




স্বপ্নের  
ফিমা



আকরাম ফারুক

# হাদীসের কিস্সা

আকরাম ফারুক

প্রত্যয় প্রকাশনী

**প্রকাশক**

মু. আতাউর রহমান সরকার

প্রত্যয় প্রকাশনী

মোবাইল : ০১৮৩১১৫২৪৭০

**প্রকাশকাল**

সর্বশেষ প্রকাশ : এপ্রিল ২০১৯

**কম্পিউটার কম্পোজ**

আসমা এন্ড কাইফ কম্পিউটার

মগবাজার, ঢাকা

**প্রচ্ছদ : সাঈদ**


**মুদ্রণ**

আল-ফালাহ প্রিন্টিং প্রেস

৪২৩ বড় মগবাজার, ঢাকা-১২১৭

ফোন : ৯৩৪৫৭৪১, ৯৩৫৮৪৩২

**মূল্য : ১৮০ টাকা মাত্র**





আব্লাহ রাক্বুল আলামীন তার বান্দাদের শিক্ষা দেবার জন্য দু'ধরনের নিদর্শন রেখেছেন । ১. ঐতিহাসিক নিদর্শন । ২. প্রাকৃতিক নিদর্শন । আর সেই ঐতিহাসিক নিদর্শন জানার দুটি নির্ভরযোগ্য মাধ্যম আল কুরআন ও সুন্নাহ । স্বনামধন্য লেখক আকরাম ফারুক রচিত 'হাদীসের কিস্সা' বইটি সেই সকল ঐতিহাসিক নিদর্শনেরই অনবদ্য সংকলন । বিশেষত বিগুঞ্জ হাদীস সূত্রে প্রাপ্ত এই সকল সত্য ঘটনাবলী প্রাজ্ঞল ভাষায় তিনি এই বইটিতে লিপিবদ্ধ করেছেন । শিশু বা কিশোর সাহিত্য হিসেবে বইটি ব্যাপকভাবে সমাদৃত হয়েছে । শুধু তাই নয় সর্বমহলে প্রশংসিত এই বইটি সব বয়স, সকল শ্রেণীর পাঠকের অন্তরের তৃপ্তি মিটিয়েছে ।

ইতিপূর্বে স্মৃতি প্রকাশনীর উদ্যোগে প্রথমে খণ্ড খণ্ড করে এবং পরবর্তীতে (১-৪)খণ্ড একত্রিত করে বইটি প্রকাশিত হয়েছে ।

পারিবারিক উদ্যোগে প্রথমবারের মতো 'প্রত্যয় প্রকাশনী' এই বইটি প্রকাশ করতে যাচ্ছে । সমাজের প্রচলিত অনৈতিকতার স্রোতে 'হাদীসের কিস্সা' বইটি নিঃসন্দেহে শিশু-কিশোরদের নৈতিক মূল্যবোধ ও মানবিক উৎকর্ষতা সাধনে এক নতুন জোয়ার সৃষ্টি করবে ।

মরহুম লেখকের এই অনবদ্য গ্রন্থটি যে ব্যাপক দাওয়াতী উদ্দীপনা সৃষ্টি করে সেই প্রচেষ্টায় নিজেদের शामिल করতে পেরে আব্লাহর শুকরিয়া আদায় করছি ।

সেইসাথে প্রথমবারের মতো প্রকাশ করার কারণে কিছু ভুলত্রুটি থেকে যেতে পারে । সেজন্য সকলের পরামর্শ ও ক্ষমা সুন্দর দৃষ্টি আশা করছি । পরবর্তী সংস্করণে নির্ভুলভাবে বইটি প্রকাশ করার আশাবাদ ব্যক্ত করছি । মহান রাক্বুল আলামীন লেখকের এই মহৎ কাজটি কবুল করুন । তাঁকে ও আমাদেরকে দুনিয়া ও আখিরাতের কল্যাণ দান করুন । আমীন ।

**মু. আতাউর রহমান সরকার**  
প্রত্যয় প্রকাশনী  
বড় মগবাজার, ঢাকা



# অভিমান

লেখকদের একান্তিক সীতা, একাত্তর স্রীর জালালাবাদ হাজরা তাই  
 কই। কিন্তু কিছু বই পড়কের মনে এমন অনুভূতি জেগে উঠে যেন পড়  
 কারবার সময়ের কোরান জগতে এই বইয়ের কাছেই যিরে আসবে।  
 'হাদীসের কিসসা' এছাড়া প্রখ্যাত ইসলামিক লিটারেচার ও শ্রেষ্ঠ অনুবাদকের  
 উপাধিতে ভূষিত লেখক আব্বাস কাসিমের তেমনই একটি অমর সৃষ্টি  
 বইটির 'সহীহ হাদীস' মুহে শাওয়া নবী-রাসূল ও সাহাবীদের  
 কিসসাগুলো চমৎকারভাবে লেখক তুলে ধরেছেন। এছাড়া বইটির অন্ত  
 বেশিটা হলো প্রতিটি কিসসা থেকে লেখক শিক্ষাগুলোকে স্পষ্টভাবে  
 তুলে ধরেছেন যা পাঠকদের মনে আলোড়ন সৃষ্টি করে। বইটি তার  
 কিশাভীর বৈচিত্র্য ও সহজ, প্রাঞ্জল, উপভোগ্য ভাষায় কারণে ইতিপূর্বে  
 বেশ কিছু অভিমানের পাঠ্য হিসেবে অন্তর্ভুক্ত হয়েছে।

কিসসাগুলো একমুহুরে যেমন শিশু-কিশোরদের আকর্ষণ করে তাদের  
 পরিচয় তুলে ধরেছে তেমনই সর্বা-রাসূলদের সাহাবীদের জীবনের  
 মাধ্যমে ইসলামী নৈতিক চরিত্রের একটি চমৎকার বার্তাও তুলে ধরেছে  
 যা শিশু-কিশোরদের মনে নৈতিক মূল্যবোধের চরম উপভোগ্য সঞ্চার  
 করে। কিশোর বয়স থেকেই তাকে আদর্শ মুসলিম ও আদর্শ মানুষ  
 হিসেবে গড়ে তোলে। মানুষ পৃথিবী থেকে বিনায় বের। কিন্তু তার কর্ম  
 জীবন পৃথিবীতে সঞ্চারিত করে। তার নৈতিক আয়তনের পরিমাণ তন্নী করে।  
 লেখক সুবিধা থেকে বিচারে নিলেও তার মহৎ কর্ম-কুল ফুল হয়ে বিশ্বপার  
 মুকবলে ইসলামের আলোয় আলোকিত করছে।

প্রত্যেক একমুহুরী করুন আলিফে বইটি প্রকাশ করার উদ্যোগ নিয়েছে।  
 যে লক্ষ্য করেই পড়াশুনা। আল্লাহ তাদের এই প্রচেষ্টা কবুল করুন।

আমরা করছি বইটি ছাপার পত্রক সমাজেরাধ্যক্ষদের পৌছে যাবে  
 সহজ করে। আল্লাহ লেখক ও বইটি প্রকাশকদের মাঝে প্রতিষ্ঠিত করুন  
 হাদীসের উন্নয়ন জন্য মান করুন এবং এই হাদীসকে আরোও বেশি  
 পরিচয় দিন। আমীন।



আলোনা কলিকাতা  
 (মেমোরিাল সাহাবীয়া)  
 ২০১৩  
 কলিকাতা, দক্ষিণবান, ঢাকা

কিসসা কাহিনী ও গল্প বলা আবহমানকাল থেকেই শিক্ষার একটি উৎকৃষ্ট মাধ্যম হিসেবে স্বীকৃতি পেয়ে আসছে। নৈতিক অথবা নৈতিকতা বিরোধী— যে বিষয়েই মানুষকে প্রেরণা দান ও উদ্বুদ্ধকরণের আকাঙ্ক্ষা পোষণ করা হোক না কেন, কিসসা কাহিনীর মাধ্যমে তা সর্বোত্তম পর্যায়ে করা সম্ভব। সর্বশ্রেণীর মানুষকে, বিশেষতঃ শিশুদেরকে নৈতিক শিক্ষা দানের জন্য অতীত কিংবা বর্তমানের সর্বজনমান্য ব্যক্তিবর্গের জীবনী, ঘটনাবলী ও শিক্ষামূলক গল্প কাহিনী শোনানো ও প্রাঞ্জল ভাষায় লিখিত বই পড়তে দেয়া খুবই ফলদায়ক হয়ে থাকে।

মানব মনের এই স্বভাবগত ঝোঁক ও আগ্রহের পরিপ্রেক্ষিতেই অধিকাংশ ধর্মগ্রন্থের বিরাট অংশ জুড়ে ইতিহাস ও ঘটনাবলী সন্নিবেশিত হতে দেখা যায়। মহাগ্রন্থ আল কুরআন এবং হাদীস গ্রন্থসমূহও বহুলাংশে ইতিহাস ও কিসসা কাহিনীতে পরিপূর্ণ। কুরআনের এই ইতিহাস অংশ আলাদাভাবে ‘কাসাসুল কুরআন’ নামে বিভিন্ন ভাষায় রচিত ও অনুদিত হয়েছে। কিন্তু হাদীসের কিসসা-কাহিনী ও ইতিহাস সম্বলিত অংশ বিশেষতঃ রাসূল (সা.)-এরপূর্ববর্তী সময়কার ঘটনাবলী আলাদাভাবে বই আকারে সংকলিত হয়েছে বলে আমার জানা নেই। অথচ এই ঘটনাবলী সর্বশ্রেণীর মানুষের জন্য অত্যন্ত উপকারী প্রমাণিত হতে পারে।

‘হাদীসের কিসসা’ নামে হাদীসে বর্ণিত ঘটনাবলীর এই ক্ষুদ্র সংকলনটি রচনার পটভূমি এটাই। কিসসাসুলো বিশুদ্ধ হাদীস থেকে সংগ্রহ করার যথাসাধ্য চেষ্টা করা হয়েছে। ‘হাদীসের কিসসা’ সর্বস্তরের মানুষ বিশেষত শিশু-কিশোরদেরনিকট ইসলামের শিক্ষা বিস্তারের মহৎ উদ্দেশ্য নিয়েই রচিত। আল্লাহ এ উদ্দেশ্য সফল করুন, এটাই তার দরবারে আমার সর্করণ প্রার্থনা।

আকরাম ফারুক,  
ফায়দাবাদ, আয়মপুর, ঢাকা  
০১-০৯-১৯৯৩



১।	বিশ্বনবীর একটি স্বপ্ন	৯
২।	মিরাজের ঘটনা	১২
৩।	মুমিনের সবচেয়ে বড় হাতিয়ার আল্লাহর ওপর নির্ভরশীলতা	১৬
৪।	মহানবীর আখলাক	১৭
৫।	খলিফার আখলাক	১৮
৬।	হযরত আবু বকরের খোদাভীতি	২০
৭।	হযরত আবু বকরের (রা.) জনসেবা	২১
৮।	হযরত আবু বকরের (রা.) অনুশোচনা	২২
৯।	ব্যক্তি স্বাধীনতা ও বাক স্বাধীনতা	২৩
১০।	হযরত ওমর (রা.) এর ইসলাম গ্রহণ	২৪
১১।	স্বামী-স্ত্রীর আচরণে সহনশীলতা	৩২
১২।	রাসূলের সিদ্ধান্ত প্রত্যাখ্যানকারী এক মুরতাদের শাস্তি	৩৩
১৩।	জাবালার ঔদ্ধত্য ও হযরত ওমর (রা.)	৩৫
১৪।	হযরত খাব্বাব (রা.) এর ত্যাগ ও কুরবানি	৩৬
১৫।	হযরত ওমরের (রা.) শাসনে প্রজাদের সম-অধিকার	৩৮
১৬।	হযরত ওমর (রা.) ও গভর্নর হরমুযান	৩৯
১৭।	হযরত ওমরের (রা.) ন্যায় বিচারের আর একটি উদাহরণ	৪১
১৮।	হযরত ওমর কর্তৃক স্বীয় পুত্রের বিচার	৪১
১৯।	সততার পুরস্কার	৪২
২০।	কায়ী গুরাইহের ন্যায় বিচার	৪৩
২১।	হযরত উসমানের দানশীলতা ও মিতব্যয়িতা	৪৭
২২।	সাতশো গুণ লাভ	৪৯
২৩।	হযরত আলীর (রা.) খোদাভীতি	৫০
২৪।	অধিক সম্পদের মোহ ও কৃপণতার পরিণাম	৫০

২৫।	হযরত আবুযার গিফারীর ইসলাম গ্রহণ	৫৩
২৬।	পিতামাতাকে অসন্তুষ্ট করার পরিণাম	৫৪
২৭।	কুরাইশ নেতাগণের গোপনে রাসূলুল্লাহর কুরআন পাঠ শ্রবণ	৫৬
২৮।	তারুক অভিযানে অনুপস্থিত তিন সাহাবীর তওবার কাহিনী	৫৮
২৯।	হযরত সালমান ফারসির ইসলাম গ্রহণ	৬৪
৩০।	মিথ্যা সকল পাপের জননী	৬৮
৩১।	মসজিদে যেরারের ঘটনা	৬৯
৩২।	মানুষের পরিণাম তার শেষ কর্মের ওপর নির্ভরশীল	৭১
৩৩।	বিনা তদন্তে কারো সম্পর্কে খারাপ ধারণা পোষণ ও অপপ্রচার	৭২
৩৪।	বদর যুদ্ধাদের মর্যাদা	৭৫
৩৫।	সুরাকার বিবেক জেগে উঠলো	৭৮
৩৬।	হযরত খুবাইবের শাহাদাত	৭৯
৩৭।	আবু জাহলের যুলুম প্রতিরোধে রাসূলুল্লাহ (সা.)	৮২
৩৮।	বীরে মাউনার হৃদয় বিদারক ঘটনা	৮৩
৩৯।	মুমিনের নামায	৮৪
৪০।	মুমিনের আতিথেয়তা	৮৬
৪১।	মুমিনের আত্মসংযম	৮৬
৪২।	মুমিনের আত্মসমালোচনা	৮৭
৪৩।	ক্ষুধা ও দারিদ্র্যের অগ্নিপরীক্ষায় মুমিনের দৃঢ়তা	৮৮
৪৪।	কুফরীর আশুকুঁড়ে ঈমানের রক্ত গোলাপ	৯০
৪৫।	ভিক্ষাবৃত্তি একটি কলঙ্ক	৯২
৪৬।	পরোপকারী মানুষই শ্রেষ্ঠ মানুষ	৯৩
৪৭।	মোনাফেকীর পরিণাম	৯৩
৪৮।	রাখাল ছেলের খোদাভীক্তি	৯৭
৪৯।	প্রিয় বস্তুকে আল্লাহর পথে দান করা	৯৭
৫০।	একটি নাকের মূল্য	৯৮
৫১।	পশুপাখির প্রতি দয়া মুমিনের কর্তব্য	১০১
৫২।	খোদাভীর সাহাবীর অলৌকিকভাবে জীবন রক্ষা	১০২
৫৩।	ওমর ইবনে আব্দুল আযীযের ন্যায়বিচার	১০৪
৫৪।	বাইতুল মাকদাস বিজয়ী হযরত ইউশা ইবনে নূনের কাহিনী	১০৪
৫৫।	হযরত উরুগ্গা ইবনে যুবাইরের পরহেজগারী ও কৃতজ্ঞতা	১০৭
৫৬।	ইমাম আবু হানিফার মহানুভবতা	১০৮
৫৭।	ইমাম আবু হানিফা ও নাস্তিক	১০৯
৫৮।	কে বেশি দানশীল	১১১
৫৯।	একজন আরব শেখের মহানুভবতা	১১১
৬০।	দুঃসাহসী বীর বিশ্বাসিন আমরের ইসলাম গ্রহণের কাহিনী	১১৩



৬১। হযরত যুলকিফলের ক্রোধ সংবরণ	১১৬
৬২। মুক্তির জন্য নিজের সৎলোক হওয়াই যথেষ্ট নয়	১১৭
৬৩। মসজিদুল আকসা নির্মাণের ঘটনা	১১৮
৬৪। হযরত উযাইর (আ.) এর কাহিনী	১২০
৬৫। কাদেরিয়ার এক দুর্ধর্ষ বীরের কাহিনী	১২১
৬৬। কে ধনী, কে গরীব	১২৩
৬৭। উম্মে সুলাইমের দেন মোহর	১২৪
৬৮। অকৃতজ্ঞতার পরিণাম	১২৭
৬৯। আসহাবুল উখদুদের ঘটনা	১২৯
৭০। সততার এক নজীরবিহীন দৃষ্টান্ত	১৩৩
৭১। তওবার মহিমা	১৩৫
৭২। আল্লাহর পথে দানের মাহাত্ম্য	১৩৬
৭৩। নিজের ক্ষতি স্বীকার করে পরোপকার	১৩৭
৭৪। ওয়াদামত ঋণ পরিশোধের গুরুত্ব	১৩৯
৭৫। অপাত্রে দান	১৪১
৭৬। অন্যায়ের প্রতিরোধ	১৪১
৭৭। তিনজন মুসাফির	১৪২
৭৮। লুকমান হাকীমের কিসসা	১৪৫
৭৯। নামায সংক্রান্ত কয়েকটি ঘটনা	১৪৯
৮০। উদ্যানের মালিকদের ঘটনা	১৫০
৮১। আল্লাহর প্রিয় বান্দাদের বিরুদ্ধে শত্রুতার পরিণাম	১৫২
৮২। হযরত আইয়ুব (আ.) এর অগ্নিপরীক্ষা	১৫৫
৮৩। হযরত ঈসা (আ.) ও দাঙ্গিক দরবেশ	১৫৭
৮৪। হযরত ঈশা (আ.), তিন সহচর ও স্বর্ণের ইট	১৫৮
৮৫। হযরত ইবরাহীম (আ.) ও বিবি সারার ঘটনা	১৬০
৮৬। হযরত ইবরাহীম (আ.) ও ভিক্ষুক	১৬১
৮৭। হযরত ইবরাহীম (আ.) ও তদীয় পরিবারের মক্কায় পুনর্বাসন	১৬২
৮৮। হযরত মুসা (আ.) ও পানির বোতল	১৬৫
৮৯। হযরত মুসা (আ.) ও খিজির (আ.) এর সফর	১৬৭
৯০। হযরত মুসা (আ.) ও ইসতিসকার নামায	১৬৯
৯১। হযরত খিজিরের (আ.) বদাণ্যতা	১৭০
৯২। শাদাদের বেহেশতের কাহিনী	১৭৪
৯৩। হযরত ঈসা (আ.) এর উম্মতের এক দরবেশের কাহিনী	১৭৭
৯৪। হযরত সোলাইমান (আ.) এর ন্যায়বিচার	১৮০
৯৫। হযরত ইউনুস (আ.) এর কাহিনী	১৮১
৯৬। উয়াইস কারণীর ঘটনা	১৮৩

## ১. বিশ্বনবীর একটি স্বপ্ন

হযরত রাসূলুল্লাহ সাল্লাল্লাহু আলাইহি ওয়াসাল্লামের রীতি ছিল এই যে, প্রতিদিন ফজরের নামাজের পর সাহাবীদের দিকে মুখ করে বসতেন এবং কেউ কোন স্বপ্ন দেখেছে কিনা বা কারো কিছু জিজ্ঞেস করার আছে কিনা জানতে চাইতেন। কেউ কিছু জানতে চাইলে তিনি তাকে যথাযথ পরামর্শ দিতেন।

একদিন এরূপ জিজ্ঞেস করার পর কেউ কিছু বলছে না দেখে তিনি নিজেই বলতে আরম্ভ করলেন। আজ আমি একটি অতি সুন্দর ও আশ্চর্য স্বপ্ন দেখেছি। দেখলাম, দুই ব্যক্তি আমার কাছে এসে আমার হাত ধরে আমাকে এক পবিত্র স্থানের দিকে নিয়ে চলল। কিছুদূর গিয়ে দেখলাম, এক ব্যক্তি বসে আছে আর অপর এক ব্যক্তি তার কাছে দাঁড়িয়ে আছে। দাঁড়ানো লোকটির হাতে একখানা করাতের মতো অস্ত্র রয়েছে। সেই করাত দিয়ে সে বসা লোকটির মাথা চিরে ফেলছে। একবার মুখের দিকে করাত ঢুকিয়ে দিয়ে মাথার দিকে কেটে ফেলছে। আবার বিপরীত দিক দিয়েও তদ্রূপ করছে। একদিক দিয়ে কাটার পর যখন অপর দিক দিয়ে কাটতে যায়, তখন আগের দিক জোড়া লেগে স্বাভাবিক হয়ে যায়। এ অবস্থা দেখে আমি আমার সঙ্গীদ্বয়কে জিজ্ঞেস করলাম, এ কি ব্যাপার? তারা বলল, সামনে চলুন।

কিছুদূর গিয়ে দেখলাম, একজন লোক শুয়ে আছে। অপর একজন একটি ভারী পাথর নিয়ে তার কাছে দাঁড়িয়ে আছে। দাঁড়ানো লোকটি ঐ পাথরের আঘাতে শোয়া লোকটির মাথা চূর্ণবিচূর্ণ করে দিচ্ছে। পাথরটি সে এতো জোরে মারে যে, মাথাকে চূর্ণবিচূর্ণ করে তা অনেক

দূরে গিয়ে ছিটকে পড়ে। অতঃপর লোকটি যেই পাথর কুড়িয়ে আনতে যায়, অমনি ভাঙা মাথা জোড়া লেগে ভালো হয়ে যায়। সে ঐ পাথর কুড়িয়ে এনে পুনরায় মাথায় আঘাত করে এবং মাথা আবার চূর্ণবিচূর্ণ হয়ে যায়। এইভাবে ক্রমাগত ভাঙা ও জোড়া লাগার পর্ব চলছে। এই লোমহর্ষক দৃশ্য দেখে আমি আতঙ্কিত হয়ে জিজ্ঞেস করলাম, ব্যাপারটা কি আমাকে খুলে বলুন। তারা কোনো জবাব না দিয়ে পুনরায় বললেন, আগে চলুন। কিছুদূর এগিয়ে গিয়ে দেখি, একটি প্রকাণ্ড গর্ত। গর্তটির মুখ সরু, কিন্তু অভ্যন্তর ভাগ অত্যন্ত গভীর ও প্রশস্ত। এ যেন একটি জ্বলন্ত চুলো, যার ভেতরে দাঁউ দাঁউ করে আগুন জ্বলছে। আর তার ভেতরে বহু সংখ্যক নর-নারীর দক্ষীভূত হচ্ছে। আগুনের তেজ এত বেশি যেন তাতে ঢেউ খেলছে। ঢেউয়ের সাথে যখন আগুন উঁচু হয়ে ওঠে, তখন ঐ লোকগুলো উঠলে গর্তের মুখের কাছে চলে আসে। আবার যেই আগুন নিচে নেমে যায়, অমনি তারাও সাথে সাথে নিচে নেমে যায়। আমি আতঙ্কিত হয়ে সঙ্গীদ্বয়কে বললাম, বন্ধুগণ! এবার আমাকে বলুন ব্যাপারটা কি? কিন্তু এবারও তারা কোনো জবাব না দিয়ে বললেন, আগে চলুন।

আমরা সামনে এগুতে লাগলাম। কিছুদূর গিয়ে দেখলাম, একটি রক্তের নদী বয়ে চলছে। তীরে একটি লোক দাঁড়িয়ে তার কাছে স্থপীকৃত রয়েছে কিছু পাথর। নদীর মধ্যে একটি লোক হাবুড়বু খেয়ে অতি কষ্টে কিনারের দিকে আসার চেষ্টা করছে। কিনারের কাছাকাছি আসা মাত্রই তীরবর্তী লোকটি তার মুখে এত জোরে পাথর ছুঁড়ে মারছে যে, সে আবার নদীর মাঝখানে চলে যাচ্ছে। এভাবে ক্রমাগত তার হাবুড়বু খেতে খেতে কূলে আসার এবং কূল থেকে পাথর মেরে তাকে মাঝ নদীতে হটিয়ে দেয়ার কার্যক্রম চলছে। এমন নির্মম আচরণ দেখে আমি স্তম্ভিত হয়ে আমার সঙ্গীদের বললাম, বলুন, এ কি ব্যাপার? কিন্তু এবারও তারা জবাব না দিয়ে বললেন, সামনে চলুন।

আমরা আবার এগুতে লাগলাম। কিছুদূর গিয়ে দেখলাম একটি সুন্দর সবুজ উদ্যান। উদ্যানের মাঝখানে একটি উঁচু গাছ। তার নিচে একজন বৃদ্ধ লোক বসে আছে। বৃদ্ধকে বেঁটন করে বসে আছে বহুসংখ্যক বালক-বালিকা। গাছের অপর পাশে আরো এক ব্যক্তি বসে রয়েছে। তার সামনে আগুন জ্বলছে। ঐ লোকটি আগুনের মাত্রা বাড়িয়ে চলেছে। সঙ্গীদ্বয় আমাকে গাছে উঠালেন। গাছের মাঝখানে গিয়ে দেখলাম একটা মনোরম প্রাসাদ। এত সুন্দর ভবন আমি আর কখনো দেখিনি। ঐ ভবনে বালক-বালিকা ও স্ত্রী-পুরুষ সকল শ্রেণির মানুষ বিদ্যমান। সঙ্গীদ্বয় আমাকে আরো ওপরে নিয়ে গেলেন। সেখানে আরো একটি

মনোরম গৃহ দেখতে পেলাম। তার ভেতরে দেখলাম শুধু কিছু সংখ্যক যুবক ও বৃদ্ধ উপস্থিত। আমি সঙ্গীদ্বয়কে বললাম, আপনারা আমাকে নানা জায়গা ঘুরিয়ে অনেক কিছু দেখালেন। এবার এ সবে রহস্য আমাকে খুলে বলুন।

সঙ্গীদ্বয় বলতে লাগলেন, প্রথম যে লোকটির মাথা করাত দিয়ে চোরাই করতে দেখলেন, তার মিথ্যা বলার অভ্যাস ছিল। সে যে সব মিথ্যা রটাতো, তা সমগ্র সমাজে প্রসিদ্ধ হয়ে যেত। কিয়ামত পর্যন্ত তার এরূপ শাস্তি হতে থাকবে।

তারপর যার মাথা পাথরের আঘাতে চূর্ণবিচূর্ণ হতে দেখলেন, সে ছিল একজন মস্ত বড় আলেম। নিজে কুরআন হাদীস শিখেছিল, কিন্তু তা অন্যকে শিখায়নি এবং নিজেও তদনুসারে আমল করেনি। হাশরের দিন পর্যন্ত তার এ রকম শাস্তি হতে থাকবে।

তারপর যাদেরকে আগুনের বন্ধ চুলোয় জ্বলতে দেখলেন তারা ব্যভিচারী নারী ও পুরুষ। কিয়ামত পর্যন্ত তাদের এই আযাব চলতে থাকবে।

রক্তের নদীতে হাবুড়ুবু খাওয়া লোকটি দুনিয়ায় সুদ ও ঘুস খেত এবং এতিম ও বিধবার সম্পদ আত্মসাৎ করত।

গাছের নিচে যে বৃদ্ধকে বালক-বালিকা বেষ্টিত দেখলেন, উনি হযরত ইবরাহীম (আ.) এবং বালক-বালিকা হচ্ছে নাবালক অবস্থায় মৃত ছেলেমেয়ে। আর যাকে আগুন জ্বালাতে দেখলেন, তিনি দোষখের দারোগা মালেক। গাছের ওপর প্রথম যে ভবনটি দেখেছেন, ওটা সাধারণ ঈমানদারদের বেহেস্তের বাড়িঘর। আর দ্বিতীয় যে প্রাসাদটি দেখেছেন, তা হচ্ছে ইসলামের জন্য আত্মদানকারী শহীদদের বাসস্থান। আর আমি জিবরীল এবং আমার সঙ্গী ইনি মিকাইল। অতঃপর জিবরীল আমাকে বললেন, ওপরের দিকে তাকান। আমি ওপরের দিকে তাকিয়ে একখণ্ড সাদা মেঘের মতো দেখলাম। জিবরীল বললেন, ওটা আপনার বাসস্থান। আমি বললাম, আমাকে ঐ বাড়িতে যেতে দিন। জিবরীল বললেন, এখনও সময় হয়নি। পৃথিবীতে এখনো আপনার আয়ুষ্কাল বাকি রয়েছে। দুনিয়ার জীবন শেষ হলে আপনি ওখানে যাবেন।

শিক্ষা : এ হাদীসটিতে রাসূল (সা.) কে স্বপ্নের মাধ্যমে বিভিন্ন অপরাধের পরকালীন শাস্তির নমুনা দেখানোর বিবরণ রয়েছে। নবীদের স্বপ্ন ওহীর অন্তর্ভুক্ত এবং অকাটা সত্য। সুতরাং এ শাস্তির ব্যাপারে আমাদের সুদৃঢ় ঈমান রাখা এবং এগুলোকে স্মরণে রেখে এসব অপরাধ থেকে নিবৃত্ত থাকা উচিত। বিশেষত এমন কয়েকটি অপরাধের ওপর এখানে আলোকপাত করা হয়েছে, যা সামাজিক অপরাধের পর্যায়ভুক্ত। অর্থাৎ যা গোটা সমাজকে অন্যায় ও অনাচারের কবলে

নিষ্ক্ষেপ করে। যেমন মিথ্যাচার, সুদ, ঘুষ ও পরের অর্থ আত্মসাৎ করা এবং ইসলামের প্রত্যক্ষ জ্ঞান থাকা সত্ত্বেও তা প্রচারে বিমুখ হওয়া ও সে অনুসারে আমল না করা। একজন মিথ্যাবাদী যেমন মিথ্যা গুজব, অপবাদ ও কুৎসা রটিয়ে জনমতকে বিভ্রান্ত, বিপথগামী ও গোটা দেশবাসীকে অন্যায় সিদ্ধান্ত গ্রহণে প্ররোচিত করে থাকে। একজন আলেম তেমনি তার নিক্রীয়তা ও বদ আমলী দ্বারা অন্য যে কোনো খারাপ লোকের চেয়ে সমাজকে অধিকতর অপকর্মে প্ররোচিত করে থাকে। আর পরের সম্পদ আত্মসাৎকারী এবং সুদখোর ও ঘুষখোর যে গোটা সমাজকে কিভাবে জুলুম, নিপীড়ন ও শোষণ করে তা ব্যাখ্যার অপেক্ষা রাখে না।

## ২. মিরাজের ঘটনা

মিরাজ হচ্ছে রাসূলুল্লাহ সাল্লাল্লাহু আলাইহি ওয়াসাল্লামের জীবনের সবচেয়ে বিস্ময়কর, অলৌকিক ও শিক্ষামূলক ঘটনা। রাতে সংঘটিত হওয়ায় অনেকে একে স্বপ্ন ভেবে বিভ্রান্ত হয়েছে। আসলে এটি একটি বাস্তব ঘটনা। রাসূল (সা.) সম্পূর্ণ জাগ্রত ও সচেতন অবস্থায় ফেরেশতাদের সাহচর্যে মক্কা শরীফ থেকে প্রথমে বাইতুল মাকদাস এবং পরে সেখান থেকে সাত আসমান ও তারও উর্ধ্বের জগত পরিভ্রমণ করেন। এই ঘটনা সম্পর্কে নিম্নে সহীহ বুখারী ও মুসলিম শরীফের বর্ণনাসমূহের সমন্বিত বিবরণ উদ্ধৃত করা হচ্ছে।

রাসূলুল্লাহ সাল্লাল্লাহু আলাইহি ওয়াসাল্লাম একদিন সকালে সাহাবায়ে কেরামের মজলিসে বললেন, 'গত রাতে আমার প্রতিপালক আমাকে বিশেষ সম্মানে ভূষিত করেছেন। গত রাতে আমি যখন মসজিদুল হারামে ঘুমিয়ে ছিলাম, তখন তিনজন ফেরেশতা আমার কাছে আসলেন। তারা আমাকে জাগিয়ে আমাকে তুলে নিয়ে যমযম কূয়ার নিকট রাখলেন। অতঃপর জিবরীল আমার গলা থেকে বুক পর্যন্ত চিরে ফেললেন এবং আমার বুক ও পেটের ভেতর থেকে সমুদয় বস্তু বের করলেন। তারপর নিজ হাতে যমযমের পানি দ্বারা ধুয়ে আমার পেট পবিত্র করলেন। অতঃপর একটি সোনার পাত্র আনা হলো। ঐ পাত্র

থেকে ঈমান ও হিকমত নিয়ে বুক ও গলার ধমনীগুলো পূর্ণ করলেন এবং জোড়া লাগিয়ে দিলেন । অতঃপর আমাকে মসজিদুল হারামের দরজায় আনা হলো । সেখানে জিবরীল আমাকে বহন করে নেয়ার জন্য খচর সদৃশ বোরাক নামক একটি জন্তু পেশ করলেন । জন্তুটি ছিল শ্বেত বর্ণের । আমি যখন তাতে আরোহণ করলাম, তখন তা এত দ্রুতগতিতে চলতে লাগল যে, তার পেছনের পা দু'টি যে স্থানে স্পর্শ করে, সেখান থেকে সামনের পা যেখানে পড়ে তার দূরত্ব দৃষ্টি সীমার দূরত্বের সমান । এভাবে তা আমাকে বিদ্যুৎবেগে নিয়ে বাইতুল মাকদাসে গিয়ে উপনীত হলো । এখানে জিবরীলের ইঙ্গিতে বোরাকটিকে মসজিদুল আকসার দরজার কাছে একটি বিশেষ জায়গায় বেঁধে রাখা হলো । বনী ইসরাইলের নবীগণ এই মসজিদে নামায পড়তে এসে তাদের বাহনকে ঐ জায়গায় বেঁধে রাখতেন ।

অতঃপর আমি মসজিদুল আকসার ভিতরে প্রবেশ করে দু'রাকাত নামায পড়লাম । কোনো কোনো বর্ণনা অনুসারে, পূর্ববর্তী সকল নবীগণের ইমাম হয়ে জামায়াতে নামায পড়লাম । তারপর সেখান থেকে উর্ধ্বজগতে আরোহনের প্রস্তুতি শুরু হলো । প্রথমে জিবরীল আমার সামনে দু'টি পেয়ালা পেশ করলেন । এর একটিতে দুধ ও অপরটিতে মদ ছিল । আমি দুধের পেয়ালা গ্রহণ করলাম এবং মদের পেয়ালা ফেরত দিলাম । তা দেখে জিবরীল বললেন, আপনি দুধের পেয়ালা গ্রহণ করে স্বাভাবিক দ্বীনকে গ্রহণ করেছেন । অতঃপর উর্ধ্বজগতের ভ্রমণ শুরু হলো । আমাকে ও জিবরীলকে নিয়ে বোরাক আকাশের দিকে উড়ে চলল । আমরা প্রথম আসমানে পৌঁছলে জিবরীল দ্বাররক্ষী ফেরেশতাদেরকে দরজা খুলে দিতে বললেন । রক্ষী ফেরেশতারা জিজ্ঞেস করলেন, কে? জিবরীল উত্তর দিলেন, আমি জিবরীল । ফেরেশতারা জিজ্ঞেস করলেন, কে? জিবরীল উত্তর দিলেন, আমি জিবরীল । ফেরেশতারা জিজ্ঞেস করলেন, আপনার সঙ্গে কে? জিবরীল উত্তর দিলেন, মুহাম্মদ সাল্লাল্লাহু আলাইহি ওয়াসাল্লাম । ফেরেশতারা পুনরায় জিজ্ঞেস করলেন, তিনি কি আল্লাহ তায়ালার নিমন্ত্রণ পেয়ে এসেছেন? জিবরীল বললেন, অবশ্যই । ফেরেশতারা দরজা খুলতে খুলতে বললেন, এমন ব্যক্তির আগমন মোবারক হোক । আমরা যখন প্রথম আকাশে প্রবেশ করলাম, প্রথমই হযরত আদম (আ.) এর সাথে দেখা হলো । জিবরীল আমাকে বললেন, ইনি আপনার পিতা আদম আলাইহিস সালাম । আমি তাঁকে সালাম করলাম । তিনি আমার সালামের উত্তর দিয়ে বললেন, স্বাগত, হে সম্মানিত পুত্র ও সম্মানিত নবী । অতঃপর দ্বিতীয় আসমান পর্যন্ত পৌঁছলাম ।

এখানে প্রথম আসমানের মতো প্রশ্নোত্তরের পালা অতিক্রম করে দরজা দিয়ে প্রবেশ করলাম। সেখানে হযরত ইয়াহিয়া ও ঈসা (আ.) এর সাথে সাক্ষাত হলো। জিবরীল আমাকে তাঁদের উভয়ের সাথে পরিচয় করিয়ে দিলেন এবং বললেন, আপনিই আগে সালাম করুন। আমি সালাম করলে তাঁরা উত্তর দিয়ে বললেন, 'স্বাগত, হে সম্মানিত ভাই এবং সম্মানিত নবী।' অতঃপর তৃতীয় আসমানে পৌঁছলে পূর্বের মতো ঘটনাই ঘটল এবং সেখানে হযরত ইউসুফ আলাইহিস সালামের সাথে সাক্ষাত হলো। জিবরীল আমাকে বললেন, আপনিই আগে সালাম করুন। আমি সালাম করলে ইউসুফ (আ.) সালামের জবাব দিয়ে বললেন, 'স্বাগতম, হে সম্মানিত ভাই এবং সম্মানিত নবী।' অতঃপর চতুর্থ আসমানে একই রকমের প্রশ্নোত্তরের পর্ব অতিক্রম করে হযরত ইদরিস আলাইহিস সালামের সাথে সাক্ষাত হলো। অতঃপর পঞ্চম আসমানে হযরত হারুন আলাইহিস সালাম এবং ষষ্ঠ আসমানে হযরত মুসা (আ.)-এর সাথে একইভাবে সাক্ষাত অনুষ্ঠিত হলো। কিন্তু হযরত মুসার (আ.) কাছ থেকে বিদায় নেয়ার সময় তাঁর চোখ অশ্রুসিক্ত হয়ে উঠল। আমি কারণ জিজ্ঞেস করলে তিনি বললেন, আপনার এই অসাধারণ মর্যাদার জন্য আমার ঈর্ষা হচ্ছে যে, আপনার উম্মত আমার উম্মতের তুলনায় বহুগুণ বেশি বেহেশতবাসী হবে। অতঃপর পূর্বোক্ত প্রশ্নোত্তর পর্ব অতিক্রম করে আমরা যখন সপ্তম আকাশে পৌঁছলাম, তখন সেখানে হযরত ইবরাহীম আলাইহিস সালামের সাথে সাক্ষাত হলো। তিনি সেখানে বাইতুল মা'মুরের দেয়ালের সাথে পিঠ লাগিয়ে বসেছিলেন। এই বাইতুল মা'মুরে প্রতিদিন সত্তর হাজার নতুন নতুন ফেরেশতা প্রবেশ করেন। তিনি আমার সালামের জবাব দিয়ে বললেন, 'স্বাগত, হে আমার সম্মানিত সন্তান এবং সম্মানিত নবী।' অতঃপর সেখান থেকে আমাকে সিদরাতুল মুনতাহায় (শাব্দিক অর্থে 'সীমান্তের বরই গাছ' তবে এটি প্রকৃতপক্ষে কী গাছ, তা আল্লাহ ছাড়া আর কেউ জানে না) নিয়ে যাওয়া হলো।

অতঃপর আল্লাহ আমাকে সম্বোধন করে হুকুম দিলেন যে, আপনার ও আপনার উম্মতের ওপর ৫০ ওয়াজ্ঞ নামায ফরয করা হলো। অতঃপর আমি নিচের দিকে নামতে শুরু করলাম। পশ্চিমধ্যে হযরত মুসা (আ.) এর সাথে সাক্ষাত হলো। তিনি আমাকে জিজ্ঞেস করলেন, এই মিরাজের সফরে আপনি কি উপটোকন পেলেন? আমি বললাম, ৫০ ওয়াজ্ঞের নামায। তিনি বললেন, আপনার উম্মত এই ভারী বোঝা বহন করতে পারবে না। সুতরাং আপনি আবার ফিরে যান এবং আরো কমিয়ে দেয়ার আবেদন জানান। কেননা আমি আপনার

পূর্বে নিজের উম্মতকে পরীক্ষা করেছি। এ কথা শুনে আমি আল্লাহর দরবারে ফিরে গেলাম এবং মিনতি জানানোর পর ৫ ওয়াক্ত কমিয়ে দেয়া হলো। অতঃপর মূসার কাছে আসলে তিনি পুনরায় বললেন, এখনো অনেক বেশি রয়েছে, আবার যান এবং আরো কমিয়ে আনুন। আমি আবার গেলাম। এবারও আরো ৫ ওয়াক্ত কমানো হলো। অতঃপর মূসার পীড়াপীড়িতে আবার যাই এবং আবার ৫ ওয়াক্ত কমিয়ে আনি। এভাবে কয়েকবার গিয়ে কমাতে কমাতে যখন মাত্র ৫ ওয়াক্ত বাকি রইল, তখনও মূসা আমাকে বললেন, আমি বনী ইসরাইলের অভিজ্ঞতা থেকে বলছি, আপনার উম্মত ৫ ওয়াক্তও সহ্য করতে পারবে না। সুতরাং আবার যান এবং কমিয়ে আনুন। কেননা প্রতিবার ৫ ওয়াক্ত কমানো হয়েছে। এবার গেলেও হয়তো ৫ ওয়াক্ত কমানো হবে। তখন আমার হাতে আর কিছুই অবশিষ্ট থাকবে না। আমি এখন পুনরায় কমানোর আবেদন জানাতে লজ্জাবোধ করছি।’

বুখারী শরীফের রেওয়াজেতে আরো বলা হয়েছে যে, শেষ বারেও রাসূল (সা.) আল্লাহর কাছে যান এবং বলেন, হে প্রতিপালক! আমার উম্মতের শরীর, মন, শ্রবণশক্তি ও দৃষ্টিশক্তি খুবই দুর্বল। অতএব আমার প্রতি এ নির্দেশকে আরো হালকা করে দিন। তখন আল্লাহ তায়ালা বললেন, হে মুহাম্মদ! রাসূল (সা.) জবাব দিলেন, হে প্রভু, আমি হাযির। আল্লাহ বললেন, আমার নির্দেশের কোনো রদবদল হয় না। আমি তোমাদের প্রতি যা ফরয করেছিলাম, তা উম্মুল কিতাবে লিপিবদ্ধ আছে। প্রত্যেক সৎ কাজের নেকি দশগুণ। উম্মুল কিতাব বা লওহে মাহফুযে পঞ্চাশ ওয়াক্তই লেখা থাকল। শুধু তোমার ও তোমার উম্মতের জন্য তা ৫ ওয়াক্ত করা হলো। এরপর তিনি নেমে এলেন এবং নিজেকে জাগ্রত অবস্থায় মসজিদুল হারামে উপনীত দেখতে পেলেন।

**শিক্ষা :** মিরাজের ঘটনার শিক্ষা অনেক। এখানে তার মাত্র কয়েকটি উল্লেখযোগ্য শিক্ষা তুলে ধরছি :

১. নামায যে ইসলামী ইবাদাতগুলোর মধ্যে সবচেয়ে গুরুত্বপূর্ণ, তা এই ঘটনা থেকে দিবালোকের মতো স্পষ্ট হয়ে গেছে। আল্লাহ অন্যান্য সকল ইবাদাত ফরয করার জন্য একটি ওহী নাযিল করাই যথেষ্ট মনে করেছেন। কিন্তু নামায ফরয করার জন্য কুরআনে ১১৩ বার নির্দেশ দেয়া সত্ত্বেও তাকে যথেষ্ট মনে করেননি। বিশেষভাবে দাওয়াত দিয়ে রাসূল (সা.)-কে নিজের ঘনিষ্ঠ সান্নিধ্যে নিয়ে এই পাঁচ ওয়াক্ত নামায এমন ধারাবাহিক প্রক্রিয়ায় ফরয করলেন যে, প্রত্যেক ওয়াক্তের নামায দশটি ওয়াক্তের সমান বলে ধারণা দেয়া হলো। যাতে



এর একটি ওয়াক্তও কেউ তরক করার সাহস না করে ।

২. রাসূল (সা.) সর্বশ্রেষ্ঠ নবী হওয়া সত্ত্বেও তাঁর পূর্ববর্তী সকল নবীকে প্রথমে সালাম করেছেন । এ দ্বারা ইসলামের এই শিক্ষাই প্রতিফলিত হয়েছে যে, কোন জায়গায় আগে থেকে উপস্থিত ব্যক্তি এবং পরে আগত ব্যক্তির মধ্যে শেষোক্ত ব্যক্তিরই কর্তব্য প্রথমোক্ত ব্যক্তিকে সালাম করা, চাই মর্যাদার দিক দিয়ে যিনিই শ্রেষ্ঠ হোন না কেন ।

### ৩. মুমিনের সবচেয়ে বড় হাতিয়ার আল্লাহর ওপর নির্ভরশীলতা

হযরত জাবের থেকে বর্ণিত আছে যে, আমরা রাসূল (সা.) এর সঙ্গে যাতুর রিকাব অভিযানে গিয়েছিলাম । একটি ছায়াদার বৃক্ষ দেখে সেখানে রাসূল (সা.) বিশ্রাম করতে লাগলেন । আর আমরা কিছুদূরে অবস্থান করতে লাগলাম । সহসা শত্রুপক্ষীয় একজন মোশরেক রাসূল (সা.) এর কাছে এল । এ সময় রাসূল (সা.) ঘুমন্ত ছিলেন এবং তাঁর তরবারি গাছের সাথে ঝুলছিল । সে এসেই রাসূলুল্লাহর তরবারি হাতে নিয়ে বলল, হে মুহাম্মদ! এখন তোমাকে আমার হাত থেকে কে রক্ষা করবে? রাসূল (সা.) নির্ভীকভাবে দৃষ্ট কণ্ঠে উত্তর দিলেন, আল্লাহ । এ কথা শোনামাত্র লোকটির হাত থেকে তরবারি খসে পড়ল । অমনি রাসূল (সা.) তরবারি তুলে নিলেন । তিনি সঙ্গে সঙ্গে তাকে জিজ্ঞেস করলেন, বল, এখন কে তোমাকে আমার হাত থেকে রক্ষা করবে? সে বলল, আপনি মহানুভবতা প্রদর্শন করুন । রাসূল (সা.) বললেন, তুমি কি সাক্ষ্য দিতে প্রস্তুত আছ যে, আল্লাহ ছাড়া আর কোনো মা'বুদ নেই এবং আমি তাঁর রাসূল? সে বললেন, না । তবে আমি ওয়াদা করছি যে, আমি কখনো আপনার সাথে যুদ্ধ করব না এবং আপনার শত্রুদের সঙ্গী হয়ে যুদ্ধ করতে আসব না । রাসূল (সা.) তাকে মুক্ত করে দিলেন । সে চলে গেল । নিজ গোত্রের কাছে গিয়ে সে বলল, আমি মুহাম্মদের (সা.) সাথে সাক্ষাত করে এলাম । পৃথিবীতে তার চেয়ে উত্তম মানুষ আর নেই ।

শিক্ষা : ১. আল্লাহর প্রতি দৃঢ় ঈমান, অবিচল নির্ভরতা ও সৎ সাহস মুমিন

ব্যক্তির সবচেয়ে বড় অস্ত্র ।

২. নাগালে পেয়েও শত্রুর প্রতি মহানুভবতা ও ক্ষমা প্রদর্শন ইসলামের দাওয়াত দাতাদের সবচেয়ে মূল্যবান গুণ । এ দ্বারা মানুষের হৃদয় জয় করা যায় ।

৩. শত্রুকে সব সময় স্বমতে দীক্ষিত করার আশা করা ঠিক নয় । কখনো কখনো তার শত্রুতার তীব্রতা হ্রাস পাওয়াকেই যথেষ্ট মনে করা উচিত । তাকে সংঘর্ষের পথ থেকে সরাতে পারাও একটি উল্লেখযোগ্য সাফল্য ।

## ৪. মহানবীর আখলাক

[ক] একবার এক সফরে থাকাকালে রাসূল (সা.) সাহাবীগণকে একটি ছাগল জবাই করে রান্না করতে বললেন । জনৈক সাহাবী বললেন, ইয়া রাসূলুল্লাহ, আমি ছাগলটি জবাই করব । আর এক সাহাবী আরম্ভ করলেন, ইয়া রাসূলুল্লাহ, আমি ছাগলটির চামড়া খসাবো ও গোশত বানাব । তৃতীয় সাহাবী আবদার করলেন, ইয়া রাসূলুল্লাহ আমি ছাগলটি রান্না করব । রাসূল (সা.) বললেন, ঠিক আছে । আর আমি রান্নার জন্য জ্বালানি কাঠ কুড়িয়ে আনব ।

সকলে একযোগে বললেন, ইয়া রাসূলুল্লাহ ও কাজটি আমরা করতে পারব, আপনার কিছু করতে হবে না । রাসূল (সা.) বললেন, আমি জানি ও কাজটি আমি না পারলেও তোমরা করতে পারবে । কিন্তু আমি তোমাদের মধ্যে স্বতন্ত্র বৈশিষ্ট্য নিয়ে বসে থাকা পছন্দ করি না । আল্লাহও এটা পছন্দ করেন না যে, তার কোনো বান্দা তার সাথীদের মধ্যে স্বতন্ত্র বৈশিষ্ট্য নিয়ে বসে থাকুক ।

শিক্ষা : মহানবী (সা.) এর এই গুণটি পদমর্যাদা সম্পন্নসহ নির্বিশেষে সকল মুসলমানের আয়ত্ব করা উচিত । অফিস আদালতে বা ঘরোয়া জীবনে সর্বক্ষেত্রে প্রত্যেকের পরস্পরের সহযোগিতা করা উচিত ।

[খ] জনৈক ইহুদীর কাছে রাসূল (সা.) এর কিছু ঋণ ছিল । লোকটি নির্দিষ্ট সময়ের আগেই ঋণ পরিশোধের জন্য তাড়া দিতে লাগল । সে মদিনার এক রাস্তায় রাসূল (সা.) এর মুখোমুখি হয়ে বলল, 'তোমরা আব্দুল মুতালিবের বংশধরেরা সময়মতো ঋণ পরিশোধ কর না ।'

হযরত ওমর তার এই আচরণ দেখে রেগে গিয়ে বললেন, 'ইয়া রাসূলুল্লাহ! আপনি অনুমতি দিন, ওর গর্দান কেটে ফেলি।'

রাসূল (সা.) বললেন, 'হে ওমর, আমার এই ইহুদীর জন্য অন্যরকম আচরণের প্রয়োজন ছিল। তুমি বরং ওকে উত্তম পশ্চায় ঋণ ফেরত চাইতে বল, আর আমাকে উত্তম পশ্চায় ঋণ পরিশোধ করতে বল।'

অতঃপর তিনি ইহুদির দিকে ফিরে বললেন, তুমি কালকেই তোমার দেয়া ঋণ ফেরত পাবে।

এদিকে রাসূল (সা.) এর ব্যবহারে ইহুদির মনে ভাবান্তর দেখা দিল। সে এগিয়ে এসে বলল, 'আমি আসলে আপনার প্রতিক্রিয়া দেখতে চেয়েছিলাম। তাওরাতে শেষ নবীর এ রকম আলামতই লেখা আছে। আমি সাক্ষ্য দিচ্ছি যে, আপনিই আল্লাহর শেষ রাসূল।' এই বলে সে ইসলাম গ্রহণ করল।

**শিক্ষা :**

(ক) স্বচ্ছল ব্যক্তির পক্ষ থেকে কোন অস্বচ্ছল ব্যক্তিকে ঋণ দেয়া খুবই সওয়াবের কাজ। আর সময়মতো ঋণ পরিশোধে অক্ষম হলে তাকে সময় বাড়িয়ে দেয়া আরো মহৎ কাজ। তবে সময় হওয়ার আগে ঋণ পরিশোধের জন্য তাড়া দেয়া এবং কটুক্তি করায় ঋণ দেয়ার সওয়াব কমে যায়।

(খ) কারো আচরণে সহসা উত্তেজিত হওয়া উচিত নয়। ধৈর্য ও সহিষ্ণুতা কখনো কখনো অকল্পনীয় সুফল বয়ে আনে।

## ৫. খলিফার আখলাক

[ক] হযরত আবু বকর ছিদ্দীক (রা.) যেদিন খিলাফতের দায়িত্ব গ্রহণ করলেন সেইদিনই সকালে কাপড়ের বড় একটা পুটলি মাথায় করে বাড়ি থেকে বেরুলেন। পথে হযরত ওমরের সাথে তার দেখা হলো। ওমর জিজ্ঞেস করলেন, ওহে রাসূলুল্লাহর খলিফা, আপনি কোথায় চলেছেন?

হযরত আবু বকর বললেন, বাজারে।

হযরত ওমর বললেন, আপনি মুসলমানদের শাসনভার গ্রহণ করেছেন। এখন বাজারে আপনার কি কাজ?

আবু বকর বললেন, বাজারে না গেলে আমার ছেলেমেয়েকে খাওয়ানো কোথেকে? নিজের ছেলেমেয়েদেরকে যদি আমি খাবার না দিতে পারি তাহলে

গোটা দেশের মুসলমানদেরকেও তো খাবার দিতে পারব না ।

ওমর বললেন, চলুন, মসজিদে নববীতে যাই । সবার সাথে আলোচনা করে আপনার ও আপনার পরিবারের খোরপোষের কি ব্যবস্থা করা যায়, যাতে আপনি দেশের কল্যাণ সাধন ও খিলাফতের দায়িত্ব পালনে একাগ্রচিত্তে কাজ করতে পারেন । মসজিদে গিয়ে আবুবকর ও ওমর বাইতুল মালের সচিব আবু ওবায়দা ইবনুল জাররাহ ও আরো কিছু সংখ্যক সাহাবীর সাথে বৈঠকে বসলেন এবং ওমর তাঁর অভিমত পেশ করলেন । তখন সকলে আবুবকর ও তার পরিবারের জন্য প্রচলিত নিয়মে যতটা দরকার খোরপোষ বরাদ্দ করলেন ।

শিক্ষা : মুসলমানের দায়িত্বশীল ব্যক্তিদেরকে এরূপ বেতনভাতা দেওয়া উচিত, যাতে তারা মৌলিক প্রয়োজনের ব্যাপারে নিশ্চিত থেকে একাগ্রচিত্তে কাজ করতে পারে এবং কোনো দুর্নীতিতে লিপ্ত হতে বাধ্য না হয় ।

[খ] খলিফা হওয়ার পর হযরত ওমর (রা.) রাত জেগে এই বলে কাঁদতেন যে, আল্লাহর কসম, আমার শাসনকালে ছাগলও যদি নদীর কিনারে অযত্নে পড়ে থাকে, তবে আমার আশঙ্কা হয় যে, কিয়ামতের দিন তার সম্পর্কে আমাকে জিজ্ঞেস করা হবে ।

একবার তিনি একজন সঙ্গীকে নিয়ে কোথাও যাচ্ছিলেন । পথিমধ্যে এক মহিলা তাকে ডেকে থামাল । তারপর বলল, একদিন তুমি শিশু ওমর ছিলে, এখন তুমি বয়স্ক ওমর হয়েছে । কাল তুমি ওমর ছিলে, আজ হয়েছে মুসলমানদের খলিফা । হে ওমর, আল্লাহ তোমার ওপর যে দায়িত্ব অর্পণ করেছেন, সে ব্যাপারে আল্লাহকে ভয় কর ।

মহিলার কথা শুনে ওমর অঝোরে কাঁদতে লাগলেন । খলিফার সঙ্গী মহিলাকে বলল, ওহে আল্লাহর বান্দী, একটু সংযত হয়ে কথা বলুন । যিনি এই পৃথিবীতে আল্লাহর রাসূলের খলিফা, তাঁকে আপনি কাঁদিয়ে ফেললেন ।

ওমর বললেন, ‘ওহে আমার সহযাত্রী, এ মহিলাকে বলতে দাও । উনি হচ্ছেন সেই খাওলা বিনতে হাকীম, যার কথা স্বয়ং আল্লাহও শুনেছেন এবং পবিত্র কুরআনে তা বর্ণনাও করেছেন, ‘হে রাসূল, সেই মহিলার কথা আল্লাহ শুনেছেন যে তোমার সাথে তার স্বামীর ব্যাপারে বাকবিতণ্ডা করে এবং আল্লাহর কাছে অভিযোগ করে । আল্লাহ তোমাদের উভয়ের আলাপ-আলোচনা শ্রবণ করেন ।’ সুতরাং খাতাবের পুত্র ওমরকে তার কথা শনতেই হবে ।’

শিক্ষা : শাসকদের কর্তব্য প্রজাদের যাবতীয় অভিযোগ-অনুযোগ ধৈর্য সহকারে শ্রবণ করা ও যথাসাধ্য প্রতিকার করা ।

## ৬. হযরত আবু বকরের খোদাভীতি

সহীহ আল বুখারীতে বর্ণিত আছে যে, হযরত আবু বকর (রা.) এর একজন গোলাম ছিল। সে হযরত আবু বকরকে মুক্তিপণ হিসেবে কিছু অর্থ দেয়ার শর্তে মুক্তি চাইলে তিনি তাতে সম্মত হন। অতঃপর সে প্রতিদিন তার মুক্তিপণের কিছু অংশ নিতে আসত। হযরত আবু বকর তাকে জিজ্ঞেস করতেন, কিভাবে এটা উপার্জন করে এনেছ? সে যদি সন্তোষজনক জবাব দিত তবে তা গ্রহণ ও ভোগ করতেন, নচেত করতেন না। একদিন সে রাতের বেলায় তাঁর জন্য কিছু খাবার জিনিস নিয়ে এল। সেদিন তিনি রোযা ছিলেন। তাই তাকে ঐ খাদ্যের উৎস সম্পর্কে জিজ্ঞাসাবাদ করতে ভুলে গেলেন এবং এক লোকমা খেয়ে নিলেন। তাঁরপর তাকে জিজ্ঞেস করলেন, এ খাবার তুমি কিভাবে সংগ্রহ করেছ? সে বলল, আমি জাহেলিয়াত আমলে লোকেদের ভাগ্যগণনা করতাম। আমি ভালো গণনা করতে পারতাম না। কেবল ধোকা দিতাম। এই খাদ্য সে ভাগ্যগণনার উপার্জিত অর্থ দ্বারা সংগৃহীত। হযরত আবু বকর (রা.) বললেন, কী সর্বনাশ! তুমি তো আমাকে ধ্বংস করে ফেলার উপক্রম করেছ। তারপর গলায় আঙুল ঢুকিয়ে বমি করার চেষ্টা করলেন। কিন্তু বমিতে খাওয়া জিনিস বেরুল না। তখন তিনি পানি চাইলেন। পানি খেয়ে সমস্ত ভুক্ত দ্রব্য পেট থেকে বের করে দিলেন। লোকেরা বলল, আল্লাহ আপনার ওপর দয়া করুন। ঐ এক লোকমা খাওয়ার কারণেই কি এত সব? হযরত আবু বকর (রা.) বললেন, ঐ খাদ্য বের করার জন্য যদি আমাকে মৃত্যুবরণও করতে হতো, তবুও আমি বের করে ছাড়তাম। কেননা আমি শুনেছি, রাসূল (সা.) বলেছেন, ‘যে দেহ হারাম খাদ্য দ্বারা গড়ে ওঠে তার জন্য দোযখের আগুনই উত্তম।’ তাই আমি আশঙ্কা করছিলাম যে, এই এক লোকমা খাদ্য দ্বারা আমার শরীরের কিছু অংশ গঠিত হতে পারে।

**শিক্ষা :** আখিরাতের কঠিন ও অবধারিত শাস্তির কথা মনে রেখে সব সময় হালাম-হারাম বাছ-বিছার করে চলা প্রত্যেক মুসলমানের কর্তব্য।

## ৭. হযরত আবু বকরের (রা.) জনসেবা

হযরত আবু বকর (রা.) কে খলিফা নিযুক্ত করা হয়েছে একথা যখন ঘোষণা করা হলো তখন মহল্লার একটা গরীব মেয়ে অস্থির হয়ে পড়ল। লোকেরা জিজ্ঞেস করল যে, আবু বকর (রা.) খলিফা হয়েছে, তাতে তোমার কি অসুবিধা হয়েছে। মেয়েটি বলল, ‘আমাদের ছাগলগুলোর কী হবে?’ জিজ্ঞেস করা হলো, ‘তার অর্থ?’ সে বলল, এখন তো উনি খলিফা হয়ে গেছেন। আমাদের ছাগল ক’টার দেখাশুনাই বা কে করবে, ওগুলোর দুধই বা কে দুইয়ে দেবে? এ কথার কোনো জবাব দেয়া কারো পক্ষে সম্ভব হলো না। কিন্তু পরদিন খুব ভোরে মেয়েটি অবাক হয়ে দেখল যে, হযরত আবু বকর (রা.) যথাসময়ে তাদের বাড়িতে গেছেন এবং দুধ দোহাচ্ছেন। আর যাওয়ার সময় বলে গেলেন, ‘মা, তুমি একটুও চিন্তা করো না। আমি প্রতিদিন ভোরেই তোমার কাজ করে দিয়ে যাব।’ তাবাকাতে ইবনে সাদে আছে যে, মেয়েটির বিচলিত হওয়ার খবর শুনে হযরত আবু বকর (রা.) বলেছিলেন, আমি আশা করি খেলাফতের দায়িত্ব আমার আল্লাহর বান্দাদের সেবার পথে বাধা হয়ে দাঁড়াবে না। আমি এখনো ঐ দরিদ্র মেয়েটির ছাগল দোহন করে দিয়ে আসব ইনশাআল্লাহ।

ইবনে আসাকের লিখেছেন যে, আবু বকর (রা.) খেলাফতের পূর্বে তিন বছর এবং খেলাফতের পরে এক বছর পর্যন্ত মহল্লার দরিদ্র পরিবারগুলোর ছাগল দোহন করে দিতেন।

আবু সালাহ গিফারী বর্ণনা করেন যে, হযরত আবু বকর (রা.) যখন খলিফা হন তখন মদীনার এক অন্ধ বুড়ির বাড়ির কাজকর্ম হযরত ওমর (রা.) স্বহস্তে করে দিতেন। তার প্রয়োজনীয় পানি এনে দিতেন ও বাজার সওদা করে দিতেন।

একদিন হযরত ওমর সেখানে গিয়ে দেখেন বুড়ির বাড়ি একদম পরিষ্কার-পরিচ্ছন্ন। কলসিতে পানি আনা হয়েছে, বাজারও করা হয়েছে। তিনি ভাবলেন, বুড়ির কোন প্রতিবেশী হয়তো কাজগুলো করে দিয়ে গেছে। পরদিনও দেখলেন একই অবস্থা। সব কাজ সম্পন্ন হয়ে গেছে। এভাবে কয়েকদিন কেটে গেল। এবার হযরত ওমরের কৌতূহল হলো। ভাবলেন, এই মহানুভব লোকটি কে তা না দেখে ছাড়বেন না।

একদিন নির্দিষ্ট সময়ের অনেক আগে এসে লুকিয়ে রইলেন। দেখলেন অতি প্রত্যুষে এক ব্যক্তি দ্রুতগতিতে বুড়ির বাড়ির দিকে এগিয়ে আসছে। হযরত

ওমর বুঝতে পারলেন যে, এই ব্যক্তিই সেই মহান ব্যক্তি যিনি তারও আগে এসে বুড়ির সমস্ত কাজ সেরে দিয়ে যান। ব্যক্তিটি বুড়ির ঘরের মধ্যে প্রবেশ করে যখন কাজ শুরু করে দিল তখন হযরত ওমর যেয়ে দেখেন, ইনি আর কেউ নয় স্বয়ং খলিফা হযরত আবু বকর (রা.)। হযরত ওমর বললেন, সে রাসূলের প্রতিনিধি! মুসলিম জাহানের শাসন সংক্রান্ত দায়িত্ব পালনের পাশাপাশি এই বুড়ির তদারকিও চালিয়ে যেতে চান নাকি? সকল নেক কাজেই কি আপনি আমাদের সবাইকে পেছনে ফেলে দেবেন? হযরত আবু বকর জবাব না দিয়ে একটু মুচকি হেসে যথারীতি কাজ করতে লাগলেন।

শিক্ষা : সাধারণত উচ্চপদস্থ লোকেরা স্বহস্তে অন্যের কাজ করে দেয়া দূরে থাক, নিজের কাজও করতে চায় না। চাকর চাকরাণী ও যন্ত্রের মাধ্যমে সব কাজ সারতে চেষ্টা করে। হযরত আবু বকরের হাতে দাসদাসীর অভাব ছিল না। উপকারের কাজটা কোন ভৃত্যকে পাঠিয়ে দিয়েও করাতে পারতেন। কিন্তু আখিরাতের বাড়তি সওয়াবের আশায় এবং সাধারণ মুসলমানদের জন্য দৃষ্টান্ত স্থাপন করার মানসে এভাবে স্বহস্তে অন্যের সেবা করেছেন সর্বোচ্চ রাষ্ট্রীয় পদে আসীন থাকা অবস্থায়। সকল যুগের মুসলমানদের সকল পর্যায়ের উচ্চপদস্থ ব্যক্তিবর্গের জন্য এটি একটি চমকপ্রদ অনুকরণীয় দৃষ্টান্ত।

## ৮. হযরত আবুবকর (রা.) অনুশোচনা

এক ব্যক্তি হযরত আবু বকর সিদ্দীক (রা.) কে গালি দিচ্ছিল। সেখানে রাসূল (সা.) উপস্থিত ছিলেন। আবু বকর (রা.) কোন বাদ প্রতিবাদ না করে নীরবে গালি শুনতে লাগলেন। কিছুক্ষণ পর তাঁর ধৈর্যের বাঁধ ভেঙ্গে গেল। তিনি ঐ ব্যক্তিকে তারই দেয়া একটি গালি ফিরিয়ে দিলেন। তৎক্ষণাৎ রাসূল (সা.) এর মুখে অসন্তোষের চিহ্ন ফুটে উঠল। তিনি উঠে বাড়িতে চলে গেলেন। আবুবকর (রা.) ঘাবড়ে গেলেন। তিনি কালবিলম্ব না করে রাসূল (সা.) এর কাছে ছুটে গেলেন এবং বললেন, 'হে রাসূল! লোকটি যখন আমাকে গালি দিচ্ছিল আপনি চুপচাপ শুনছিলেন। যেই আমি জবাব দিলাম অমনি অসন্তুষ্ট হয়ে উঠে চলে এলেন।'

রাসূল (সা.) বললেন, 'শোন আবু বকর, যতক্ষণ তুমি চুপ ছিলে এবং ধৈর্য ধারণ করছিলে, ততক্ষণ তোমার সাথে আল্লাহর একজন ফেরেশতা ছিল, যিনি

তোমার পক্ষ থেকে জবাব দিচ্ছিলেন। কিন্তু যখন তুমি নিজেই জবাব দিতে শুরু করলে তখন ঐ ফেরেশতা চলে গেলেন এবং মাঝখানে এক শয়তান এসে গেল। সে তোমাদের উভয়ের মধ্যে গোলযোগ তীব্রতম করতে চাইছিল। হে আবু বকর! মনে রেখ কোনো বান্দার ওপর যদি জুলুম ও বাড়াবাড়ি হতে থাকে এবং সে কেবল আল্লাহর সন্তুষ্টির উদ্দেশ্যে তা ক্ষমা করতে থাকে এবং কোনো প্রতিশোধ নেয়া থেকে বিরত থাকে, তবে আল্লাহ জুলুমকারীর বিরুদ্ধে তাকে সর্বাঙ্গিক সাহায্য করেন।’

হযরত আবু বকর অনুতপ্ত হলেন যে, ধৈর্যহারা হয়ে তিনি আল্লাহর ফেরেশতার সাহায্য থেকে বঞ্চিত হয়ে গেলেন।

**শিক্ষা :** এই ঘটনা আমাদের সামনে ধৈর্যের শিক্ষাই নতুন করে তুলে ধরেছে। রাসূল (সা.) বললেন, ‘ধৈর্য এমন একটা গাছ, যার সারা গায়ে কাঁটা, কিন্তু এর ফল অত্যন্ত মজাদার।’ সুতরাং প্রত্যেক মুসলমানের উচিত, চরম উস্কানির মুখেও ধৈর্য ধারণ করা এবং ক্রোধ সম্বরণ করা। উস্কানির মুখে ক্রোধ সম্বরণের সহজ পছা হলো সালাম দিয়ে দ্রুত স্থান ত্যাগ করা, নচেত ঠাণ্ডা পানি দিয়ে ওয়ু করা।

## ৯. ব্যক্তি স্বাধীনতা ও বাক স্বাধীনতা

হযরত ওমর (রা.) তখন মুসলিম জাহানের খলিফা। একবার রাতের বেলা তিনি একটি সুরেলা আওয়াজ শুনতে পেলেন। একটি লোক গান গাইছিল। তাঁর সন্দেহ হলো। তিনি প্রাচীরে উঠে দেখলেন, পাশের ঘরে এক পুরুষ বসে আছে। তার পাশে মদ ভর্তি একটি পাত্র এবং গ্লাস। অদূরে এক মহিলাও রয়েছে। খলিফা চিৎকার করে বললেন, ওরে আল্লাহর দুষমন! তুই কি মনে করেছিস যে, তুই আল্লাহর নাফরমানী করবি, আর তিনি তোমার গোপন অভিসারের কথা ফাঁস করবেন না? জবাবে সে বলল, ‘আমীরুল মুমিনীন, তাড়াছড়া করবেন না। আমি যদি একটি গুনাহ করেও থাকি, তবে আপনি করেছেন তিনটি গুনাহ। আল্লাহ তায়ালা মানুষের দোষ-ক্রটি খুঁজে বেড়াতে নিষেধ করেছেন, কিন্তু আপনি দোষ-ক্রটি খুঁজেছেন। আল্লাহ আদেশ দিয়েছেন কারো বাড়িতে ঢুকলে দরজা দিয়ে ঢুকতে, কিন্তু আপনি প্রাচীর ডিঙিয়ে ঘরে প্রবেশ করেছেন। আল্লাহ নির্দেশ দিয়েছেন যে, নিজের বাড়ি ছাড়া অন্যের



বাড়িতে অনুমতি না নিয়ে ঢুকো না । কিন্তু আপনি আমার অনুমতি ছাড়াই আমার বাড়িতে প্রবেশ করেছেন ।’

এ জবাব শুনে হযরত ওমর নিজের ভুল স্বীকার করলেন এবং তার বিরুদ্ধে কোনো ব্যবস্থা গ্রহণ করলেন না । তবে তার কাছ থেকে অঙ্গীকার আদায় করলেন যে, সে পাপের পথ ত্যাগ করে সৎ পথে ফিরে আসবে ।

**শিক্ষা :** ১. অন্যায়ের প্রতিরোধে সক্রিয় থাকা প্রত্যেক মুসলিমের সার্বক্ষণিক দায়িত্ব । কিন্তু এই দায়িত্ব পালনেও অনেক সতর্কতা ও বিচক্ষণতার পরিচয় দেয়া প্রয়োজন । নচেত প্রতিরোধের চেষ্টা ব্যর্থ হয়ে যেতে পারে । হযরত ওমরের (রা.) এই ঘটনা থেকে সেই শিক্ষাই পাওয়া যায় ।

২. মুমিন ব্যক্তি নিজের ভুলক্রটি সংশোধনে তাৎক্ষণিক ও ত্বরিত পদক্ষেপ নিয়ে থাকে ।

## ১০. হযরত ওমর (রা.) এর ইসলাম গ্রহণ

ইবনে ইসহাক থেকে বর্ণিত আছে যে, কুরাইশ প্রতিনিধি আমর ইবনুল আ'স ও আবদুল্লাহ ইবনে রবীয়া' যখন আবিসিনিয়া থেকে ফিরে এল এবং সেখানে হযরত করে যাওয়া মুসলমানদেরকে ফিরিয়ে আনতে সক্ষম হলো না, তার অল্প কয়েকদিন পরই ওমর বিন খাত্তাবের ন্যায় দুর্দান্ত সাহসী ও প্রতাপশালী ব্যক্তি ইসলাম গ্রহণ করেন । তাঁর ও হযরত হামযার ইসলাম গ্রহণে রাসূল (সা.) এর সাহাবীগণের মনোবল যথেষ্ট বেড়ে যায় এবং তারা অপেক্ষাকৃত নিরাপদ অনুভব করেন । এর আগে তাঁরা কাবার চত্বরে নামায পড়ারও সাহস পেতেন না । ইসলাম গ্রহণের পর ওমর ঝুঁকি নিয়ে কাবার চত্বরে নামায পড়েন এবং তাঁর সাথে অন্যান্য সাহাবীগণও নামায পড়েন ।

উম্মে আবদুল্লাহ বিনতে আবি খাসয়ামা (রা.) বলেন যে, আমরা একে একে সবাই আবিসিনিয়ায় চলে যাওয়ার প্রস্তুতি নিচ্ছিলাম । আমার স্বামী আমের তখন একটা পারিবারিক কাজে বাইরে গিয়েছিলেন । সহসা ওমর ইবনুল খাত্তাব এসে আমার কাছে দাঁড়ালেন । তখনো তিনি মোশরেক । তার জুলুম-অত্যাচারে আমরা অতিষ্ঠ ছিলাম । ওমর বললেন, হে উম্মে আবদুল্লাহ! আপনারা বুঝি বিদায় হচ্ছেন? আমি বললাম, হ্যাঁ, আল্লাহর কসম । আল্লাহর পৃথিবীতে বেরিয়ে পড়ব । তোমরা আমাদেরকে অনেক কষ্ট দিয়েছ, অনেক নির্যাতন চালিয়েছ । আল্লাহ এ

অবস্থা থেকে আমাদেরকে উদ্ধার করবেন। ওমর বললেন, ‘আল্লাহ আপনাদের সাথী হোন।’ তার কথায় এমন একটা সহানুভূতির ভাব পরিলক্ষিত হচ্ছিল যা আর কখনো দেখিনি। এরপর ওমর ইবনুল খাত্তাব চলে গেলেন। তবে আমার মনে হচ্ছিল, আমাদের দেশ ত্যাগের খবরে তিনি মর্মান্বিত। কিছুক্ষণ পর আমার প্রয়োজন সেরে ঘরে ফিরে এলো। আমি তাকে বললাম, ‘ওহে আবদুল্লাহর বাবা! এইমাত্র ওমর এসেছিল। আমাদের প্রতি তার সেকি সহানুভূতি ও উদ্বেগ, তা যদি তুমি দেখতে!’ আমার বললেন, তুমি কি তার ইসলাম গ্রহণের ব্যাপারে আশান্বিত? আমি বললাম, হ্যাঁ। সে বলল, খাত্তাবের গাধা ইসলাম গ্রহণ করলেও তুমি যাকে দেখেছ সে (খাত্তাবের ছেলে ওমর) ইসলাম গ্রহণ করবে না। ইসলামের প্রতি ওমরের যে প্রচণ্ড বিদ্বেষ, হঠকারিতা ও একগুঁয়েমির প্রকাশ দেখা যাচ্ছিল, তার দরুণ আমার হতাশ হয়েই অনুরূপ কথা বলেছিলেন।

**হযরত ওমরের ইসলাম গ্রহণের কারণ :** ইবনে ইসহাক থেকে বর্ণিত আছে যে, ‘ওমরের বোন ফাতিমা বিনতে খাত্তাব ও তার স্বামী সাঈদ বিন যায়েদ বিন আমর বিন নুফায়েল ওমরের আগেই ইসলাম গ্রহণ করেছিলেন। কিন্তু তাঁরা তাদের ইসলাম গ্রহণের কথা ওমরের কাছ থেকে লুকিয়ে রেখেছিলেন। মক্কার আর এক ব্যক্তি নাঈম বিন আবদুল্লাহ আন নাহহামও একইভাবে গোপনে ইসলাম গ্রহণ করেছিল। ওমরের স্বগোত্রীয় অর্থাৎ বনু আদি বিন কাবের অন্তর্ভুক্ত এই ব্যক্তি নিজ গোত্রের অত্যাচারের ভয়ে নিজের ইসলাম গ্রহণের কথা প্রকাশ করেননি। খাব্বাব ইবনুল আরাতি (বনু তামীম বংশোদ্ভূত এই সাহাসী জাহেলিয়াতের যুগে তরবারি তৈরির পেশায় নিয়োজিত ছিলেন এবং বনু খোযায়া গোত্রের উম্মে আনমার নাম্মী মহিলার মুক্ত গোলাম ছিলেন) নামক অপর এক নওমুসলিম গোপনে ফাতিমা বিনতে খাত্তাবকে কুরআন পড়িয়ে যেতেন। একদিন ওমর ইবনুল খাত্তাব উন্যুক্ত তরবারি হাতে নিয়ে রাসূল (সা.) ও তাঁর একদল সাহাবীর সন্মানে বেরিয়ে পড়লেন। তিনি জানতে পেরেছিলেন যে, প্রায় ৪০ জন নারী ও পুরুষ সাহাবীসহ রাসূল (সা.) সাফা পাহাড়ের নিকটবর্তী একটা ঘরে সমবেত রয়েছেন। রাসূল (সা.) এর সাথে তাঁর চাচা হামযা ইবনে আবদুল মুতালিব, আবুবকর সিদ্দীক বিন আবু কুহাফা ও আলী বিন আবু তালেবসহ এমন কিছু সংখ্যক মুসলমান ছিলেন যারা রাসূল (সা.) এর সাথে মক্কার অবস্থান করছিলেন এবং আবিসিনিয়ায় হিজরতকারীদের সাথে হিজরত করেননি।’ পথে নাঈম বিন আবদুল্লাহর সাথে ওমরের দেখা হলো। তিনি বললেন, কোথায় চলেছ ওমর? ওমর বললেন, ‘ধর্মচ্যুত মুহাম্মাদের সন্মানে চলেছি, যে কুরাইশ

বংশে বিভেদ সৃষ্টি করেছে, তাদের বুদ্ধিমানদেরকে বোকা সাব্যস্ত করেছে, তাদের অনুসৃত ধর্মের নিন্দা করেছে এবং তাদের দেবদেবীকে গালাগাল করেছে। আমি ওকে হত্যা করব।’

নাঈম বললেন, ‘ওহে ওমর, আল্লাহর কসম, তুমি আত্মপ্রবঞ্চনার শিকার হয়েছ। তুমি কি মনে কর, মুহাম্মদকে হত্যা করার পর বনু আবদ মানাফ তোমাকে ছেড়ে দেবে আর তুমি পৃথিবীর ওপর অবাধে বিচরণ করে বেড়াতে পারবে? তোমার কি উচিত নয় আগে নিজের পরিবার-পরিজনের দিকে মনোনিবেশ করা এবং তাদেরকে শোধরানো?’ ওমর বললেন, ‘আমার পরিবার-পরিজনের কি হলো?’ নাঈম বললেন, ‘তোমার ভগ্নিপতি ও চাচাতো ভাই সাঈদ বিন যায়েদ বিন আমার এবং তোমার বোন ফাতিমা বিনতে খাত্তাব। আল্লাহর কসম, তাঁরা উভয়ে ইসলাম গ্রহণ করেছে এবং মুহাম্মদের ধর্ম অনুসরণ করেছে। পারলে তাদেরকে সামলাও।’ ওমর তৎক্ষণাৎ ফিরে গেলেন তার বোন ও ভগ্নিপতির বাড়ির দিকে। যখন তিনি তাদের কাছে রওনা হলেন তখন তাদের কাছে খাবাব ইবনুল আরাতে ছিলেন। তিনি তাদেরকে পবিত্র কুরআনের একটি অংশ হাতে নিয়ে পড়াচ্ছিলেন। এই অংশটিতে ছিল সূরা ত্বা-হা। ওমরের আওয়াজ শুনে খাবাব গা ঢাকা দিলেন। তিনি ঘরের কোনো এক অংশে লুকিয়ে রইলেন। আর ফাতেমা কুরআনের অংশটি নিজের উরুর নিচে চাপা দিয়ে রাখলেন। ঘরের কাছাকাছি পৌঁছার পর ওমর খাবাবের পড়ার আওয়াজ শুনেছিলেন। ঘরে ঢুকে তিনি বললেন, ‘একটা দুর্বোধ্য বাণী আবৃত্তি করার আওয়াজ শুনেছিলাম। ওটা কি?’ তারা উভয়ে বললেন, ‘না, আপনি কিছুই শোনেননি।’ ওমর বললেন, ‘নিশ্চয়ই শুনেছি। আর আল্লাহর কসম, এটাও জেনেছি যে, তোমরা দু’জনে মুহাম্মদের অনুসারী হয়ে গেছ।’ কথাটা বলে ভগ্নিপতি সাঈদকে প্রবলভাবে জাপটে ধরলেন। তার বোন ফাতিমা বিনতে খাত্তাব স্বামীকে বাঁচাতে ছুটে গেলে তিনি তাকে মেরে জখম করে দিলেন। এই কাণ্ড ঘটানোর পর তার বোন ও ভগ্নিপতি একযোগে তাঁকে বললেন, ‘হ্যাঁ, আমরা ইসলাম গ্রহণ করেছি। আল্লাহ ও তাঁর রাসূলের প্রতি ঈমান এনেছি। এখন যা করতে চান করুন।’ ওমর যখন দেখলেন তার বোনের শরীর রক্তাক্ত, তখন অনুতপ্ত হলেন। তিনি স্বীয় বোনকে বললেন, ‘আমাকে এই পুস্তিকাটি দাও, যা এইমাত্র তোমাদেরকে পড়তে শুনলাম। আমি একটু দেখবো মুহাম্মদ কি জিনিস নিয়ে এসেছে।’ ওমর লেখাপড়া জানতেন। তিনি এ কথা বললে তাঁর বোন তাঁকে বলল, ‘আমার ভয় হয় আপনি নষ্ট করে ফেলেন কিনা। ওমর বললেন,

‘ভয় পেয়ো না!’ অতঃপর তিনি নিজের দেবদেবীর শপথ করে বললেন, ‘ওটি আমি পড়েই তোমার কাছে ফিরিয়ে দেব।’ ওমরের এ কথাটা শুনে ফাতিমার মনে আশার সঞ্চার হলো যে, ওমর ইসলাম গ্রহণ করতে পারে। তিনি বললেন, ‘ভাইজান! আপনি যে অপবিত্র! কেননা আপনি এখনো মোশরেক। অথচ এই পবিত্র গ্রন্থকে পবিত্র ব্যক্তি ছাড়া স্পর্শ করতে পারে না।’ ওমর তৎক্ষণাৎ উঠে চলে গেলেন এবং গোসল করে এলেন। এবার ফাতিমা তাকে পুস্তিকাখানি দিলেন। তাতে সূরা ত্বা-হা লিখিত ছিল। তিনি তা পড়লেন। প্রথম অংশটি পড়েই বললেন, ‘আহ! কি সুন্দর কথা! কী মহৎ বাণী!’ তাঁর এ উক্তি শুনে খাব্বাব তাঁর সামনে বেরিয়ে এলেন। তিনি তাঁকে বললেন, ‘হে ওমর! আল্লাহর কসম, আমার মনে আশার সঞ্চার হচ্ছে যে, আল্লাহ হয়তো আপনাকে তাঁর নবীর দাওয়াত গ্রহণের জন্য মনোনীত করেছেন। আমি গতকাল শুনলাম রাসূল (সা.) দোয়া করছেন, ‘হে আল্লাহ! তুমি আবুল হিকাম বিন হিশাম অথবা ওমর ইবনুল খাত্তাবের দ্বারা ইসলামের শক্তি বৃদ্ধি কর। অতএব, আল্লাহর দিকে অগ্রসর হোন, আল্লাহর দিকে অগ্রসর হোন হে ওমর।’

ওমর বললেন, ‘হে খাব্বাব! আমাকে মুহাম্মাদের সন্ধান দাও। আমি তাঁর কাছে যেয়ে ইসলাম গ্রহণ করব।’ খাব্বাব বললেন, ‘তিনি সাফা পাহাড়ের নিকট একটি বাড়িতে আছেন। সেখানে তাঁর সাথে তাঁর একদল সাহাবী রয়েছেন।’ ওমর তাঁর তরবারি আগের মতোই খোলা অবস্থায় ধরে নিয়ে রাসূল (সা.) ও তাঁর সাহাবীদের কাছে চললেন। সেখানে গিয়ে দরজায় কড়া নাড়লেন। ভেতর থেকে তাঁর আওয়াজ শুনে রাসূল (সা.) এর জনৈক সাহাবী দরজার কাছে এগিয়ে গিয়ে ভেতর থেকে তাকালেন। দেখলেন ওমর মুক্ত তরবারি হাতে দাঁড়িয়ে। তিনি শঙ্কিত চিন্তে রাসূল (সা.) এর কাছে ফিরে গিয়ে বললেন, ‘হে রাসূলুল্লাহ! এ যে ওমর ইবনুল খাত্তাব একেবারে নগ্ন তরবারি হাতে!’ হামযা ইবনে আবদুল মুত্তালিব বললেন, ‘ওকে ভেতরে আসার অনুমতি দিন। সে যদি কোন শুভ কামনা নিয়ে এসে থাকে, আমরা তার প্রতি বদান্যতা দেখাবে। আর যদি কোন কু-বাসনা নিয়ে এসে থাকে তাহলে ওর তরবারি দিয়েই ওকে হত্যা করব।’ রাসূল (সা.) বললেন, ‘ওকে ভেতরে আসতে দাও।’ উক্ত সাহাবী তাকে ভেতরে আসতে দিলেন। রাসূল (সা.) নিজে উঠে তার কাছে এগিয়ে গেলেন এবং নিজের কক্ষে নিয়ে গিয়ে তাঁর সাথে সাক্ষাৎ করলেন। রাসূল (সা.) তাঁর পাজামা বাঁধার জায়গা অথবা যেখানে চাদরের দুই কোণা মিলিত হয়, সেখানটা ধরে তাকে প্রবল জোরে আকর্ষণ করলেন এবং বললেন, ‘কি হে খাত্তাবের পুত্র!

তোমার এখানে আগমন ঘটল কিভাবে! আমার তো মনে হয়, আল্লাহ তোমার ওপর কোনো বিপর্যয় না নামানো পর্যন্ত তুমি ফিরবে না।' ওমর বললেন, 'হে রাসূলুল্লাহ! আমি আপনার কাছে এসেছি আল্লাহর ওপর, তাঁর রাসূলের ওপর ও আপনার কাছে আল্লাহর পক্ষ থেকে যা কিছু আসে তার ওপর ঈমান আনবার জন্য।' এ কথা শোনামাত্র রাসূল (সা.) এমন জোরে 'আল্লাহ আকবার' বলে উঠলেন যে, ঐ ঘরের ভেতরে রাসূল (সা.) এর যে কয়জন সাহাবী ছিলেন সবাই বুঝলেন যে, ওমর ইসলাম গ্রহণ করেছে।

এরপর রাসূল (সা.) এর সাহাবীগণ যার যার জায়গায় চলে গেলেন। হামযার পর ওমর (রা.) এর ইসলাম গ্রহণে তাদের মনোবল ও আত্মমর্যাদা বেড়ে গেল। তারা নিশ্চিত হলেন যে, ওঁরা দু'জন রাসূল (সা.) এর প্রতিরক্ষায় অবদান রাখবেন এবং ইসলামের দুশমনদের মোকাবিলায় মুসলমানদের সহযোগিতা করবেন।

এটি তাঁর ইসলাম গ্রহণ সংক্রান্ত সবচেয়ে প্রসিদ্ধ বর্ণনা।

**ওমর ইবনুল খাত্তাবের ইসলাম গ্রহণ সম্পর্কে আতা ও মুজাহিদের বর্ণনা :** ইবনে ইসহাক বলেন, আব্দুল্লাহ ইবনে আবি নুজাইহ আল মাক্কী স্বীয় শিষ্য আতা, মুজাহিদ অথবা অন্যান্য বর্ণনাকারীদের থেকে বর্ণনা করেছেন যে, ওমর (রা.) এর ইসলাম গ্রহণ সম্পর্কে ব্যাপক জনশ্রুতি রয়েছে যে, তিনি স্বয়ং নিম্নরূপ বলতেন, 'আমি ইসলামের কটুর বিরোধী ছিলাম। জাহেলী যুগে আমি মদের খুব ভক্ত ছিলাম। মদ পেলে খুবই আনন্দিত হতাম। আমাদের একটা মজলিশ বসত উমার বিন আবদ বিন ইমরান আল মাখায়ুমীল পারিবারিক বাসস্থানের নিকটস্থ খাজওয়াবা নামক স্থানে। সেখানে কুরাইশের বহু লোক সমবেত হতো। একদিন রাতে ঐ আসরে আমার সহযোগীদের উদ্দেশ্যে গেলাম। কিন্তু তাদের কাউকেই পেলাম না। এরপর ভাবলাম, মক্কার অমুক মদ বিক্রেতার কাছে গেলে হয়তো মদ খেতে পারতাম। তার উদ্দেশ্যে গেলাম। কিন্তু তাকে পেলাম না। এরপর মনে মনে বললাম, কা'বা শরীফে গিয়ে যদি সাতবার অথবা সত্তরবার তওয়াফ করতাম, মন্দ হতো না। অতঃপর কা'বা শরীফে তওয়াফ করার জন্য মসজিদুল হারামে উপনীত হলাম। সেখানে দেখলাম, রাসূলুল্লাহ (সা.) নামাযে দাঁড়িয়ে আছেন। তিনি তখনো সিরিয়ার দিকে মুখ করে নামায পড়তেন। নিজের ও সিরিয়ার মাঝখানে কা'বা শরীফকে রাখতেন। রুকনে আসওয়াদ ও রুকনে ইয়ামানীর মাঝে বসে তিনি নামায পড়তেন। তাঁকে দেখেই আপন মনে বললাম, আল্লাহর কসম, আজকের রাতটা

যদি মুহাম্মাদের (সা.) আবৃত্তি শুনে কাটিয়ে দিতাম এবং সে কি বলে তা অবহিত হতাম, তাহলেও কাজ হতো। কিন্তু সেই সাথে এটাও ভাবলাম যে, মুহাম্মাদের (সা.) খুব কাছে গিয়ে যদি শুনি তাহলে তিনি ভয় পেয়ে যাবেন। তাই হাজরে আসওয়াদের দিক থেকে এলাম, কা'বা শরীফের পর্দার আড়ালে লুকিয়ে ধীর পায়ে এগিয়ে গেলাম। রাসূল (সা.) তখনো যথারীতি দাঁড়িয়ে নামাযে কুরআন পাঠ করে যাচ্ছেন। অবশেষে আমি তাঁর ঠিক সামনে কা'বার পর্দার আড়ালে লুকিয়ে দাঁড়িয়ে রইলাম। যখন কুরআন শুনলাম, আমার মন নরম হয়ে গেল। আমি কেঁদে দিলাম। ইসলাম আমার মনমগজ দখল করে ফেলল। রাসূল (সা.) নামায শেষ করে চলে না যাওয়া পর্যন্ত আমি ওখানেই চুপচাপ দাঁড়িয়ে রইলাম। তিনি যখন কা'বা থেকে যেতেন, ইবনে আবি হুসাইনের বাড়ির কাছ দিয়ে যেতেন। এই বাড়ি ছিল তার সাফা ও মারওয়ার দৌড়েরও শেষ সীমা। সেখান থেকে আব্বাস ইবনে আব্দুল মুত্তালিবের বাড়ি এবং আজহার বিন আবদ আওফ আযযুহরীর বাড়ির মাঝখান দিয়ে, তারপর আখনাস বিন শুরাইকের বাড়ি হয়ে নিজের বাড়িতে চলে যেতেন। দারুন্ন রাক্বতাতে ছিল রাসূল (সা.) এর বাড়ি। এই জায়গাটি ছিল আবু সুফিয়ানের ছেলে মুয়াবীয়ার মালিকানাধীন। ওমর (রা.) বলেন, আমি রাসূল (সা.) এর পিছু পিছু চলতে লাগলাম। যখন তিনি আব্বাসের বাড়ি ও ইবনে আযহারের বাড়ির মাঝখানে পৌঁছিলেন, তখন তাঁকে গিয়ে ধরলাম। আমার আওয়াজ শুনেই রাসূল (সা.) আমাকে চিনে ফেললেন। রাসূল (সা.) মনে করলেন আমি তাঁকে কষ্ট দিতে এসেছি। তাই তিনি আমাকে একটা ধমক দিলেন। ধমক দিয়েই আবার জিজ্ঞেস করলেন, 'ওহে খাত্তাবের পুত্র! এ মুহূর্তে তুমি কি উদ্দেশ্যে এসেছ?' এ কথা শুনে রাসূল (সা.) আল্লাহর প্রশংসা ও কৃতজ্ঞতা জ্ঞাপন করলেন। তারপর বললেন, 'হে ওমর! আল্লাহ তোমাকে হেদায়েত করেছেন।' তারপর তিনি আমার বুক হাত বুলালেন এবং আমি যাতে ইসলামের ওপর অবিচল থাকি সে জন্য দোয়া করলেন। অতঃপর রাসূল (সা.) এর কাছ থেকে বিদায় হলো এবং তিনি নিজের বাড়িতে প্রবেশ করলেন।'

ইবনে ইসহাক বলেন, ওমরের ইসলাম গ্রহণ সম্পর্কে উপরোক্ত দুই ধরনের বিবরণের কোনটি সঠিক তা আল্লাহই ভালো জানেন।

**ইসলামের ওপর ওমরের দৃঢ়তা :** ইবনে ইসহাক বলেন, আবদুল্লাহ ইবনে উমারের মুক্ত গোলাম নাফে ইবনে উমার থেকে বর্ণনা করেন যে, আমার পিতা ওমর যখন ইসলাম গ্রহণ করলেন, তখন জিজ্ঞেস করলেন যে, কুরাইশের কোন ব্যক্তি সর্বাধিক প্রচারমুখর? তাকে বলা হলো, জামিল বিন মুয়াম্মার আল-

জুমহী। তিনি তৎক্ষণাৎ তার উদ্দেশ্যে রওনা হলেন। আবদুল্লাহ ইবনে উমার বলেন, আমি তাঁর পেছনে পেছনে ছুটলাম এবং তিনি কি করেন দেখতে লাগলাম। তখন আমি একজন বালক হলেও যা কিছু দেখি সবই বুঝতে পারি। ওমর (রা.) জামিলের কাছে উপস্থিত হয়ে বললেন, 'হে জামিল! তুমি জান, আমি ইসলাম গ্রহণ ও মুহাম্মদের ধর্মে প্রবেশ করেছি।' ইবনে ওমর বলেন, জামিল তার দিকে দ্রুত নাক করে চাদর গুঁটিয়ে হাঁটতে লাগল। ওমর (রা.) তার পিছু পিছু চললেন। আমিও আমার পিতার পিছু পিছু চললাম। চলতে চলতে মসজিদুল হারামের দরজার ওপর পৌঁছে সে বিকট চিৎকার করে বলল, 'হে কুরাইশ জনমণ্ডলী! শুনে নাও, ওমর ধর্মচ্যুত হয়ে গেছে।' এ সময় কুরাইশ নেতৃবৃন্দ কা'বার চত্বরে তাদের আড্ডায় বসেছিল। ওমর তার পেছনে দাঁড়িয়ে বললেন, 'জামিল মিথ্যা বলেছে, আমি ধর্মচ্যুত হইনি, ইসলাম গ্রহণ করেছি। আমি সাক্ষ্য দিচ্ছি যে, আল্লাহ ছাড়া আর কোনো ইলাহ নেই এবং মুহাম্মদ (সা.) তার বান্দা ও রাসূল।' সঙ্গে সঙ্গে সকলে তার দিকে মারমুখী হয়ে ছুটে গেল। ওমর ও কুরাইশ জনতার মধ্যে লড়াই চলল দুপুর পর্যন্ত। এক সময় ওমর ক্লান্ত ও অবসন্ন হয়ে বসে পড়ল। মারমুখী জনতা তখনো তার মাথার ওপর দাঁড়িয়ে। ওমর বলতে লাগলেন, তোমরা যা খুশি কর। আল্লাহর কসম, আমরা যদি তিনশো লোক হতাম, তাহলে আমরা তোমাদের জন্য রণাঙ্গন ছেড়ে দিতাম অথবা তোমরা ছেড়ে দিতে।' (অর্থাৎ মুসলমানদের সংখ্যা বেশি হলে তোমরা এত মারমুখো হতে না।) উভয় পক্ষ যখন এই পর্যায়ে, তখন সহসা সেখানে একজন প্রবীণ কুরাইশ সর্দারের আবির্ভাব ঘটল। মূল্যবান ইয়ামানী চাদর ও নকশাদার আলখেল্লা পরিহিত এই বৃদ্ধ এসে তাদের কাছে দাঁড়ালেন। তিনি জিজ্ঞেস করলেন, তোমাদের কি হয়েছে? তারা বলল, 'ওমর ধর্মচ্যুত হয়ে গেছে।' বৃদ্ধ বললেন, 'তাতে কি? থামো। একজন মানুষ নিজের ইচ্ছায় একটা জিনিস গ্রহণ করেছে। তোমরা তার কি করতে চাও? তোমরা কি ভেবেছ, বনু আদি বিন কা'ব [ওমর (রা.)-এর গোত্র] তাদের সদস্যকে তোমাদের হাতে এভাবেই ছেড়ে দেবে? ওকে ছেড়ে দাও।' ইবনে উমার (রা.) বলেন, এ কথার পর তারা নিজেদের উত্তেজিত ভাবাবেগকে সংযত করল। পরে মদীনায় হিজরত করার পর আমার পিতাকে জিজ্ঞেস করেছিলাম, আব্বা, ঐ বৃদ্ধটি কে, যিনি আপনার ইসলাম গ্রহণের দিন মারমুখো জনতাকে ধমক দিয়ে আপনার কাছ থেকে হটিয়ে দিয়েছিলেন? তিনি বললেন, উনি আস ইবনে ওয়ায়েল আসসাহমী।

ইবনে হিশাম বলেন, আমাকে কোন কোন বিদ্বান ব্যক্তি বলেছেন যে, আবদুল্লাহ ইবনে ওমর ও তাঁর পিতার কথোপকথনটি এ রকম ছিল :

ইবনে ওমর : আব্বা! ঐ লোকটি কে, যিনি আপনার ইসলাম গ্রহণের দিন মক্কাতে যারা আপনার ওপর আক্রমণ করেছিল, তাদেরকে ধমক দিয়ে থামিয়ে দিয়েছিলেন? আল্লাহ উনাকে উত্তম প্রতিদান দিন ।’

হযরত ওমর (রা.) বলেন, ‘হে বৎস! উনি আ’স ইবনে ওয়ায়েল । আল্লাহ তাঁকে কোনই উত্তম প্রতিদান যেন না দেন ।’ কারণ ইসলাম গ্রহণ ব্যতীত ভালো কাজের প্রতিদান পাওয়া যায় না । আ’স ইবনে ওয়ায়েল মোশরেক অবস্থায় এ কাজটি করেন এবং কখনো মুসলমান হননি ।

হযরত ওমর (রা.) বলেছেন, ‘সেই রাতে ইসলাম গ্রহণ করার পর সিদ্ধান্ত নিলাম যে, মক্কাবাসীর মধ্যে যে ব্যক্তি রাসূল (সা.) এর সবচেয়ে কট্টর দূশমন, তার কাছে যাবো এবং তাকে জানাব যে, আমি মুসলমান হয়ে গেছি । ভেবে দেখলাম, এই ব্যক্তিটি তো আবু জাহল ছাড়া আর কেউ নয় ।’ উল্লেখ্য যে, ওমর (রা.) আবু জাহলের আপন বোন খানসামা বিনতে হিশাম ইবনুল মুগীরার পুত্র ছিলেন । যাহোক, ওমর বলেন, আমি পরদনি সকালে তার কাছে গিয়ে তার ঘরের দরজায় কড়া নাড়লাম । আবু জাহল আমার কাছে বেরিয়ে এলো এবং বলল, ‘আমার ভাগ্নেকে স্বাগত! তুমি কি খবর নিয়ে এসেছ ওমর?’ আমি বললাম, ‘মামা, আমি আপনাকে জানাতে এসেছি যে, আমি আল্লাহ ও তাঁর রাসূল মুহাম্মদ (সা.) এর প্রতি ঈমান এনেছি । তিনি যে বিধান নিয়ে এসেছেন তাও সত্য বলে মেনে নিয়েছি ।’ এরপর তিনি আমার মুখের ওপর ঠাস করে দরজা বন্ধ করে দিলেন এবং বললেন, ‘ধিক তোমাকে এবং ধিক তোমার বহন করে আনা সংবাদকে ।’

হযরত আবদুল্লাহ ইবনে মাসউদ বলেন, হযরত ওমরের (রা.) ইসলাম গ্রহণ ছিল একটি বিজয়, তাঁর মদীনায় হিজরত ছিল আল্লাহর সাহায্য স্বরূপ এবং তাঁর খিলাফাত ছিল আল্লাহর রহমতস্বরূপ ।

শিক্ষা :

১. কুরআন অধ্যয়ন করেই হযরত ওমর (রা.) হেদায়াত লাভ করেছিলেন । তাই ইসলামের পুনরুজ্জীবন ও পুনঃপ্রতিষ্ঠার জন্য যারাই কাজ করতে চায়, কেয়ামত পর্যন্ত তাদের এ কাজ সরাসরি কুরআন দিয়েই শুরু করতে হবে ।

২. রাসূল (সা.) হযরত ওমরের নাম ধরে দোয়া করতেন তাঁর হেদায়াতের জন্য । তাই রাসূল (সা.) এর পদানুসরণ করে আমাদেরও ইসলামের শত্রুদের



হেদায়াতের জন্য নাম ধরে ধরে দোয়া করা উচিত। শুধু প্রচার ও শিক্ষা দান করেই ক্ষান্ত থাকা উচিত নয়। কেননা হেদায়াতের আসল চাবিকাঠি আল্লাহর হাতে রয়েছে।

৩. আবিসিনিয়ায় হিজরতের পর মক্কার অবস্থা ছিল চরম নৈরাশ্যজনক। কিন্তু এহেন পরিস্থিতিতেও আল্লাহ তায়ালা হযরত ওমরের (রা.) মতো ব্যক্তিত্বকে ইসলাম গ্রহণে উদ্বুদ্ধ করেছিলেন। সুতরাং কোনো পরিস্থিতিতেই মুসলমানদের হতাশ হওয়া উচিত নয়। আল্লাহ তায়ালা অকল্পনীয়ভাবে সাহায্য পাঠাতে পারেন।

## ১১. স্বামী-স্ত্রীর আচরণে সহনশীলতা

বর্ণিত আছে যে, এক ব্যক্তি নিজের স্ত্রীর দুর্ব্যবহারে অতিষ্ঠ হয়ে হযরত ওমর (রা.) এর নিকট নালিশ করতে ও তাঁর পরামর্শ নিতে এলো। এসে হযরত ওমরের (রা.) বাসভবনের দরজায় দাঁড়াতেই গুনতে পেল তাঁর স্ত্রী অত্যন্ত কর্কশ ভাষায় ও উচ্চস্বরে তাঁকে তিরস্কার করছে, আর হযরত ওমর নীরবে তা গুনছেন। লোকটি তৎক্ষণাৎ ফিরে যেতে উদ্যত হলো। সে ভাবল, হযরত ওমরের (রা.) মতো কঠোর মেজাজের মানুষের যখন এই অবস্থা এবং তিনি খলিফা, তখন আমি আর কে? ঠিক এই সময় হযরত ওমর বাইরে বেরিয়ে দেখলেন এক ব্যক্তি তার দরজা থেকে ফিরে যাচ্ছে। তিনি তাকে ডেকে ফেরালেন এবং জিজ্ঞেস করলেন, তুমি কি জন্য এসেছ? সে বলল, ‘আমীরুল মুমিনীন, আমি আপনার কাছে এসেছিলাম নিজের স্ত্রীর বদমেজাজ ও কঠোর ব্যবহার সম্পর্কে নালিশ করতে। কিন্তু এসে নিজ কানে যা গুনতে পেলাম, তাতে মনে হলো আপনার স্ত্রীরও একই অবস্থা। তাই এই সাত্তুনা নিয়ে ফিরে যাচ্ছিলাম যে, খোদ আমীরুল মুমিনীনের যখন নিজের স্ত্রীর সাথে এরূপ অবস্থা, তখন আমি আর কোথাকার কে?’

হযরত ওমর (রা.) বললেন, ওহে দ্বীনি ভাই, শোন! আমি আমার স্ত্রীর এরূপ আচরণ সহ্য করি দুটি কারণে— প্রথমত আমার কাছে তার অনেক অধিকার পাওনা আছে। দ্বিতীয়তঃ সে আমার খাবার রান্না করে, রুটি বানায়, কাপড় ধোয় এবং আমার সন্তানকে দুধ খাওয়ায়। অথচ এর কোনটি তার কাছে আমার প্রাপ্য নয় এবং সে এগুলো করতে বাধ্য নয়। এ সবেব কারণে আমার মনে শান্তি

বিরাজ করে এবং আমি হারাম উপার্জন থেকে রক্ষা পাই। এ কারণেই আমি তাকে সহ্য করি। লোকটি বলল, হে আমীরুল মুমিনীন, আমার স্ত্রীও তদ্রূপ। হযরত ওমর (রা.) বললেন, তাহলে সহ্য করতে থাক ভাই। দুনিয়ার জীবন তো অল্প কটা দিনের!

**শিক্ষা :** ইসলাম যে নারীর প্রতি কত উদার ও সহনশীল হওয়ার শিক্ষা দেয় তা এই ঘটনা থেকে স্পষ্ট হয়ে যায়।

এই ঘটনা থেকে শরীয়তের এই বিধিও স্পষ্ট হয়ে যায় যে, নিছক প্রথাগতভাবে আমাদের সমাজে মনে করা হয় যে, রান্নাবান্না করা, কাপড় ধোয়া ও গৃহস্থালির যাবতীয় কাজ করা স্ত্রীর দায়িত্ব ও কর্তব্য। কিন্তু আসলে তা তার কোনো দায়িত্ব ও কর্তব্য নয়। এসব কাজ করা স্ত্রীর ইচ্ছাধীন। শুধু স্বামী ও সন্তানের মঙ্গলাকাঙ্ক্ষা থেকেই স্ত্রীরা নিজের ইচ্ছায় এসব কাজ করে থাকে। এসব কাজে কোনো ক্রটি হলে সে জন্য তাকে কোনো শাস্তি বা বকাঝকা করা জায়েজ নয়। তবে স্বামীর সম্পদ ও সন্তানের রক্ষণাবেক্ষণ ও তত্ত্বাবধান অবশ্যই স্ত্রীর দায়িত্ব।

## ১২. রাসূলের সিদ্ধান্ত প্রত্যাখ্যানকারী এক মুরতাদের শাস্তি

হযরত ইবনে আব্বাস থেকে বর্ণিত আছে যে, মদীনায বিশর নামক একজন মুনাফিক বাস করত। একবার জনৈক ইহুদির সাথে তার বিবাদ বেধে যায়। ইহুদি বলল, চল, আমরা মুহাম্মদ (সা.) এর কাছে গিয়ে এর মীমাংসা করিয়ে আসি। বিশর প্রথম এ প্রস্তাবে সম্মত হলো না। সে ইহুদি নেতা কা'ব ইবনে আশরাফের কাছে মীমাংশার জন্য যাওয়ার প্রস্তাব করল। কা'ব ইবনে আশরাফ ছিল মুসলমানদের কট্টর দূশমন। বিস্ময়ের ব্যাপার এই যে, এই ইহুদি নেতার কাছ থেকে মীমাংশা কামনা করছিল মুসলমান পরিচয় দানকারী বিশর। অথচ ইহুদি লোকটি স্বয়ং রাসূল এর ওপর এর বিচারের ভার অর্পণ করতে চাইছিল। আসলে এর কারণ ছিল এই যে, রাসূল (সা.) এর বিচার যে পুরোপুরি ন্যায়সঙ্গত হবে তা উভয়েই জানত। কিন্তু ন্যায়সঙ্গত মীমাংশা হলে মুনাফিক হেরে যেত, আর ইহুদি জয়লাভ করত।

অনেক তর্ক-বিতর্কের পর শেষ পর্যন্ত ইহুদির মতই স্থির হলো। উভয়ে রাসূল (সা.) এর কাছে গিয়ে বিবাদটার মীমাংশার ভার তাঁর ওপর অর্পণ করল। রাসূল

(সা.) মামলার ব্যাপক তদন্ত চালিয়ে ইহুদির পক্ষে রায় দিলেন এবং বিশর হেরে গেল। সে এ মীমাংশায় মনে মনে অসন্তুষ্ট হয় এবং ইহুদিকে এই মর্মে সম্মত করে যে, বিষয়টির চূড়ান্ত মীমাংশার জন্য তারা হযরত ওমরের নিকট যাবে। বিশর ভেবেছিল যে, হযরত ওমর যেহেতু কাফেরদের ব্যাপরে অত্যন্ত কঠিন, তাই তিনি ইহুদির মুকাবিলায় তার পক্ষে রায় দেবেন।

দু'জনেই হযরত ওমরের নিকট উপস্থিত হলো। ইহুদি তাঁকে পুরো ঘটনা জানাল এবং বলল, এ ব্যাপারে রাসূল (সা.) যে ফায়সালা করেছেন, তা আমার পক্ষে। কিন্তু এ লোকটি তাতে সম্মত নয়। তাই আমাকে আপনার কাছে নিয়ে এসেছে।

হযরত ওমর বিশরকে জিজ্ঞেস করলেন, ঘটনা কি এরূপ? সে বলল, হ্যাঁ। তখন হযরত ওমর বললেন, তাহলে একটু অপেক্ষা কর। এই বলে তিনি ঘরের ভেতর থেকে একখানা তলোয়ার নিয়ে এলেন এবং 'যে লোক রাসূলের ফায়সালা মেনে নিতে রাজি হয় না, ওমরের কাছে তার ফায়সালা হলো এই...' এই বলে চোখের নিমেষে বিশরকে দ্বিখণ্ডিত করে ফেললেন।

এরপর বিশরের উত্তরাধিকারীরা রাসূল (সা.) এর নিকট হযরত ওমরের বিরুদ্ধে এই মর্মে অভিযোগ দায়ের করেন যে, তিনি শরীয়ত সম্মত কারণ ব্যতীত একজন মুসলমানকে হত্যা করেছেন। এ সময় রাসূল (সা.) এর মুখ দিয়ে স্বতঃস্ফূর্তভাবে এ কথা বেরিয়ে আসে যে, 'ওমর কোনো মুসলমানকে হত্যা করার ধৃষ্টতা দেখাতে পারে এটা আমি মনে করি না।'

আসলে হযরত ওমর (রা.) তাকে এই মনে করে হত্যা করেছেন যে, সে যখন আল্লাহর রাসূলের ফায়সালা প্রত্যাখ্যান করেছে, তখন সে স্পষ্টতই মুরতাদ ও কাফের হয়ে গেছে। ইসলামী শরীয়তে মুরতাদের সর্বসম্মত শাস্তি যে, মৃত্যুদণ্ড সেটাই তিনি তাকে দিয়েছিলেন। আর এর অব্যবহিত পর সূরা নিসার ৬০ থেকে ৬৮ নং আয়াত নাযিল হয়ে হযরত ওমরের অভিমতকে সঠিক প্রমাণিত করে।

শিক্ষা : আল্লাহ ও আল্লাহ রাসূল (সা.) এর আদেশ, নিষেধ বা সিদ্ধান্তকে যারা প্রকাশ্যভাবে অস্বীকার ও প্রত্যাখ্যান করে, তাদেরকে মুসলমান বলে মনে করা বৈধ নয়। ইসলামী রাষ্ট্র প্রতিষ্ঠিত থাকলে এ ধরনের লোকদের মৃত্যুদণ্ড দেয়া অপরিহার্য। অন্যথায়, এ ধরনের মুরতাদদেরকে সমাজচ্যুত করা ও নিন্দা প্রতিবাদের মাধ্যমে কোণঠাসা করে রাখতে হবে, যাতে আর কেউ মুরতাদ হবার ধৃষ্টতা না দেখায়।

## ১৩. জাবালার ঔদ্ধত্য ও হযরত ওমর (রা.)

একবার হযরত ওমর (রা.) হজ্জ করতে মক্কায় এলেন। তিনি কা'বার চারপাশে তওয়াফ করছিলেন। তাঁর সাথে একই কাতারে তওয়াফ করছিলেন সদ্য ইসলাম গ্রহণকারী প্রতিবেশী এক রাজা জাবালা ইবনে আইহাম। জাবালা কা'বার চারপাশ প্রদক্ষিণ করার সময় সহসা আরেক তওয়াফকারী জনৈক দরিদ্র আরব বেদুঈনের পায়ের তলে চাপা পড়ে জাবালার বহু মূল্যবান ইহরামের চাদরের এক কোণা। চাদরটি রাজার কাঁধের ওপর থেকে টান লেগে নিচে পড়ে যায়।

ক্রোধে অগ্নিশর্মা হয়ে ওঠেন জাবালা। লোকটির কোনো ওজর আপত্তি না শুনে জাবালা তার গালে প্রবল জোরে এক চড় বসিয়ে দেন।

লোকটি তৎক্ষণাৎ খলিফার নিকট গিয়ে নালিশ করে এবং এই অন্যায়ের বিচার চায়। খলিফা জাবালাকে তৎক্ষণাৎ ডেকে পাঠান এবং জিজ্ঞেস করেন যে, অভিযোগ সত্য কিনা। জাবালা উদ্ধত স্বরে জবাব দেন, 'সম্পূর্ণ সত্য। এই পাজিটা আমার চাদর পদদলিত করে আল্লাহর ঘরের সামনে আমাকে প্রায় উলঙ্গ করে দিয়েছে।'

খলিফা দৃঢ়তার সাথে জবাব দেন, 'কিন্তু এটা ছিল একটা দুর্ঘটনা।' জাবালা স্পর্ধিত কণ্ঠে বললেন, 'আমি তার পরোয়া করি না। কা'বা শরীফের সম্মানের খাতিরে ও কা'বার চত্বরে রক্তপাত নিষিদ্ধ থাকার কারণে আমি যথেষ্ট ক্রোধ সংবরণ করেছি। নচেত ওকে আমি চপেটাঘাত নয় হত্যাই করতাম।'

জাবালা হযরত ওমরের একজন শক্তিশালী মিত্র ও ব্যক্তিগত বন্ধু ছিলেন। খলিফা তাই একটু থামলেন এবং কিছু চিন্তাভাবনা করলেন। অতঃপর শান্ত অথচ দৃঢ় কণ্ঠে বললেন, 'জাবালা, তুমি নিজের অপরাধ স্বীকার করেছ। এখন বাদী ক্ষমা না করলে তোমাকে ইসলামী আইনের শাস্তি মাথা পেতে নিতে হবে এবং বাদীর হাতে পাল্টা একটা চপেটাঘাত খেতে হবে।'

স্তুভিত হয়ে জাবালা বললেন, 'আমি একজন রাজা। আর ও হচ্ছে একজন সাধারণ কৃষক।'

জাবালা বলল, 'যে ধর্মে রাজা ও একজন সাধারণ প্রজাকে সমান চোখে দেখা হয়, আমি তার আনুগত্য করতে পারি না। ঐ চাষা যদি আমাকে চপেটাঘাত করে, তবে আমি ইসলাম ত্যাগ করব।' (নাউয়ুবিল্লাহ)।

হযরত ওমর ততোধিক কঠোর স্বরে জবাব দিলেন, 'তোমার মতো হাজার জাবালাও যদি ইসলাম ত্যাগ করে চলে যায়, তবে সেই ভয়ে ইসলামের একটি

ক্ষুদ্রতম বিধিও লঙ্ঘিত হতে পারে না। তোমাকে এ শাস্তি পেতেই হবে। আর এ কথাও জেনে রেখ যে, ইসলাম কাউকে জোরপূর্বক মুসলমান বানায় না। তোমাকেও বানায়নি। কিন্তু ইসলাম ত্যাগ করা সহজ নয়। মুরতাদের শাস্তি মৃত্যুদণ্ড।’

হযরত ওমরের শেষোক্ত কথাটা শুনে জাবালা রাগে ও ভয়ে ঠক ঠক করে কাঁপতে লাগল। হযরত ওমরের নির্দেশে বাদী তৎক্ষণাৎ জাবালার মুখে ঠাস করে একটি চড় বসিয়ে দিয়ে প্রতিশোধ নিয়ে নিল।

জাবালা ক্রোধে চক্ষু লাল করে বাদীর দিকে একবার তাকাল। অতঃপর রাগে গরগর করতে করতে কাঁবার চত্বর ত্যাগ করে নীরবে চলে গেল। জানা যায়, এরপর জাবালা ইবনে আইহাম ইসলাম ত্যাগ করে প্রাণের ভয়ে সোজা রোম সম্রাটের কাছে গিয়ে আশ্রয় নেয় এবং সেখানেই জীবনের অবশিষ্ট দিনগুলো কাটায়।

**শিক্ষা :**

১. একজন ন্যায়বিচারককে ব্যক্তির প্রতি দুর্বলতা, সম্পর্ক ও তার পদের উর্ধ্বে উঠে বিচার করতে হয়।

২. কারও ইসলাম ত্যাগের হুমকিতে ভীত হওয়ার কিছু নেই। বরং এটি তার জন্যই ক্ষতিকর।

## ১৪. হযরত খাব্বাব (রা.) এর ত্যাগ ও কুরবানি

হযরত ওমর (রা.) ইসলাম গ্রহণের পূর্বে নগ্ন তরবারি হাতে নিয়ে যেদিন রাসূল (সা.) কে হত্যা করতে রওয়ানা হয়েছিলেন, সেইদিন পথিমধ্যে নিজের বোন ও ভগ্নিপতির ইসলাম গ্রহণের খবর পেয়ে সাময়িকভাবে গন্তব্য স্থান পরিবর্তন করেন এবং প্রথমে বোন ভগ্নিপতিকে ইসলাম গ্রহণের শাস্তি দেয়ার সিদ্ধান্ত নেন। বোনের বাড়িতে গিয়ে দেখতে পান তারা কুরআন পড়ছে। আর যে ব্যক্তি কুরআন পড়াচ্ছিলেন তিনি ছিলেন বিশিষ্ট সাহাবী খাব্বাব ইবনুল আরত। হযরত ওমর বাড়িতে প্রবেশ করা মাত্রই খাব্বাব প্রাণভয়ে আত্মগোপন করেন। কেননা বোন ভগ্নিপতি রক্তের টানে প্রাণে রক্ষা পেলেও সেদিন খাব্বাবের বাঁচার কোনো আশা ছিল না ওমরের নগ্ন তরবারি থেকে। সেদিন যা হবার তা হলো। প্রথম সাক্ষাতে বোন ভগ্নিপতি কিছু মার খেলেও কুরআনের

আয়াত ক'টি পড়ে তাঁর আমূল পরিবর্তন ঘটে এবং তিনি রাসূলের (সা.) কাছে গিয়ে ইসলাম গ্রহণ করেন। খাব্বাবের সাথে হযরত ওমরের সেইদিন হয়েছিল প্রথম সাক্ষাত। তারপর দরিদ্র খাব্বাবের ওপর মক্কার কোরেশদের আরো অনেক নির্যাতন হয়েছে। হযরত ওমর শুনেছেন, কিন্তু প্রতিকার করতে পারেননি।

কিন্তু আজ সম্পূর্ণ ভিন্ন পরিবেশে হযরত ওমরের সামনে বসে আছেন মহান ত্যাগী সাহাবী খাব্বাব। আজ ইসলাম বিজয়ী আসনে অধিষ্ঠিত। হযরত ওমর আজ মুসলিম জাহানের দ্বিতীয় খলিফা। তাওহীদ ও রিসালাতের সাথে সংঘর্ষে কুফর ও শিরক চূর্ণবিচূর্ণ হয়ে গেছে। জাহেলিয়াতের অন্ধকার দূর হয়ে ইসলামের আলোয় চারদিক উদ্ভাসিত। কিন্তু হযরত ওমরের (রা.) প্রবল ইচ্ছা, খাব্বাবের সেই নির্যাতনের কাহিনীগুলো শুনবেন। তাই জিজ্ঞেস করলেন, 'ইসলাম গ্রহণের পর আপনার ওপর কি ধরনের নির্যাতন হয়েছে, একটু বলবেন?'

হযরত ওমরের প্রশ্ন হযরত খাব্বাবকে আবার দূর অতীতে টেনে নিয়ে গেল এবং মক্কার ১৩ বছরের সেই রক্তক্ষরা দিনগুলোকে তার চোখের সামনে হাজির করল। সে নির্যাতন ঈমান ও একীনে উজ্জীবিত মর্মে মুমিনরা ছাড়া আর কেউ তের বছর তো দূরের কথা, তের দিনও বরদাশত করতে পারত না। হযরত খাব্বাব কোন কাহিনী দিয়ে শুরু করবেন এবং কোনটা বাদ দিয়ে কোনটা বলবেন। তাই ভেবে ভেবে কয়েক মুহূর্ত নীরবে কাটিয়ে দিলেন। শেষে বলতে চেয়েও বলতে পারলেন না। অবশেষে প্রশ্নের জবাব না দিয়ে নিজের জামা খুলে কোমরের একটি অংশ আমীরুল মুমিনীনকে দেখালেন। জায়গাটি ছিল যখমের চিহ্নে পরিপূর্ণ। আমীরুল মুমিনীন দেখা মাত্র চিৎকার করে বলে উঠলেন :

'আল্লাহ আকবার! এই নাকি আপনার কোমর। আমি তো আজ পর্যন্ত কোনো মানুষের এমন কোমর দেখিনি।'

খাব্বাব বললেন, 'জি, আমীরুল মুমিনীন, কতবার যে আমাকে লোহার বর্মসহ তপ্ত মরুভূমিতে টেনে হিচড়ে বেড়ানো হয়েছে এবং কতবার যে আমার কোমরের চর্বিতে ওদের আগুন নিভেছে, তা আমি স্মরণ করতে পারি না। তারপর আল্লাহর শোকর যে, একদিন আমরা সমস্ত নির্যাতন থেকে মুক্তি পেলাম।'

সহসা হযরত খাব্বাব কান্না শুরু করে দিলেন।

হযরত ওমর বললেন, 'খাব্বাব, আজ কেন কাঁদছেন?'

হযরত খাব্বাব চোখের পানি ফেলতে ফেলতে জবাব দিলেন :

‘আমি কাঁদছি এজন্য যে, জেহাদের পর জেহাদ করে বিজয় অর্জন করার পর আল্লাহ আমাদের জন্য সুখ সমৃদ্ধি ও ধন দৌলতের দ্বার খুলে দিয়েছেন। আমাদের মাথার ওপর সম্মান ও মর্যাদার পতাকা উড়ছে। আমার আশঙ্কা হয় যে আমাদের ক্ষুদ্র ও সং কাজগুলোর প্রতিদান দুনিয়াতেই দিয়ে দেয়া হচ্ছে কিনা এবং আখেরাতে আমাদের খালি হাতে উঠতে হবে কিনা।’

এই নিঃস্বার্থ ত্যাগী পুরুষ ইস্তিকালের সময় ওসিয়ত করেন, ‘আমাকে তোমরা লোকালয়ে নয়, কুফার জঙ্গলে কবর দিও। জঙ্গল আমাকে ডাকছে।’

তাঁর ইস্তিকালের পর একদিন হযরত আলী তাঁর কবরের কাছ দিয়ে যাওয়ার সময় চোখের পানি ফেলতে ফেলতে বললেন, ‘আল্লাহ খাববাবের ওপর রহমত করুন। তিনি স্বেচ্ছায় ও সানন্দে ইসলাম গ্রহণ করেন, সানন্দে হিজরত করেন, জেহাদে জীবন কাটান এবং মুসিবতের পর মুসিবত বরদাশত করেন। অথচ নিজের প্রয়োজনের চেয়ে এক চুল পরিমাণও বেশি সম্পদ যোগাড় করেননি।’

শিক্ষা :

১. জুলাম নির্যাতনে ধৈর্য ধারণ করাই মুমিনদের কর্তব্য।
২. সুখ, দুঃখ সকল অবস্থায় একইভাবে আল্লাহকে ভয় করা এবং শুধু আখিরাতের প্রতিদানের আশায় কাজ করা উচিত।

## ১৫. হযরত ওমরের (রা.) শাসনে প্রজাদের সম-অধিকার

মিশর বিজয়ী সেনাপতি আমর ইবনুল আস তখন মিশরের গভর্নর। তাঁর শাসনে মিশরের জনগণ বেশ শান্তিতেই কাটাচ্ছিল। কিন্তু তাঁর একটা বেয়াড়া ছেলে তাঁর ন্যায়পরায়নতার সুনাম প্রায় নষ্ট করতে উদ্যত হয়েছিল। সে যখনই পথে বেরুত, সবাইকে নিজের চালচলন দ্বারা বুঝিয়ে দিত যে, সে কোনো সাধারণ মানুষ নয়, বরং গভর্নরের ছেলে।

একদিন সে জনৈক মিশরীয় খ্রিস্টানদের ছেলেকে প্রহার করল। দরিদ্র মিশরীয় গভর্নরের কাছে তার ছেলের বিরুদ্ধে অভিযোগ করার সাহস পেল না। তাই নীরবে হজম করল। কয়েকদিন পর তার জনৈক প্রতিবেশী মদীনা থেকে ফিরে এসে জানাল যে, খলিফা ওমর অত্যন্ত ন্যায়পরায়ন শাসক। তিনি জাতি-ধর্ম নির্বিশেষে সকলের সমঅধিকার নিশ্চিত করেন এবং কেউ কারো ওপর জুলুম

করেছে জানলে তাকে কঠোর শাস্তি দেন। এ কথা শুনে ঐ মিশরীয় খ্রিস্টান একটি উটের পিঠে চড়ে দীর্ঘ সতেরো দিন চলার পর মদীনায় খলিফার কাছে পৌঁছলো এবং গভর্নরের ছেলের বিপক্ষে মোকদ্দমা দায়ের করল। হযরত ওমর তৎক্ষণাৎ হযরত আমার ইবনুল আস ও তার ছেলেকে মদীনায় ডাকিয়ে আনলেন। অতঃপর বিচার বসল।

সাক্ষ্য প্রমাণ দ্বারা হযরত আমার ইবনুল আসের (রা.) ছেলে দোষী সাব্যস্ত হলো। খলিফা ওমর (রা.) অভিযোগকারীর ছেলেকে দেখিয়ে বললেন, সে তোমাকে যেভাবে যে কয়বার প্রহার করেছে তুমিও সেই কয়বার তদ্রূপ প্রহার কর। ছেলেটি যথাযথভাবে প্রতিশোধ নিল।

তারপর খলিফা বললেন, 'প্রজারা শাসকের দাস নয়। শাসকরা প্রজাদের সেবক। প্রজারা ঠিক তেমনি স্বাধীন যেমন তাদের মায়ের পেট থেকে ভ্রূমিষ্ট হবার সময় স্বাধীন ছিল।'

শিক্ষা : মুসলিম শাসকদের কর্তব্য নিজেকে পদমর্যাদায় শ্রেষ্ঠ না ভেবে নিজেকে জনগণের সেবক মনে করা।

## ১৬. হযরত ওমর (রা.) ও গভর্নর হরমুযান

পারস্যের নাহাওয়ান্দ প্রদেশের গভর্নর হরমুযান ইসলামের এক কট্টর দূশমন ছিল। সে মুসলমানদের সাথে পারস্যের যুদ্ধ বাধানোর প্রধান হোতা ছিল। সে নিজেও খুবই শৌর্য বীর্যের সাথে যুদ্ধ করেছিল। অবশেষে হরমুযান মুসলমানদের হাতে ধরা পড়ে ও কারাবন্দী হয়। কারাবন্দী হবার পর সে ভেবেছিল, এবার আর তার রেহাই নেই। মুসলমানরা হয় তাকে দাস হিসেবে বিক্রি করে দেবে, নচেত মৃত্যুদণ্ড দেবে। কারণ তার অতীত কার্যকলাপ দ্বারা সে মুসলমানদের সাথে নিজের সম্পর্ক খুবই খারাপ করে ফেলেছিল। কিন্তু তাকে এই দুই শাস্তির কোনোটাই দেয়া হলো না। তাকে কিছু করার বিনিময়ে মুক্তি দেয়া হলো। হরমুযান নিজের রাজধানীতে ফিরে এল, তৎক্ষণাৎ আরো দ্বিগুণ শক্তি নিয়ে বিদ্রোহী তৎপরতা শুরু করল এবং এক বিরাট সেনাবাহিনী নিয়ে মুসলমানদের সাথে যুদ্ধ করতে ফিরে এল। এবারও হরমুযান ধরা পড়ে বন্দী হলো। হরমুযানকে পাকড়াও করে যখন হরত ওমরের কাছে আনা হলো তখন হযরত ওমর তাঁর উপদেষ্টাদের সাথে পরামর্শ করছিলেন। বন্দী এবার তার মৃত্যুদণ্ড সম্পর্কে প্রায় নিশ্চিত ছিল। প্রতি মুহূর্তে সে তাই মৃত্যুর আশঙ্কা



করছিল।

সহসা হযরত ওমর জিজ্ঞেস করলেন : তুমিই নাহাওয়ান্দের বিদ্রোহী গভর্নর?  
হরমুযান : জ্বী, আমিই।

হযরত ওমর : তুমিই কি সেই ব্যক্তি, যে বারবার মুসলমানদের সাথে চুক্তি  
ভঙ্গ করে?

হরমুযান : জ্বী, আমিই।

হযরত ওমর : এ ধরনের অপরাধের শাস্তি যে মৃত্যুদণ্ড, তা তুমি জান?

হরমুযান : জ্বী, জানি।

হযরত ওমর : বেশ, তাহলে তুমি কি এই শাস্তি এম্ফুনি নিতে প্রস্তুত?

হরমুযান : আমি প্রস্তুত। তবে মৃত্যুর পূর্বে আপনার নিকট আমার একটি মাত্র  
আবেদন আছে।

হযরত ওমর : সেটি কী?

হরমুযান : আমি খুব পিপাসা বোধ করছি। আমি এক গ্লাস পানি চাইতে  
পারি?

হযরত ওমর : অবশ্যই।

এই সময় হযরত ওমরের নির্দেশে তাঁকে এক গ্লাস পানি দেয়া হলো।

হরমুযান : আমীরুল মু'মিনীন, আমি আশঙ্কা করছি যে, আমি পানি খাওয়ার  
সময়ই আমার মস্তক ছিন্ন করা হতে পারে।

হযরত ওমর : কখনো নয়। তোমার এই পানি খাওয়া শেষ হবার আগে কেউ  
তোমার চুলও স্পর্শ করবে না।

হযরমুযান : (একটু খেমে) আমীরুল মু'মিনীন, আপনি আমাকে কথা  
দিয়েছেন যে, আমি এই পানি খাওয়া শেষ না করা পর্যন্ত আপনারা আমার চুলও  
স্পর্শ করবেন না। আমি পানি পান করব না। (এই বলেই সে পানি ঢেলে ফেলে  
দিল)। এখন আপনি আমাকে হত্যা করতে পারেন না।

হযরত ওমর : (মুচকি হেসে) ওহে গভর্নর, এটা তোমার চালাকি। যাহোক,  
ওমর যখন কথা দিয়েছে, তখন সে তার কথা রাখবেই। যাও, তুমি মুক্ত।

এর কিছুকাল পরে একদিন হরমুযান একদল সঙ্গী পরিবেষ্টিত হয়ে আবার  
মদীনায় এল এবং হযরত ওমরের সাথে সাক্ষাত করল। সে বলল, 'আমীরুল  
মুমিনীন, এবার আমি নতুন জীবনের সন্ধানে এসেছি। আমাদের সবাইকে  
ইসলামে দীক্ষিত করুন।'

শিক্ষা : মুমিনের আচরণ ও ওয়াদা রক্ষা করা এমন একটি গুণ যা শত্রুকে

মনের দিক থেকে পরাজিত করে এবং সে অন্তরঙ্গ বন্ধুতে পরিণত হয় ।

## ১৭. হযরত ওমরের (রা.) ন্যায়বিচারের আর একটি উদাহরণ

একবার কিছু সুগন্ধী দ্রব্য বাহরাইন থেকে হযরত ওমরের নিকট পাঠানো হলো । তিনি সমবেত জনতাকে লক্ষ্য করে বললেন, ‘তোমাদের মধ্যে এমন কেউ আছে কি, যে এই সুগন্ধী দ্রব্যটিকে মেপে সমান ভাগ করে মুসলমানদের মধ্যে বণ্টন করতে পারে?’

তঁার স্ত্রী হযরত আতেকা বললেন, ‘আমিরুল মুমিনীন, আমি পারব ।’

হযরত ওমর বললেন, ‘আতেকা ছাড়া আর কেউ আছে কি?’

হযরত আতেকা বললেন, ‘আমীরুল মুমিনীন, আমি মেপে দিলে অসুবিধা কী?’

হযরত ওমর বললেন, ‘আমার আশঙ্কা হয় যে, মাপার সময় জিনিসটা তুমি হাত দিয়ে ধরবে এবং তোমার হাত সুবাসিত হয়ে যাবে । অতঃপর সেই সুবাসিত হাত তুমি মুখে মেখে নেবে এবং সুগন্ধী উপভোগ করবে । অন্যদের চাইতে এতটুকু বাড়তি সুবিধাও তুমি পেয়ে যাও, তা আমি পছন্দ করি না ।’

**শিক্ষা :**

একজন সাধারণ মুসলমানের জন্য স্বীয় স্ত্রীর বা অধীনস্থদের ওপর এতো কঠোরতা আরোপ না করলেও চলত । কিন্তু খলিফা বা যে কোনো স্তরের নেতৃবৃন্দের পক্ষে এরূপ কঠোর ও সূক্ষ্ম সতর্কতামূলক ব্যবস্থা গ্রহণ করা জরুরি । কারণ নেতামাত্রই আদর্শ ও অনুকরণীয় ব্যক্তি । তার পক্ষে নিজেকে ও নিজের ঘনিষ্ঠজনদেরকে বিন্দুমাত্রও ছাড় দেয়ার অবকাশ নেই ।

## ১৮. হযরত ওমর কর্তৃক স্বীয় পুত্রের বিচার

একবার হযরত ওমরের নিকট একটা অভিযোগ এল যে, তার পুত্র আবু শাহমা মদ খেয়েছে । অভিযোগটা অন্যান্য লোকেরও কানে গেল । অনেকে ফিসফিসানি শুরু করে দিল যে, এবার দেখব খলিফার আইনের শাসন নিজের ছেলের ক্ষেত্রে কতোটা কার্যকর হয় । কিন্তু তাদের ধারণাটা অচিরেই মাঠে মারা গেল । কেননা অন্যরা শৈথিল্য দেখাতে পারে এই আশঙ্কায় হযরত ওমর তঁার ছেলের মামলা আদালতে না পাঠিয়ে নিজের হাতে তুলে নিলেন ।

ছেলের মদ খাওয়ার সত্যতা প্রমাণিত হলো । ইসলামী আইনে এর শাস্তি ৮০ ঘা বেত্রদণ্ড । এবারও হযরত ওমর অন্যের ওপর নির্ভর করলেন না । কেননা

অন্যরা দুর্বলতা দেখাতে পারে। তিনি নিজ হাতেই পুরো ৮০টা বেত্রাঘাত নিজের ছেলের পিঠে লাগালেন। আবু শাহমা এই শাস্তিতে মারা গেল। কিন্তু হযরত ওমর আল্লাহর শোকর আদায় করলেন যে, তিনি তাকে এমন কঠিন পরীক্ষায় উত্তীর্ণ করেছেন। কোনো কোনো রেওয়াজে আছে যে, ৮০টি বেত্রাঘাতের কয়েকটি বাকি থাকতেই ছেলে মারা গেলে হযরত ওমর তার কবরের ওপর বাকি বেত্রাঘাতগুলো করেন।

শিক্ষা : ইসলামী আইন ও নীতিমালা প্রয়োগের ব্যাপারে কোনো আপোষের অবকাশ নেই। আল্লাহ বলেন, 'হে মুমিনগণ, তোমরা আল্লাহর সাক্ষী হিসেবে ইনসাফ কয়েম কর, এমনকি তা যদি তোমাদের নিজেদের, পিতামাতার ও ঘনিষ্ঠজনদের বিরুদ্ধেও যায়।

## ১৯. সততার পুরস্কার

রাত প্রায় দুপুর গড়িয়ে চলেছে। ঘুমন্ত মদীনা নগরী। এরই অলিগলি দিয়ে প্রতিদিনের মতো ধীর পদে হেঁটে চলেছেন ছদ্মবেশী খলিফা হযরত ওমর। খোঁজ-খবর নিচ্ছেন প্রজাদের। হঠাৎ একটি কুঁড়েঘর থেকে ফিসফিস করে একটি কথোপকথন তার কানে ভেসে এল। খলিফা দাঁড়িয়ে গেলেন পুরো কথোপকথন শুনতে। এক বৃদ্ধা মহিলা তার মেয়েকে বলছে, 'দুধ বেঁচতে দেয়ার সময় একটু পানি মিশিয়ে দিসনে কেন? তুই তো জানিস, কী অভাব আমাদের। ঐটুকু দুধে আর কটা পয়সা হবে। একটু পানি মেশালে কিছুটা স্বচ্ছলতার মুখ দেখা যেত।'

'কিন্তু তুমি খলিফার আদেশ ভুলে গেলে, আশী? তিনি যে বলেছেন কেউ যেন দুধের সাথে পানি না মেশায়।'

'বলেছেন, তাতে কী হয়েছে? খলিফা বা তার কোনো কর্মচারী তো আর দেখতে আসছেন না আমরা কী করছি।'

'কিন্তু আশী, তিনি বা তার কোনো কর্মচারী দেখুক বা না দেখুক, তার আদেশ তো প্রত্যেক মুসলমানের মেনে চলা দরকার। তা ছাড়া খলিফা যদি নাও জানেন, আল্লাহ তো জানবেন। তিনি তো সবকিছু দেখেন, শোনেন এবং জানেন।'

খলিফা নীরবে প্রস্থান করলেন। নিজের সঙ্গীকে জিজ্ঞেস করলেন, 'শুনলে তো? এই মেয়েটাকে কী পুরস্কার দেয়া যায় তার সততার জন্য?'

‘তাকে বেশ বড়সড় একটা পুরস্কার দেয়া উচিত। ধরুন, এক হাজার দিরহাম।’

‘না, তা যথেষ্ট নয়। আমি তাকে সততার সর্বোচ্চ পুরস্কার দেব। আমি তাকে আপন করে নেব।’

খলিফার সঙ্গী অবাক হয়ে ভাবতে লাগল, খলিফা কী পুরস্কার দিতে চান?

পরদিন সকালে খলিফা মেয়েটাকে তার দরবারে ডেকে পাঠালেন। মেয়েটি ভয়ে কাঁপতে কাঁপতে এসে হাজির হলো মুসলিম সাম্রাজ্যের মহাশক্তিধর শাসকের সামনে।

খলিফা তাঁর ছেলের ডাকলেন। তাদেরকে শোনালেন গত রাতে তার শোনা আলাপচারিতার কথা। তারপর বললেন, ‘হে আমার ছেলেরা, আমি চাই তোমাদের কোনো একজন এই মেয়েটিকে স্ত্রী হিসেবে গ্রহণ করুক। কেননা এর চেয়ে ভালো কোনো পাত্রী আমি তোমাদের জন্য যোগাড় করতে পারব বলে মনে হয় না।’

একটি ছেলে পিতার প্রস্তাবে রাজি হলো। মেয়েটিও সম্মতি দিল। আর সে খলিফার সম্মানিত পুত্রবধূতে পরিণত হলো। বর্ণিত আছে যে, পরবর্তীকালে দ্বিতীয় ওমর নামে পরিচিত ও পঞ্চম খলিফায়ে রাশেদ নামে আখ্যায়িত মহান শাসক ওমর বিন আবদুল আযীয এই মেয়েরই দৌহিত্র ছিলেন।

**শিক্ষা :** এই ঘটনাটি একদিকে যেমন প্রাথমিক যুগের মুসলমানদের সততার এক অত্যুজ্জ্বল দৃষ্টান্ত তুলে ধরে, অপরদিকে তেমনি মুসলিম নেতৃত্বদ সততার কেমন মর্যাদা দিতেন ও কদর করতেন, তাও এ ঘটনা থেকে সুস্পষ্টভাবে জানা যায়। মনে রাখতে হবে, গুণের কদর দিতে না পারলে সমাজে সদগুণের বিকাশ ঘটা সম্ভব নয়।

## ২০. কাযী শুরাইহের ন্যায়বিচার

একবার হযরত ওমর (রা.) জনৈক বেদুইনের কাছ থেকে একটি ঘোড়া কিনলেন। ঘোড়ার দাম পরিশোধ করেই তিনি ঘোড়ায় চড়লেন এবং তাকে হাঁকিয়ে নিয়ে গেলেন। কিছুদূর যেতেই ঘোড়াটি হেঁচট খেয়ে খোঁড়া হয়ে গেল। তিনি তৎক্ষণাৎ ঘোড়াকে পেছনের দিকে ফিরিয়ে ঐ বেদুইনের কাছে নিয়ে গেলেন। হযরত ওমর ভেবেছিলেন ঘোড়াটির আগে থেকেই পায়ে কোনো খুত ছিল, যা সামান্য ধাক্কা খেয়ে ভেঙ্গে গেছে। তিনি ঘোড়ার মালিককে বললেন,

‘তোমার ঘোড়া ফেরত নাও । এর পা ভাঙ্গা ।’

সে বলল, ‘আমীরুল মুমিনীন! আমি ফেরত নিতে পারব না । কারণ আমি যখন বিক্রি করেছি, তখন ঘোড়াটি ভালো ছিল ।’

হযরত ওমর বললেন, ‘ঠিক আছে । একজন শালিশ মানা হোক । সে আমাদের বিরোধ মিটিয়ে দেবে ।’

লোকটি বলল, শুরাইহ বিন হারিস কান্দী নামে একজন ভালো জ্ঞানী লোককে আমি চিনি । তাকেই শালিশ মানা হোক । হযরত ওমর রাজি হলেন । উভয়ে শুরাইহের নিকট উপস্থিত হলেন । প্রথমে বেদুইন বাদী হয়ে নালিশ করলে শুরাইহ খলিফাকে জিজ্ঞেস করলেন, ‘আমীরুল মুমিনীন! আপনি কি ঘোড়াটি সুস্থ অবস্থায় কিনেছিলেন?’

হযরত ওমর বললেন, হ্যাঁ ।

শুরাইহ বললেন, তাহলে হয় আপনি ঘোড়াটির মূল্য দিয়ে কিনে নিন । নচেত যে অবস্থায় কিনেছিলেন সেই অবস্থায় ফেরত দিন ।

এ কথা শুনে খলিফা ওমর (রা.) চমৎকৃত হয়ে বললেন, ‘এটাই সঠিক বিচার বটে । তুমি সম্পূর্ণ নির্ভুল মত ও ন্যায্য রায় দিয়েছ । তুমি কুফা চলে যাও । আজ থেকে তুমি কুফার বিচারপতি ।’

সেই থেকে দীর্ঘ ষাট বছর যাবত পর্যন্ত তিনি মুসলিম জাহানের বিচারপতির দায়িত্ব পালন করেন । যতদূর জানা যায়, হযরত আলীর সময়ে তিনি খলিফার বিরুদ্ধে অনুরূপ আর একটি রায় দিয়ে প্রধান বিচারপতির পদে উন্নীত হন । তারপর উমাইয়া শাসনামলে হাজ্জাজ বিন ইউসুফের অবর্ণনীয় অত্যাচারে বিরক্ত হয়ে তিনি নিজে পদত্যাগ না করা পর্যন্ত কোনো শাসকই তাকে পদচ্যুত করতে সাহস পায়নি ।

হযরত আলী (রা.) একবার তার অতিপ্রিয় একটি বর্ম হারিয়ে ফেলেন । কিছুদিন পর জনৈক ইহুদির হাতে সেটি দেখেই চিনে ফেলেন । লোকটি কুফার বাজারে ওটা বিক্রয় করতে এনেছিল । হযরত আলী তাকে বললেন, ‘এতো আমার বর্ম! আমার একটি উটের পিঠ থেকে এটি অমুক রাতে অমুক জায়গায় পড়ে গিয়েছিল ।’

ইহুদি বলল, ‘আমীরুল মুমিনীন! ওটা আমার বর্ম এবং আমার দখলেই রয়েছে ।’

হযরত আলী পুনরায় বললেন, ‘এটি আমারই বর্ম । আমি এটাফে কাউকে দানও করিনি, কারো কাছে বিক্রয়ও করিনি । এটি তোমার হাতে কিভাবে গেল?’

ইহুদি বলল, 'চলুন, কাযীর দরবারে যাওয়া যাক ।'  
হযরত আলী (রা.) বললেন, 'বেশ, তাই হোক । চল ।'  
তারা উভয় গেলেন বিচারপতি শুরাইহের দরবারে ।

বিচারপতি শুরাইহ উভয়ের বক্তব্য জানতে চাইলে উভয়ে বর্মটি নিজের বলে যথারীতি দাবি জানালেন ।

বিচারপতি খলিফাকে সম্বোধন করে বললেন, 'আমীরুল মুমিনীন! আপনাকে দু'জন সাক্ষী উপস্থিত করতে হবে ।'

হযরত আলী বললেন, 'আমার ভৃত্য কিম্বার এবং ছেলে হাসান সাক্ষী আছে ।'  
শুরাইহ বললেন, 'আপনার ভৃত্যের সাক্ষ্য নিতে পারি । কিন্তু ছেলের সাক্ষ্য নিতে পারব না । কেননা বাপের জন্য ছেলের সাক্ষ্য শরীয়তের আইনে অচল ।'

হযরত আলী বললেন, 'বলেন কি আপনি? একজন বেহেশ্তবাসীর সাক্ষ্য চলবে না? আপনি কি শোনেননি, রাসূল (সা.) বলেছেন, হাসান ও হোসেন বেহেশ্তের যুবকদের নেতা?'

শুরাইহ বললেন, 'শুনেছি আমীরুল মুমিনীন! তথাপি আমি বাপের জন্য ছেলের সাক্ষ্য গ্রহণ করব না ।'

অণন্যোপায় হযরত আলী ইহুদিকে বললেন, 'ঠিক আছে । বর্মটা তুমিই নিয়ে নাও । আমার কাছে এই দু'জন ছাড়া আর কোনো সাক্ষী নেই ।'

ইহুদি তৎক্ষণাৎ বলল, 'আমীরুল মুমিনীন! আমি স্বয়ং সাক্ষ্য দিচ্ছি যে, ওটা আপনারই বর্ম । কি আশ্চর্য! মুসলমানদের খলিফা আমাকে কাযীর দরবারে হাজির করে আর সেই কাযী খলিফার বিরুদ্ধে রায় দেয় । এমন সত্য ও ন্যায়ের ব্যবস্থা যে ধর্মে রয়েছে আমি সেই ইসলামকে গ্রহণ করছি । আশহাদু আল লা-ইলাহা ইল্লাল্লাহ... ।'

অতঃপর বিচারপতি শুরাইহকে সে জানাল যে, 'খলিফা সিফফীন যুদ্ধে যাওয়ার সময় আমি তার পিছু পিছু যাচ্ছিলাম । হঠাৎ তার উটের পিঠ থেকে এই বর্মটি পড়ে গেলে আমি তা তুলে নিই ।'

হযরত আলী (রা.) বললেন, 'বেশ! তুমি যখন ইসলাম গ্রহণ করেছ, তখন আমি ওটা তোমাকে উপহার দিলাম ।'

এই শ্লোকটি পরবর্তীকালে নাহরাওয়ানে হযরত আলীর নেতৃত্বে খারেজীদের সাথে যুদ্ধ করার সময় শহীদ হয় ।

আর একবার কাযী শুরাইহের ছেলে জনৈক আসামির জামিন হয় । আসামি জামিনে মুক্তি পেয়ে পালিয়ে গেলে শুরাইহ আসামির বিনিময়ে ছেলেকে জেলে

আটকান। যতদিন আসামিকে খুঁজে পাওয়া যায়নি ততদিন সে জেলে আটক এবং কাষী সাহেব স্বয়ং বন্দী ছেলের জন্য জেলখানায় খাবার এগিয়ে দিয়ে আসতেন।

কাষী গুরাইহের আর এক ছেলে একবার এক গোত্রের সাথে জমিজমা সংক্রান্ত ব্যাপারে মোকদ্দমার সম্মুখীন হন। মোকদ্দমাটি গুরাইহের আদালতেই আসার কথা ছিল। তাই পিতার সাথে আগেভাগেই পরামর্শ করার জন্য ছেলোটিকে একদিন বলল, আব্বা, আপনি আমার মামলার বিবরণটি পুরোপুরি শুনে আমাকে বলুন আমার জেতার সম্ভাবনা আছে কিনা। যদি থাকে তাহলে আমি মামলাটিকে রুজু করব। নচেত বিরত থাকব।

বিচারপতি গুরাইহ পুরো ঘটনা শুনে ছেলেকে মামলা রুজু করার পরামর্শ দিলেন।

যথাসময়ে মামলার শুনানি শুরু হলো। শুনানি শেষে গুরাইহ নিজের ছেলের বিরুদ্ধে রায় দিলেন।

রাতে বাসায় এসে ছেলে পিতার কাছে অনুযোগের সুরে বলল, ‘আব্বা, আপনি আমাকে এভাবে অপমান করলেন! আমি যদি আগেভাগে আপনার পরামর্শ না নিতাম, তা হলেও একটা সাক্ষ্য ছিল। কিন্তু...।’

কাষী গুরাইহ বললেন, ‘হে বৎস! তুমি আমার কাছে পৃথিবীর সবার চাইতে প্রিয়; কিন্তু তোমার চেয়েও আল্লাহ আমার কাছে অনেক বেশি প্রিয়। আমি জানতাম, তোমার বিপক্ষের দাবিই সঠিক ও ন্যায্যসঙ্গত। কিন্তু তোমাকে সেটা জানিয়ে দিলে তুমি তাদের সাথে এমনভাবে আপস করে নিতে পারতে, যার ফলে তাদের প্রাপ্যের অংশ বিশেষ তোমাকে দিতে হতো। তেমনটি ঘটলে আমার ওপর আল্লাহ নারাজ হতেন। এ জন্যই আমি তোমাকে মামলা আদালতে আনবার পরামর্শ দিয়েছিলাম। এখন তোমার খুশি হওয়া উচিত যে, তুমি অন্যায়ভাবে অন্যের সম্পত্তি দখল করা থেকে রক্ষা পেলে।’

বর্ণিত আছে যে, বিচারপতি গুরাইহ যখনই কোনো মামলার শুনানি গ্রহণ করতেন, তখন সংশ্লিষ্ট সাক্ষীদেরকে সাক্ষ্য দানের ভয়াবহ পরিণাম স্মরণ করিয়ে দিতেন এবং বলতেন, ‘তোমাদের সাক্ষ্যের ওপরই এই মামলার রায় নির্ভরশীল। এখনো সময় আছে, তোমরা ইচ্ছা করলে সাক্ষ্য না দিয়েও চলে যেতে পার।’

এরপরও যখন সাক্ষীরা সাক্ষ্য দিতে চাইত, তিনি সাক্ষ্য নিতেন এবং রায় দেয়ার সময় বিজয়ী পক্ষকে হুঁশিয়ার করে দিতেন যে, ‘শুধুমাত্র সাক্ষীর সাক্ষ্যের

ভিত্তিতেই আমি এই রায় দিলাম। আল্লাহ যা হারাম করেছেন, এই রায় দ্বারা তা হালাল হবে না।’

সম্ভবত: এসব দুর্লভ গুণ বৈশিষ্ট্যের কারণেই হাজার হাজার জ্ঞানীশুণি সাহাবী বেঁচে থাকা সত্ত্বেও হযরত ওমরের আমল থেকে শুরু করে হাজ্জাজ বিন ইউসুফের শাসনামল পর্যন্ত দীর্ঘ ৬০ বছরব্যাপী কাযী শুরাইহ মুসলিম জাহানের প্রধান বিচারপতির পদে বহাল থাকেন।

শিক্ষা : একজন ন্যায়বিচারককে সর্বাবস্থায় শুধু আল্লাহকেই ভয় করা প্রয়োজন এবং সকল পরিস্থিতিতে শুধু আল্লাহর আইনকেই বাস্তবায়ন করতে হবে।

## ২১. হযরত উসমানের দানশীলতা ও মিতব্যয়িতা

একদিন এক নিঃস্ব লোক রাসূলের নিকট এসে কিছু সাহায্য চাইল। তখন রাসূলের নিকট কিছুই ছিল না, তিনি লোকটাকে হযরত উসমানের নিকট পাঠালেন। দরিদ্র ব্যক্তিটি হযরত উসমানের গৃহে উপস্থিত হয়ে দেখে যে একদল পিঁপড়ে বেশ কিছু শস্য একটি স্তূপ থেকে গর্তে নিয়ে যাচ্ছে। হযরত উসমান শস্যগুলো একত্রিত করে কিছু শস্য পিঁপড়ের গর্তের কাছে ছড়িয়ে বাকিগুলো আবার স্তূপে রেখে দিচ্ছিলেন। লোকটি ধারণা করল যে, হযরত উসমান বড় কৃপণ। সে মনে মনে ভাবল যে দরিদ্র হওয়া সত্ত্বেও নিজে পিঁপড়ের মুখ থেকে শস্য কেড়ে নিত না। তাই কিছুই না চেয়ে লোকটি চলে গেল।

পরদিন লোকটি আবার রাসূলের নিকট উপস্থিত হলো এবং কিছু চাইল। সে রাসূলকে জানাল যে, কৃপণ উসমানের (রা.) নিকট কিছুই আশা করা যায় না, তাই সে কিছুই চায়নি। রাসূল (সা.) তাকে আবার হযরত উসমানের নিকট পাঠালেন। অনিচ্ছা সত্ত্বেও লোকটি গেল এবং দেখতে পেল যে, হযরত উসমান তার চাকরকে বাতির সলতে উঁচু করে দেওয়ার দায়ে বকাঝকা করছেন। কারণ তাতে অধিক তেল খরচ হয়। দরিদ্র লোকটি মনে মনে ভাবল যে, তার বাড়িতে আলো আরও উজ্জ্বলভাবে জ্বলে এবং সে কখনও এরূপ তেলের হিসাব করে না। হযরত উসমানের কৃপণতা সম্বন্ধে তার ধারণা আরো জোরদার হলো। কিছু না চেয়েই লোকটি আবার রাসূলের নিকট ফিরে গেল। হযরত উসমানের বিরুদ্ধে কৃপণতার অভিযোগ শুনে রাসূল (সা.) মৃদু হাসলেন এবং লোকটিকে আবার বললেন, হযরত উসমানের কাছে ফিরে যেতে এবং কিছু চাইতে।



তৃতীয়বার লোকটি উসমানের নিকট এসে দেখে যে, হযরত উসমানের বাড়িতে তুলা শুকাতে দেয়া হয়েছে। ঢেকে দেয়া হয়েছিল জাল দিয়ে। জালের নিচ হতে কিছু কিছু তুলা বাতাসে উড়িয়ে নিচ্ছিল। হযরত উসমান সেই তুলাগুলোকে সংগ্রহ করে এনে আবার জালের নিচে রাখছিলেন। লোকটির মন অত্যন্ত বিরূপ হয়ে উঠল। ভাবল এমন কৃপণও কিছু কিছু দান করতে পারে? তবুও যেহেতু রাসূল তাকে তিনবার উসমান (রা.)-এর কাছে পাঠিয়েছেন, তাই সে গিয়ে কিছু চাইল।

হযরত উসমান (রা.) ভাবলেন, লোকটিকে কি দেওয়া যায়, যে লোককে রাসূল তার নিকট সাহায্যের জন্য পাঠিয়েছিলেন, তার চাইতে সাহায্য নেয়ার যোগ্য আর কে হতে পারে? তখন দেখা গেল বেশ দূরে একটি সরু রেখা। রেখাটিকে একটি উটের কাফেলা বলেই মনে হলো। কিছুক্ষণ পর হযরত উসমান বুঝতে পারলেন, যে কাফেলা বাণিজ্যের উদ্দেশ্যে সিরিয়ায় গিয়েছিল সেটাই ফিরে আসছে। হযরত উসমান তাকে লিখে দিলেন যে, ঐ কাফেলার সবচেয়ে ভালো উটটি এবং যার ওপর সবচেয়ে বেশি দ্রব্য সম্ভার আছে সেটিই সে নিতে পারে। লোকটি প্রথম মনে করল যে, হযরত উসমান তামাশা করছেন। কিছুক্ষণ কথাবার্তার পরও লোকটি তার দান সম্পর্কে নিঃসন্দেহ হতে পারল না। সন্দিদ্ধ চিন্তে লোকটি গেল কাফেলার নিকট। সবচেয়ে ভালো এবং প্রথম উটটিই তার পছন্দ হলো। সেটি সে নিতে চাইল। কাফেলার পরিচালক অনুমতি দিল। কিন্তু মরুভূমিতে চলাকালে প্রথম উটটিকে কাফেলা থেকে সরিয়ে নেওয়া সহজ নয়। সবগুলো উটই প্রথমটিকে অনুসরণ করল। কাফেলার পরিচালক তখন লোকটিকে বলল যে, আস্তানায় ফিরে যাওয়ার পর উটটি দেয়া হবে। হযরত উসমানের নিকট খবর দেওয়া হলো যে, একটি উটকে কাফেলা থেকে সরিয়ে নেয়া সম্ভব হয়নি। তাই তখন তার নির্দেশ পালন করা হয়নি। খবর শুনে হযরত উসমান (রা.) বললেন, হয়তো আল্লাহর ইচ্ছা এই যে, কাফেলার সবগুলো উটই লোকটি পাবে। অতঃপর তিনি কাফেলার পরিচালককে নির্দেশ দিলেন যে, সবগুলো উটই যেন লোকটিকে দিয়ে দেয়া হয়। লোকটি তো বিস্ময়ে অবাক। অতো বড় কৃপণের কি করে এতো বড় দান করা সম্ভব হলো? হতবাক হয়ে সে তার পূর্ববর্তী তিন অভিজ্ঞতা জানাল এবং দু'প্রকার ব্যবহারের তাৎপর্য কি জানতে চাইল।

হযরত উসমান যে জওয়াব দিলেন তার সারমর্ম এই যে, আল্লাহ বিশ্বের সমস্ত সম্পদের মালিক, মানুষ হলো তত্ত্বাবধানকারী বা পাহারাদার। সে শুধুমাত্র আল্লাহর ইচ্ছানুসারে সম্পদ নিজের জন্য এবং সমাজের অপরাপর ব্যক্তির

কল্যাণের জন্য ব্যয় করতে পারবে। মানুষের কাজ হলো আল্লাহর সম্পদ নিজের মর্জিমতো রক্ষণাবেক্ষণ করা। যদি কোনোব্যক্তির তত্ত্বাবধানকালে কোনো সম্পদের এককণা মাত্র বিনষ্ট হয় তবে তার জন্য আল্লাহর কাছে জওয়াবদিহি করতে হবে। সম্পদের অধিকার শুধু বিশেষ সুবিধা নয়, বরং একটি বিরাট দায়িত্ব।’

শিক্ষা : মুমিনকে অবশ্যই দানশীল হতে হবে, কিন্তু সে কখনো অপচয়কারী ও অপব্যয়কারী হতে পারবে না। কেননা ‘অপচয় ও অপব্যয়কারী শয়তানের ভাই।’ (আল-কুরআন)

## ২২. সাতশো গুণ লাভ

হযরত আবু বকর (রা.) এর খেলাফতকালে এক দুর্ভিক্ষ সংঘটিত হয়। খাদ্রাদ্রব্য একেবারেই দুর্লভ হয়ে পড়ে এবং মানুষের দুঃখ দুর্দশা চরম আকার ধারণ করে। এই সময়ে হযরত উসমানের প্রায় এক হাজার মন গমের একটি চালান বিদেশ থেকে মদিনায় পৌঁছল। শহরে কয়েকজন ব্যবসায়ী তাঁর কাছে এল। তারা তাঁর সমস্ত গমের চালান শতকরা ৫০ ভাগ লাভে কিনে নেয়ার প্রস্তাব দিল। সেই সাথে তারা এও ওয়াদা করল যে, তারা দুর্ভিক্ষ পীড়িত জনগণের দুর্দশা লাঘবের জন্যই এটা কিনতে চাইছে।

হযরত উসমান বললেন, ‘তোমরা যদি আমাকে এক হাজার গুণ লাভ দিতে পার, তবে আমি দিতে পারি। কেননা অন্য একজন আমাকে সাতশো গুণ লাভ দিতে চেয়েছে।’

ব্যবসায়ীরা বলল, ‘বলেন কি? চালান মদিনায় আসার পর তো আমরাই প্রথম আপনার কাছে এলাম। সাতশো গুণ লাভের প্রস্তাব কে কখন দিল?’

হযরত উসমান বললেন, ‘এই প্রস্তাব আমি পেয়েছি আল্লাহর কাছ থেকে। আমি এই চালানের সমস্ত গম বিনা মূল্যে গরিবদের মধ্যে বিতরণ করব। এর বিনিময়ে আল্লাহ আমাকে সাতশো গুণ বেশি পূণ্য দেবেন বলে ওয়াদা করেছেন।’

শিক্ষা : পবিত্র কুরআনে সূরা বাকারার ২৬১ নং আয়াতে এই ওয়াদার উল্লেখ রয়েছে। হযরত উসমান (রা.) সম্ভবত ঐদিকেই ইঙ্গিত করেছেন। হযরত উসমানের মহানুভবতার এই ঘটনা বিপন্ন মানুষের সেবাকে ইসলাম কত গুরুত্ব দেয়, তারই প্রমাণ বহন করে। জনসেবা ও ত্যাগের এই মনোভাব বিশেষভাবে

ধনীদেব মध्ये सङ्गारित हওয়া खुबई जरुरि ।

## २३. हयरत आलीर (रा.) खोदाडीति

हयरत आली (रा.) तखन मुसलिम जाहानेर खलिफा । एकदिन तार छोट भाई आकील तार काछे ऐसे निजेर अनेक अभाव अडियोगेर कथा जानालेन एवं ताके किछु साहाय्य देयार अनुरोध करलेन । हयरत आली बललेन, जनगणेर सम्पदेर कोषागार बाईतुल माल थेके आमि तोमाके एक कपर्दकओ दिते पारब ना । मासेर शेष पर्यस्त अपेक्षा कर । आमि बेतन पेले ता थेके तोमाके किछु देया यावे । हयरत आकील बललेन, आपनि निजेर बेतन अग्रिम निये निन । हयरत आली बललेन, आमार बेतन अन्य सकलेर बेतनेर साथे आसवे । अग्रिम नेयार कोनो अधिकार आमार नेई । हयरत आकील नाछोड़ाबान्दा । तिनि बललेन, एकटा किछु करून । आमार संसार चलछे ना । येभावेई होक आमाके किछु साहाय्य दिन । हयरत आली बललेन, बाजारेर कोन दोकान थेके ताला डेङ्गे किछु निये याओ । आकील बललेन, ओटा तो चुरि बा डकाति बले गण्य हवे । हयरत आली (रा.) बललेन, एई मुहूर्ते आमि यदि तोमाके बाईतुल माल थेके किछु निये देई तबे ताओ चुरि बा डकाति बले गण्य हवे । केनना ओटा जनगणेर सम्पद एवं जनगण आमाके ओखान थेके नेयार अनुमति देयनि ।

अगत्या हयरत आकील हयरत मोयाबियार निकट गेले तिनि ताके एकशो दिरहाम दिये बललेन, तुमि मसजिदे दाँडिये सकलके जानावे ये, आलीर काछे साहाय्य चेये पाईनि, किञ्च मोयाबियार काछे चेये पेयेछि ।

इत्यबसरे आकील हयरत आलीर बङ्गव्येर यौञ्जिकता बूढते पारलेन । तिनि मसजिदे दाँडिये बललेन, आमि आलीर काछे अन्यायभावे साहाय्य चेयेछिलाम । किञ्च तिनि खोदाडीतिके अग्राधिकार दियेछेन । आर मोयाबियार काछे साहाय्य चाईले तिनि खोदाडीतिर परिवर्ते आमाके अग्राधिकार दियेछेन ।

## २४. अधिक सम्पदेर मोह ओ कूपणतार परिणाम

एकवार सालाबा ईबने हातेम आनसारी नामक एक साहाबी रासूल (सा.) एर निकट उपस्थित हये बललेन, हे आल्लाहर रासूल (सा.), आमार जन्य दोग्या करून, येन आमि अनेक बड़ धनी हते पारि । रासूल (सा.) बललेन, आमि ये नीति अनुसरण करे चलछि, ता कि तोमार पछन्द नय? आल्लाहर कसम, आमि

ইচ্ছা করলে মদীনার পাহাড়গুলো সোনা হয়ে আমার সাথে সাথে ঘুরত। কিন্তু এমন ধনী হওয়া আমার পছন্দ নয়। এ কথা শুনে লোকটি ফিরে গেল, কিন্তু কিছুক্ষণ পর আবার ফিরে এল। এবার সে বলল, হে রাসূল (সা.), আমি ওয়াদা করছি যে, আমি যদি ধনী হয়ে যাই তাহলে প্রত্যেক হকদারকে তার প্রাপ্য পৌঁছে দেব। এ কথা শুনে রাসূল (সা.) তার বিপুল ধনসম্পদ হোক— এই মর্মে দোয়া করলেন। এর ফলে তার ছাগল ভেড়া ইত্যাদিতে অসাধারণ প্রবৃদ্ধি দেখা দিল। ফলে মদীনার যে জায়গায় সে বাস করত তাতে তার আর স্থান সংকুলান হলো না। সে মদীনার বাইরে চলে গেল। তবে যোহর ও আসরের নামায মদীনার মসজিদে নববীতে পড়ত। আর অন্যান্য নামায সে নিজের বাসস্থানেই পড়ত।

এরপর তার গৃহপালিত পশুর সংখ্যা আরো বেড়ে গেল। এর ফলে নতুন জায়গাটিও তার জন্য সঙ্কীর্ণ হয়ে দাঁড়াল। তাই সে মদীনা থেকে আরো দূরে যেয়ে থাকতে আরম্ভ করল। সেখান থেকে সে শুধু জুমার নামায মদীনায়ে এসে পড়তে পারত। অন্যান্য নামায নিজের বাসস্থানেই পড়ত। ক্রমে তার সম্পদ আরো বেড়ে গেল তাকে আরো দূরে চলে যেতে হলো। সেখান থেকে সে জুমার নামাযেও মসজিদে আসতে পারত না।

কিছুদিন পর রাসূল (সা.) সালাবা সম্পর্কে লোকদের কাছে খোঁজ-খবর জানতে চাইলেন। তাঁকে জানানো হলো যে, সালাবার সম্পদ এতো বেশি হয়েছে যে, শহরের কাছে কোথাও তার স্থান সংকুলান হয়নি। তাই এখন সে আর এদিকে আসে না। এ কথা শুনে রাসূল (সা.) তিনবার বললেন, 'ইয়া ওয়াইহা সালাবা!' অর্থাৎ সালাবার জন্য আফসোস!

ঠিক এই সময় যাকাতের আয়াত নাযিল হয়। তাতে রাসূল (সা.) কে মুসলমানদের কাছ থেকে যাকাত আদায়ের নির্দেশ দেয়া হয়। তিনি যাকাত আদায়ের জন্য মুসলমানদের কাছে লোক পাঠালেন। কয়েকজন লোককে সালাবার কাছে পাঠালেন। আর কয়েকজনকে বনু সুলাইমের আর এক ধনীর কাছেও পাঠালেন।

যখন আদায়কারীরা সালাবার কাছে গিয়ে যাকাত চাইল এবং রাসূল (সা.) এর লিখিত ফরমান দেখাল; তখন সালাবা বলতে লাগল, এতো জিযিয়া কর হয়ে গেল, যা অমূলসামনদের কাছ থেকে আদায় করা হয়। তারপর বলল, এখন আপনারা যান। ফেরার পথে আসবেন। তখন তারা চলে গেলেন।

পক্ষান্তরে বনু সুলাইমের ধনী লোকটি রাসূল (সা.) এর আদেশ শুনে নিজের গৃহপালিত পশুর মধ্য থেকে বেছে বেছে উৎকৃষ্ট মানের পশু যাকাত হিসেবে দিলেন। আদায়কারীরা বললেন, আমাদের প্রতি নির্দেশ রয়েছে, উৎকৃষ্ট মানের

পশু যেন না নেই। বনু সুলাইমের ধনী লোকটি বলল, আমি নিজের ইচ্ছায় দিচ্ছি। দয়া করে গ্রহণ করুন।

অতঃপর আদায়কারীগণ সালাবার কাছে গেলে সে বলল, 'কই, দেখি যাকাতের আইন আমাকে দেখাও। তারপর তা দেখে আবার বলতে লাগল, আমি তো মুসলমান। অমুসলমানদের মতো জিযিয়া কেন দিতে যাব? যা হোক, আপনারা এখন যান। আমি পরে ভেবেচিন্তে জানাব।

যখন আদায়কারীরা রাসূল (সা.) এর কাছে ফিরে গেল। তখন সকল বৃত্তান্ত শুনে রাসূল (সা.) আবার তিনবার বললেন, 'সালাবার জন্য আক্ষেপ!' আর সুলাইমের জন্য দোয়া করতে লাগলেন। এরপর সালাবার প্রতি ইঙ্গিত করে সূরা তাওবার একটি আয়াত নাযিল হয়। তাতে এই ধরনের লোকদের নিন্দা করা হয়, যারা সম্পদশালী হলে হকদারদের হক দেবে বলে ওয়াদা করেছে, কিন্তু পরে সেই ওয়াদা ভুলে গিয়ে কৃপণতা করতে আরম্ভ করেছে। আয়াতে বলা হয় যে, এ ধরনের লোকদের মনে আল্লাহ মোনাফেকী গভীরভাবে বদ্ধমূল করে দিয়েছেন।

রাসূল (সা.) যখন সালাবার জন্য তিনবার আক্ষেপ প্রকাশ করলেন এবং কুরআনের আয়াতও নাযিল হলো, তখন সেখানে সালাবার একজন আত্মীয় ছিল। সে গিয়ে সালাবাকে সব জানাল এবং তাকে তার আচরণের জন্য তিরস্কার করল। সালাবা ভীষণ ঘাবড়ে গেল এবং মদীনায় হাজির হয়ে বলল, 'হে রাসূল, আমার যাকাত গ্রহণ করুন। রাসূল (সা.) বললেন, আল্লাহ তোমার যাকাত গ্রহণ করতে নিষেধ করেছেন। এ কথা শুনে সালাবা আফসোস করতে লাগল।

রাসূল (সা.) বললেন, এটা তো তোমার নিজের কৃতকাজের ফল। আমি তোমাকে হুকুম করেছিলাম। তুমি তা মাননি। এখন আর তোমার যাকাত কবুল হতে পারে না। তখন সালাবা অকৃতকার্য হয়ে ফিরে গেল। এর কিছুদিন পরই রাসূল (সা.) ইস্তেকাল করেন। এরপর সালাবা যথাক্রমে হযরত আবু বকর ও ওমর (রা.) কে যাকাত গ্রহণ করার আবেদন জানায়। কিন্তু তারা রাসূল (সা.) এর নীতি অনুসরণ করেন। হযরত ওসমানও তার যাকাত গ্রহণ করতে অস্বীকার করেন। হযরত উসমানের খেলাফত আমলেই তার মৃত্যু হয়। (মায়া'রিফুল কুরআনের সৌজন্যে)

শিক্ষা : হালাল সম্পদে ধনী হওয়ার আশা ও চেষ্টা করা যদিও বৈধ। তথাপি এত বেশি সম্পদের লোভ করা উচিত নয়, যা মানুষকে ইসলাম থেকে দূরে সরিয়ে দেয়। আর প্রাপ্ত সম্পদের যাকাত ও সদকা দিতে বিন্দুমাত্র কুষ্ঠাবোধ করা উচিত নয়।

## ২৫. হযরত আবুযার গিফারীর ইসলাম গ্রহণ

হযরত আবুযার গিফারী তার ইসলাম গ্রহণের ঘটনা নিম্নরূপে বর্ণনা করেছেন : আমি যখন জানতে পারলাম যে, মক্কায় এমন এক ব্যক্তির আবির্ভাব ঘটেছে, যিনি নিজেকে নবী বলে দাবি করেন, তখন আমি আমার ভাইকে ঐ ব্যক্তির (মুহাম্মাদ (সা.) নিকট পাঠলাম্ বেং তাঁর সম্পর্কে বিস্তারিত জেনে আসতে বললাম। সে গেল, তাঁর সাথে দেখা করল এবং ফিরে এসে আমাকে জানাল যে, তিনি এমন এক ব্যক্তি যিনি সৎ কাজের আদেশ দেন এবং অসৎ কাজ থেকে নিষেধ করেন। কিন্তু আমি তার এই বিবরণে সন্তুষ্ট হতে পারলাম না।

অগত্যা আমি নিজে কিছু খাবার ও একটা লাঠি নিয়ে মক্কা অভিমুখে রওনা হলাম। মক্কায় পৌঁছে আমি এক বিব্রতকর অবস্থায় পড়ে গেলাম। আমি তাকে চিনতামও না, আবার কোরেশদের ভয়ে কাউকে তার কথা জিজ্ঞেসও করতে পারছিলাম না। তাই আমি যমযমের পানি পান করে দিন কয়েক মসজিদুল হারামেই কাটিয়ে দিলাম।

একদিন আলী আমার কাছ দিয়ে যাওয়ার সময় আমার দিকে তাকিয়ে বললেন, মনে হয় তুমি বহিরাগত। আমি বললাম, সত্যিই তাই। তিনি বললেন, তবে আমার বাড়ি চল। আমি তার সাথে চললাম। পথে তিনিও আমাকে কিছু জিজ্ঞেস করলেন না, আমিও তাকে কিছু বললাম না। আলীর বাড়িতে রাত কাটিয়ে ভোরবেলা আবার মসজিদুল হারামে গিয়ে হাজির হলাম। ভাবলাম, সুযোগমতো কাউকে জিজ্ঞেস করব। কিন্তু এদিনও তেমন সুযোগ হলো না।

আলী আজও আমার কাছ দিয়ে যাওয়ার সময় বললেন, লোকটা কি থাকার কোনো জায়গাই পেল না যে, মসজিদুল হারামেই ক্রমাগত থাকতে আরম্ভ করেছে? আমি বললাম, না ভাই, জায়গা পাইনি। তিনি বললেন, আমার সাথে চল। পথিমধ্যে তিনি বললেন, তোমার হয়েছেটা কী? কী চাও এখানে? আমি বললাম, আমার ব্যাপারটা যদি গোপন রাখার প্রতিশ্রুতি দিতে পারেন তাহলে বলতে পারি। তিনি প্রতিশ্রুতি দিলেন। আমি তখন তাকে সমস্ত কথা খুলে বললাম। তিনি বললেন, ঠিক আছে। তুমি আমার সাথে চল। আমি সেই ব্যক্তির কাছেই যাচ্ছি। আমি যেখানে প্রবেশ করব, তুমিও সেখানে প্রবেশ করবে। আর পথিমধ্যে যদি তোমার জন্য ক্ষতিকর কোনো লোক দেখি, তাহলে আমি জুতো ঠিক করার ভান করে বসে পড়ব, তুমি চলতে থাকবে। তাহলে কেউ তোমাকে আমার সাথী বলে সন্দেহ করবে না।

এরপর আমি তাকে অনুসরণ করে চলতে লাগলাম। অবশেষে তিনি রাসূল

(সা.) এর কাছে উপনীত হলেন এবং আমিও উপনীত হলাম। আমি নবীকে বললাম, আমার সামনে ইসলাম পেশ করুন। তিনি পেশ করলেন। আমি তৎক্ষণাৎ ইসলাম গ্রহণ করলাম। তিনি আমাকে বললেন, হে আবু যার, তোমার ইসলাম গ্রহণের ব্যাপারটা আপাতত কারো কাছে প্রকাশ না করে সরাসরি নিজ মাতৃভূমিতে ফিরে যাও। তারপর আমাদের বিজয় হলে এসো। আমি বললাম, আল্লাহর কসম, এই বাণী আমি নিশ্চয়ই লোক সমক্ষে প্রকাশ করব। এই বলে মসজিদুল হারামে এসে কুরাইশদেরকে সম্বোধন করে বললাম, হে কুরাইশগণ, শোন, আমি সাক্ষ্য দিচ্ছি যে, আল্লাহ ছাড়া কোনো মাবুদ নেই এবং মুহাম্মদ আল্লাহর বান্দা ও রাসূল।

আর যায় কোথায়। আমাকে ধর্মত্যাগী বলে গাল দিয়ে সবাই ধর ধর বলে তেড়ে এলো এবং আমাকে পিটিয়ে আধমরা করে ফেলল। আব্বাস এসে আমাকে রক্ষা করলেন। পরদিন আবার একইভাবে ঘোষণা করলাম এবং কুরাইশদের হাতে একইভাবে গণপিটুনি খেলাম। এই ছিল আমার ইসলাম গ্রহণের প্রথম অবস্থা।

**শিক্ষা :** অতিমাত্রায় বৈরী পরিবেশে নিজের ইসলামী পরিচয় প্রকাশ করে বিপদ ডেকে আনা অত্যন্ত দুঃসাহসিকতার কাজ। হযরত আবু যারের সিদ্ধান্তটি ছিল নিতান্ত ব্যক্তিগত ও ব্যতিক্রমধর্মী। সাধারণ মানুষের পক্ষে এরূপ করা উচিত নয়।

## ২৬. পিতামাকে অসন্তুষ্ট করার পরিণাম

ইমাম তাবরানী ও ইমাম আহমাদ একটি ঘটনা বর্ণনা করেছেন। রাসূল (সা.) এর যুগে আলকামা নামে মদীনায এক যুবক বাস করত। সে নামায, রোযা ও সদকার মাধ্যমে আল্লাহ তায়ালার ইবাদাত বন্দেগীতে অতিশয় অধ্যবসায় সহকারে লিপ্ত থাকত। একবার সে কঠিন রোগে আক্রান্ত হলে তার স্ত্রী রাসূল (সা.) এর কাছে খবর পাঠাল যে, 'আমার স্বামী আলকামা মুমূর্ষু অবস্থায় আছে। হে রাসূল, আমি আপনাকে তার অবস্থা জানানো জরুরি মনে করছি।' রাসূল (সা.) তৎক্ষণাৎ হযরত আম্মার, সুহাইব ও বিলাল (রা.) কে তার কাছে পাঠালেন। তাদেরকে বলে দিলেন যে, 'তোমরা তার কাছে গিয়ে তাকে কালেমায়ে শাহাদাত পড়াও।' তারা গিয়ে দেখলেন, আলকামা মুমূর্ষু অবস্থায়

রয়েছে। তাই তারা তাকে 'লা-ইলাহা ইল্লাল্লাহ' পড়াতে চেষ্টা করতে লাগলেন। কিন্তু সে কোনোমতেই কলেমা উচ্চারণ করতে পারছিল না। অগত্যা তারা রাসূল (সা.) কে খবর পাঠালেন যে, আলকামার মুখে কলেমা উচ্চারিত হচ্ছে না। যে ব্যক্তি এই সংবাদ নিয়ে গিয়েছিল, তার কাছে রাসূল (সা.) জিজ্ঞেস করলেন, 'আলকামার পিতামাতার মধ্যে কেউ কি জীবিত আছে?' সে বলল, 'হ্যাঁ রাসূল, তার কেবল বৃদ্ধা মা বেঁচে আছে।' রাসূল (সা.) তৎক্ষণাত তাকে আলকামার মায়ের কাছে পাঠালেন এবং বললেন, 'তাকে গিয়ে বল যে, তুমি যদি রাসূল (সা.) এর কাছে যেতে পার তবে চল, নচেত অপেক্ষা কর, তিনি তোমার সাথে সাক্ষাত করতে আসছেন।' দূত আলকামার মায়ের কাছে উপস্থিত হয়ে রাসূল (সা.) যা বলেছিলেন তা জানালে আলকামার মা বললেন, রাসূল (সা.) এর জন্য আমার প্রাণ উৎসর্গ হোক। তার কাছে বরং আমিই যাব।' বৃদ্ধা লাঠি ভর দিয়ে রাসূল (সা.) এর কাছে এসে সালাম করলেন। রাসূল (সা.) সালামের জবাব দিয়ে বললেন, 'ওহে আলকামার মা, আমাকে আপনি সত্য কথা বলবেন। আর যদি মিথ্যা বলেন, তবে আল্লাহর কাছ থেকে আমার কাছে ওহি আসবে। বলুন তো, আপনার ছেলে আলকামার স্বভাব-চরিত্র কেমন ছিল?' বৃদ্ধা বললেন, 'হে আল্লাহর রাসূল, সে প্রচুর পরিমানে নামায, রোযা ও সদকা আদায় করত।' রাসূল (সা.) বললেন, তার প্রতি আপনার মনোভাব কী? বৃদ্ধা বললেন, 'হে আল্লাহর রাসূল, আমি তার প্রতি অসন্তুষ্ট।' রাসূল (সা.) বললেন, 'কেন?' বৃদ্ধা বললেন, 'সে তার স্ত্রীকে আমার ওপর অগ্রাধিকার দিত এবং আমার আদেশ অমান্য করত।' রাসূল (সা.) বললেন, 'আলকামার মায়ের অসন্তোষ হেতু কলেমা উচ্চারণে আলকামার জিহ্বা আড়ষ্ট হয়ে গেছে।' তারপর রাসূল (সা.) বললেন, 'হে বিলাল, যাও, আমার জন্য প্রচুর পরিমাণে কাষ্ঠ যোগাড় করে নিয়ে এস।'।

বৃদ্ধা বললেন, 'হে আল্লাহর রাসূল, কাষ্ঠ দিয়ে কী করবেন?' রাসূল (সা.) বললেন, 'আমি ওকে আপনার সামনেই আগুন দিয়ে পুড়িয়ে দেব।' বৃদ্ধা বললেন, 'হে আল্লাহর রাসূল। আমার সামনেই আমার ছেলেকে আগুন দিয়ে পোড়াবেন। তা আমি সহ্য করতে পারব না।' রাসূল (সা.) বললেন, 'ওহে আলকামার মা, আল্লাহর আযাব এর চেয়েও কঠোর এবং দীর্ঘস্থায়ী। এখন আপনি যদি চান যে, আল্লাহ আপনার ছেলেকে মাফ করে দিক, তাহলে তাকে আপনি মাফ করে দিন এবং তার ওপর সন্তুষ্ট হয়ে যান। নচেত যে আল্লাহর হাতে আমার প্রাণ তার কসম, যতক্ষণ আপনি তার ওপর অসন্তুষ্ট থাকবেন,



ততোক্ষণ নামায-রোযা ও সদকা দিয়ে আলকামার কোনো লাভ হবে না । একথা শুনে আলকামার মা বললেন, ‘হে আল্লাহর রাসূল, আমি আল্লাহকে, আল্লাহর ফেরেশতাদেরকে এবং এখানে যে সকল মুসলমান উপস্থিত তাদের সকলকে সাক্ষী রেখে বলছি যে, আমি আমার ছেলে আলকামার ওপর সন্তুষ্ট হয়ে গিয়েছি ।’ রাসূল (সা.) বললেন, ‘ওহে বিলাল, এবার আলকামার কাছে যাও । দেখ, সে লা-ইলাহা ইল্লাল্লাহ বলতে পারে কিনা । কেননা, আমার মনে হয়, আলকামার মা আমার কাছে কোনো লাজ-লজ্জা না রেখে যথার্থ কথাই বলেছে ।’ হযরত বিলাল (রা.) তৎক্ষণাত গেলেন । শুনতে পেলেন, ঘরের ভেতর থেকে আলকামা উচ্চস্বরে উচ্চারণ করছে, ‘লা-ইলাহা ইল্লাল্লাহ’ । অতঃপর বিলাল গৃহে প্রবেশ করে উপস্থিত জনতাকে বললেন, শুনে রাখ, আলকামার মা অসন্তুষ্ট থাকার কারণে সে প্রথমে কলেমা উচ্চারণ করতে পারেনি । পরে তিনি সন্তুষ্ট হয়ে যাওয়ায় তার জিহ্বা কলেমা উচ্চারণে সক্ষম হয়েছে । অতঃপর আলকামা সেই দিনই মারা যায় এবং রাসূল (সা.) নিজে উপস্থিত হয়ে তার গোসল ও কাফনের নির্দেশ দেন, জানাযার নামায পড়ান এবং দাফনে শরীক হন । অতঃপর তার কবরে দাঁড়িয়ে রাসূল (সা.) বলেন, ‘হে আনসার ও মুহাজেরগণ! যে ব্যক্তি মায়ের ওপর স্ত্রীকে অগ্রাধিকার দেয় তার ওপর আল্লাহ, ফেরেশতাগণ ও সকল মানুষের অভিসম্পাত! আল্লাহ তার পক্ষে কোনো সুপারিশ কবুল করবেন না । কেবল তওবা করে ও মায়ের প্রতি সদ্যবহার করে তাকে সন্তুষ্ট করলেই নিস্তার পাওয়া যাবে । মনে রাখবে, মায়ের সন্তুষ্টিতেই আল্লাহর সন্তোষ এবং মায়ের অসন্তোষেই আল্লাহর অসন্তোষ ।’

**শিক্ষা :**

১. আল্লাহর ইবাদতের সঙ্গে সঙ্গে পিতা-মাতাকে সন্তুষ্ট রাখার প্রতি সর্বোচ্চ গুরুত্ব দেওয়া উচিত এবং মৃত্যুর পূর্বে পিতামাতার কাছ থেকে ক্ষমা চেয়ে নেয়া উচিত ।

২. মুমূর্ষু ব্যক্তিকে কলেমা পড়ানোর চেষ্টা করা ঘনিষ্ঠ লোকদের কর্তব্য ।

১১

## ২৭. কুরাইশ নেতাগণের গোপনে রাসূলুল্লাহর কুরআন পাঠ শ্রবণ

বর্ণিত আছে যে, একদিন রাতে আবু সুফিয়ান বিন হারব, আবু জাহল বিন হিশাম এবং আখনাস বিন শুরাইক-এই তিনজন শীর্ষস্থানীয় কুরাইশ নেতা রাসূল (সা.) এর কুরআন পাঠ শ্রবণের কৌতূহল কোনোভাবেই চেপে রাখতে না পেরে

গোপনে বেরিয়ে পড়ল। এ সময় তিনি নিজের বাড়িতে তাহাজ্জদের নামাযে কুরআন পড়ছিলেন। এই তিনজনের প্রত্যেকে এমন একটি জায়গা বেছে নিয়ে বসে পড়ল, যেখান থেকে সহজেই তেলাওয়াত শুনা যায়। অথচ নিজেদের অবস্থা গোপন থাকে। তারা এমন দূরত্বে অবস্থান করতে লাগল যে, কে কোথায় বসেছে তা কেউ জানতে পারেনি। রাতভর তারা পরমাগ্রহ সহকারে কুরআন পাঠ শুনল। সকালে বাড়ির দিকে ফেরার পথে পরস্পরের সাক্ষাত হলো। প্রত্যেকে পরস্পরকে তিরস্কার করে বলতে লাগল, 'ছি, ছি, এমন কাজ আর কখনো করো না। তোমাদের বখাটে চেলা-চামুড়াদের কেউ যদি তোমাদের এভাবে দেখে ফেলে, তাহলে আর রক্ষা নেই। তারা একটা খারাপ ধারণা নিয়ে বসবে।' তারপর সবাই চলে গেল।

পরদিন রাতে আবার তিনজনই নিজ নিজ গোপন জায়গায় এসে বসল এবং সারারাত ধরে রাসূল (সা.) এর কুরআন পড়া শুনল। সকালবেলা আবার পরস্পরে সাক্ষাত এবং একই ধরনের আলাপ বিনিময় হলো। এবার তারা চূড়ান্তভাবে অঙ্গীকার করল যে, এমন কাজ আর কখনো করব না। তারপর সবাই বিদায় নিল।

পরদিন সকালে বৃদ্ধ আখনাস তার লাঠিটা ভর করে রওনা হলো। প্রথমে আবু সুফিয়ানের কাছে হাজির হলো। সে বলল, 'ওহে হানযালার বাবা! মুহাম্মাদের কাছ থেকে যা শুনলে সে সম্পর্কে তোমার মতামত কি?' আবু সুফিয়ান বলল, 'আল্লাহর কসম, আমি কিছু কথা এমন শুনেছি, যা আমি জানি এবং তার অর্থও বুঝি। আবার কিছু কথা এমনও শুনলাম যার অর্থ বুঝলাম না। আখনাস বলল, 'আল্লাহর কসম, আমার অবস্থাও তদ্রূপ।'

এরপর তার কাছ থেকে বিদায় নিয়ে সে আবু জাহলের কাছে গেল। আবু জাহলকে বলল, 'ওহে আবুল হিকাম, মুহাম্মাদের কাছ থেকে যা শুনলে সে সম্পর্কে তোমার কি অভিমত?' সে বলল, 'কি আর বলব আমরা আর বনু আবদ মানাফ-এ দুটি কুরাইশী গোত্র আবহমান কাল ধরে মান-ইজ্জত নিয়ে প্রতিদ্বন্দ্বিতা করে এসেছি। আপ্যায়ন ও ভোজের আয়োজন তারাও করেছে, আমরাও করেছি। সামাজিক দায়দায়িত্ব তারাও বহন করেছে, আমরা করেছি। সব কিছুতে যখন আমরা সমানে সমানে টক্কর দিয়ে চলেছি, তখন হঠাৎ তারা বলে উঠল, আমাদের ভেতর একজন নবী আছে, যার কাছে আকাশ থেকে ওহী আসে। এত বড় একটা জিনিসে আমরা তাদের সমকক্ষ হব কি করে? আল্লাহর কসম, আমরা তার ওপর কক্ষনো ঈমান আনব না এবং কক্ষনো তাকে স্বীকৃতি

দেব না ।' ও কথা শুনে তার কাছ থেকে বিদায় নিল । (সীরাতে ইবনে হিশাম)

**শিক্ষা :** এ ঘটনা থেকে স্পষ্ট হয়ে গেছে যে, আল্লাহর দ্বীনের বিরোধিতা যারাই করে, তারা তাকে (দ্বীনকে) সত্য জেনেই নিছক কায়েমী স্বার্থের কারণেই করে । তাছাড়া তাদের ভেতরে একটা হীনমণ্যতা সক্রিয় থাকে । আবু জাহল প্রমুখ কুরাইশ নেতাদের মধ্যে হীনমণ্যতার কারণ ছিল এই যে, ওহির কারণে বনু হাশেমের সাথে তাদের সমকক্ষতা ও ভারসাম্য নষ্ট হয়ে যায় এবং বনু হাশেমের শ্রেষ্ঠত্ব অর্জিত হয় । আর এ যুগে কোনো ইসলামী আন্দোলনের বিরোধীরা হীনমণ্যতায় ভুগবে এজন্য যে, ইসলামী আন্দোলনের লোকেরা এতো উন্নতমানের চরিত্র ও নিঃস্বার্থ জনসেবার নমুনা পেশ করে থাকে, যার সমকক্ষ তারা কখনো হতে পারবে না । তাই ইসলামী চরিত্র সম্পন্ন লোকদের হাতে কখনো ক্ষমতা গেলে দেশবাসী দুর্নীতিমুক্ত শাসনের স্বাদ পাবে । ফলে ধর্মহীন শক্তিগুলোকে জনগণ আর কক্ষনো ক্ষমতায় আসতে দেবে না । এ কারণে এ যুগের প্রতিষ্ঠিত জাহেলী শক্তিও সর্বশক্তি দিয়ে ইসলাম প্রতিষ্ঠার বিরোধিতা করে থাকে ।

এ ঘটনা থেকে আরো জানা যায় যে, ইসলামের শত্রুদেরও সাধারণ মনস্তত্ত্ব হলো ইসলামের তাত্ত্বিক বিষয় তাদের জানার প্রাচলন কৌতূহল থাকে । নেতৃত্বানীয় লোকেরা এ কৌতূহল পার্থিব স্বার্থের কারণে দমন করে থাকে । কিন্তু শত্রুতা যতই তীব্র হয়, তাদের প্রভাবাধীন সাধারণ মানুষের মনে ইসলামকে জানার আগ্রহ ততোই প্রবল হয়ে থাকে ।

## ২৮. তাবুক অভিযানে অনুপস্থিত তিন সাহাবীর তওবার কাহিনী

হযরত রাসূলুল্লাহ সাল্লাল্লাহু আলাইহি ওয়াসাল্লামের সেনাপতিত্বে যে কয়টি যুদ্ধ বা যুদ্ধাভিযান সংঘটিত হয়, তন্মধ্যে তাবুক যুদ্ধাভিযান অন্যতম । যদিও প্রতিপক্ষের অনুপস্থিতির কারণে এ যুদ্ধ শেষ পর্যন্ত সংঘটিত হয়নি । কিন্তু তথাপি যুদ্ধের নির্ধারিত স্থান তাবুক-এ মুসলিম বাহিনীকে সর্বোচ্চ প্রস্তুতি নিয়ে ও সর্বাধিক গুরুত্ব দিয়ে সদলবলে যেতে হয়েছিল । মক্কা বিজয়ের পর এটাই ছিল ইসলামের সর্বশেষ বৃহত্তম যুদ্ধাভিযান । এই অভিযানের জন্য সাহাবায়ে কেরামের কারো শারীরিক অনুপস্থিতির অনুমতি তো ছিলই না, অধিকন্তু প্রত্যেক সাহাবীকে সাধ্যমতো সর্বোচ্চ পরিমাণ আর্থিক সাহায্য দেয়ার আহ্বান জানানো

হয়েছিল। তাবুক অভিযানের প্রাক্কালে যখন আর্থিক সাহায্য চাওয়া হয়, তখন হযরত ওমর (রা.) নিজের সমস্ত অস্থাবর সম্পত্তির অর্ধেক আর হযরত আবুবকর (রা.) সমস্ত অস্থাবর সম্পত্তি দান করেছিলেন।

কিন্তু তিনজন সাহাবী এই যুদ্ধে অপ্রত্যাশিতভাবে বিনা ওজরে অনুপস্থিত ছিলেন। তারা হলেন কা'ব বিন মালেক, হিলাল ইবনে উমাইয়া ও মুরারা বিন রাবী। এই তিনজন সাহাবী সম্পর্কে অপর কোনো সাহাবীর এমনকি স্বয়ং রাসূল (সা.)-এরও কখনো কোনো অভিযোগ বা সংশয় ছিল না। তাঁদের নিষ্ঠা ও আন্তরিকতায় কখনো কোনো খাদ ছিল না। তথাপি সর্বোচ্চ গুরুত্ববহ এই অভিযানে তারা সম্পূর্ণ বিনা ওজরে অনুপস্থিত থাকেন। এ সংক্রান্ত বিশদ ঘটনা স্বয়ং হযরত কা'ব ইবনে মালেক বর্ণনা করেছেন। এই বর্ণনা নিম্নরূপ :

কা'ব বলেন, রাসূলুল্লাহ (সা.) এর নেতৃত্বে যতগুলো যুদ্ধ সংঘটিত হয়েছে, তন্মধ্যে তাবুক ও বদর ছাড়া আর কোনোটাতেই আমি অনুপস্থিত থাকিনি। তবে বদর যুদ্ধে যারা অনুপস্থিত ছিলেন তাদের কাউকে আল্লাহর আক্রমণের সম্মুখীন হতে হয়নি। কেননা বদর যুদ্ধে রাসূল (সা.) এর উদ্দেশ্য ছিল কুরাইশদের কাফেলাকে ধাওয়া করা। এরূপ করতে গিয়ে হঠাৎ এক সময় যুদ্ধ বেঁধে যায়। আকাবার রাতে রাসূল (সা.) ইসলামের ওপর দৃঢ়ভাবে টিকে থাকা এবং ইসলাম ও রাসূল (সা.) কে সাহায্য করার জন্য মোট যে ৭০ জনের কাছ থেকে শপথ গ্রহণ করেন, তাদের মধ্যে আমিও ছিলাম। ঐ রাতটি আমার কাছে যুদ্ধের চেয়েও প্রিয় ছিল।

তাবুক যুদ্ধের সময় আমি অপেক্ষাকৃত শক্তিশালী ও স্বচ্ছল অবস্থায় ছিলাম। এ সময় আমার কাছে দুটো সওয়ারী ছিল, যা এর আগে কখনো ছিল না। রাসূল (সা.)-এর নিয়ম ছিল, যখনই কোনো যুদ্ধের সিদ্ধান্ত নিতেন, কখনো পরিষ্কারভাবে স্থান, এলাকা বা কোনদিকে যাওয়া হবে তাও পর্যাপ্ত জানাতেন না। কিন্তু তাবুক যুদ্ধের সময়টা ছিল ভীষণ গরমের সময়। পথও ছিল দীর্ঘ এবং তার কোথাও গাছপালা, লতাপাতা ও পানি ছিল না আর শত্রুর সংখ্যা ছিল অত্যধিক। তাই রাসূল (সা.) মুসলমানদেরকে যুদ্ধের সকল প্রয়োজনীয় জাতব্য বিষয় স্পষ্টভাবে জানিয়ে দেন, যাতে তারা ভালোভাবে যুদ্ধের প্রস্তুতি গ্রহণ করতে পারে। এ সময় রাসূল (সা.) এর সহযোদ্ধার সংখ্যা ছিল বিপুল। তবে তাদের নামধাম লেখার জন্য কোনো খাতাপত্র বা রেজিস্ট্রার ছিল না। এ যুদ্ধ থেকে অনুপস্থিত থাকতে চায়- এমন লোক একজনও ছিল না। তবে সকল সাহাবী এও মনে করতেন যে, কেউ যদি অনুপস্থিত থাকে, তবে আল্লাহর ওহী না আসা

পর্যন্ত রাসূল (সা.) তা জানতে পারতেন না ।

রাসূল (সা.) যখন এ যুদ্ধের প্রস্তুতি গ্রহণ করেন, তখন ফল পেকে গিয়েছিল এবং ছায়া খুবই ভালো লাগত । রাসূল (সা.) ও তার সাথী মুসলমানগণ পূর্ণদ্যোমে যুদ্ধের প্রস্তুতি চালাচ্ছিলেন । আমিও প্রতিদিন ভাবতাম প্রস্তুতি নেব । কিন্তু কোনো প্রস্তুতিই নেয়া হতো না । এমনিই দিন কেটে যেত । আমি নিজেকে সান্ত্বনা দিয়ে বলতাম, আমি তো যে কোনো সময় প্রস্তুতি নিতে পারব । ব্যস্ত হওয়ার দরকার কি? এভাবে দিন গড়িয়ে যেতে থাকে । একদিন ভোরে তিনি মুসলমানদেরকে সাথে নিয়ে চলে গেলেন । তখনো আমার প্রস্তুতি নেয়া হয়নি । আমি মনে মনে ভাবলাম, ওরা চলে যায় যাক । আমি পথেই তাদেরকে ধরতে পারব । তাদের রওনা হয়ে যাওয়ার পরের দিন আমি রওনা হতে চাইলাম । কিন্তু দিনটা কেটে গেল, আমার রওনা দেয়া হয়ে উঠল না । পরদিন সকালে আবার ইচ্ছা করলাম । কিন্তু এবারও পারলাম না রওনা দিতে । এভাবে গড়িমসির মধ্য দিয়ে দিনের পর দিন কেটে গেল । ততোক্ষণে মুসলিম বাহিনী অনেক দূর চলে গেছে । আমি কয়েকবার বেরিয়ে দ্রুতবেগে তাদেরকে ধরে ফেলার সংকল্প করেও পিছিয়ে থাকলাম । আফসোস তখনো যদি কাজটি করে ফেলতাম । কিন্তু আসলে তা বোধহয় আমার ভাগ্যে ছিল না । রাসূল (সা.) ও মুসলমানদের চলে যাওয়ার পর আমি যখন মদীনায় জনসাধারণের মধ্যে বেরুতাম, তখন পথে ঘাটে মুনাফিক ও পিড়াব্যাপিগ্রস্ত লোক ছাড়া আর কাউকে দেখতাম না । এ পরিস্থিতিতে নিজেকে দেখে আমার খুবই দুঃখ লাগত ।

রাসূল (সা.) তাবুক যাওয়ার পথে আমার সম্পর্কে কিছুই জিজ্ঞেস করেননি । তবে তাবুকে পৌঁছে জিজ্ঞেস করেন যে, কা'বের কি হয়েছে? বনু সালামার এক ব্যক্তি বলল, হে রাসূলুল্লাহ! নিজের সম্পদের মায়া ও আত্মাভিমানের কারণে সে আসেনি । মুয়াজ ইবনে জাবাল এ কথা শুনে বললেন, 'ছি, কি একটা বাজে কথা তুমি বললে! আল্লাহর কসম, তার সম্পর্কে আমরা কখনো কোনো খারাপ কথা শুনিনি ।' রাসূল (সা.) উভয়ের বাক্য বিনিময়ের মধ্যে চূপ করে থাকলেন ।

কা'ব ইবনে মালেক বলেন, যখন আমি জানতে পারলাম যে, রাসূল (সা.) ফিরে আসছেন, তখন ভাবলাম, এমন কোনো মিথ্যে ওজর বাহানা করা যায় কিনা, যাতে আমি তাঁর অসন্তোষ থেকে রক্ষা পেতে পারি । কিন্তু পরক্ষণেই এসব চিন্তা আমার দূর হয়ে গেল । আমি মনে মনে বললাম যে, মিথ্যে ওজর দিয়ে আমি রেহাই পাব না । কারণ রাসূল (সা.) ওহীর মাধ্যমে জেনে ফেলবেন । কাজেই পুরোপুরি সত্য কথা বলব বলে স্থির করলাম । রাসূল (সা.) পরদিন

সকালে ফিরে এসে মসজিদে নববীতে বসলে তাবুক যুদ্ধে যারা যায়নি তারা একে একে আসতে লাগল এবং প্রায় ৮০ জন (মতান্তরে ৮২ জন) নানা রকম ওজর বাহানা পেশ করে কসম খেতে লাগল। রাসূল (সা.) তাদের ওজর মেনে নিলেন, তাদের কাছ থেকে পুনরায় বাইয়াত নিলেন, তাদের জন্য আল্লাহর কাছে ক্ষমা চাইলেন এবং তাদের গোপন বিষয় আল্লাহর হাতে সোপর্দ করলেন। আমিও তাঁর কাছে এলাম। আমি সালাম দিলে তিনি ঈষৎ ক্রোধ মিশ্রিত মুচকি হাসিসহ জবাব দিলেন। তারপর বসতে বলে জিজ্ঞেস করলেন, তোমার কি হয়েছিল যে, তাবুকে যেতে পারলে না? তুমি না সওয়ালী কিনে নিয়েছিলে? আমি বললাম, জি, সওয়ালী কিনে নিয়েছিলাম। কিন্তু আল্লাহর কসম, আমি যদি আপনি ছাড়া অন্য কারো সামনে বসতাম, তাহলে তার আক্রোশ থেকে রক্ষা পাওয়ার জন্য মিথ্যে মিথ্যে ওজর পেশ করে চলে যেতাম। কারণ কথা বলার দক্ষতা আমারও আছে। কিন্তু আমি জানি, আজ আপনার কাছে মিথ্যা বলে আপনাকে খুশি করা গেলেও আল্লাহ তায়ালা কালই সব ফাঁস করে দিয়ে আপনাকে আমার ওপর অসন্তুষ্ট করে দেবেন। আর যদি সত্য বলি, তবে তাতে আপনি অসন্তুষ্ট হলেও আল্লাহর ক্ষমা লাভের আশা আছে। আল্লাহর কসম, আমার না যাওয়ার জন্য কোনো ওজর ছিল না। আল্লাহর কসম, আমি এ সময়ে সর্ব প্রকারে সুস্থ, সবল ও সক্ষম ছিলাম।

রাসূল (সা.) আমার কথা শুনে বললেন, কা'ব সত্য কথা বলেছে। বেশ, তুমি এখন যাও। দেখ, আল্লাহ তোমার ব্যাপারে কি সিদ্ধান্ত দেন।

আমি বিদায় নিলাম। বনু সালামার লোকেরাও আমার সাথে চলতে লাগল তারা আমাকে বলল, 'আমরা তো আজ পর্যন্ত তোমার কোনো পাপ কাজের কথা শুনিনি। অন্যান্যদের মতো তুমিও একটা ওজর পেশ করে দিলেই তো পারতে। তারপর রাসূলুল্লাহ (সা.) তোমার জন্য ক্ষমা চাইতেন এবং তাতেই তোমার গুনাহ মাফ হয়ে যেত।' তারা এভাবে আমাকে ক্রমাগত তিরস্কার করতে লাগল। ফলে একপর্যায়ে মনে মনে স্থির করে ফেললাম, রাসূল (সা.) এর কাছে ফিরে যাই এবং আগে যা বলেছি তা ভুল প্রতিপন্ন করে আসি। সহসা আমি তাদেরকে জিজ্ঞেস করলাম, আচ্ছা, আমার মতো অকপটে সত্য বলে ভুল স্বীকার করতে তোমরা কি আর কাউকে দেখেছ? তারা বলল, হ্যাঁ, হিলাল বিন উমাইয়া ও মুরারা বিন রাবীও তোমার মতোই কথা বলেছে। এই দু'জনকে আমি ভালোভাবে জানতাম। তারা ছিলেন খুবই সৎ লোক এবং বদর যুদ্ধে অংশগ্রহণকারী। তাদের দু'জনের কথা শুনে আমি আমার পূর্বের বক্তব্যে অবিচল

থাকার সিদ্ধান্ত নিলাম ।

এদিকে রাসূল (সা.) তাবুকে অনুপস্থিত থাকা লোকদের মধ্যে আমাদের তিনজনের সাথে কথা বলা সকল মুসলমানের জন্য নিষিদ্ধ করে দিলেন । তাই লোকেরা আমাদেরকে বয়কট করে চলল । যেন আমরা তাদের একেবারেই অচেনা মানুষ । দুনিয়াটাই যেন আমার কাছে বদলে গেল । এভাবে পঞ্চাশ দিন কেটে গেল । অন্য দু'জন তো ঘরেই বসে রইল এবং কান্নাকাটি করতে লাগল । কিন্তু আমি বাইরে বেরুতাম । মসজিদে নববীতে নামায পড়তাম ও বাজারে ঘুরতাম । কিন্তু কেউ আমার সাথে কথা বলত না । আমি রাসূল (সা.)-এর কাছে যেতাম । তিনি নামাযের পর মজলিসে বসলে সেখানেও তাকে সালাম দিতাম, আর দেখতাম, সালামের জবাবে তাঁর ঠোঁট নড়ল কিনা । আমি তাঁর কাছে দাঁড়িয়ে নামায পড়তাম । আমি বাঁকা দৃষ্টিতে তাঁকে দেখতাম আমি নামায পড়ার সময় তিনি আমার দিকে তাকাতেন, আর আমি তাকালেই মুখ ফিরিয়ে নিতেন । এ অবস্থায় অনেকদিন কেটে গেল । ক্রমে আমি অস্থির ও দিশেহারা হয়ে পড়লাম । একদিন আমার অতি প্রিয় চাচাত ভাই আবু কাতাদাহকে সালাম করলাম । কিন্তু সে সালামের জবাব পর্যন্ত দিল না । আমি তাকে জিজ্ঞেস করলাম, হে আবু কাতাদাহ! আমি যে আল্লাহ ও আল্লাহর রাসূলকে ভালোবাসি, তা কি তুমি স্বীকার কর না? সে এ কথার কোনো জবাব দিল না । দ্বিতীয়বার জিজ্ঞেস করলেও জবাব দিল না । তৃতীয়বার আল্লাহর কসম দিয়ে জিজ্ঞেস করলে সে শুধু বলল, আল্লাহ ও তার রাসূলই ভালো জানেন । আমার চোখ দিয়ে অশ্রু গড়িয়ে পড়ল । আমি তার কাছ থেকে ফিরে এলাম । এই সময় একদিন মদীনার বাজারে ঘুরে বেড়াচ্ছিলাম । এই সময় সিরিয়ার একজন খ্রিস্টান কৃষক মদীনার বাজারে খাদ্যশস্য বিক্রি করতে এসেছিল । সে লোকজনের কাছে আমার ঠিকানা সন্ধান করছিল । লোকেরা আমাকে দেখিয়ে দিলে সে গাসসানের রাজার একটি চিঠি আমার হাতে দিল । চিঠিতে রাজা লিখেছে, আমি জানতে পেরেছি যে, আপনার নেতা আপনাকে খুব কষ্ট দিচ্ছেন । অথচ আল্লাহ আপনাকে লাঞ্ছনা ও অবমাননার যোগ্য রাখেননি । আপনি আমাদের এখানে চলে আসুন । আমরা আপনাকে সম্মানের সাথে রাখব । চিঠিটা পড়ার সাথে সাথে আমি মনে মনে বললাম, এ আর এক পরীক্ষা । আমি তৎক্ষণাত তা চুলোর মধ্যে নিক্ষেপ করলাম ।

এভাবে চল্লিশ দিন কেটে গেলে রাসূল (সা.)-এর এক দূত আমার কাছে এসে বলল, রাসূল (সা.) তোমাকে তোমার স্ত্রী থেকে পৃথক হয়ে যাবার আদেশ

দিয়েছেন। আমি বললাম, ওকে তালাক দেব নাকি? দূত বললেন, না, তালাক দিতে হবে না, তবে তার কাছে যাবে না। আমার অন্য দু'জন সাথীকেও একই হুকুম দেয়া হলো। আমি আমার স্ত্রীকে বললাম, তুমি বাপের বাড়িতে চলে যাও এবং আল্লাহর ফয়সালা আসা পর্যন্ত অপেক্ষা কর। হিলাল ইবনে উমাইয়ার স্ত্রী রাসূল (রা.) এর কাছে এসে বললেন, হে রাসূল! আমার স্বামী বুড়ো হয়ে গেছে। তার কোনো ভৃত্য নেই। আমি যদি তার দৈনন্দিন কাজ-কর্ম করে তার সেবা করে দেই, তাতে কি আপত্তি আছে? রাসূল (সা.) বললেন, আপত্তি নেই। তবে সে যেন তোমার কাছে না আসে। আমাকেও কেউ কেউ বলল যে, তুমি রাসূল (সা.) এর কাছে গিয়ে স্ত্রীর জন্য অনুমতি নিয়ে এস, যেমন হেলালের স্ত্রী এনেছে। আমি বললাম, না, আমি কোনো অনুমতি আনতে যাব না। জানি না তিনি কি ভাববেন। কারণ হেলাল বিন উমাইয়া বুড়ো, আর আমি যুবক।

এভাবে আরো দশটি দিন কেটে গেলে একদিন ফজরের নামায পড়ে অত্যন্ত বিষণ্ণ মনে বসেছিলাম। সহসা কে একজন চিৎকার করে বলতে বলতে ছুটে আসতে লাগল, ক্বাব ইবনে মালেক! সুসংবাদ গ্রহণ কর। আমি তৎক্ষণাত সিজদায় পড়ে গেলাম। বুঝলাম, আমাদের মুসিবত কেটে গেছে। রাসূলুল্লাহ (সা.) ঐদিন ফজরের পর ঘোষণা করে দিয়েছেন যে, আল্লাহ আমাদের তওবা কবুল করে নিয়েছেন। লোকেরা দলে দলে এসে আমাকে অভিনন্দন জানাতে লাগল। এরপর আমি রাসূল (সা.) এর সাথে সাক্ষাত করতে গেলাম। আমি দেখলাম, তিনিও আমার সুসংবাদে আনন্দিত। আমি বললাম, হে রাসূলুল্লাহ (সা.)! আমার তওবা কবুলের জন্য শুকরিয়াস্বরূপ আমার সমস্ত ধনসম্পদ আল্লাহ ও রাসূলের পথে সদকা করে দিতে চাই। রাসূল (সা.) বললেন, সব নয়, কিছু অংশ নিজের জন্য রেখে দাও। আমি বললাম, হে আল্লাহর রাসূল! আল্লাহ এবার আমাকে সত্য কথা বলার কারণে ক্ষমা করেছেন। কাজেই এরপর বাকি জীবন আমি সর্বদা সত্য কথাই বলতে থাকব। আল্লাহ যেন আমাকে মিথ্যা থেকে রক্ষা করেন।

**শিক্ষা :**

১. এ ঘটনার সবচেয়ে বড় শিক্ষা এই যে, ইসলামী আন্দোলনের প্রতিটি ক্ষেত্রে সত্য কথা বলার নীতিতে অবিচল থাকতে হবে। তাতে যত কঠিন পরীক্ষাই আসুক না কেন।

২. আল্লাহ মুনাফেকদেরকে পরীক্ষার সম্মুখীন করেন না বরং মুমিনদেরকেই কঠিন পরীক্ষার সম্মুখীন করেন। এই তিন মুমিন ব্যতীত বাকি ৮২ জন মিথ্যে



অজুহাত পেশ করলেও তাদেরকে সামাজিকভাবে বয়কট করা হয়নি। কারণ তারা ছিল মুনাফিক। তাই আল্লাহ তাদেরকে পরিশুদ্ধ করতে চাননি।

৩. ইসলামী সংগঠনের নেতৃত্বের অধিকার রয়েছে কুরআন হাদীসের সীমার মধ্যে নিষ্ঠাবান কর্মীদেরকে পরিশুদ্ধ করার জন্য পরীক্ষার সম্মুখীন করা বা গুরুতর ভুল কাজের জন্য শাস্তি দেয়ার। এসব ক্ষেত্রে আনুগত্যের পরিচয় দিয়ে এবং কোনদিক থেকে কুপ্ররোচনা এলে তা উপেক্ষা করে পরীক্ষায় কৃতকার্য হবার চেষ্টা করতে হবে।

৪. ইসলামী আন্দোলনের কোনো পর্যায়ে কারো কোনো সাফল্য বা কৃতিত্ব প্রমাণিত হলে তার জন্য যাতে অন্তরে গর্ব ও অহমিকার সৃষ্টি না হয় সে জন্য সম্ভব হলে সদকা করা উত্তম। আর সেই সাথে তাওবা ইসতিগফারও অব্যাহত রাখা উচিত।

৫. অলসতা ও সিদ্ধান্তহীনতা এই তিনজন মুজাহিদের জীবনে চরম সংকট সৃষ্টি করেছিল। কাজেই অলসতা, গড়িমসি ও সিদ্ধান্তহীনতা সর্বোত্তমভাবে পরিত্যাজ্য।

## ২৯. হযরত সালমান ফারসীর ইসলাম গ্রহণ

হযরত সালমান ফারসি প্রথম জীবনে একজন অগ্নি উপাসক ছিলেন। পরে খ্রিস্টধর্ম গ্রহণ করেন এবং সর্বশেষে ইসলাম গ্রহণ করেন। তিনি পারস্যের ইসফাহান প্রদেশের অধিবাসী ছিলেন। তার পিতা ছিলেন একজন বিত্তশালী গ্রাম্য মোড়ল। তিনি তাকে এত বেশি স্নেহ করতেন যে, তাকে বাড়ি থেকে কোথাও যেতে দিতেন না। তিনি জানান যে, এই সময় তিনি অগ্নি উপাসকদের ধর্মে গভীর দক্ষতা অর্জন করেন। এক মুহূর্তের জন্যও যাতে আগুন নিভতে না পারে— এভাবে কুণ্ডলী জ্বালিয়ে রাখতে তাকে দায়িত্ব দেয়া হয়েছিল। এ সময় ঘটনাক্রমে একটি জমি দেখাশুনার দায়িত্ব তার ওপর ন্যস্ত হয়। সেই জমি দেখতে তিনি পিতার অনুমতিক্রমে বাড়ির বাইরে যাওয়া আসা করতে লাগলেন। এই সময় তার যাওয়া আসার পথের পাশে একটি খ্রিস্টান গির্জা তার নজরে পড়ে। লোকজনের হৈ-চৈ শুনে কৌতূহলবশতঃ তিনি সেই গির্জার অভ্যন্তরে প্রবেশ করেন। সেখানে তাদের উপাসনা দেখে তিনি মুগ্ধ হয়ে যান এবং মনে মনে বলেন, অগ্নিউপাসকদের ধর্মের চেয়ে এই ধর্ম অনেক ভালো। ঐ দিন তার আর জমি দেখতে যাওয়া হলো না। তিনি সারাদিন গির্জায় কাটিয়ে দিলেন।

গির্জার লোকদের কাছে তিনি জিজ্ঞেস করলেন যে, এই ধর্মের উৎস কোথায়? তারা জানাল যে, সিরিয়ায়। এরপর তিনি তাঁর পিতার কাছে ফিরে গেলেন? তাঁর পিতা তাঁকে জিজ্ঞেস করলেন তুমি সারাদিন কোথায় ছিলে? সালমান গির্জার ঘটনা খুলে বলে দিলেন। সেই সাথে এ কথাও বললেন যে, ঐ ধর্ম তার কাছে ভালো লেগেছে। একথা শুনে তার পিতা বললেন, না বাবা, তোমার জন্য তোমার বাপ দাদার ধর্মই ভালো। সালমান বললেন, না বাবা, ঐ ধর্মই ভালো। এতে তিনি তাঁকে নিয়ে ভীত হয়ে পড়লেন এবং তাঁর পায়ে শিকল পরিয়ে দিলেন। এই সময় সালমান গোপনে গির্জায় খ্রিস্টানদের নিকট খবর পাঠান যে, আপনাদের কাছে সিরিয়া থেকে কোন কাফেলা এলে আমাকে জানাবেন। কিছুদিন পর সিরিয়া থেকে একটা কাফেলা এল। তারা যথাসময়ে সালমানকে সে খবর জানাল। সালমান বলে পাঠালেন যে, এই কাফেলার কাজ যখন শেষ হবে এবং তারা সিরিয়ায় ফিরে যাওয়ার প্রস্তুতি নেবে, তখন আমাকে জানাবেন। তারপর কাফেলার কাজ শেষে স্বদেশে ফিরে যাওয়ার প্রস্তুতি নিতে আরম্ভ করলে তা সালমানকে জানান হলো। সালমান তৎক্ষণাত স্বীয় পিতার স্নেহের শিকল ভেঙ্গে গোপনে তাদের সাথে সিরিয়ায় চলে গেলেন। সিরিয়ায় গিয়ে তিনি লোকদের কাছে জিজ্ঞেস করলেন, এই ধর্মাবলম্বীদের মধ্যে সবচেয়ে বেশি জ্ঞানী কে? তারা তাকে জানাল যে, গির্জার পাদ্রীই সবচেয়ে জ্ঞানী।

সালমান পাদ্রীর নিকট হাজির হয়ে বললেন, আমি এই ধর্মের প্রতি আগ্রহী। আমি আপনার সহচর হয়ে আপনার সেবা করতে চাই এবং আপনার কাছে থেকে ধর্ম শিখতে ও উপাসনা করতে চাই। পাদ্রী সালমানকে স্বীয় গির্জায় থাকতে দিলেন এবং সালমান খ্রিস্টধর্মে দীক্ষা নিতে লাগলেন। এই সময় সালমান বুঝতে পারলেন যে, উক্ত পাদ্রী খুবই অসৎ। সে জনসাধারণের কাছ থেকে ছদকা আদায় করে এবং তা গরীবদের মধ্যে বিতরণ না করে নিজে আত্মসাত করে। এভাবে সে বিপুল সম্পদ সঞ্চয় করে। সালমান এরপর থেকে তাকে ঘৃণা করতে লাগলেন এবং ঐ স্থান ত্যাগ করার সুযোগ খুঁজতে লাগলেন।

এই পাদ্রী মারা গেলে খ্রিস্টানরা তার শেষকৃত্য সম্পন্ন করার জন্য সমবেত হলো। সালমান তাদেরকে বললেন, এই লোকটি চরম দুর্নীতিবাজ ছিল। সে তোমাদেরকে ছদকা দিতে উপদেশ দিত। কিন্তু নিজে তোমাদের দেয়া ছদকাগুলো আত্মসাত করত। তারা সালমানকে বলল, তোমার এ সব অভিযোগ যে সত্য, তার প্রমাণ কী? তিনি এর প্রমাণস্বরূপ তার জমা করা সাতটা সোনারূপা ভর্তি কলসি বের করে দেখালেন। তা দেখে সমবেত জনতা ক্রুদ্ধ স্বরে

বলল, আমরা এ নরাধমকে কবর দেব না । তারপর লাশকে তারা শূলে চড়াল । তার ওপর পাথর ছুঁড়ল এবং তারপর একজন নতুন যাজক নিয়োগ করল ।

নতুন যাজক ছিল একজন নিরেট সৎ লোক । পৃথিবীর ধন-সম্পদের প্রতি তার কোনো লালসা ছিল না । সালমান কিছুদিন তার কাছে থাকলেন । তারপর তার মৃত্যু কাছাকাছি হলে সালমান তাকে বললেন, জনাব, আমি তো এতদিন এখানে কাটালাম । এখন আপনার পর আমি কোথায় কার কাছে যাব বলে দিন ।

তিনি বললেন, বাবা! আমি যতটা খাঁটি ধর্মের অনুসারী ছিলাম, এখন তেমন আর কাউকে দেখি না । ভালো লোকেরা সব পরপারে পাড়ি জমিয়েছে । এখন যারা আছে, তাদের অধিকাংশই ধর্মকে খানিকটা বিকৃত করেছে, আর খানিকটা পরিত্যক্ত অবস্থায় রেখে দিয়েছে । তবে মুসেলে একজন আছে খাঁটি ধর্মের অনুসারী । তুমি তার কাছে চলে যাও ।

সালমান মুসেলের যাজকের কাছে গেলেন । সেখানে কিছুদিন থাকার পর তিনিও মারা গেলেন । মারা যাওয়ার আগে তাকে নাসিবাইনের এক ব্যক্তির সন্ধান দিয়ে গেলেন । অতঃপর সালমান নাসিবাইনে গেলেন । সেখানকার পাদ্রীর কাছে কিছুদিন থাকার পর তিনিও মারা গেলেন । মারা যাওয়ার সময় আম্মুরিয়ার আর একজন যাজকের সন্ধান দিয়ে গেলেন । সালমান আম্মুরিয়ায় চলে গেলেন ।

আম্মুরিয়ায় কিছুদিন থাকার পর সেখানকার যাজকও মারা গেলেন । মৃত্যুর প্রাক্কালে সালমান তার কাছে একজন সৎ যাজকের সন্ধান চাইলে তিনি বললেন, এখন আর আমার জানামতে সঠিক ধর্মের অনুসারী কোনো যাজক পৃথিবীতে জীবিত নেই । তবে একজন নতুন নবীর আবির্ভাবের সময় ঘনিয়ে এসেছে । তিনি ইবরাহীম (আ.) এর দ্বীনকে পুনরুজ্জীবিত করবেন । তিনি আরবভূমিতে আবির্ভূত হবেন এবং দুই মরুর মাঝে খেজুরের বাগানে পরিপূর্ণ জায়গায় হিজরত করবেন । তিনি হাদিয়া নেবেন । কিন্তু ছদকা গ্রহণ করবেন না । তার দুই কাঁধের মাঝে নবুয়তের সিল থাকবে । তুমি যদি সেই দেশে যেতে পার তবে যেও ।

আম্মুরিয়ায় হযরত সালমান অনেক ছাগল ভেড়া পুষতেন । তারই এক পাল ছাগল ভেড়া একদল আরব বণিককে দিয়ে তাদের সাথে তিনি আম্মুরিয়া থেকে আরব চলে গেলেন । ওয়াদিল কুরাতে তারা তাকে এক ইহুদির নিকট বিক্রি করে দিল । সালমান এই ইহুদির খেজুরের বাগানে কাজ করতে লাগলেন । ঐ খেজুরের বাগান দেখে তিনি ভেবেছিলেন, এটাই সেই আখেরি নবীর আবির্ভাব স্থান । তাই তিনি ইহুদির কাছেই থাকতে লাগলেন ।

হযরত সালমান বলেন, 'এই সময় একদিন মদীনা থেকে আবার ইহুদী মনিবের এক আত্মীয় এল। বনু কুরায়যা গোত্রীয় ঐ ইহুদি আমাকে কিনে নিয়ে মদীনায় চলে গেল। মদীনাকে দেখেই আমি চিনতে পারলাম যেন ওটা অবিকল আমার আশ্মুরিয়ার ওস্তাদের বর্ণিত জায়গা। তাই আমি ওখানেই থাকতে লাগলাম। এই সময় মক্কায় রাসূল (সা.) নবুয়ত লাভ করেছেন বলে শুনলাম। তবে তার সম্পর্কে বিস্তারিত খবরাখবর জানতে পারলাম না। কিছুদিন পর তিনি মদীনায় হিজরত করে আসলেন।

একদিন আমি খেজুর ভর্তি গাছের মাথায় চড়ে আমার মনিবের জন্য কিছু কাজ করছি। মনিব তখন আমার নিচে বসা ছিলেন। সহসা তার এক চাচাত ভাই এসে তাকে বলল, আল্লাহ কায়লার বংশধরকে ধ্বংস করুন। (আওস ও খাজরাজ এই দুই গোত্রের মায়ের নাম কায়লা। তাই কায়লার বংশধর বলতে ঐ দুই গোত্রকে বুঝানো হয়েছে।) ওরা এখন মক্কা থেকে আগত এক ব্যক্তির চারপাশে ভিড় জমিয়েছে। লোকটি আজই এসেছে। আওস ও খাজরাজ মনে করে সে নাকি এ যুগের নবী এবং সর্বশেষ নবী। হযরত সালমান বলেন, খেজুর গাছের ওপরে বসে আমি যখন এ খবর শুনলাম, তখন আনন্দে ও উত্তেজনায় এত বেসামাল হয়ে গিয়েছিলাম যে, আমি মনিবের ঘাড়ের ওপর পড়ে যাব বলে আশঙ্কা হচ্ছিল। অনেক কষ্টে ধীরে ধীরে গাছ থেকে নেমে এসে ঐ লোকটিকে জিজ্ঞেস করলাম যে, আপনি কার কথা যেন বলছিলেন? অমনি আমার মনিব আমাকে ঠাস করে এক চড় বসিয়ে দিল। সে বলল, তোর তা দিয়ে কি দরকার? আমি বললাম, কিছু না, কৌতূহলবশতঃ জিজ্ঞেস করেছিলাম।

হযরত সালমান বলেন, এরপর আমি নিজের কাছে সম্বৃত কিছু খাবার জিনিস নিয়ে সন্ধ্যাবেলায় গোপনে কুবাতে রাসূল (সা.) এর কাছে উপস্থিত হলাম। তাকে বললাম, আমি শুনেছি, আপনার সাথে অনেক দরিদ্র লোক রয়েছে। তাদের জন্য আমি কিছু ছদকা এনেছি। এই বলে উক্ত খাদ্য হাজির করলে তিনি সাহাবীদেরকে তা খেতে বললেন। কিন্তু নিজে খেলেন না। তখন আমি মনে মনে বললাম, আশ্মুরিয়ার যাজক যে তিনটে আলামতের কথা বলেছে, তার একটি পেয়ে গেলাম। অতঃপর আমি সেদিনকার মতো চলে এলাম।

আর একদিন আরো কিছু খাবার নিয়ে তা হাদিয়া হিসেবে পেশ করলাম। রাসূল (সা.) তা নিজেও খেলেন এবং অন্যদেরকেও খাওয়ালেন। এরপর আমি দ্বিতীয় আলামতটিও পেয়ে গেলাম।

এরপর যখন তিনি বাকীযুল গারকাদ নামক কবরস্থানে তাঁর জনৈক সাহাবীর দাফন সম্পন্ন করে ফিরে আসছিলেন, তখন আমি তাঁর কাছে উপস্থিত হলাম।

সেই সময় রাসূল (সা.) এর গায়ে ঢিলেঢালা পোশাক ছিল। আমি নবুয়তের মোহরটি দেখার জন্য তার ঘাড়ের ওপর চোখ বুলাতে লাগলাম। রাসূল (সা.) আমার চাহনির হাবভাব দেখে বুঝে ফেললেন এবং তাঁর পিঠের ওপর থেকে চাদর উঠিয়ে ফেলে দিলেন। আমি তখন নবুয়তের মোহর দেখে চিনতে পারলাম। আমি মোহরটিতে চুমু খাওয়ার জন্য ঝুঁকে পড়লাম এবং কাঁদতে লাগলাম। রাসূল (সা.) আমাকে বললেন, সামনে এস। আমি সামনে গিয়ে বসে পড়লাম। অতঃপর অতীতের সমস্ত ঘটনা খুলে বললাম।

এরপর রাসূল (সা.) আমাকে ইহুদির দাসত্ব থেকে মুক্ত হবার জন্য ৪০ আউস স্বর্ণ দিলেন। ঐ স্বর্ণ ইহুদিকে দিয়ে আমি মুক্তি লাভ করলাম। কিন্তু বদর ও ওহুদ যুদ্ধ আমার দাসত্বের আমলে সংঘটিত হয়। তাই আমি তাতে অংশগ্রহণ করতে পারিনি।

**শিক্ষা :** হযরত সালমান ফারসির ইসলাম গ্রহণের এই ঘটনা অত্যন্ত শিক্ষাপ্রদ। এর সর্বপ্রধান শিক্ষা এই যে, মুহাম্মদ (সা.) ছাড়া পৃথিবীতে আল্লাহর প্রেরিত আর কোনো নবীর শরীয়ত অবিকৃত অবস্থায় নেই। তাই ইসলাম ছাড়া আর কোনো ধর্ম সঠিক ও নির্ভুল নয়। এই সত্য ও সঠিক ধর্মের সন্ধান লাভের জন্য হযরত সালমান ফারসি প্রথম দিন থেকেই অনুসন্ধান চালাচ্ছিলেন। আল্লাহ তাঁর অক্লান্ত সাধনাকে সফল করেছেন। এভাবেই আল্লাহ তায়ালা সত্যের সন্ধানরত প্রত্যেক মানুষকেই সত্যের সন্ধান দিয়ে থাকেন।

### ৩০. মিথ্যা সকল পাপের জননী

একবার রাসূলুল্লাহ (সা.) এর নিকট এক ব্যক্তি উপস্থিত হয়ে বলল, হে আল্লাহর রাসূল! আমার মধ্যে তিনটি বদঅভ্যাস রয়েছে, মিথ্যা বলা, চুরি করা ও মদ খাওয়া। আমি তিনটি বদঅভ্যাসই ছেড়ে দিতে চাই। কিন্তু এক সাথে এর সবকটি ছাড়তে পারছি না। আমাকে এক একটি করে এগুলো পরিত্যাগ করার সুযোগ দিন এবং কোনটি আগে ত্যাগ করব, তা বলে দিন।

রাসূল (সা.) একটু চিন্তা করে বললেন, তুমি প্রথমে মিথ্যা কথা বলার অভ্যাস ত্যাগ কর। আর এই ত্যাগ করার ওপর বহাল আছ কিনা, তা জানানোর জন্য মাঝে মাঝে আমার কাছে এসো।

সে এতে রাজি হয়ে চলে গেল এবং কোনো অবস্থাতেই মিথ্যা বলবে না বলে দৃঢ় সংকল্প গ্রহণ করল।

রাতে সে অভ্যাসমতো চুরি করতে বেরিয়ে পড়ল। কেননা এটা সে বাদ দেওয়ার ওয়াদা করেনি। কিন্তু কিছুদূর গেলেই তার মনে হলো : রাসূল (সা.) এর সাথে দেখা করতে গেলে তিনি যদি চুরি করেছি কিনা জিজ্ঞেস করেন তাহলে মিথ্যা তো বলা যাবে না। কাজেই সত্য বলে স্বীকারোক্তি দিতে হবে। আর তাহলে রাসূলের (সা.) দরবারে অপমান তো সহ্য করতেই হবে। উপরন্তু হাতটাও কাটা যাবে। অনেক ভেবেচিন্তে সে ফিরে এল। চুরি করতে যাওয়া হলো না।

এরপর সে মদ খাওয়ার জন্য গ্লাস হাতে নিয়ে তাতে মদ ঢালল। কিন্তু মুখে নিতে গিয়ে আবার ঐ একই প্রশ্ন তার মনে উদ্ভিত হলো। রাসূল (সা.) এর দরবারে তো আজ হোক কাল হোক যেতেই হবে। তিনি যদি জিজ্ঞেস করেন, মদ খাওয়া চলছে কিনা; তাহলে কি জবাব দেব? মিথ্যা তো বলা যাবে না। আর সত্য বললে অপমান ও ৮০ ঘা বেত্রদণ্ড। অতএব, মদও সে ছেড়ে দিল।

এভাবে একমাত্র মিথ্যা ছেড়ে দিয়ে সে একে এক সব কয়টি চারিত্রিক দোষ থেকে মুক্তি পেল। রাসূল (সা.) সত্যই বলেছেন : মিথ্যা হলো সকল পাপের জননী।

**শিক্ষা :** এই ঘটনার মধ্য দিয়ে মানুষকে ইসলামে দীক্ষিত করার একটি অত্যন্ত বিজ্ঞানসম্মত চমকপ্রদ কৌশল শিক্ষা দেয়া হয়েছে। সেই শিক্ষাটি এই যে, ইসলাম বিরোধী কর্মকাণ্ড ও চরিত্র যখন কারো অভ্যাসে পরিণত হয়ে যায়, তখন তাকে রাতারাতি শুধরে পবিত্র করা সম্ভব হয় না। এজন্য ধীরে ধীরে ও পর্যায়ক্রমে চরিত্র সংশোধনের চেষ্টা করতে হবে। এতে সফলতা লাভ করা সহজতর হবে। এ কথা ব্যক্তির ক্ষেত্রে যেমন সঠিক, জাতির ক্ষেত্রেও তেমনি অদ্রাষ্ট।

## ৩১. মসজিদে যেরারের ঘটনা

মদীনায় আবু আমের নামে একজন খ্রিস্টান পাদ্রী বাস করত। তার ছেলে ছিলেন বিখ্যাত সাহাবী হযরত হানযালা (রা.)। শহীদ হওয়ার পর ফেরেশতারা তাঁকে গোসল দিয়েছিলেন। কিন্তু তাঁর পিতা খ্রিস্টধর্মের ওপর অবিচল ছিল।

রাসূল (সা.) হিজরত করে মদীনায় যাওয়ার পর আবু আমের তাঁর সাথে সাক্ষাত করে ইসলাম সম্পর্কে বিভিন্ন আপত্তি ও সন্দেহ উত্থাপন করে। রাসূল (সা.) তার সকল আপত্তির জবাব দেন। কিন্তু তবু সে সন্তুষ্ট হতে পারেনি। সে

বলল, আমাদের দু'জনের মধ্যে যে মিথ্যুক সে যেন অভিশপ্ত ও আত্মীয়-স্বজন থেকে বিচ্ছিন্ন অবস্থায় মৃত্যুবরণ করেন। সে রাসূল (সা.) কে এ কথাও জানিয়ে দিল যে, সে রাসূল (সা.) এর শত্রুদেরকে সব সময় সাহায্য করতে থাকবে। নিজের এই প্রতিশ্রুতি অনুযায়ী সে বদর থেকে হুনাইন পর্যন্ত সকল যুদ্ধে মুসলমানদের শত্রুদের পক্ষ অবলম্বন করে। হুনায়েনের যুদ্ধে যখন হাওয়ায়েনের মতো বিশালাকায় গোত্র মুসলমানদের কাছে হেরে গেল, তখন সে ভগ্ন হৃদয়ে তৎকালীন খ্রিস্টধর্মের ঘাটি সিরিয়ায় চলে যায় এবং আত্মীয়-স্বজন থেকে বিচ্ছিন্ন অবস্থায় সেখানেই মৃত্যুবরণ করে। এভাবে তার নিজের বদদোয়া ও অভিশাপ দ্বারা সে নিজেই ঘায়েল হয়।

জীবদ্দশায় আবু আমের পাদ্রী আজীবন ইসলাম ও মুসলমানদের শত্রুতা করে। এমনকি সে রোম সশ্রাটকে মদীনায় আক্রমণ চালিয়ে মুসলমানদের নাম নিশানা মুছে ফেলার প্ররোচনাও দিয়েছিল।

মদীনার মুসলমানদের মধ্যে যারা বর্ণচোরা, ভণ্ড ও মোনাফেক ছিল, সর্বকালের ও সর্বদেশের মোনাফেকদের মতোই তারাও ইহুদি ও খ্রিস্টানদের ক্রীড়নক ছিল। বিশেষত আবু আমেরের তারা খুবই ভক্ত ও অনুগত ছিল। আবু আমের এই মোনাফেকদের কাছে চিঠি লিখল যে, আমি রোম সশ্রাটকে মদীনা আক্রমণ করার অনুরোধ জানিয়েছি। কিন্তু সশ্রাটের বাহিনীকে সহযোগিতা করে এমন একটি দল মদীনাতেও সংগঠিত হওয়া জরুরি। এ জন্য তোমরা মদীনায় মসজিদের নাম দিয়ে একটি গৃহ নির্মাণ কর, যেন মদীনার মুসলমানদের মনে কোনো সন্দেহ সৃষ্টি না হয়। সেই গৃহে নিজেরা সমবেত হও, কিছু অস্ত্র-শস্ত্র ও সাজ-সরঞ্জাম তাতে সংগ্রহ করে রাখ।

তার এ চিঠির ভিত্তিতে বারোজন মোনাফেক মদীনার কোবা মহল্লায় একটি মসজিদ নির্মাণ করল। এই মহল্লায় রাসূল (সা.) হিজরত করে এসে প্রথম অবস্থান করেছিলেন এবং একটি মসজিদ তৈরি করেছিলেন। অতঃপর তারা স্থির করল যে, ঐ মসজিদে রাসূল (সা.) এর দ্বারা এক ওয়াস্ত নামায পড়াবে। এতে মুসলমানদের মনে আর কোনো সন্দেহ থাকবে না। তারা বুঝবে এটাও অন্যান্য মসজিদের মতোই একটা মসজিদ।

তাদের একটি প্রতিনিধি দল রাসূল (সা.) এর সাথে সাক্ষাত করে বুঝাল যে, কোবার বর্তমান মসজিদটি অনেক দূরে অবস্থিত। দুর্বল ও অসুস্থ লোকেরা অতদূরে যেতে পারে না। তাছাড়া ওখানে সব লোকের সংকুলানও হয় না। তাই আমরা আর একটি মসজিদ নির্মাণ করেছি। আপনি এতে এক ওয়াস্ত নামায পড়ে উদ্বোধন করে দিয়ে যান।

রাসূল (সা.) তখন তাবুক যুদ্ধের প্রস্তুতিতে ব্যস্ত ছিলেন। তাই ওয়াদা করলেন যে, যুদ্ধ থেকে ফিরে এসে তিনি ওখানে নামায পড়বেন। কিন্তু তাবুক থেকে ফেরার পথে সূরা তাওবার সংশ্লিষ্ট আয়াত কয়টি নাযিল করে আল্লাহ তাতে নামায পড়তে নিষেধ করলেন এবং তাকে ‘মসজিদে যেরার’ (ক্ষতিকর মসজিদ) নামে আখ্যায়িত করলেন। রাসূল (সা.) এই নির্দেশ অনুসারে নামায তো পড়লেনই না, অধিকন্তু কতিপয় সাহাবীকে পাঠিয়ে দিয়ে মসজিদটি আগুন ধরিয়ে পুড়িয়ে দিলেন।

সূরা তাওবার সংশ্লিষ্ট আয়াতে এই মসজিদকে তিনটি কারণে মসজিদে যেরার বলা হয়েছে : এক. তা দ্বারা ইসলামের ক্ষতি সাধন ও কুফরী প্রতিষ্ঠার সংকল্প করা হয়েছিল। দুই. তা দ্বারা মুসলমানদের মধ্যে বিভেদ ও অনৈক্য সৃষ্টির চেষ্টা করা হয়েছিল। তিন. সেখানে ইসলামের শত্রুদেরকে আশ্রয় দেয়ার ফন্দি আঁটা হয়েছিল।

উল্লিখিত তিনটি উদ্দেশ্যে যখন যেখানেই কোনো গৃহ নির্মাণ, কোনো দল বা প্রতিষ্ঠান গঠন কিংবা আর কোনো ধরনের স্থাপনার কাজ করা হবে, তখন তা মসজিদে যেরারেরই পর্যায়ভুক্ত হবে এবং মুসলমানদের কর্তব্য হবে তা প্রথম সুযোগেই ধ্বংস করা, চাই তা মসজিদ বা অন্য কোনো আকারেই গঠিত হোক। এ কারণে হযরত ওমর (রা.) এক মসজিদের পাশে আর একটি মসজিদ নির্মাণ করতে নিষেধ করেন। অনুরূপভাবে কোনো প্রতিষ্ঠিত ইসলামী শিক্ষাপ্রতিষ্ঠান বা ইসলাম প্রতিষ্ঠার চেষ্টায় নিয়োজিত দল বা সংগঠনকে ক্ষতিগ্রস্ত করার উদ্দেশ্যে অন্য কোনো প্রতিষ্ঠান গঠন করা বৈধ হবে না।

**শিক্ষা :** ১. মুসলমান নাম ধারণ করেও ইসলামের চিহ্নিত শত্রুদের আনুগত্য করা সুস্পষ্ট মোনাফেকীর লক্ষণ।

২. অজ্ঞতা বা ভুলবশত কোনো অন্যায় কাজের ওয়াদা করলে সেই ওয়াদা ভঙ্গ করা শুধু জায়েজ নয় বরং ওয়াজিবও।

## ৩২. মানুষের পরিণাম তার শেষ কর্মের ওপর নির্ভরশীল

হযরত আবু হুরায়রা (রা.) বর্ণনা করেন যে, আমরা খায়বরের যুদ্ধে রাসূল (সা.)-এর সাথে অংশগ্রহণ করেছিলাম। তখন ইসলাম গ্রহণ করেছে বলে দাবি করত এমন এক ব্যক্তি সম্পর্কে রাসূল (সা.) বললেন, ‘এই ব্যক্তি দোযখবাসী’। তারপর যুদ্ধ শুরু হলে লোকটি বীরত্বের সাথে যুদ্ধ করল এবং আঘাতে আঘাতে



জর্জরিত হলো। এক সময় আঘাতের চোটে সে অচল হয়ে পড়ল। তখন এক সাহাবী এসে রাসূল (সা.)-কে বললেন, 'হে আল্লাহর রাসূল! ঐ ব্যক্তির ব্যাপারে আপনার মত কী? যে ব্যক্তিকে আপনি দোযখবাসী বলেছিলেন, সেতো প্রচণ্ডভাবে যুদ্ধ করেছে এবং আহত হয়েছে।' নবী করিম (সা.) বললেন, 'শুনে রাখো, সে দোযখবাসী।' এতে কোনো কোনো মুসলমান সন্দেহ পোষণ করতে লাগলেন।

ইত্যবসরে লোকটি ক্ষত স্থানের তীব্র যন্ত্রণা অনুভব করল। অতঃপর সে নিজের তীর হাতে নিয়ে তা দ্বারা নিজের গলা ফুঁড়ে আত্মহত্যা করল। এ ঘটনা প্রত্যক্ষ করে বহু সংখ্য সাহাবী রাসূল (সা.)-এর নিকট ছুটে গিয়ে বললেন, 'হে আল্লাহর রাসূল! আল্লাহ আপনার কথাতে সত্যে পরিণত করেছেন। অমুক লোকটি তো নিজের গলা ফুঁড়ে আত্মহত্যা করেছে।' তখন রাসূল (সা.) বললেন, 'ওহে বিলাল! ওঠো। জনগণের মধ্যে ঘোষণা করে দাও যে, মুমিন ব্যতীত কেউ বেহেশতে প্রবেশ করতে পারবে না। আর পাপী লোক দ্বারাও আল্লাহ কখনো কখনো এ দ্বীনের সাহায্য করে থাকেন।'

অন্য রেওয়াজে আছে, রাসূল (সা.) বললেন, কোনো কোনো বান্দা দোযখীর ন্যায় আমল করে, অথচ সে বেহেশতবাসী। আবার কোনো কোনো বান্দা বেহেশতবাসীর ন্যায় কাজ করে, অথচ সে দোযখবাসী। আর মনে রাখবে, কর্মের ফলাফল শেষ কর্মের ওপর নির্ভরশীল।

**শিক্ষা :** আত্মহত্যা কবীরা গুনাহ তথা মহাপাপই শুধু নয়, বরং তা ঈমানকেও ধ্বংস করে দেয় এবং সকল কৃত সৎ কাজ বিনষ্ট করে দেয়। তাই আত্মহত্যাকারী শত ভালো কাজ করলেও দোযখবাসী হয়ে থাকে।

### ৩৩. বিনা তদন্তে কারো সম্পর্কে খারাপ ধারণা পোষণ ও অপপ্রচার

মুসনাদে আহমাদের বরাদ দিয়ে ইবনে কাছীর বর্ণনা করেন যে, বনুল মুস্তালিক গোত্রের সরদার, উম্মুল মুমিনীন হযরত জুয়াইরিয়ার পিতা হারেছ ইবনে যেরার রাসূল (সা.)-এর দরবারে হাজির হলে তিনি তাকে ইসলামের দাওয়াত দিলেন এবং যাকাত প্রদানের আদেশ দিলেন। হারেছ ইসলামের দাওয়াত কবুল এবং যাকাত প্রদানের ওয়াদা করে বললেন, এখন আমি নিজ গোত্রে ফিরে গিয়ে তাদেরকেও ইসলাম ও যাকাত প্রদানের দাওয়াত দেব। যারা আমার কথা মানবে ও যাকাত দেবে, আমি তাদের যাকাত একত্রিত করে আমার কাছে জমা রাখব। আপনি অমুক মাসের অমুক তারিখ পর্যন্ত কোন দূত আমার

কাছে পাঠাবেন। আমি তার কাছে যাকাতের জমাকৃত অর্থ দিয়ে দেব। এরপর হারেস ওয়াদা অনুযায়ী যাকাতের অর্থ জমা করলেন এবং দূত আগমনের নির্ধারিত মাস ও তারিখ অতিক্রান্ত হওয়ার পরও কোনো দূত না আসায় হারেসের মনে সন্দেহের সৃষ্টি হলো। তিনি ভাবলেন, হয়তো রাসূল (সা.) কোনো কারণে আমাদের ওপর অসন্তুষ্ট হয়েছেন। নতুবা ওয়াদা অনুযায়ী দূত না পাঠানোর কোনো কারণ থাকতে পারে না। হারেস তার এই আশঙ্কার কথা ইসলাম গ্রহণকারী নেতৃস্থানীয় লোকদের কাছেও ব্যক্ত করলেন। অতঃপর সবাই মিলে একদিন রাসূল (সা.) এর কাছে যাবেন বলে স্থির করলেন।

এদিকে রাসূল (সা.) নির্ধারিত তারিখে ওলীদ বিন উকবাকে যাকাত গ্রহণের জন্য পাঠিয়ে দেন। কিন্তু ওলীদের মনে এই ধারণা জন্মে যে, যেহেতু এই গোত্রের সাথে তার পুরানো শত্রুতা রয়েছে, তাই তারা হয়তো তাকে একা পেয়ে হত্যা করে ফেলবে। এই আশঙ্কার ভিত্তিতে তিনি আর অগ্রসর না হয়ে সেখান থেকেই ফিরে আসেন এবং রাসূল (সা.)-কে গিয়ে বলেন যে, তারা যাকাত দিতে অস্বীকার করেছে এবং আমাকেও হত্যা করার হুমকি দিয়েছে। তখন রাসূল (সা.) রাগান্বিত হয়ে হযরত খালেদ বিন ওলীদের নেতৃত্বে একদল মুজাহিদ প্রেরণ করেন। ঠিক এই সময়ে হারেস মদীনার উপকণ্ঠে উপস্থিত হয়ে এই মুজাহিদ বাহিনীকে দেখতে পান। তিনি তাদেরকে জিজ্ঞেস করেন, আপনার কোন গোত্রের দিকে রওনা হয়েছেন। তারা বললেন, আমরা তোমার গোত্রের দিকেই যাচ্ছি। হারেস কারণ জিজ্ঞেস করলে তাকে ওলীদ বিন উকবার কথিত পুরো কাহিনী শুনানো হলো। তাকে বলা হলো যে, বনুল মুস্তালিক গোত্র যাকাত দিতে অস্বীকার করে ওলীদেরকে হত্যা করার ফন্দি এঁটেছে। এ কথা শুনে হারেস বললেন, আল্লাহর কসম, আমি ওলীদ বিন উকবাকে দেখিওনি। সে আমার কাছে যায়নি। অতঃপর হারেস রাসূল (সা.) এর সামনে উপস্থিত হলে তিনি জিজ্ঞেস করলেন, তুমি কি যাকাত দিতে অস্বীকার করেছ এবং আমার দূতকে হত্যা করতে চেয়েছ? হারিস বললেন, কখনো নয়। আল্লাহর কসম, সে আমার কাছে যায়নি এবং আমি তাকে দেখিওনি। নির্ধারিত সময়ে আপনার দূত যায়নি দেখে আমার আশঙ্কা হয় যে, আপনি হয়তো কোনো ক্রটির কারণে আমাদের ওপর অসন্তুষ্ট হয়েছেন।

কোনো কোনো রেওয়াজে আছে যে, ওলীদ বিন উকবা রাসূল (সা.) এর নির্দেশ মোতাবেক বনুল মুস্তালিক গোত্রে পৌঁছেন। গোত্রের লোকেরা আগেই জানত যে, রাসূল (সা.) এর দূত অমুক তারিখে আসবে। তাই তারা অভ্যর্থনার

উদ্দেশ্যে বস্ত্রি থেকে বেরিয়ে আসে। ওলীদ সন্দেহ করলেন যে, তারা বোধহয় পুরানো শত্রুতার কারণে তাকে হত্যা করতে এগিয়ে আসছে। তাই তিনি সেখান থেকেই ফিরে আসেন এবং রাসূল (সা.) এর কাছে নিজ ধারণা অনুযায়ী অভিযোগ পেশ করলেন যে, তারা যাকাত দেয়ার পরিবর্তে আমাকে হত্যা করতে চেয়েছে। তখন রাসূল (সা.) খালেদ বিন ওলীদকে প্রেরণ করলেন এবং বলে দিলেন যে পূর্ণ তদন্ত ও অনুসন্ধানের পর প্রয়োজনীয় ব্যবস্থা গ্রহণ করবেন। খালেদ বিন ওলীদ রাতের বেলায় বস্ত্রির নিকট পৌঁছে গোপনে কয়েকজন গুপ্তচর পাঠিয়ে দিলেন। তারা ফিরে এসে সংবাদ দিল যে, তারা সবাই ঈমান ও ইসলামের ওপর কায়ম আছে এবং যাকাত দিতে প্রস্তুত আছে। তাদের মধ্যে ইসলামের বিপরীত কিছু নেই। খালেদ ফিরে এসে রাসূল (সা.) এর নিকট সমস্ত বৃত্তান্ত বর্ণনা করলেন।

এই ঘটনার পরিপ্রেক্ষিতে পবিত্র কুরআনের সূরা আল-হুজরাত নাযিল হয়। বিশেষতঃ এই ঘটনার সাথে সম্পৃক্ত আয়াতটি হলো :

‘হে মুমিনগণ! যদি কোনো পাপাচারী ব্যক্তি তোমাদের কাছে কোনো খবর নিয়ে আসে, তবে তোমরা তা পরীক্ষা করে দেখবে, যাতে অজ্ঞতাবশতঃ তোমরা কোনো সম্প্রদায়ের ক্ষতি সাধনে প্রবৃত্ত না হও এবং পরে নিজেদের কৃতকর্মের জন্য অনুতপ্ত না হও।’

শিক্ষা : এই ঘটনা ও এই ঘটনা উপলক্ষে অবতীর্ণ সূরার সংশ্লিষ্ট আয়াতের প্রধান শিক্ষা এই যে, কোনো প্রচারণা- চাই তা মৌখিক হোক বা লিখিত হোক- বক্তা বা লেখকের চারিত্রিক মান এবং খবরের গুরুত্ব বিবেচনা করে গ্রহণ বা বর্জন করতে হবে। খবর যদি এমন গুরুতর হয় যে, তার ভিত্তিতে জানমালের ক্ষয়ক্ষতি সংঘটিত হতে পারে তবে তা তদন্ত ছাড়া গ্রহণ করা যাবেনা। সংবাদদাতা অসৎ হলে তো নয়ই, এমনকি সৎ হলেও নয়। কেননা খবরটি তার ইচ্ছাকৃত অপপ্রচার না হয়ে ভুল বুঝাবুঝির কারণেও উদ্ভূত হতে পারে। আর ফাসেক বা অসৎ লোক হলে তো গ্রহণ করাই যাবেনা তদন্ত ছাড়া। কেননা তা একটা নিরেট মিথ্যাচারও হতে পারে। রাসূল (সা.) বলেছেন, একজন লোকের মিথ্যাবাদী হওয়ার জন্য এতটুকুই যথেষ্ট যে, সে যা শোনে তাই বলে বেড়ায়।

## ৩৪. বদর যুদ্ধের মর্যাদা

বিভিন্ন সহীহ রেওয়ায়েত থেকে জানা যায় যে, বদর যুদ্ধের পর মক্কা বিজয়ের কিছু আগে মক্কার সারা নাম্মী একজন গায়িকা মহিলা মদীনায় আগমন করে। রাসূল (সা.) তাকে জিজ্ঞেস করেন, তুমি হিয়রত করতে এসেছ? সে বলল, না। পুনরায় জিজ্ঞেস করা হলো, তবে কি মুসলমান হয়ে এসেছ? সে বলল, না। রাসূল (সা.) বললেন, তাহলে কি করতে এসেছ? সে বলল, আপনারা মক্কার সম্রাট পরিবারের লোক ছিলেন। আপনাদের ওপর নির্ভর করেই আমি জীবিকা নির্বাহ করতাম। এখন মক্কার বড় বড় সরদাররা বদর যুদ্ধে নিহত হয়েছে। আর আপনারাও এখানে চলে এসেছেন। ফলে আমার জীবিকা নির্বাহ করা কঠিন হয়ে পড়েছে। আমি অনন্যোপায় হয়ে আপনাদের সাহায্য চাইতে এসেছি। রাসূল (সা.) বললেন, তুমি মক্কার পেশাদার গায়িকা। যে যুবকরা তোমার গানে মুগ্ধ হয়ে তোমাকে অনেক অর্থ দিত তারা কোথায়? সে বলল, বদর যুদ্ধের পর তাদের গান বাজনার জৌলুস শেষ হয়ে গেছে। এ পর্যন্ত তারা কেউ আমার খোঁজ নেয়নি। অতঃপর রাসূল (সা.) কোরেশ বংশীয় মোহাজেরদেরকে তাকে সাহায্য করার জন্য উৎসাহ দিলেন। তাঁরা তাকে কিছু নগদ অর্থ ও কাপড় চোপড় দিয়ে বিদায় দিল।

এ সময় মক্কার কাফেররা হুদাইবিয়ার সন্ধি চুক্তি ভঙ্গ করেছে। ফলে রাসূল (সা.) কাফেরদের বিরুদ্ধে একটি চূড়ান্ত অভিযান পরিচালনার সংকল্প নিয়ে গোপনে প্রস্তুতি নিচ্ছিলেন। এই প্রস্তুতির কথা যেন কিছুতেই মক্কার লোকেরা আগেভাগে জানতে না পারে, সে জন্য তিনি সর্বোচ্চ গুরুত্ব সহকারে গোপনীয়তা রক্ষা করে যাচ্ছিলেন।

মদীনায় যারা প্রথম প্রথম হিজরত করেন তাদের মধ্যে একজন ছিলেন বিশিষ্ট সাহাবী হাতেব ইবনে আবি বালতা'য়া। ইয়েমেনী বংশোদ্ভূত এই সাহাবী ইসলাম গ্রহণের পর মক্কাই স্থায়ীভাবে বসবাস করতে থাকেন। মক্কাই তাঁর রক্ত সম্পর্কীয় বা ঘনিষ্ঠ কোনো আত্মীয়-স্বজন ছিল না। তিনি হিজরত করে মদীনায় চলে যাওয়ার পর তাঁর স্ত্রী ও ছেলেমেয়েরা মক্কাতেই ছিল। রাসূল (সা.) ও অন্যান্য সাহাবীর হিজরতের পর মক্কাই বসবাসকারী মুসলমানদের ওপর কাফেররা নানাভাবে জুলুম করত। যেসব মোহাজিরের আত্মীয়-স্বজন মক্কাই ছিল, তাদের সন্তান-সন্ততির কোনো রকমে নিরাপদে থাকত। হাতেবের তেমন কোনো আত্মীয়-স্বজন না থাকায় তার পরিবার-পরিজন মারাত্মক ঝুঁকি ও নির্যাতনের সম্মুখীন ছিল। তাই তিনি ভাবলেন, তার পরিবারকে রক্ষা করার

মতো কেউ যখন নেই, তখন তিনি যদি মক্কাবাসীদের কোনো উপকার করে তাদের সহানুভূতি অর্জন করেন, তাহলে তারা হয়তো তার পরিবারের ওপর জুলুম করবে না। তাই ঐ গায়িকা মহিলার মক্কা গমনকে তিনি একটি সুবর্ণ সুযোগ মনে করলেন।

হাতেবের নিশ্চিত বিশ্বাস ছিল যে, রাসূল (সা.) কে আল্লাহ তায়ালা মক্কা অভিযানে বিজয় দান করবেন। তাই তিনি যদি আগেভাগে মক্কা অভিযানের বিষয়টি মক্কাবাসীর নিকট ফাঁস করে দেন, তাহলে তাঁর কিংবা ইসলামের কোনো ক্ষতি হবে না। তিনি ভাবলেন, একটি পত্র লিখে মক্কাবাসীকে জানিয়ে দেবেন যে, রাসূল (সা.) মক্কা অভিযানের প্রস্তুতি নিচ্ছেন। এতে তাঁর পরিবারের হেফযতের ব্যবস্থা হয়ে যাবে। তাই তিনি একটি চিঠি লিখে গায়িকা সারার হাতে দিয়ে দিলেন, যাতে সে মক্কার বিশিষ্ট লোকদের নিকট তা পৌঁছিয়ে দেয়। গায়িকা চিঠিটি নিয়ে মক্কা অভিমুখে রওনা হয়ে গেল। (তাফসীরে কুরতুবী, মাযহারী)

এদিকে রাসূল (সা.) কে আল্লাহ তায়ালা ওহীর মাধ্যমে ব্যাপারটা জানিয়ে দিলেন এবং মহিলাটি কোন পর্যন্ত পৌঁছেছে, তাও জানালেন।

বুখারী ও মুসলিমে বর্ণিত আছে যে, রাসূল (সা.) হযরত আলী, আবু মুরসাদ ও যুবাইর ইবনুল আওয়ামকে আদেশ দিলেন ঘোড়ায় সওয়ার হয়ে মহিলাকে ধরার জন্য। তার কাছে মক্কাবাসীর নামে হাতেব ইবনে আবি বাল'তায়ার চিঠি রয়েছে। তাকে পাকড়াও করে চিঠিটা উদ্ধার করে নিয়ে এস। তারা দ্রুত ঘোড়া ছুটিয়ে গিয়ে পথিমধ্যেই তাকে ধরে ফেললেন। তারা মহিলাকে বললেন, তোমার কাছে একটা চিঠি আছে ওটা দিয়ে দাও। সে বলল, আমার কাছে কোনো চিঠি নেই। তারা প্রাথমিক তল্লাশিতে চিঠি পেলেন না। কিন্তু তারা দমলেন না। কেননা রাসূল (সা.) এর কথা মিথ্যা হতে পারে না। তাই তারা কঠোর ভাষায় বললেন, চিঠিটা বের করে দাও। নচেত আমরা তোমাকে নগ্ন করে তল্লাশি চালাব।

সে নিরুপায় হয়ে চিঠিটা বের করে দিল। আমরা চিঠিটা নিয়ে রাসূল (সা.)-এর কাছে হাজির হলাম। হযরত ওমর (রা.) ঘটনা শুনেই রাগে অগ্নিশর্মা হয়ে বললেন, হে রাসূল, এই ব্যক্তি আল্লাহ, তাঁর রাসূল ও সকল মুসলমানদের সাথে বিশ্বাসঘাতকতা করেছে। সে আমাদের গোপন তথ্য কাফেরদের কাছে লিখে পাঠিয়েছে। অতএব, অনুমতি দিন। আমি ওর গর্দান উড়িয়ে দেই।

রাসূল (সা.) হাতেবকে ডেকে এনে জিজ্ঞেস করলেন, তোমার এই কাজের

কারণ কি? হাতেব বললেন, হে রাসূল, আমার ঈমানে কোনো ত্রুটি হয়নি। ব্যাপার এই যে, আমি ভাবলাম, আমি যদি মক্কাবাসীর একটু উপকার করি, তাহলে তারা আমার পরিবারের কোনো ক্ষতি করবে না। ভেবে দেখুন, আমিই একমাত্র মোহাজের, যার কোনো আপজন মক্কায় নেই, অথচ তার পরিবার মক্কায় রয়েছে। অন্য সবার স্বগোত্রীয়রা তাদের পরিবারের তদারকি করে। কিন্তু আমার তেমন কেউ নেই।

রাসূল (সা.) হাতেবের বক্তব্য শুনে বললেন, সে সত্য বলেছে। অতএব, তোমরা তার সম্পর্কে ভালো ছাড়া মন্দ বলো না। হযরত ওমর (রা.) তথাপি ঈমানের আবেগে অধীর হয়ে তার আগের উক্তিটি পুনরায় উচ্চারণ করলেন। তখন রাসূল (সা.) বললেন, সে একজন বদর যোদ্ধা। আল্লাহ তায়ালা বদর যোদ্ধাদের সকল গুনাহ মাফ করেছেন ও তাদের জন্য জান্নাতের ঘোষণা দিয়েছেন। কোনো কোনো রেওয়াজে আছে, রাসূল (সা.) বলেন, 'আল্লাহ হয়তো বদর যোদ্ধাদের বলে দিয়েছেন, তোমরা যা খুশি তাই কর।' এ কথা শুনে হযরত ওমর (রা.) চোখের পানি ফেলে বললেন, আল্লাহ ও আল্লাহর রাসূলই ভালো জানেন। (ইবনে কাছির) কোনো কোনো রেওয়াজে হাতেবের এই উক্তিও বর্ণিত হয়েছে যে, আমি এ কাজ ইসলাম ও মুসলমানদের ক্ষতি করার জন্য করিনি। কেননা আমার দৃঢ় বিশ্বাস ছিল যে, রাসূল (সা.) বিজয়ী হবেনই। মক্কাবাসী জেনে গেলেও ক্ষতি হবে না।

**শিক্ষা :** ১. এই ঘটনা থেকে প্রমাণিত হয় যে, বদর যুদ্ধের ন্যায় ঈমানের অগ্নি পরীক্ষায় উত্তীর্ণ সাহাবায়ে কেরামের ভুলত্রুটি আল্লাহ ক্ষমা করে দিয়েছেন। আর এ ধরনের পরীক্ষায় উত্তীর্ণ মুমিনদেরকে তাদের ভুল-ত্রুটির জন্য সন্দেহের চোখে দেখা উচিত নয় এবং বিনা তদন্তে ত্বরিত সিদ্ধান্ত নেয়াও উচিত নয়।

২. ক্ষমার ঘোষণা সত্ত্বেও এটা মানতে হবে যে, এ ধরনের কাজ ভুল। মুসলমানদের স্বার্থের ক্ষতিকর কোনো কাজ কোনো অবস্থায়ই করা চাই না। হযরত হাতেবের এই ঘটনাকে উপলক্ষ করে সূরা মুমতাহিনা নাযিল হয় এবং তাতে এ কাজের কঠোর সমালোচনা করে মুসলমানদেরকে কাফেরদের সাহায্য ও সহানুভূতি গ্রহণ করতে নিষেধ করা হয়। কাজটি যদি ভুল ও অন্যায না হতো তাহলে রাসূল (সা.) চিঠিটা আটকাতেন না এবং সূরা মুমতাহিনায় এর সমালোচনা করা হতো না।

## ৩৫. সুরাকার বিবেক জেগে উঠল

সুরাকা ইবনে মালেক । কুরাইশ বংশের এক দুঃসাহসী যুবক । রাসূল (সা.) যেদিন হযরত আলীকে বিছানায় শুইয়ে রেখে হযরত আবুবকর (রা.) কে সাথে নিয়ে মদীনায় হিজরত করার জন্য মক্কা থেকে বেরুলেন, সেই দিনই কুরাইশ নেতারা ঘোষণা দিল যে, মুহাম্মদকে যে ব্যক্তি খুঁজে ধরে আনতে পারবে, তাকে একশো উট পুরস্কার দেয়া হবে । এই পুরস্কার লাভের নেশায় চারদিকে ঘোড়া ছুটাতে লাগল দুর্ধর্ষ যুবক সুরাকা ইবনে মালেক এবং অনেকে । রাসূল (সা.) ও আবুবকর (রা.) দিন কয়েক মক্কায় পার্শ্ববর্তী সূর পর্বত গুহায় কাটিয়েছিলেন । সে সময় অনেকেই তাদের ঘোড়ার পদচিহ্ন ধরে সূর পর্বত গুহার কাছে গিয়েছিল । কিন্তু গুহার মুখে আল্লাহ নিযুক্ত রক্ষী মাকড়সা জাল বুনে তাদের গতি রুখে দেয় । সবাই মনে করল যে, তারা এই গুহার ভেতরে থাকলে মাকড়সার জাল ছিঁড়ে যেত । অগত্যা সবাই ওখান থেকে ফিরে যায় । এরপর মুহাম্মদ (সা.) ও আবুবকর (রা.) কে খোঁজার চেষ্টা থেকে সুরাকা ছাড়া আর সবাই বিরত হয় । একা সুরাকা মক্কার চারপাশের মরুভূমিতে তন্ন তন্ন করে খুঁজতে থাকে ।

যেদিন আল্লাহর হুকুমে হযরত আবুবকরকে সাথে নিয়ে রাসূল (সা.) সূর পর্বত গুহা থেকে বেরিয়ে মক্কা অভিমুখে রওনা হলেন । সেদিন সহসা সুরাকার নজরে পড়ে গেলেন । তারা দু'জন যাচ্ছিলেন উটের পিঠে সওয়ার হয়ে । তাই সুরাকা ঘোড়া ছুটিয়ে খুব দ্রুত তাদের কাছে পৌঁছে গেল । পেছনে ঘোড়ার পায়ের শব্দ শুনে উভয়ে চমকে উঠলেন । দেখলেন পেছনে অতি নিকটেই যমদূতের মতো ছুটে আসছে সুরাকা ইবনে মালেক । হযরত আবুবকর যিনি সূর পর্বতের গুহায় বসেও এক একবার কাফেরদের পদশব্দে চমকে উঠে রাসূল (সা.) কে নিজের অজানা আশঙ্কার কথা জানাচ্ছিলেন, তখন রাসূল (সা.) তাকে এই বলে প্রবোধ দিচ্ছিলেন যে, 'আবু বকর চিন্তা করো না, আল্লাহ আমাদের সাথে আছেন ।' সেই প্রবোধ বাক্যে আবু বকর শান্ত হয়েছিলেন । কিন্তু এখন? সে সময় আর যা হোক, কাফেররা তাঁদেরকে সাক্ষাত দেখতে পায়নি । কিন্তু এখন কী হবে? এখন যে শত্রু তাদেরকে সরাসরি দেখতে পাচ্ছে, দিনের আলোয় দেখে চিনতেও পারবে এবং ঘোড়সওয়ারের পক্ষে উদ্ভীরোহীকে ধরা একেবারেই সহজ । ওদিকে সুরাকা বিকট শব্দে শাসাচ্ছে আর বলছে, আবুবকর, এখন তোমাদের আর নিস্তার নেই । ছুটাছুটি করে লাভ নেই । থামো । রাসূল (সা.) আবুবকরের বিহ্বল অবস্থা দেখে আবারও তাকে শান্ত হতে বললেন এবং বললেন 'ভয় পেয়ো না, আল্লাহ আমাদের সাথে আছেন ।'

আবুবকর যতটা দ্রুত সম্ভব উটকে হাঁকাতে লাগলেন। ওদিকে সূরাকা যখন একেবারে তাদের কাছে এসে পড়ল, অমনি ঘটে গেল এক অভাবনীয় ঘটনা। সূরাকার ঘোড়ার পা হাঁটু সমান মাটিতে ডেবে গেল। সূরাকা অনেক চেষ্টা করে তাকে ওঠাল। ইত্যবসরে রাসূল (সা.) ও আবুবকর আরো বেশ খানিকটা দূরে চলে গেলেন। সূরাকা আবার প্রবল জোরে ঘোড়া হাঁকালো। আবার কাছে গেল। কিন্তু আবার সেই একই ঘটনা ঘটল। আবারো সূরাকার ঘোড়ার পা হাঁটু সমান মাটিতে ডেবে গেল। সূরাকা আবার তাকে ওঠাল এবং আবারো হাঁকিয়ে কাছে গেল। আবারো একই ঘটনা ঘটল। এভাবে ক্রমাগত কয়েকবার ঘটীর পর সূরাকার বিবেক জেগে উঠল। সে আর তাদের পদানুসরণ না করে ফিরে গেল আবু জাহলের কাছে। তখন আবু জাহলের নাম ছিল 'আবুল হিকাম' অর্থাৎ বুদ্ধিমান বা প্রাজ্ঞ। আবু জাহল যখন তাকে তার অভিযান সম্বন্ধে জিজ্ঞেস করল। সে একটি কবিতার মাধ্যমে পুরো ঘটনা বিবৃত করল। কবিতাটির প্রথম কয়টি লাইন এরূপ :

‘ওহে আবুল হিকাম, তুমি যদি আমার ঘোড়ার অবস্থা স্বচোখে দেখতে যে, কিভাবে তার পাগুলো মাটিতে ডেবে যাচ্ছিল, তাহলে তুমি অবাধ হতে এবং তোমার কোনো সন্দেহ থাকত না যে, মুহাম্মদ (সা.) একজন নবী ও পথপ্রদর্শক, তাঁর মোকাবিলা করার ক্ষমতা কারো নেই।’

যতদূর জানা যায়, সূরাকা এরপর ইসলাম গ্রহণ করেন। কিন্তু নিজের মুসলমান হওয়ার কথা গোপন রাখেন এবং মক্কাতেই অবস্থান করেন। মক্কা বিজয়ের পর তিনি রাসূল (সা.) এর সাথে দেখা করেন এবং প্রকাশ্যে ইসলাম গ্রহণের কথা ঘোষণা করেন।

**শিক্ষা :** সত্যকে উপলব্ধি করার পর সত্যের বিরোধিতা থেকে বিরত হলে আল্লাহর গ্যব থেকে রক্ষা পাওয়া ও হেদায়াত লাভ করার আশা করা যায়।

## ৩৬. হযরত খুবাইবের শাহাদাত

ওহুদ যুদ্ধের পর আযল ও কারাহ গোত্রের একদল লোক রাসূলুল্লাহ (সা.) এর নিকট এসে বলল, হে রাসূল! আমাদের গোত্রে অনেকে ইসলাম গ্রহণ করেছে। তাই আপনার সাহাবীদের মধ্যে থেকে কয়েকজনকে আমাদের সাথে পাঠিয়ে দিন। তারা আমাদেরকে কুরআন পড়াবেন এবং ইসলামের বিধিসমূহ শিখাবেন। রাসূল (সা.) তাদের কথামতো সরল বিশ্বাসে আসেম ইবনে সাবেত, খুবাইব



ইবনে আদী ও যায়েদ ইবনে দাখিনাসহ ছয়জন মতান্তরে দশজন সাহাবীকে পাঠিয়ে দিলেন। তারা মক্কা ও উসফানের মধ্যবর্তী হুদাত নামক স্থানে পৌঁছলে আযল ও কারাহ গোত্রের লোকেরা বিশ্বাসঘাতকতা করে তরবারি সজ্জিত হয়ে সাহাবীদেরকে ঘেরাও করে ফেলল। সাহাবীগণ শত্রুদের এই আকস্মিক বিশ্বাসঘাতকতায় হতবাক হলেও ঘাবড়ালেন না। তারা তাৎক্ষণিকভাবে তরবারি হাতে নিয়ে লড়াই করতে প্রস্তুত হয়ে গেলেন। শত্রুরা বলল, তোমরা নেমে এস। আল্লাহর কসম, আমরা তোমাদেরকে হত্যা করব না।

আসেমসহ তিনজন তাদের এই প্রতিশ্রুতি অগ্রাহ্য করলেন। তারা বললেন, বিশ্বাসঘাতক কাফেরদের ওয়াদায় বিশ্বাস করা যায় না। তারা লড়াই করতে করতে শহীদ হয়ে গেলেন। শহীদ হবার পূর্বে তিনি দোয়া করলেন, 'হে আল্লাহ! আমাদের খবর রাসূল (সা.) কে জানিয়ে দিও।'

আসেমের শাহাদাতের পর শত্রুরা তার মাথা কেটে নিতে চাইল। ওহুদ যুদ্ধে তাদের দু'জন আসেমের হাতে নিহত হয়েছিল। তাই তারা প্রতিজ্ঞা করেছিল যে, আসেমের মাথার খুলিতে মদ খাবে। কিন্তু একঝাঁক বোলতা এমনভাবে আসেমের মাথাটা ঘিরে রাখল যে, তারা তার মাথা বিচ্ছিন্ন করতে সক্ষম হলো না। কারণ মৃত্যুর পূর্বে তিনি এই দোয়াও করেছিলেন যে, কোনো কাফের যেন তার দেহকে স্পর্শ করতে না পারে।

এরপর যায়েদ ইবনে দাখিনা, খুবাইব ইবনে আদী ও আব্দুল্লাহ ইবনে তারিক কিছুটা নমনীয় হওয়ার সিদ্ধান্ত নিলেন এবং শত্রুদের কাছে আত্মসমর্পণ করলেন। তারা তাদেরকে বন্দী করে মক্কায় নিয়ে চলল। পশ্চিমধ্যে হাজারানে গিয়ে আব্দুল্লাহ ইবনে তারিক খুলে তরবারি নিয়ে যুদ্ধ শুরু করে দিলেন। শত্রুরা তাকে পাথর মেরেই শহীদ করে ফেলল। অবশিষ্ট খুবাইব ও যায়েদকে তারা মক্কায় নিয়ে কুরায়েশদের কাছে বিক্রি করে দিল।

অতঃপর কুরায়েশরা খুবাইব ও যায়েদকে বদর ও ওহুদের প্রতিশোধস্বরূপ হত্যা করার সিদ্ধান্ত নিল। যায়েদকে হত্যা করার আগে আবু সুফিয়ান জিজ্ঞেস করল, হে যায়েদ! বল, তোমার জায়গায় যদি মুহাম্মদ থাকত, তোমার পরিবর্তে আমরা তাকে হত্যা করতাম এবং তুমি নিরাপদে বাড়ি চলে যেতে, তাহলে কেমন হতো? যায়েদ বললেন, আল্লাহর কসম, তাঁর গায়ে একটা কাঁটাও যদি ফোটে, তবে আমি নিজের মুক্তির বিনিময়েও তা সহ্য করব না। একথা শুনে আবু সুফিয়ান বলল, 'মুহাম্মদের সঙ্গীরা তাকে যেমন ভালোবাসে, এমন ভালোবাসতে আমি আর কাউকে দেখিনি।' অতঃপর তাকে শহীদ করে দেয়া হয়।

সবার শেষে খুবাইবের পালা। পরবর্তীতে ইসলাম গ্রহণ করেছিলেন কুরাইশদের এমন এক দাসী মাবিয়া বলেন, খুবাইব আমার কাছে আমার একটি ঘরে বন্দী ছিলেন। আমি একদিন তার কাছে গেলাম। দেখলাম, বিরাট এক থোকা আঙ্গুর তার হাতে। তিনি তা থেকে আঙ্গুর ছিঁড়ে ছিঁড়ে খাচ্ছেন। অথচ ঐ সময় দেশের কোথাও আঙ্গুর ছিল না। হত্যার পূর্বে খুবাইব আমার কাছে একটা ক্ষুর চাইলেন পরিষ্কার-পরিচ্ছন্ন হবার জন্য। একটি ছেলের হাতে আমি ক্ষুর পাঠিয়ে দিয়েছিলাম।

এরপর কাফেররা খুবাইবকে নিয়ে তানঈমে গেল। হত্যার পূর্বে তিনি তাদের কাছে দু'রাকাত নামায পড়ার অনুমতি চাইলে তারা অনুমতি দিল। খুবাইব সংক্ষেপে দু'রাকাত নামায পড়ে বললেন, তোমরা হয়তো ভাববে, আমি মৃত্যুর ভয়ে নামায লম্বা করছি। তা না হলে আরো লম্বা নামায পড়তাম। সেই থেকে শাহাদাতের পূর্বে সুযোগ পেলে দু'রাকাত নামায পড়া মুসলমানদের মধ্যে প্রচলিত হয়ে গেছে।

এরপর তারা তাকে শূলে চড়াল। শূলে চড়ার পূর্ব মুহূর্তে তিনি দোয়া করলেন, 'হে আল্লাহ! আমরা আপনার রাসূলের দাওয়াত পৌঁছে দিয়েছি। তবুও আমাদের সাথে এরা যে আচরণ করল, সে খবর রাসূলের কাছে পৌঁছে দাও। হে আল্লাহ! এদের সকলকে গুণে গুণে এক এক করে খতম করে দিও। কাউকে রেহাই দিও না।

শাহাদাতের পূর্বে খুবাইব একটি কবিতাও আবৃত্তি করেছিলেন। তার কয়েকটি লাইনের অনুবাদ নিম্নরূপ :

'আমি যখন মুসলমান অবস্থায় নিহত হই, তখন কোনদিকে শুইয়ে আমাকে হত্যা করা হয়, তার আমি কোনো পরোয়া করি না। ওহে আরশের অধিপতি, আমার প্রতি তাদের যে অভিপ্রায়, তাতে আমাকে ধৈর্য ধারণের ক্ষমতা দাও। তারা আমার গোশত টুকরো টুকরো করার সংকল্প করেছে। তখন আমার জীবনের আর কোনো আশা নেই। এসব তো আল্লাহরই উদ্দেশ্যে, তিনি চাইলে আমার ছিন্ন-ভিন্ন দেহেও বরকত দিতে পারেন। তারা আমাকে কুফরি কিংবা মৃত্যু- এর যে কোনো একটি বেছে নিতে বলেছে। আমার দু'চোখে যে অশ্রু বয়ে যাচ্ছে, তা মৃত্যুর ভয়ে নয় বরং আল্লাহর ভয়ে বইছে। আমি মৃত্যুকে ভয় করি না। আমাকে মরতে তো একদিন হবেই। আমি কেবল জাহান্নামের লেলিহান শিখাকে ভয় করি। আমি শত্রুর সামনে কোনো দুর্বলতা ও অস্থিরতা প্রকাশ করব না। কেননা আল্লাহর কাছেই আমার প্রত্যাবর্তন।' এরপর তারা খুবাইবকে হত্যা করে।

শিক্ষা : হযরত খুবাইবের শাহাদাত আল্লাহর দ্বীন প্রতিষ্ঠার সংগ্রামকারীদের জন্য অত্যন্ত শিক্ষণীয় ও প্রেরণাদায়ক একটি ঘটনা। এমন লোমহর্ষক নির্যাতন ও হত্যার মুখে অবিচল থাকা অত্যন্ত মজবুত ঈমানের পরিচায়ক যা আল্লাহর রহমত ছাড়া কারো পক্ষে সম্ভব নয়। এই ঘটনার আরো একটি শিক্ষা এই যে, ইসলামী আন্দোলনের নেতা ও কর্মীদের শত্রুর দুরভিসন্ধি, চক্রান্ত ও ধান্নাবাজী সম্পর্কে সাবধান হতে হবে। আল্লাহর রাসূলের জীবদ্দশায় এরূপ ঘটনা ঘটিয়ে আল্লাহ কেয়ামত পর্যন্ত সমগ্র মুসলিম উম্মাহকে সতর্ক করে দিয়েছেন।

### ৩৭. আবু জাহলের জুলুম প্রতিরোধে রাসূলুল্লাহ (সা.)

জাহেলিয়াত যুগে আবু জাহল জনৈক ইয়াতিমের অভিভাবক ছিল। সে ঐ ইয়াতিমের পৈতৃক সম্পত্তি দেখাশুনার নামে নিজেই ভোগ দখল করত এবং ইয়াতিমকে তার কোনো অংশই দিত না। একদিন সেই ইয়াতিম বালক তার কাছে এসে পিতার পরিত্যক্ত সম্পত্তির কিছু অংশ চাইল। তার গায়ে তখন কাপড় চোপড়ও ছিল না। কিন্তু পাষণ্ড আবু জাহল তার দিকে দ্রুক্ষেপও করল না, ছেলেটি দীর্ঘ সময় দাঁড়িয়ে থেকে অবশেষে হতাশ হয়ে ফিরে চলল। কোরায়েশ নেতাদের কয়েকজন দুষ্টমি করে তাঁকে বলল, ‘মুহাম্মদ (সা.) এর কাছে যেয়ে নালিশ করে দে। সে আবু জাহলের কাছ থেকে সুপারিশ করে তোর সম্পত্তি আদায় করে দেবে।’ আসলে তাদের মতলব ছিল আবু জাহলের সাথে একটা টক্কর লাগিয়ে দিয়ে রাসূল (সা.) কে জন্দ করা। ছেলেটি জানতোই না যে, আবু জাহলের সাথে তার সম্পর্ক কী এবং তারা কোন উদ্দেশ্যে তাকে এই পরামর্শ দিচ্ছে। সে সরল মনে রাসূল (সা.) এর কাছে হাজির হলো এবং নিজের পুরো ঘটনা বর্ণনা করল।

রাসূল (সা.) তৎক্ষণাৎ উঠলেন এবং তাঁর কট্টর দূশমন আবু জাহলের কাছে চলে গেলেন। তাঁকে দেখে আবু জাহল স্বাগত জানাল। তিনি যখন বললেন যে, এই ছেলেটার পাওনা দিয়ে দাও, তখন সে নির্বিবাদে মেনে নিল এবং তার পাওনা দিয়ে দিল। ওদিকে কোরায়েশ নেতারা অপেক্ষায় ছিল আবু জাহল ও মুহাম্মদের (সা.) মধ্যে কী কাণ্ড ঘটে তা জানার জন্য। তারা একটা মজার সংঘর্ষ ঘটানোর খবরের আশায় প্রহর গুনছিল। কিন্তু যখন পুরো ঘটনার খবর পেল, তখন অবাক হয়ে গেল এবং আবু জাহলকে এসে ভৎসনা করতে লাগল যে, সে এমন সুযোগ হাতছাড়া করল কেন এবং সেও ইসলামে দীক্ষিত হয়েছে বলে চিৎকার

দিতে লাগল। আবু জাহল তাদেরকে বলল, ‘আল্লাহর কসম, আমি আমার ধর্ম ত্যাগ করিনি। কিন্তু আমি দেখতে পেলাম যেন মুহাম্মদের ডানে ও বামে এক একটা বর্শা রয়েছে, আমি তার কথামতো কাজ না করলে তা আমার বুকের মধ্যে ঢুকে যাবে।’

শিক্ষা : ইয়াতিম ও দুস্থ মানুষের ওপর কেউ অত্যাচার করলে তা নীরবে বরদাশত করা উচিত নয়। সমাজের প্রভাবশালী লোকদের উচিত আল্লাহর ওপর ভরসা করে জুলুম প্রতিরোধের চেষ্টা করা। যালেমদের সাধারণত মনোবল কম থাকে। দৃঢ় প্রতিরোধ গড়ে তুলতে পারলে তারা প্রায়ই হার মানে। এ কাজে একাকী অগ্রসর হলেও আল্লাহর সাহায্য পাওয়ার আশা করা যায়।

## ৩৮. বীরে মাউনার হৃদয়বিদারক ঘটনা

চতুর্থ হিজরীর সফর মাসে নাজদ থেকে আবু বারা নামক এক ব্যক্তি মদীনায়ে আগ্রহ করল। সে রাসূল (সা.) এর সাথে সাক্ষাত করলে রাসূল তাকে ইসলামের দাওয়াত দিলেন। সে দাওয়াত গ্রহণও করল না, প্রত্যাখ্যানও করল না। সে বলল, হে মুহাম্মদ! আপনি আমার সাথে কিছু সংখ্যক সাহাবীকে নাজদে পাঠালে ভালো হয়। তারা সেখানে গিয়ে ইসলাম প্রচার করলে অনেকে তা গ্রহণ করতে পারে। রাসূল (সা.) বললেন, নাজদবাসী যে তাদের ক্ষতি করবে না তার নিশ্চয়তা কী? আবু বারা বলল, তাদের নিরাপত্তার দায়িত্ব আমিই নিচ্ছি।

রাসূল (সা.) মুনিযির বিন আমরের (রা.) নেতৃত্বে চল্লিশজন সাহাবীকে নাজদে পাঠিয়ে দিলেন। তারা চলতে চলতে বীরে মাউনা নামক কুয়ার কিনারে পৌঁছলেন। সেখানে সবাই অবস্থান গ্রহণ করে তাদের অন্যতম সঙ্গী হারাম ইবনে মিলহান (রা.) কে রাসূলুল্লাহর পত্রসহ এলাকার বিশিষ্ট গোত্রপতি আমের বিন তোফায়েলের কাছে পাঠালেন। আমের রাসূল (সা.) এর চিঠি তো পড়ে দেখলই না, অধিকন্তু দূত হারাম ইবনে মিলহানকে হত্যা করে বসল। এরপর বাদবাকিদেরকেও হত্যা করার জন্য বনু সুলাইম গোত্রের একাংশের সাহায্য নিয়ে তাদেরকে ঘেরাও করে ফেলল। সাহাবীগণ শত্রুদের বিরুদ্ধে বীর বিক্রমে যুদ্ধ করলেন এবং একজন ব্যতীত সবাই শহীদ হয়ে গেলেন।

আমের ইবনে তুফায়েল পরবর্তীকালে লোকদের কাছে জিজ্ঞেস করেছিল যে, আমি নিহতদের মধ্যে একজনের লাশকে আকাশে উঠে অদৃশ্য হয়ে যেতে দেখেছি। এই লোকটি কে? লোকেরা বলল, আমের ইবনে ফুহাইয়া। (হযরত আবু বকর সিদ্দীকের মুক্ত সাবেক ক্রীতদাস এবং রাসূল (সা.) ও আবু বকরের

মদীনায় হিজরতকালীন পথপ্রদর্শক ।)

ইবনে ইসহাক বর্ণনা করেন যে, আমের ইবনে তোফায়েলের সহযোগী জাবার পরবর্তীকালে ইসলাম গ্রহণ করেন । তিনি তার ইসলাম গ্রহণের কারণ ব্যাখ্যা করে বলেন, বীরে মাউনার ঘটনার সময় আমি বর্শা দিয়ে একজন সাহাবীর দু'কাঁধের মাঝখানে যখন আঘাত করলাম এবং বর্শা যখন তার বুক ভেদ করে বেরিয়ে গেল, তখন ফিনকি দিয়ে বের হওয়া রক্তকে সে দু'হাতে মুখে মাখাচ্ছিল আর বলছিল, 'ফুযতু ওয়া রবিবল কা'বা ।' অর্থাৎ কা'বার প্রভুর শপথ, আমি সফল হয়েছি । একথা শুনে আমি মনে মনে বললাম, যে ব্যক্তি আমার হাতে খুন হলো তার আবার সাফল্য এল কোথেকে? পরে আমি অনেকের কাছে এ কথার মর্ম জিজ্ঞেস করি । তারা আমাকে জানায় যে, সে নিজের শহীদ হওয়াকেই সাফল্য বলে বিশ্বাস করত । আর এ বিশ্বাস শুধু তার একার নয়, প্রত্যেক মুমিনেরই ।

শিক্ষা : শাহাদাত বাহ্যতঃ ব্যর্থতা মনে হলেও আসলে তা মুমিনের সবচেয়ে বড় সাফল্য । কুরআনে আল্লাহ বলেছেন, 'নিশ্চয় আল্লাহ মুমিনদের কাছ থেকে তাদের জান ও মাল কিনে নিয়েছেন । তারা আল্লাহর পথে লড়াই করে । ফলে হত্যা করে ও নিহত হয় ।... আর এটাই হচ্ছে সবচেয়ে বড় সাফল্য । (সূরা তাওবা)

## ৩৯. মুমিনের নামায

একবার রাসূলুল্লাহ সাল্লাল্লাহু আলাইহি ওয়াসাল্লাম জানতে পারলেন যে, নাজদে দুটি গোত্র মদীনা আক্রমণের প্রস্তুতি নিচ্ছে । তিনি কালবিলম্ব না করে সাতশো সাহাবীকে সাথে নিয়ে যুদ্ধসাজে সজ্জিত হয়ে নাজদ অভিমুখে যাত্রা করলেন । হযরত উসমান ইবনে আফফানকে তিনি মদীনায় নিজের স্থলাভিষিক্ত রেখে গেলেন । যথাস্থানে পৌঁছে তিনি 'যাতুর রিকা' নামক পর্বতবেষ্টিত এক উপত্যকায় শিবির স্থাপন করলেন । এ কারণে এই অভিযানের নাম দেওয়া হয়েছে 'গায়ওয়ানে যাতুর রিকা' ।

রাসূলুল্লাহ (সা.) এর নেতৃত্বে মুসলিম বাহিনীর ত্বরিত উপস্থিতির ফলে শত্রুদল এতোই ঘাবড়ে গেল যে, তারা রণে ভঙ্গ দিয়ে চতুর্দিকে পালিয়ে গেল । ফলে যুদ্ধ না করেই রাসূল (সা.) সসৈন্যে মদীনায় ফিরে গেলেন । তবে এই অভিযানকালে এমন একটি চমকপ্রদ ঘটনা ঘটে যা চিরদিন মুসলমানদের জন্য শিক্ষা ও প্রেরণার উৎস হয়ে থাকবে । এই অভিযানকালে রাসূল (সা.)-এর তাঁবু পাহারা দেয়ার জন্য প্রতি রাতে পালাক্রমে কয়েকজন করে সাহাবীকে নিয়োগ

করা হয়। যেদিন হযরত আব্বাদ (রা.) ও আম্মার ইবনে ইয়াসার (রা.) কে পাহারার কাজে নিয়োগ করা হয়, সেই দিনই ঘটে এই মর্মস্পর্শী ঘটনা।

হযরত আব্বাদ ও হযরত আম্মার ইবনে ইয়াসার পরস্পরে পুরো রাতটাকে এভাবে ভাগ করে নিয়েছিলেন যে, প্রথম ভাগে পাহারার দায়িত্ব হযরত আব্বাদের ওপর এবং শেষের অংশ হযরত আম্মারের ওপর পড়ল। হযরত আব্বাদের পাহারার পালা শুরু হলো। তিনি ছিলেন অত্যধিক নফল নামাযের ভক্ত। তাই ডাবলেন, এত দীর্ঘ সময় চুপচাপ থেকে লাভ কী? সময়টা নামায পড়ে কাটিয়ে দেয়া যাক। তাই তিনি নফল নামাযের নিয়ত করে নামাযে সূরা কাহাফ পড়া শুরু করে দিলেন। ওদিকে হযরত আম্মার ঘুমিয়ে পড়লেন। হযরত আব্বাদ যখন নামাযে দাঁড়িয়ে দীর্ঘ সূরা পাঠরত, তখন চারদিকে গাঢ় অন্ধকার। এক কাফের সস্তর্পণে সামনে এল। সে দূর থেকে স্পষ্ট দেখতে পেল না যে কোনো পাহারাদার আছে কিনা। তবে দূর থেকে হযরত আব্বাদকে একটা গাছ মনে করল। আবার তার মনে সন্দেহ হলো যে, ওটা গাছ না হয়ে একটা মানুষও হতে পারে। তাই সে নিজের সন্দেহ ভঙ্গনের জন্য তাকে লক্ষ্য করে একটা তীর ছুঁড়ল। তীর হযরত আব্বাদের পিঠে গিয়ে ঢুকল। কিন্তু নামায ছাড়লেন না। কাফেরটি সন্দেহমুক্ত হওয়ার জন্য একে একে তিনটে তীর ছুঁড়ল। প্রত্যেকটি তীর তার গায়ে বিদ্ধ হয়ে প্রবল রক্তপাত ঘটাল। অগত্যা বাধ্য হয়ে তিনি নামায ছেড়ে দিয়ে হযরত আম্মারকে ডেকে ঘুম থেকে জাগালেন। ইত্যবসরে তার নড়াচড়া টের পেয়ে ও কথাবার্তা শুনে শত্রু সৈন্যটি নীরবে প্রস্থান করল। হযরত আম্মার তাকে ক্ষতবিক্ষত ও রক্তাক্ত দেখে জিজ্ঞেস করলেন, 'আপনি প্রথম তীরের সাথে সাথেই আমাকে ডাকলেন না কেন?'

হযরত আব্বাদ বললেন, আমি নামাযে সূরা কাহাফ পাঠ করছিলাম। এতে এতো মজা লাগছিল যে, সূরা শেষ না করে কিছুতেই নামায ছাড়তে ইচ্ছা হচ্ছিল না।

হযরত আব্বাদ (রা.) হযরত আবু বকর (রা.)-এর খিলাফতকালে মুরতাদদের বিরুদ্ধেও জেহাদে অংশগ্রহণ করেন এবং ভগ্ন নবী মুসাইলিমার বিরুদ্ধে জিহাদ করতে গিয়ে শহীদ হন।

শিক্ষা : ১. শত্রুর আক্রমণের প্রস্তুতির কথা জানার পর চুপ করে বসে না থেকে আক্রমণ প্রতিহত করার যথাসাধ্য প্রস্তুতি নেয়া উচিত।

২. নামাযে পঠিত কুরআনের অর্থের দিকে খেয়াল রাখলে নামাযে মনোনিবেশ করা সহজ হয়।

## ৪০. মুমিনের আতিথেয়তা

একবার এক ব্যক্তি রাসূলুল্লাহ সাল্লাল্লাহু আলাইহি ওয়াসাল্লামের কাছে এসে বলল, আমি অনাহারে আছি। রাসূল (সা.) তৎক্ষণাত অন্য এক ব্যক্তিকে নিজের এক স্ত্রীর কাছে পাঠিয়ে কিছু খাবার আনতে বললেন। কিন্তু রাসূল (সা.) এর ঐ স্ত্রী জানালেন যে, তাঁর কাছে পানি ছাড়া আর কিছু নেই। অতঃপর একে একে অন্য সকল স্ত্রীর কাছে খাবার চেয়ে পাঠালেন। কিন্তু প্রত্যেকের কাছ থেকে একই জবাব পেলেন যে, পানি ছাড়া আর কিছুই নেই। অতঃপর রাসূল (সা.) তাঁর সাহাবীগণের কাছে জানতে চাইলেন যে, তোমাদের কারো এই ব্যক্তিকে আজকের রাতের জন্য আতিথেয়তা করার ক্ষমতা আছে কি? আনসারদের একজন বললেন, 'হে রাসূল! আমি প্রস্তুত।' তিনি লোকটিকে নিয়ে নিজের পরিবারের কাছে গেলেন এবং তাঁর স্ত্রীকে বললেন, 'আল্লাহর রাসূলের মেহমানকে যতন করো।' স্ত্রী বললেন, আমার ছেলেমেয়েদের খাবার ছাড়া আর কিছু নেই। সাহাবী বললেন, বেশ তো, ওদেরকে অন্য কোনো বিষয়ের দিকে আকৃষ্ট করে রাখ। তারপর রাতের খাবার চাইলে ঘুম পাড়িয়ে রাখ। আর আমাদের মেহমান খেতে আসলে আলো নিভিয়ে দাও এবং এরূপ ভান কর যেন আমরাও তার সাথে খাচ্ছি। অতঃপর তারা একত্রে বসলেন। কিন্তু শুধু মেহমান তৃপ্ত হয়ে আহার করল। আর তারা উভয়ে এবং ছেলেমেয়েরা অনাহারে রাত কাটিয়ে দিলেন। সকাল বেলা তিনি যখন রাসূল (সা.) এর নিকট এলেন, তখন দেখলেন, রাসূল (সা.) পুরো ঘটনা ওহীর মাধ্যমে জেনে ফেলেছেন। তিনি বললেন, তোমরা দু'জনে তোমাদের মেহমানের সাথে রাতে যে ব্যবহার করেছ, তাতে আল্লাহ তায়লা মুগ্ধ হয়েছেন। (বুখারী ও মুসলিম)।

**শিক্ষা :** মেহমানের যত্ন করা ইসলামে অত্যন্ত সওয়াবের কাজ। এমনকি প্রয়োজনে নিজেরা অভুক্ত থেকেও মেহমানকে আপ্যায়ন করানো উচিত।

## ৪১. মুমিনের আত্মসংযম

এক রণাঙ্গনে মুসলমান বাহিনীর সাথে কাফেরদের প্রচণ্ড যুদ্ধ চলছে। হযরত আলী (রা.) এক অমুসলিম যোদ্ধাকে ধরাশায়ী করে তার বুকের ওপর চড়ে বসেছেন। হাতে নগ্ন তরবারী। এক্ষুণি তার বুকে বসিয়ে দেবেন। সহসা ধরাশায়ী অমুসলিম সৈনিকটি তার শেষ অস্ত্র চালাতে গিয়ে বুকের ওপর চেপে বসা হযরত আলীর (রা.) মুখে থুথু দিয়ে ভরে দিল। হযরত আলী (রা.) এক

মুহূর্ত খমকে বসে রইলেন। তারপর তার বুকের ওপর থেকে উঠে আসলেন।  
তরবারি দূরে নিক্ষেপ করে বললেন, 'যাও, তুমি মুক্ত।'।

কাফের সৈনিকটি তো হতবাক। সে যে একটি যুদ্ধের ময়দানে রয়েছে একথা  
ভুলে গেল। সে জিজ্ঞেস করল, আলী, তোমার কি হয়েছে। আমাকে এমন  
মুঠোর মধ্যে পেয়েও ছেড়ে দিলে যে?

হযরত আলী (রা.) বললেন, ময়দানে তোমাদের সাথে যে যুদ্ধ চলছিল, সেটা  
চলছিল ইসলামের সাথে। কিন্তু যে মুহূর্তে তুমি আমার মুখে থুথু দিলে, তখন  
তোমার ওপর আমার প্রচণ্ড আক্রোশ সৃষ্টি হলো। সেটা ছিল আমার ব্যক্তিগত  
আক্রোশ। এই আক্রোশের বশে তোমাকে হত্যা করলে গুনাহ হবে। তাই ক্রোধ  
সম্বরণ করলাম।

সৈনিকটি তৎক্ষণাত বলল, 'যে ধর্ম তোমাকে এমন কঠিন মুহূর্তেও আত্মসংযম  
শিক্ষা দেয়, তাতে আমাকেও দীক্ষিত কর।' এই বলে সে ইসলাম গ্রহণ করল।

শিক্ষা : ব্যক্তিগত আক্রোশের বশে কারো ওপর আক্রমণ করা জায়েজ নয়।  
তবে আত্মরক্ষার জন্য সর্বাবস্থায় যুদ্ধ করা কর্তব্য।

## ৪২. মুমিনের আত্মসমালোচনা

এক ব্যক্তি উয়াইস কারনীর (একমাত্র মুমিন, যিনি রাসূল (সা.) এর  
জীবদ্দশায় ইসলাম গ্রহণ করেও রাসূল (সা.) এর সাথে সাক্ষাতের সুযোগ  
পাননি) সাথে সাক্ষাত করে বলল, 'কেমন আছেন, হে উয়াইস?'

উয়াইস : আলহামদুলিল্লাহ, ভালো আছি।

আগস্তিক : আজকাল কিভাবে আপনার সময় কাটে?

উয়াইস : সে কথা শুনতে না চাওয়াই উত্তম। আজকাল দুনিয়ায় কোন  
মুমিনের সুখে শান্তিতে জীবন-যাপনের সুযোগ সংকুচিত হয়ে এসেছে।  
কুরআনের জ্ঞান অর্জন করলে সম্পদশালী হওয়া যায় না। এমনকি সততার  
সাথে জীবন-যাপন করলে দুনিয়ায় বন্ধুও মেলে না।

আগস্তিক : রাসূল (সা.) এর কাছ থেকে শুনেছেন এমন একটি হাদীস আমাকে  
শোনান।

উয়াইস : আমি রাসূল (সা.) এর সাক্ষাত পাইনি যে, তোমাকে তাঁর হাদীস  
শোনাব। তবে অন্যের মাধ্যমে পাওয়া রাসূল (সা.) এর একটি উপদেশ আমি  
তোমাকে জানাচ্ছি। তিনি বলেছেন, 'তোমরা আল্লাহর দরবারে গিয়ে হিসাব-



নিকাশের সম্মুখীন হবার আগে নিজেদের হিসাব নিজেই গ্রহণ কর। আল্লাহ দুনিয়াটাকে তোমাদের জন্য একটা পুলস্বরূপ বানিয়েছেন। কাজেই তোমরা এই পুল পার হবার চেষ্টা কর।'

**শিক্ষা :** আত্মসমালোচনা করা মুমিনের একটি অপরিহার্য গুণ। অন্যের সমালোচনার পাশাপাশি নিজের সমালোচনাও সব সময় অব্যাহত রাখা উচিত। রাসূল (সা.) বলেছেন, 'তোমাদের কাজের হিসাব নেয়ার আগে নিজেরাই নিজেদের কাজের সমালোচনা কর।'

## ৪৩. ক্ষুধা ও দারিদ্র্যের অগ্নিপরীক্ষায় মুমিনের দৃঢ়তা

[ক] হযরত আবু আবদুল্লাহ জাবের ইবনে আবদুল্লাহ (রা.) বলেন, একবার রাসূলুল্লাহ (সা.) আমাদের কিছু জোয়ানকে কুরাইশদের একটি দলের মোকাবিলার জন্য পাঠালেন। আমাদের সেনাপতি ছিলেন আবু উবাইদা। রাসূলুল্লাহ (সা.) আমাদের রসদ হিসেবে এক ব্যাগ খোরমার অতিরিক্ত কিছুই দিতে পারলেন না। ক্ষুধা লাগলে আবু উবাইদা আমাদের প্রত্যেককে একটা করে খোরমা দিতেন। শিশুরা যেমন চুষে চুষে অনেকক্ষণ ধরে খায়, আমরাও তেমনিভাবে খেতাম এবং খাওয়ার শেষে অনেক করে পানি খেয়ে নিতাম। এতেই আমাদের পুরো একদিন চলে যেত। কখনো কখনো আমরা উটের খাদ্য 'খাবাত' নামক গাছের পাতা লাঠি দিয়ে পেড়ে পানি দিয়ে ভিজিয়ে খেয়ে নিতাম। এভাবে চলতে চলতে আমরা সমুদ্রের কিনারে গিয়ে উপনীত হলাম। সমুদ্রতীরে আমাদের সামনে পড়ল একটা বিরাট আকারের বস্ত্র। দূর থেকে মনে হলো বালুর স্তূপ। কাছে গিয়ে দেখি আমাদের নামক এক প্রকাণ্ড সামুদ্রিক জন্তু। আবু উবায়দা প্রথমে বললেন, এটা মৃত। কিন্তু পরক্ষণেই আবার বললেন, আমরা এখন আল্লাহর রাসূলের প্রতিনিধি হিসেবে আল্লাহর পথে জেহাদরত। এখন আমরা অনন্যোপায়। কাজেই চল ওটাকে খাদ্য হিসেবে গ্রহণ করা যাক। অতঃপর আমরা ৩০০ জন মোজাহেদ ঐ জন্তুটার ওপর নির্ভর করে এক মাস কাটলাম। ওর গোশত খেয়ে আমরা বেশ মোটাসোটা হয়ে গেলাম। শুধু তাই নয়, ওর চোখের কোটর থেকে আমরা কলসি কলসি চর্বিও সংগ্রহ করলাম এবং এত বড় এক এক টুকরো গোশত কেটে আলাদা করলাম যে, যার প্রত্যেকটা এক একটা ষাড়ের মতো দেখতে। আবু উবাইদা আমাদের মধ্য থেকে ১৩ ব্যক্তিকে ওর চোখের কোটরের ওপর বসিয়ে দিলেন এবং তার বিভিন্ন অঙ্গ

বিচ্ছিন্ন করে আমাদের সবচেয়ে বড় উটটার ওপর চড়িয়ে দিলেন। এই বোঝা বহন করে উটটি রওনা দিল। আমরাও অনেক গোশত কেটে নিয়ে চললাম। মদীনায় যখন রাসূল (সা.) কে পুরো ঘটনা জানালাম, তখন তিনি বললেন, 'ওটা তোমাদের খাদ্য হিসেবে আল্লাহ সরবরাহ করেছিলেন। ওর কিছু গোশত কি তোমাদের সাথে আছে, যা আমাদেরকেও খেতে দিতে পার?' তখন আমরা তার কিছু গোশত রাসূল (সা.) এর নিকট পাঠালাম এবং তিনি তা খেলেন। (মুসলিম)।

[খ] হযরত জাবের বর্ণনা করেন যে, খন্দক যুদ্ধের প্রস্তুতি হিসেবে আমরা যখন মদীনার চারপাশে পরিখা খনন করছিলাম, তখন এক পর্যায়ে এমন শক্ত মাটি পাওয়া গেল যার ভেতর কোদাল বসতেই চায় না। সবাই এসে রাসূল (সা.) কে ব্যাপারটা জানালে তিনি বললেন, আমি আসছি। অতঃপর তিনি রওনা হলেন। অথচ তখনও রাসূল (সা.) এর পেটে পাথর বাঁধা ছিল। তিনিসহ আমরা তিনদিন যাবত কোনো খাবার মুখে তুলিনি। রাসূল (সা.) কোদাল দিয়ে কোপ দিতেই তা নরম মাটিতে পরিণত হয়ে গেল। আমি বললাম, হে রাসূল! আমাকে একটু বাড়ি যাওয়ার অনুমতি দিন।' বাড়ি গিয়ে আমি আমার স্ত্রীকে বললাম, রাসূল (সা.) কে এমন অবস্থায় দেখেছি, যা সহ্য করার মতো নয় (পেটে পাথর বাঁধা)। তোমার কাছে খাবার কিছু আছে কি? সে বলল, আমার কাছে কিছু যব ও ছোট একটা ভেড়ার বাচ্চা আছে। আমি ভেড়ার বাচ্চাটা যবাই করলাম আর আমার স্ত্রী যব পিষতে শুরু করল। যখন গোশত ডেগচিত্তে করে চুলোর ওপর চড়ানোর পর প্রায় সিদ্ধ হয়ে এসেছে এবং যব অনেকখানি পিষ্ট হয়ে গেছে, তখন আমি গিয়ে বললাম, 'হে আল্লাহর রাসূল! আমার কাছে অল্প কিছু খাবার প্রস্তুত আছে। আপনি এবং একজন বা দু'জন চলুন।' তিনি বললেন, 'খাবারের পরিমাণ কতটুকু?' আমি সঠিক পরিমাণ জানালাম। তিনি বললেন, 'যথেষ্ট পবিত্র খাবার। তোমার স্ত্রীকে গিয়ে বল, আমি না আসা পর্যন্ত যেন চুলোর ওপর থেকে রুটি ও গোশত না নামায়।' অতঃপর বললেন, 'তোমরা সবাই চল।' মোহাজেরগণ ও আনসারগণ সবাই চলল। আমি আমার স্ত্রীর কাছে আগেভাগে গিয়ে পৌঁছলাম। আমি বললাম, তোমার ওপর আল্লাহ সদয় হোন! রাসূল (সা.) সকল আনসার ও মোহাজেরগণ নিয়ে সদলবলে এসে গেছেন। সে বলল, খাবার পরিমাণ কেমন তা কি তোমার কাছে জিজ্ঞেস করেছিলেন? আমি বললাম, হ্যাঁ।

যা হোক, রাসূল (সা.) সমবেত আনসার ও মোহাজেরগণকে বললেন, 'তোমরা ভিড় করো না। একে একে প্রবেশ কর।' অতঃপর রাসূল (সা.) এক এক টুকরো রুটি ছিঁড়ে নিতে লাগলেন, তার সাথে গোশত যুক্ত করে চুলো ও

ডেকাচি ঢেকে দিয়ে সাহাবীগণকে দিতে লাগলেন । এভাবে দিতে দিতে সবাই পেট পুরে খেল এবং আরো অবশিষ্ট রইল । অন্য রেওয়ায়েতে আছে যে, রাসূল (সা.) গোশত ও রুটিতে সামান্য থুথু ছিটিয়ে দিলেন । এক হাজার সাহাবী পেট পুরে খেলেন এবং তারপরও ডেকাচি থেকে এমন আওয়াজ আসছিল যে, তাতে তখনো অনেক গোশত রয়েছে বলে মনে হচ্ছিল । অতঃপর রাসূল (সা.) হযরত জাবেরের স্ত্রীকে বললেন, তোমরা খাও এবং অন্যদেরকেও খাওয়াও । কারণ বহু লোক ক্ষুধার্ত রয়েছে । (বোখারী ও মুসলিম) ।

**শিক্ষা :** এই দুটি ঘটনা থেকে শিক্ষা পাওয়া গেল যে, ইসলামের জন্য যারা সংগ্রাম করে তাদেরকে কঠিন অগ্নিপরীক্ষার সম্মুখীন হতে হয়; বিশেষত: ক্ষুধা ও দারিদ্র্যের পরীক্ষা অনিবার্য । এ পরীক্ষায় ধৈর্যের পরিচয় দিলে আল্লাহর সাহায্য আসবে ইনশাআল্লাহ । আল্লাহ বলেছেন, আমি তোমাদেরকে ভীতি, ক্ষুধা, জানমাল ও ফসলের ক্ষয়ক্ষতি দিয়ে অবশ্য অবশ্যই পরীক্ষা করব । যারা এতে ধৈর্যধারণ করবে, তাদেরকে সুসংবাদ দাও ।’

## ৪৪. কুফরীর আশ্তাকুঁড়ে ঈমানের রক্ত গোলাপ

বিজয়ের পূর্ব পর্যন্ত আবু জাহলের ছেলে ইকরামা কুফরীর ওপরই বহাল ছিলেন । বদরের ময়দানে তার পিতা শোচনীয়ভাবে নিহত হওয়ার পর পিতৃহত্যার প্রতিশোধ নেওয়ার জন্য তিনি কম চেষ্টা করেননি । ওহুদে খন্দকে-যেখানেই পেয়েছেন মুসলমানদের বিরুদ্ধে সর্বশক্তি দিয়ে লড়েছেন । কিন্তু কোথাও সাফল্য আসেনি । শেষ পর্যন্ত মক্কা বিজয়ের দিন যখন সমগ্র কুরাইশ বংশ আত্মসমর্পণ করল, সেদিনও তিনি প্রতিরোধ গড়ে তোলার চেষ্টা করেন । কিন্তু বীর কেশরীর খালিদ বিন ওলীদ এতদিনে ইসলাম গ্রহণ করে মুসলিম বাহিনীর নেতৃত্বের হাল ধরেছেন । তিনি ইকরামার প্রতিরোধ চূর্ণ করে দেন এবং ইকরামা ইয়ামানে পালিয়ে যান ।

ইকরামার স্ত্রী উম্মে হাকীম রাসূল (সা.) এর দরবারে হাজির হয়ে ইসলাম গ্রহণ করলেন এবং ইকরামার জন্য নিরাপত্তা চেয়ে নিয়ে ইয়ামান অভিমুখে রওনা হলেন । ইকরামাকে সাথে নিয়ে তিনি যখন রাসূল (সা.) এর দরবারে ফিরে এলেন, তখন রাসূল (সা.) তার দিকে এগিয়ে গেলেন । ইকরামা বললেন, হে মুহাম্মদ! উম্মে হাকীম আমাকে বলেছে যে, আপনি আমাকে নিরাপত্তা দিয়েছেন । রাসূল (সা.) বলেছেন, ‘সে ঠিকই বলেছে । তুমি নিরাপদ ।’

ইকরামা আমি তোমাকে দাওয়াত দিচ্ছি, 'তুমি সাক্ষ্য দাও আল্লাহ ছাড়া আর কোনো মা'বুদ নেই এবং আমি মুহাম্মদ তাঁর বান্দা ও রাসূল। অতঃপর তুমি নামায কায়েম করবে ও যাকাত দেবে।'

ইকরামা হাত বাড়িয়ে দিয়ে উচ্চারণ করলেন— আশহাদু আল লা-ইলাহা ইল্লাল্লাহু ওয়া আশহাদু আল্লা মুহাম্মাদান আবদুলহু ওয়া রাসূলুহু। অতঃপর ইকরামা বললেন, ইয়া রাসূলুল্লাহ! আপনি আমার অতীতের সকল গুনাহর জন্য ক্ষমা প্রার্থনা করুন। রাসূল (সা.) তৎক্ষণাত হাত তুলে দোয়া করলেন ও তার জন্য ক্ষমা চাইলেন।

ইকরামা বললেন, 'ইয়া রাসূলুল্লাহ! আল্লাহর শপথ করে আমি ওয়াদা করছি যে, আমি আল্লাহর পথে বাধা সৃষ্টি করার জন্য ইতিপূর্বে যত অর্থ ব্যয় ও যত যুদ্ধ করেছি; এখন থেকে আল্লাহর দ্বীনের বিজয়, রক্ষণাবেক্ষণ ও প্রচার প্রসারের জন্য আমি তার চেয়ে দ্বিগুণ অর্থ ব্যয় ও দ্বিগুণ যুদ্ধ করব।'

ইতিহাস সাক্ষী যে, ইকরামা তার এ অঙ্গীকার অক্ষরে অক্ষরে পালন করেছিলেন। তিনি এই দিন থেকে ইসলামের সর্বাধিক সেবায় আত্মনিয়োগ করলেন। তিনি হলেন একাধারে ময়দানের যোদ্ধা, রাত জেগে আল্লাহর ইবাদাতকারী, কুরআন পাঠকারী এবং ক্রন্দনকারী।

রাসূল (সা.) এর ইস্তিকালের পর মুসলমানরা যতগুলো যুদ্ধ করেছে ইকরামা তার প্রত্যেকটিতে অংশ নেন এবং অভিযানের নেতৃত্ব দেন।

শেষ পর্যন্ত ইয়ারমুকের যুদ্ধে বীর বিক্রমে যুদ্ধ করে তিনি শাহাদাত বরণ করেন। শাহাদাতের পূর্বে তিনি এমন উঁচু মানের এবং ত্যাগের দৃষ্টান্ত রেখে যান, যা শুধু ইসলামের ইতিহাসে নয় বরং সমগ্র মানব ইতিহাসে নজিরবিহীন।

যুদ্ধের শেষে ইয়ারমুকের ময়দানে যে কয়জন সৈনিকের ক্ষতবিক্ষত দেহ মুমূর্ষাবস্থায় পড়ে কাতরাচ্ছিল, তার মধ্যে ইকরামা ছিলেন অন্যতম। তাছাড়া হারিছ বিন হিশাম এবং আইয়াশ ইবনে আবী রবীয়াও ছিলেন পিপাসায় কাতর। ইকরামা যখন পানি চাইলেন, পানি আনা হলো। তখন পাশ থেকে হারিছ পানি চাইলে ইকরামা পানি স্পর্শ না করে তাকে দিতে বললেন। হারিছকে দিতে গেলে আইয়াশ পানি চাইল। হারিছ নিজে আইয়াশকে দেখিয়ে দিলেন। আইয়াশের কাছে নিয়ে গেলে দেখা গেল তিনি ইস্তিকাল করেছেন। অতঃপর পানি আবার হারিছের কাছে আনা হলে দেখা গেল, তিনিও শেষ নিঃশ্বাস ত্যাগ করেছেন। অতঃপর ইকরামার কাছে গিয়ে দেখা গেল, তিনিও দুনিয়া ছেড়ে চলে গেছেন।

তাই আবু জাহেলের ছেলে ইকরামাকে বলা যায় কুফরীর আস্তাকুঁড়ে ঈমানের একটি রক্ত গোলাপ ।

**শিক্ষা :** পিতা ও বংশের পরিচয় ইসলামের দৃষ্টিতে সম্পূর্ণ গুরুত্বহীন । কোন ব্যক্তির নিজস্ব ঈমান ও আমলই সর্বোচ্চ অগ্রাধিকারের সাথে বিবেচনার দাবি রাখে । আবু জাহেলের ছেলে হওয়া সত্ত্বেও ইকরামা নিজের ঈমান ও আমলের বলে মুসলমানদের সেনাপতি পর্যন্ত হয়েছিলেন । আল্লাহর কাছেও সাহাবীর মর্যাদা পেয়েছিলেন ।

## ৪৫. ভিক্ষাবৃত্তি একটি কলঙ্ক

একবার আনসারদের মধ্য থেকে এক ব্যক্তি রাসূল (সা.) এর কাছে এসে খাবার চাইল । রাসূল (সা.) তাকে জিজ্ঞেস করলেন, তোমার বাড়িতে কি কিছুই নেই? সে বলল, একটা কষল আছে যার একাংশ পরিধান করি এবং আর একাংশ বিছিয়ে শুই । আর একটা পেয়ালা যা দিয়ে পানি খাই । রাসূল (সা.) বললেন, যাও, ঐ দুটি জিনিস আমার কাছে নিয়ে এস । লোকটি তৎক্ষণাত গিয়ে জিনিস দুটি নিয়ে এল ।

রাসূল (সা.) জিনিস দুটি তার কাছ থেকে নিয়ে নিলেন এবং সমবেত সাহাবীগণকে বললেন, এই জিনিস দুটি তোমারা কেউ কিনবে নাকি? একজন সাহাবী বললেন, আমি এক দিরহামে নিতে পারি । অপর একজন বললেন, আমি দুই দিরহামে নিতে পারি । রাসূল (সা.) শেষোক্ত ব্যক্তিকে পেয়ালা ও কষলটি দিলেন এবং তার কাছ থেকে দুই দিরহাম নিয় আনসারকে দিলেন । তাকে বললেন, এক দিরহাম দিয়ে খাবার কিনে তোমার পরিবারকে দাও । আর এক দিরহাম দিয়ে একখানা কুঠার কিনে আমার কাছে এস । লোকটি কুঠার কিনে নিয়ে এলে রাসূল (সা.) তাতে আছাড় লাগিয়ে দিয়ে বললেন, ‘যাও এ দিয়ে কাঠ কাট । ১৫ দিনের মধ্যে তোমাকে যেন আমি না দেখি ।’ সে নির্দেশ মোতাবেক কাজ করল । একদিন এসে জানাল যে, দশ দিরহাম মুনাফা পেয়েছে । এর কিছু দিয়ে সে খাবার এবং কিছু দিয়ে কাপড় কিনল ।

রাসূল (সা.) তাকে বললেন, ভিক্ষার কলঙ্ক মুখে নিয়ে কেয়ামতের ময়দানে হাজির হওয়ার চাইতে তোমার এই কাজ অনেক ভালো ।

**শিক্ষা :** কাজ করে অর্থ উপার্জনের ক্ষমতা রাখে এমন সবল ও সুস্থ লোককে ভিক্ষা দেওয়া উচিত নয় । এ ধরনের লোকের ভিক্ষা চাওয়াও মস্ত বড় গুনাহ ।

## ৪৬. পরোপকারী মানুষই শ্রেষ্ঠ মানুষ

একবার হযরত আবদুল্লাহ ইবনে আব্বাস (রা.) মসজিদে নববীতে ইতিকাক্ষরত ছিলেন। এই সময় এক ব্যক্তি এসে তাঁকে সালাম করল এবং তাঁর কাছে বসে পড়ল। হযরত ইবনে আব্বাস তাঁকে বললেন, 'তোমার কী হয়েছে? তোমাকে তো খুবই চিন্তিত মনে হচ্ছে!'

আগস্তক জবাব দিল, 'অমুকের কাছে ঋণগ্রস্ত আছি। অথচ তা পরিশোধ করতে পারছি না।'

ইবনে আব্বাস (রা.) বললেন, আমি কি তোমার সম্পর্কে ঐ ব্যক্তির সাথে কিছু আলোচনা করব? (অর্থাৎ ঋণ পরিশোধে কিছু সময় বাড়িয়ে দেয়া বা অন্য কোনো সম্ভাব্য রেয়াত পাওয়ার জন্য।)

আগস্তক বলল, 'যদি ভালো মনে করেন করতে পারেন।'

হযরত ইবনে আব্বাস তৎক্ষণাত জুতো পরলেন ও মসজিদ থেকে বের হলেন। আগস্তক বলল, এ কী? আপনি করছেন কী? ইতিকাক্ষের কথা কি ভুলে গেছেন?

ইবনে আব্বাস রাসূল (সা.) এর কবর দেখিয়ে অশ্রু সজল চোখে বললেন, 'না সেটা ভুলিনি। তবে এই কবরে যিনি শুয়ে আছেন তাঁকে আমি বলতে শুনেছি যে, যে ব্যক্তি তার ভাইয়ের উপকারের জন্য সচেষ্ট হবে এবং উপকার সাধন করবে, সে দশ বছর ধরে ইতিকাক্ষকারীর চেয়েও মর্যাদাবান হবে। অথচ আল্লাহর সন্তুষ্টির উদ্দেশ্যে যে ব্যক্তি একদিন ইতিকাক্ষ করে তার মধ্যে ও দোষখের মধ্যে আল্লাহ এমন তিনটি পরীখা স্থাপন করেন, যার একটি থেকে অপরটির দূরত্ব সূর্যের উদয় ও অস্তের জায়গার মধ্যে দূরত্বের চেয়েও বেশি।

শিক্ষা : বান্দার হক তথা মানবাধিকার সম্পর্কে সচেতন থাকলেই পরোপকারী হওয়া সম্ভব। রাসূল (সা.) বলেছেন 'কোন ব্যক্তি যতক্ষণ বান্দার সাহায্যে নিয়োজিত থাকে, ততোক্ষণ আল্লাহ তার সাহায্যে নিয়োজিত থাকেন।'

## ৪৭. মোনাফেকীর পরিণাম

রাসূল (সা.)-এর নিকট একবার এই মর্মে খবর এলো যে, মুসতালিক গোত্রের সরদার হারেস ইবনে যেরার মদীনা আক্রমণের প্রস্তুতি নিচ্ছে। হারেস ইবনে যেরার রাসূল (সা.)-এর অন্যতম স্ত্রী উম্মুল মুমিনীন হযরত হয়াইবিয়ার পিতা। তারা উভয়েই পরবর্তীকালে ইসলাম গ্রহণ করেন।

খবর পাওয়া মাত্র রাসূল (সা.) একদল মুজাহিদকে সাথে নিয়ে তাদের

প্রতিরোধের জন্য অগ্রসর হলেন। যারা এই যুদ্ধে অংশগ্রহণের জন্য রাসূল (সা.)-এর সঙ্গী হলো, তাদের মধ্যে কিছুসংখ্যক মোনাফেকও ছিল। এসব মোনাফেকের উদ্দেশ্য ছিল কাফেররা পরাজিত হলে তাদের ফেলে যাওয়া সম্পদ হস্তগত করা আর মোনাফেক হওয়া সত্ত্বেও তাদের ধারণা ছিল যে, মুসলমানেরা যেহেতু অধিকাংশ যুদ্ধে জয়লাভ করেছে, তাই এ যুদ্ধেও জয়লাভ করবে।

কার্যতঃ হলোও তাই। মুসলমানরা জয়লাভ করলেন এবং প্রতিপক্ষ ইহুদি গোত্র পরাজিত হলো। যুদ্ধ সমাপ্ত হওয়ার পর মুসলমানদের শিবিরে একটি দুর্ঘটনা ঘটে গেল। একজন মুহাজির (অর্থাৎ মক্কা থেকে আগত মুসলমান) এবং একজন আনসার (অর্থাৎ মদিনাবাসী মুসলমান)-এর মধ্যে কূপ থেকে পানি তোলা নিয়ে কথা কাটাকাটি ও ঝগড়ার সূত্রপাত হলো। অতঃপর তা হাতাহাতির পর্যায়ে গড়াল। মোহাজির হাঁক দিলেন, 'ওহে মোহাজিররা, কে কোথায় আছ আমাকে বাঁচাও।' আর আনসাররাও অনুরূপ আনসারদের ডাক দিলেন। ফলে উভয়পক্ষে উত্তেজনা ও সাজ সাজ রব পড়ে গেল। এভাবে মুসলমানদের মধ্যে একটা মারামারি বেধে যাওয়ার সম্ভাবনা দেখা দিল।

এই ঝগড়ার খবর পাওয়া মাত্রই রাসূল (সা.) কালবিলম্ব না করে ঘটনাস্থলে ছুটে গেলেন। তিনি আনসার ও মোহাজির উভয়কে বুঝালেন যে, তোমরা এভাবে নিজ নিজ অঞ্চলের লোকদেরকে ডাকছ কেন? এতো জাহেলিয়াতের চারিত্রিক বৈশিষ্ট্য। এ এক নোংরা পস্থা। তোমরা এটা পরিত্যগ করো। কেউ কারো ওপর জুলুম করলে সকল মুসলমানের উচিত ময়নুমের সাহায্যে ছুটে যাওয়া এবং যালেমকে নিরস্ত করা- তা সে যেখানকার লোকই হোক না কেন। দেখতে হবে কে যালেম এবং কে মজলুম, কে আনসার কে মোহাজির বা কে কোথাকার বাসিন্দা ও কে কোন বর্ণ বা বংশের লোক তা নয়।

রাসূল (সা.)-এর এ ভাষণ শুনে সবাই শান্ত হয়ে যে যার কাজে চলে গেল। সাহাবী উবাদা ইবনে সামেত ঝগড়ায় লিপ্ত দুই সাহাবীর মধ্যে আপোস করিয়ে দিলেন এবং যার বাড়াবাড়ি প্রমাণিত হলো, তাকে দিয়ে মাফ চাইয়ে নিলেন। কিন্তু মুনাফিকরা এ ঝগড়ার সুযোগটাকে নিজেদের স্বার্থসিদ্ধির জন্য কাজে লাগাতে চাইল। তারা এই আপোস-মীমাংসা মেনে নিল না। মোনাফেকদের নেতা ছিল আবদুল্লাহ বিন উবাই। সে মোনাফেকদের একটা গোপন সভা ডেকে সেখানে মদিনাবাসীদেরকে মক্কাবাসী মোহাজিরদের বিরুদ্ধে ক্ষেপিয়ে তোলার উদ্দেশ্যে বলল, তোমরাই তো ওদেরকে আক্ষারা দিয়ে দিয়ে মাথায় তুলেছ। তোমরাই খাল কেটে কুমির এনেছ এবং দুখকলা দিয়ে এই সাপদের পুষেছ।

এখন ওদের এতো স্পর্ধা হয়েছে যে, তোমাদেরকেই ওরা দংশন করতে চাইছে। এখনও যদি তোমরা সাবধান না হও এবং ওদেরকে লালনপালন থেকে বিরত না হও। তাহলে একদিন ওরাই তোমাদের ধ্বংস করবে। তোমরা মদীনার সম্রাট লোক। আর ওরা হলো বহিরাগত নীচুজাত। মদীনায় গিয়ে তোমাদের উচিত হবে ঐ নীচুজাতদেরকে বিতাড়িত করা। আবদুল্লাহ ইবনে উবাই এভাবে আনসার ও মোহাজেরদের ঐক্য ধ্বংস করার ষড়যন্ত্রে লিপ্ত হলো।

এই গোপন সভায় ঘটনাক্রমে হযরত য়ায়েদ বিন আরকাম উপস্থিত ছিলেন। তিনি তার উক্ত ভাষণ শেষ হওয়া মাত্রই চিৎকার করে বলে উঠলেন, ‘আল্লাহর কসম, তুইই নীচুজাত। রাসূল (সা.) ও তাঁর মুমিন সাহাবীগণ ঈমানের বলে বলীয়ান ও পরস্পরের প্রতি প্রগাঢ় প্রীতি ও ভালোবাসা পোষণ করেন। সুতরাং তারাই প্রকৃত সম্রাট লোক।’

আবদুল্লাহ ইবনে উবাই ভেবেছিল, পরিস্থিতি প্রতিকূল হলে সে কথার ভিন্ন ব্যাখ্যা দেবে ও সুর পাটে ফেলবে। এ জন্য সে কারো নাম উল্লেখ করেনি এবং কিছুটা অস্পষ্ট ভাষায় কথা বলেছে। য়ায়েদ ইবনে আরকামের ক্ষেপে যাওয়া দেখে সে বিপদ গুনলো। পাছে তার কুফরী প্রকাশ হয়ে পড়ে তাই সে য়ায়েদের কাছে গিয়ে বুঝাতে লাগল যে, আমি তো ঠাট্টাচ্ছলেই কথাগুলো বলেছিলাম। তুমি ভুল বুঝেছ।

য়ায়েদ সেখান থেকে উঠে সরাসরি রাসূল (সা.)-এর কাছে গিয়ে পুরো ঘটনা খুলে বললেন। রাসূল (সা.) ঘটনাটাকে গুরুতর মনে করলেও নিশ্চিত হবার জন্য বললেন, তুমি ভুল বলছ না তো? য়ায়েদ বললেন, আল্লাহর কছম, আমি নিজ কানে শুনেছি। এরপর আবদুল্লাহ ইবনে উবাই এর কথাবার্তা সমগ্র মুসলিম বাহিনীর গোচরে চলে গেল। সবাই এ বিষয় নিয়ে আলোচনা করতে লাগলেন।

একপর্যায়ে হযরত ওমর রাসূল (সা.) এর কাছে এসে বললেন, ‘ইয়া রাসূলুল্লাহ! আমাকে অনুমতি দিন, মোনাফেকটার গর্দান কেটে ফেলি। রাসূল (সা.) বললেন, ওমর, লোকে যখন বলবে যে, মুহাম্মদ তাঁর সঙ্গী সাথীদেরকেও হত্যা করে, তখন কী হবে?’ অতঃপর তিনি হত্যা করতে নিষেধ করলেন।

হযরত ওমরের কথাটা আবদুল্লাহ ইবনে উবাই-এর পুত্রও জেনে ফেললেন। তার নামও ছিল আবদুল্লাহ এবং তিনি ছিলেন একজন একনিষ্ঠ মুমিন। তিনি রাসূল (সা.)-এর নিকট হাজির হয়ে বললেন, ‘ইয়া রাসূলুল্লাহ, আমার পিতার এসব কথাবার্তার কারণে তাকে যদি আপনি হত্যা করতে চান, তবে আমাকেই আদেশ করুন, অন্য কাউকে নয়। আমি নিজ হাতে তার মস্তক কেটে আপনার



কাছে এনে দেব। ইয়া রাসূলুল্লাহ, সমস্ত খাজরাজ গোত্র জানে আমি তাদের মধ্যে সবচেয়ে পিতৃভক্ত। কিন্তু আল্লাহ ও রাসূলের বিরুদ্ধে কোনো কথা আমি সহ্য করতে পারি না। আমার আশঙ্কা হয় যে, আপনার আদেশে অন্য কেউ আমার পিতাকে হত্যা করলে আমি আমার পিতার হত্যাকারীকে দেখে আত্মসম্বরণ করতে পারব না। ফলে তাকে হত্যা করে আমি আযাব ভোগ করব।’ রাসূল (সা.) বললেন, তোমার পিতাকে হত্যা করার আমার কোনো ইচ্ছাও নেই এবং কাউকে আমি আদেশও দেইনি। এরপর এই অশান্ত পরিস্থিতিতে পরিবর্তন আনয়নের জন্য রাসূল (সা.) প্রচলিত নিয়মের বিপরীত অসময়ে সফরের আদেশ দিলেন। সাহাবায়ে কেলাম রওনা হয়ে গেলে তিনি আবদুল্লাহ ইবনে উবাইকে ডেকে জিজ্ঞেস করলেন, তুমি কি এসব কথা বলেছ? সে অনেক কসম খেয়ে বলল যে, সে এসব কথা বলেনি। অতঃপর সাধারণ সাহাবায়ে কেলাম মনে করলেন, সম্ভবত অল্প বয়স্ক যায়েদ ভুল বুঝেছে। আসলে ইবনে উবাই অমন কথা বলেনি।

এদিকে যায়েদ পড়ে গেলেন মহা ফাঁপরে। সবাই তাকে মিথ্যুক ভাবছে মনে করে তিনি গা ঢাকা দিয়ে থাকতে লাগলেন। কিন্তু মনে মনে আশান্বিত ছিলেন যে, এ ঘটনার মুখোশ উন্মোচন করে অচিরেই আয়াত নাযিল হবে। বাস্তবাবিকই এই সফরের মধ্যে সূরা মুনাফিকুন নাযিল হয়ে যায়েদের সত্যতা প্রমাণ করে দিল। রাসূল (সা.) যায়েদকে ডেকে বললেন, ‘হে বালক, আল্লাহ তোমাকে সত্যবাদী সাব্যস্ত করেছেন এবং ইবনে উবাই সম্পর্কে পুরো সূরা মুনাফিকুনটাই নাযিল করেছেন।’

ইবনে উবাই যখন মদীনার উপকণ্ঠে পৌঁছল, তখন তাঁর মুমিন পুত্র আবদুল্লাহ তার উটের হাঁটুতে পা রেখে পিতাকে বললেন, ‘আল্লাহর কসম, ‘সম্ভ্রান্ত লোকেরা নিচুজাতের লোকদেরকে বহিষ্কার করবে’ এই কথার ব্যাখ্যা না করা পর্যন্ত তুমি মদীনায় প্রবেশ করতে পারবে না। কে সম্ভ্রান্ত, তুমি না আল্লাহর রাসূল?’

পুত্র কর্তৃক পিতা অবরুদ্ধ এ খবর পেয়ে রাসূল (সা.) ছুটে এলেন এবং পুত্রকে বললেন, তার পথ ছেড়ে দাও, তাকে মদীনায় ঢুকতে দাও।’ অতঃপর সে মদীনায় প্রবেশ করল।

**শিক্ষা :** মোনাফেকরা ইসলামের মারাত্মক দূশমন হলেও তাদের প্রতি মহানুভবতা ও সহিষ্ণুতা প্রদর্শন করা কর্তব্য। তবে তাদের গতিবিধির ওপর কড়া দৃষ্টি রাখা চাই।

## ৪৮. রাখাল ছেলের খোদাভীতি

একবার হযরত ওমর গভীর রাতে ছদ্মবেশে মদীনার পথ ধরে হেঁটে বেড়াচ্ছিলেন এবং প্রজাদের খোঁজখবর নিচ্ছিলেন। এই সময় দেখতে পেলেন এক রাখাল একপাল ছাগল নিয়ে তার সামনে দিয়ে যাচ্ছে। তিনি রাখালকে পরীক্ষা করার মানসে বললেন, ‘এই ছাগলগুলোর মধ্য থেকে যে কোনো একটা আমার কাছে বিক্রি করে দাও।’

রাখাল বলল, ‘এ ছাগলগুলো আমার নয়। আমার মনিবের। আমি তার ক্রীতদাস।’

ওমর বললেন, ‘আমরা যে জায়গায় আছি, এখানে তোমার মনিব আমাদেরকে দেখতে পাবেনা। একটা ছাগল বেঁচে দাও। আর মনিবকে বলে দিও যে, একটা ছাগল বাঘে খেয়ে ফেলেছে।’

রাখাল রাগান্বিত হয়ে চিৎকার করে বলে উঠল, ‘আল্লাহ কি দেখতে পাচ্ছেন না?’

ওমর চুপ করে রইলেন। রাখাল তার দিকে রাগত চোখে তাকিয়ে গরগর করতে করতে ছাগল হাঁকিয়ে নিয়ে চলে গেল।

পরদিন সকালে ওমর ঐ রাখালের মনিবের কাছে গেলেন এবং তাকে মনিবের কাছ থেকে কিনে নিয়ে স্বাধীন করে দিলেন। অতঃপর বললেন, ‘ওহে যুবক, কালকে তুমি আল্লাহর সম্পর্কে যে কথাটা বলেছিলে, তা আজ তোমার দুনিয়ার গোলামী ঘুচিয়ে দিল। আমি আশা করি তোমার এই খোদাভীতি তোমাকে কেয়ামতের দিন দোযখের আযাব থেকেও মুক্তি দেবে।’

**শিক্ষা :** তাকওয়া ও সততা যত তুচ্ছ ও নগণ্য মানুষের মধ্যেই পাওয়া যাক, তাকে উপযুক্ত মর্যাদা দিতে হবে। কেননা আল্লাহ বলেছেন, তোমাদের মধ্যে সেই ব্যক্তিই অধিক সম্মানিত, যে তোমাদের মধ্যে সর্বাপেক্ষা সৎ ও খোদাভীরু।

## ৪৯. প্রিয় বস্তুকে আল্লাহর পথে দান করা

বুখারী ও মুসলিম শরীফে বর্ণিত আছে যে, সূরা আল-ইমরানের ‘তোমরা কখনো কল্যাণ লাভ করতে পারবে না, যতক্ষণ তোমরা যা ভালোবাস তা দান না কর’। এই আয়াত নাযিল হলে সাহাবীগণের মধ্যে এই মর্মে চিন্তাভাবনা ও প্রতিযোগিতা শুরু হয়ে যায় যে, তার সম্পত্তির মধ্যে কোনো জিনিসটি বেশি প্রিয় এবং তা কত দ্রুত রাসূলের (সা.) কাছে গিয়ে দান করা যায়।

মদীনার আনসারদের মধ্যে সবচেয়ে ধনী ছিলেন আবু তালহা (রা.)।

মসজিদে নববীর বিপরীত দিকে তার একটি বাগানে ‘বীরহা’ নামে একটি কুয়া ছিল। ক্রমে ঐ কুয়ার নামানুসারে তার বাগানটিও ‘বীরহা’ নামে পরিচিত হয়। রাসূল (সা.) মাঝে মাঝে এই বাগানে আসতেন এবং এই কুয়ার পানি খেতেন। এই কুয়ার পানি তাঁর কাছে খুবই প্রিয় ছিল। আবু তালহারও এই কুপসহ বাগানটি অত্যন্ত মূল্যবান, উর্বর ও সর্বাপেক্ষা প্রিয় সম্পত্তি ছিল। উক্ত আয়াত নাযিল হবার পর তিনি রাসূল (সা.) এর নিকট উপস্থিত হয়ে বললেন যে, ‘আমার সমস্ত বিষয় সম্পত্তির মধ্যে বীরহা আমার কাছে সবচেয়ে প্রিয়। তাই এটি আমি আল্লাহর পথে ব্যয় করতে চাই। আপনি যে কাজে ভালো মনে করেন এটি ব্যয় করুন।’

রাসূল (সা.) বললেন, ‘এত বড় বাগান, আমার মতে তুমি নিজের আত্মীয়-স্বজনের মধ্যে বণ্টন করে দিলেই ভালো হবে।’ হযরত আবু তালহা এই উপদেশ অনুসারে বাগানটি স্বীয় আত্মীয়-স্বজনদের মধ্যে ভাগ করে দিলেন।

ওদিকে হযরত য়ায়েদ বিন হারিসা তার আরোহনের প্রিয় ঘোড়াটি নিয়ে রাসূল (সা.) এর কাছে হাজির হলেন এবং তা আল্লাহর পথে দান করার ইচ্ছা ব্যক্ত করলেন। রাসূল (সা.) ঘোড়াটি তার কাছ থেকে নিয়ে তারই ছেলে উসমানকে দান করলেন। হযরত য়ায়েদকে এতে কিছুটা দ্বিধাস্থিত দেখে তাকে এই বলে আশ্বস্ত করলেন যে, তোমার দান গৃহীত হয়েছে।

**শিক্ষা :** এ ঘটনা দুটি থেকে জানা গেল যে, আল্লাহর পথে দান করার অর্থ শুধু ফকির মিসকিনকে এবং ইসলামের পথে জেহাদরত ব্যক্তি বা সংস্থাকে দান করা নয়, বরং পরিবার-পরিজন ও দরিদ্র আত্মীয়-স্বজনকে দান করাও আল্লাহর পথে দানের শামিল এবং বিরাট সওয়াবের কাজ।

## ৫০. একটি নাকের মূল্য

সিরিয়া থেকে পরাজিত ও বিতাড়িত রোমক সৈন্যরা তাদের তৎকালীন শক্ত ঘাঁটি মিশরের রাজধানী আলেকজান্দ্রিয়ায় গিয়ে অবস্থান নেয়। মুসলমানদের অগ্রাভিযান রুখে দেয়ার জন্য তারা এখানে তাদের সকল শক্তি কেন্দ্রীভূত করে। কিন্তু অদম্য সাহসী মুসলিম সেনাপতি আমর ইবনুল আ’স এখানেও তাদের সম্মিলিত শক্তি গুঁড়িয়ে দেন এবং অধিকৃত শহরের শাসনভার স্বহস্তে গ্রহণ করেন। তিনি সেখানকার খ্রিস্টান প্রজাদেরকে তাদের যাবতীয় ধর্মীয় কর্মকাণ্ডে পূর্ণ স্বাধীনতা নিশ্চিত করেন।

একদিন সকালে শহরের খ্রিস্টান অধ্যুষিত আবাসিক এলাকায় হৈ চৈ পড়ে যায়। উত্তেজিত জনতা শহরের কেন্দ্রীয় এলাকায় সমবেত হতে থাকে এবং এক বিশাল জনসভার আয়োজন করে। সভায় আশুন বরানো বক্তৃতা চলতে থাকে। সভাশেষে স্থানীয় পাদ্রীর নেতৃত্বে একটি খ্রিস্টান প্রতিনিধি দল সেনাপতি আমর ইবনুল আসের সাথে দেখা করতে আসে। আমর প্রতিনিধিদলকে আন্তরিকভাবে অভ্যর্থনা জানান।

পাদ্রী খ্রিস্টান জনতার উত্তেজিত হওয়ার কারণ আমর ইবনুল আ'সকে অবহিত করলেন। বাজারের কেন্দ্রীয় স্থানে হযরত ঈসার (আ.) মর্মর পাথরের তৈরি একটি মূর্তি স্থাপিত ছিল। খ্রিস্টানরা পরম ভক্তি সহকারে তাঁর পূজা করত। গভীর রাতে কে যেন ঐ মূর্তির নাক ভেঙে দিয়ে গেছে। খ্রিস্টানরা স্বাভাবিকভাবেই এজন্য বিজয়ী মুসলিম সম্প্রদায়ের কোনো উগ্র ব্যক্তিকে দায়ী বলে সন্দেহ করেছিল। যদিও এর কোনো চাক্ষুস সাক্ষী ছিল না।

আমর ধৈর্যের সাথে তাদের বক্তব্য শুনলেন এবং তিনি নিজেও তাদের সন্দেহের প্রতি নিজের ঐকমত্য প্রকাশ করলেন। তিনি পাদ্রীকে সম্বোধন করে বললেন, 'ঘটনাটার জন্য আমি গভীরভাবে ব্যথিত ও লজ্জিত। ইসলাম মূর্তি পূজাকে সমর্থন না করলেও অমুসলিম সম্প্রদায়সমূহের উপাস্যদের কোনোরূপ অবমাননাকে কঠোরভাবে নিষেধ করে। অনুগ্রহপূর্বক আপনারা মূর্তির মেরামতের উদ্যোগ নিন। আমি এ কাজের সমস্ত ব্যয়ভার বহন করবো।'

পাদ্রী বললেন, 'কিন্তু এ মেরামত সম্ভব নয়। কেননা নবনির্মিত একটা নাক ওখানে যুক্ত করা যাবে না।'

আমর বললেন, 'তাহলে পুরো মূর্তিটা নতুন করে নির্মাণ করুন আমি পুরো ব্যয়ভার বহন করব।'

পাদ্রী বললেন, 'কিন্তু তাতেও ক্ষতিপূরণ হবার নয়। আপনি জানেন, আমরা যিশুকে আল্লাহর পুত্র বলে বিশ্বাস করি। সুতরাং তার মূর্তির অবমাননার ক্ষতিপূরণ পার্থিব টাকাকড়ি দিয়ে তা হতে পারে না। এর ক্ষতিপূরণ একটি মাত্র পস্থায়ী হতে পারে। আমরা আপনাদের নবীর মূর্তি নির্মাণ করব এবং তার নাক ভেঙে দেব।'

এ কথা শুনে আমরের সমগ্র মুখমণ্ডল ক্রোধে রক্তবর্ণ ধারণ করল। তার অগ্নিষ্ফরা চোখের মধ্যে রক্তবর্ণ মণিটা বারবার ঘোরাফিরা করতে লাগল। তার ঠোঁট বন্ধ রইল এবং সমগ্র দেহ বারবার ঝাঁকি দিতে লাগল। বারবার তাঁর হাত তরবারির কোষের ওপর পড়তে লাগল এবং অতি কষ্টে প্রতিবার হাত সরিয়ে

নিতে লাগলেন। আমার আসন ছেড়ে অস্থিরভাবে পায়চারি করতে লাগলেন। কিছুক্ষণ পর ঠাণ্ডা পানি দিয়ে মুখ ধুয়ে নিলেন। অতঃপর নিজের আসনে ফিরে এলেন এবং শান্ত ও বিষাদভরা কণ্ঠে বললেন, ‘আপনারা সেই মহানবীর মূর্তি বানানোর প্রস্তাব দিচ্ছেন যিনি বহু বছর অক্লান্ত পরিশ্রমের পর মূর্তি পূজার বিলোপ ঘটিয়েছেন। এরপরও আপনারা পুনরায় তাঁর মূর্তি বানাতে চান এবং তাও আমাদেরই চোখের সামনে! এমন কাজটি সংঘটিত হবার আগে আমাদের সকল সহায় সম্পত্তি, আমাদের জীবন এবং আমাদের ছেলেমেয়েদের জীবন ধ্বংস হয়ে যাওয়া উচিত। পাদ্রী সাহেব, অন্য কোনো প্রস্তাব দিন। আমি আপনাদের মূর্তির নাকের বিনিময়ে আমাদের যে কোনো জীবিত ব্যক্তির নাক কেটে আপনাদের কাছে পেশ করতে প্রস্তুত আছি।’

পাদ্রী সর্বশেষ প্রস্তাবে সম্মত হলেন। পরদিন সকালে খ্রিস্টান ও মুসলমানরা মাঠে সমবেত হলো। এই উন্মুক্ত প্রান্তরে খ্রিস্টানরা তাদের অবমাননার প্রতিশোধ নেবে।

আমর জনতার সামনে ভাষণ দিলেন। তিনি দুর্ভাগ্যজনক ঘটনার প্রেক্ষাপট সবিস্তারে বর্ণনা করলেন। অতঃপর তিনি পাদ্রীকে তার সামনে ডাকলেন এবং বললেন, ‘আপনি খ্রিস্টান সম্প্রদায়ের প্রধান। আর আমি এখানকার মুসলমানদের প্রধান। এদেশে শাসনের দায়দায়িত্ব আমার। আমার প্রশাসনিক দুর্বলতার কারণে আপনাদের ধর্মের যে কোনো অবমাননা ঘটুক, তার শাস্তি মাথা পেতে নিতে আমি বাধ্য। এই নিন তরবারি এবং আমার নাকটা কেটে নিন।’ এ কথা বলে তিনি নিজের তরবারি পাদ্রীর হাতে সমর্পণ করলেন।

পাদ্রী তরবারিটা হাতে নিলেন এবং তরবারির ধার পরীক্ষা করতে লাগলেন। বিশাল জনতা রুদ্ধশ্বাসে নীরবে সবকিছু অবাক বিস্ময়ে দেখছিল।

সহসা নীরবতা ভঙ্গ করল একজন মুসলিম সৈনিক। সে মঞ্চের দিকে ছুটে আসতে লাগল এবং চিৎকার করে বলতে লাগল, ‘থামুন, থামুন, পাদ্রী সাহেব থামুন। এই নিন আপনার মূর্তির নাক এবং আমিই এ ঘটনার আসামি। আমিই মূর্তির নাক ভেঙ্গে ছিলাম। শাস্তি আমারই প্রাপ্য। আমাদের সেনাপতি নিরপরাধ।’

বলতে বলতে সৈনিকটি পাদ্রীর সামনে এসে নিজের নাক এগিয়ে দিল। হতবাক জনতা আবার নীরব হয়ে সভয়ে তাকিয়ে রইল। পাদ্রী তরবারি দূরে ছুঁড়ে মারলেন, সেনাপতিকে ধন্যবাদ দিলেন এবং যে মহানবীর (সা.) আদর্শে এমন সৎ লোকেরা গড়ে উঠেছে তাঁকে অভিনন্দন জানিয়ে বললেন, ‘মূর্তিটা

ভাঙ্গা ভালো কাজ হয়নি তা সত্য বটে। কিন্তু সে জন্য একজন মানুষের চেহারা বিকৃত করা হবে আরো বড় পাপের কাজ।’

শিক্ষা : ইসলাম যে বিজয়ী অবস্থায়ও অমুসলিমদের অধিকার সংরক্ষণ করে, এ ঘটনা তার জ্বলন্ত প্রমাণ। ভারতবর্ষে আটশত বছর এবং স্পেনে আটশত বছর ইসলামী শাসন চালু ছিল। অথচ ইসলামী শাসনের পতনের পর এই দুটি দেশে অমুসলিমদের সংখ্যাগরিষ্ঠতা বহাল রয়েছে। এ থেকেও প্রমাণিত হয় যে, মুসলিম শাসকরা অমুসলিমদের ওপর দমননীতি চালিয়ে নিজেদের শাসন পাকাশোক্ত করার কোনো চেষ্টা করেনি। করলে এত দীর্ঘকাল পরও অমুসলিমদের অস্তিত্ব থাকত না।

## ৫১. পশুপাখির প্রতি দয়া মুমিনের কর্তব্য

একবার একটি উট রাসূলুল্লাহ (সা.) এর সামনে এসে নিজস্ব ভাব-ভঙ্গিতে কি যেন বলল। তিনি তখন তাকে লক্ষ্য করে বললেন, তোমার অভিযোগ যদি সত্য হয়, তবে তো ভালোই, আর যদি মিথ্যে হয় তবে এর পরিশ্রাম তোমাকে ভোগ করতে হবে। আমার দায়িত্ব ময়লুমকে আশ্রয় দেয়া। তাই তোমাকে নিরাপত্তার আশ্বাস দিচ্ছি। এই ঘটনার বর্ণনাকারী হযরত তামীম দারি (রা.) বলেন, উটের সাথে নবীজির বাক্যলাপের মর্ম কিছুই বুঝতে না পারায় আমরা এ বিষয়ে জানতে চাইলে হুজুর (সা.) বললেন, এই উটের মালিক দীর্ঘদিন এর শ্রম নিয়েছে, বিভিন্ন কাজে খাটিয়েছে। এখন বৃদ্ধ হয়ে পড়ায় শ্রম দিতে পারে না—এ অভিযোগে তাকে জবাই করতে চায়। জবাই হবার ভয়ে উটটি আমার নিকট পালিয়ে এসেছে। ইতিমধ্যে উটের মালিক সেখানে আসল। নবীজি তাকে বললেন, তোমার বিরুদ্ধে এক জঘন্য নালিশ দায়ের হয়েছে। সে জানতে চাইল কে তার বিরুদ্ধে কি নালিশ করেছে। তিনি তখন বললেন, এই উট দীর্ঘদিন তোমার সেবা করেছে। তুমি নাকি এখন একে জবাই করে ফেলতে চাও? সে বলল, এটা এখন আর কোনো রকম শ্রম দেয়ার উপযুক্ত নয়, কাজেই জবাই ছাড়া কি আর করা যায়। হুজুর (সা.) বললেন, জীবন-যৌবন, শক্তি-সামর্থ দিয়ে সে এতদিন তোমার সেবা করেছে, আর এখন জরাগ্রস্ত হয়ে পড়ায় তুমি তাকে জবাই করতে চাও। তোমার কর্তব্য তার প্রতি সদয় হওয়া। জবাই হতে রক্ষা পাওয়ার জন্য সে তোমার নিকট করুণ আকৃতি জানিয়েছে। কিন্তু সেদিকে কর্পপাত করোনি, তার আত্মার ফরিয়াদ তুমি বুঝতে পারনি। এহেন অবস্থায় তার নিরাপত্তার ব্যবস্থা করা আমার নৈতিক দায়িত্ব। এই বলে তিনি মালিকের

কাছ থেকে একশ' মুদ্রার বিনিময়ে উটটি কিনে নিলেন আর উটকে লক্ষ্য করে বললেন, যাও, চলে যাও, আমি আল্লাহর ওয়াস্তে তোমাকে সমস্ত ভয়ভীতি ও অধীনতা হতে মুক্ত করে দিলাম। (নুজহাতুল মাজালেস)

এক হাদীসে আছে : একদা একটি কুকুর পিপাসায় কাতর হয়ে কুয়ার পাড়ে দাঁড়িয়ে হাঁপাচ্ছিল। ঘটনাক্রমে এক দেহপসারিনী পাপীয়সী সেখানে আসল। কুকুরটির কাতরতা দেখে তার মনে দয়া হলো। সে তার ওড়নার আঁচল ভিজিয়ে কয়েকবার পানি তুলে নিংড়িয়ে কুকুরটিকে পান করিয়ে তার পিপাসা মিটাল। এতে খুশি হয়ে আল্লাহ তা'য়ালা মহিলাটির গত জীবনের সমস্ত ব্যভিচারের অপরাধ ক্ষমা করে দিলেন। (বুখারী, মুসলিম)।

শিক্ষা : পশুপাখি, জীবজন্তুর প্রতি সদয় হওয়া মুমিনের অনেক গুনাহ মাফের পথ উন্মুক্ত করে দেয়।

## ৫২. খোদাভীরু সাহাবীর অলৌকিকভাবে জীবন রক্ষা

রাত গভীর হয়ে গেছে। ঘুটঘুটে অন্ধকারে আচ্ছন্ন মসজিদ অলিগলি। ঘুমন্ত নগরীর নিস্তব্ধ পরিবেশে অতি সন্তর্পনে পা রাখলেন মুরছাদ ইবনে আবি মুরছাদ। কাফেররা যে সব মুসলমানকে আটক করে রেখেছিল এবং অমানুষিক নির্যাতন চালাচ্ছিল, তাদের কয়েকজনকে গোপনে মদীনা নিয়ে যাওয়ার জন্য তিনি এসেছিলেন। রাসূল (সা.) তাকে এই কাজে নিয়োগ করেছিলেন। তিনি অতি সাবধানে যাচ্ছিলেন। সহসা সামনে একটা ছায়া দেখতে পেলেন। মুরছাদ ভয়ে জড়সড় হয়ে আসলেন। ছায়াটা আরো নিকটে এল। অতঃপর ছায়াটা থেকে পরিচিত এক নারী কণ্ঠ ভেসে এল :

'মুরছাদ! তুমি? আমি চিনে ফেলেছি। কেমন আছ! কিভাবে এলে?'

'কে উনাক নাকি?' প্রশ্ন ছুড়ে দিলেন মুরছাদ।

'হ্যাঁ, আমি উনাক। তোমার প্রাণপ্রিয় উনাক। একদিন যাকে ছাড়া তোমার দু'দণ্ড চলত না। এত রাতে কোথায় যাবে তুমি? চল, আমাদের বাড়িতে। মনে আছে না অতীতের সেই দিনগুলোর কথা?' বলতে বলতে মুরছাদের হাত ধরে টানতে লাগল মুরছাদের জাহেলী যুগের প্রেমিকা ও বাল্য সঙ্গিনী।

মুরছাদ এক ঝটকায় হাত ছাড়িয়ে এমন ভঙ্গীতে দূরে সরে গেলেন যেন তার হাত কোনো বিষধর সাপে পৌঁচিয়ে ধরেছিল।

'কী হলো? পাগল টাগল হয়ে গেছ নাকি? এ হাত একদিন তোমার কত প্রিয় ছিল, তা কি ভুলে গেলে? উনাক বিস্ময়জড়িত কণ্ঠে বলল-

'থামো উনাক। অতীতের কথা ভুলে যাও। ওটা ছিল আমার জীবনের অন্ধকার

যুগ। সে সময় আমি সত্য-মিথ্যা, ন্যায়-অন্যায় এবং পাক নাপাকির কোনো বাহুবিচার করতাম না। আমি গোমরাহ ও বিপথগামী ছিলাম। আল্লাহ আমার ওপর অনুগ্রহ করেছেন। আমি মুসলমান হয়েছি। কিন্তু তুমি এখনো মোশরেক। তাছাড়া তুমি আমার জন্য পরত্নী। পরত্নীর সাথে মেলামেশা ইসলামে হারাম। কাজেই আমাকে মাফ কর। তোমার বাড়িতে আমি যাব না।’ মুরছাদ দ্ব্যর্থহীন কণ্ঠে বললেন।

‘কত বড় আমার সাধু পুরুষ গো। আমার সাথে যাবে, না চিৎকার দিয়ে সবাইকে জড় করব?’ উনাক বলল।

‘মুরছাদ পবিত্র জীবন ছেড়ে অপবিত্রতার পথ আর মাড়াবেন না। জাহেলী যুগের সবকিছু আমি পা দিয়ে পিষে ফেলেছি। যাও, তোমার কাজে তুমি যাও।’ মুরছাদ অবিচল কণ্ঠে জবাব দিল।

‘আমার কাজে আমি চলে যাই, আর তুমি ধর্মচ্যুতদেরকে ভাগিয়ে নিয়ে যাওয়ার সুযোগ পেয়ে যাও, তাই না?’ ক্ষুব্ধ সর্পিনীর মতো ফুঁসতে ফুঁসতে বলল উনাক। তারপর আকাশ-বাতাস ফাটিয়ে চিৎকার করে ‘ওহে মক্কাবাসী, এই দেখ মুরছাদ এসেছে, তোমাদের বন্দীদেরকে ভাগিয়ে নিয়ে যাবে।’

আর যায় কোথায়! সদ্য ঘুমিয়ে পড়া মক্কাবাসী জেগে উঠল এবং যদিও থেকে আওয়াজ আসছিল, সেই দিকে দলে দলে ছুটল।

মুরছাদ ধরা পড়ে যাওয়ার ভয়ে একটা পাহাড়ের গর্ভে আত্মগোপন করলেন। কিছু লোক ঐ গর্ভের দিকে ধেয়ে গেল। মুরছাদের ধরা পড়ে যাওয়া প্রায় অবধারিত ছিল। সহসা অনেক দূর থেকে এক রহস্যময় আওয়াজ ভেসে এল, ‘ওদিকে নয়, এদিকে।’

এরপর মুরছাদ শুনতে পেলেন পায়ের আওয়াজগুলো ক্রমে দূরে মিলিয়ে যাচ্ছে। আল্লাহ তার সৎ ও পরহেজগার বান্দাকে নিশ্চিত মৃত্যুর হাত থেকে অলৌকিকভাবে রক্ষা করলেন।

**শিক্ষা :** পবিত্র কুরআনের সূরা তালাকের (২-৩) নং আয়াতে আল্লাহ বলেছেন, ‘যে ব্যক্তি আল্লাহকে ভয় করে অন্যায় কাজ থেকে বিরত থাকবে, আল্লাহ তাকে সঙ্কট থেকে কোনো না কোনো উপায়ে উদ্ধার করবেন এবং তাকে অকল্পনীয়ভাবে জীবিকা সরবরাহ করবেন।’ আলোচ্য ঘটনা এই আয়াতে বর্ণিত আল্লাহর প্রতিশ্রুতি বাস্তবায়নের একটি জ্বলন্ত দৃষ্টান্ত। এমন অলৌকিকভাবে বিপদ থেকে উদ্ধার পাওয়া সবার ভাগ্যে নাও ঘটতে পারে, কিন্তু প্রতিদান আখিরাতে অবশ্যই পাওয়া যাবে এই বিশ্বাসে অবিচল থেকে তাকওয়া ও পরহেজগারী সর্বাবস্থায় বজায় রাখা কর্তব্য।



## ৫৩. ওমর ইবনে আব্দুল আযীযের ন্যায়বিচার

হযরত ওমর ইবনে আব্দুল আযীয খলীফা হবার পর সমরকন্দের এক প্রতিনিধি দল এসে অভিযোগ করল যে, সেখানকার মুসলিম বাহিনীর অধিনায়ক এলাকার একটি শহর অতর্কিত দখল করে সেখানকার স্থানীয় অধিবাসীদের মধ্যে জোরপূর্বক মুসলমানদের বসতি গড়ে দিয়েছেন। হযরত ওমর বিন আব্দুল আযীয সমরকন্দের গভর্নরকে প্রকৃত ঘটনা কি, তার তদন্ত করার নির্দেশ দিলেন। তিনি লিখলেন যে, একজন বিচারক দ্বারা তদন্ত চালাতে হবে। বিচারক যদি বলেন যে, সেখান থেকে মুসলমানদের বেরিয়ে যাওয়া উচিত, তাহলে তৎক্ষণাত শহর খালি করে দিতে হবে।

নির্দেশ মোতাবেক একজন মুসলিম বিচারক তদন্ত করে রায় দিলেন যে, মুসলমানদের শহর ছেড়ে চলে যাওয়া উচিত। কেননা প্রথমে তাদের শহরবাসীকে সতর্ক করা উচিত ছিল এবং ইসলামী সমর বিধি অনুসারে সকল চুক্তি বাতিল করা উচিত ছিল, যাতে তারা যুদ্ধের প্রস্তুতি নিতে পারে। তাদের ওপর অতর্কিত আক্রমণ করা উচিত হয়নি।

সমরকন্দবাসী এ রায় শুনে নিশ্চিত হলো যে, ইসলামী সরকার ইনসাফ ও ন্যায়বিচারে অতুলনীয়। এ ধরনের লোকদের সাথে যুদ্ধ করা নিরর্থক এবং এদের শাসন আন্নাহর করুণাস্বরূপ। তাই তারা তাদের এলাকায় মুসলমানদের আবাসন সানন্দে মেনে নিল।

শিক্ষা : সুবিচার ও ন্যায়-নীতিতে অবিচল থাকার মাধ্যমে মুসলমানরা যে কোনো স্থানে অমুসলিমদের সাথে ভালো সম্পর্ক গড়ে তুলতে পারে। অমুসলিমদের সাথে উত্তম সম্পর্ক বজায় রাখা ইসলাম ও মুসলমানদের সামগ্রিক স্বার্থে সব সময়ই জরুরি।

## ৫৪. বাইতুল মাকদাস বিজয়ী প্রথম বীর হযরত ইউশা ইবনে নূনের কাহিনী

হযরত মুসা (আ.) বনী ইসরাঈলকে সাথে নিয়ে অলৌকিক উপায়ে লোহিত সাগর পেরিয়ে এক মরুভূমিতে অবস্থান করতে থাকেন। এই সময় আন্নাহতায়লা বেহেশত থেকে মান্না ও সালওয়া নামক তৈরি খাবার পাঠিয়ে এবং আকাশ থেকে মেঘের ছায়া দিয়ে তাদের জীবন যাপনের সুব্যবস্থা করেন। ইত্যবসরে আন্নাহর নির্দেশক্রমে মুসা (আ.) বনী ইসরাঈলকে বলেন, 'আন্নাহ একটি সুজলা সুফলা নয়নাভিরাম পবিত্র ভূমি ফিলিস্তীন তোমাদের স্থায়ী বসবাসের জন্য নির্ধারণ করেছেন, তোমরা সেখানে গিয়ে বসবাস করতে থাক।'।

এই সময় ফিলিস্তীন ছিল আমালেকা নামক বিশালদেহী একটি জাতির দখলে । বনী ইসরাঈলীরা লোকমুখে তাদের বিবরণ শুনেছিল । তারা জবাব দিল, 'হে মুসা! ঐ দেশে একটি অত্যন্ত শক্তিশালী জাতি বাস করে । তাদেরকে লড়াইয়ের মাধ্যমে পরাজিত করে বহিষ্কার করা ছাড়া আমরা সেখানে প্রবেশ করতে পারব না । কিন্তু তাদের সাথে আমরা লড়াই করতে অক্ষম ।'

হযরত মুসা (আ.) এ কথা শুনে তাঁর বিশ্বস্ত সাহাবী হযরত ইউশা ইবনে নূনের নেতৃত্বে একটি প্রতিনিধি দল ফিলিস্তীনে পাঠালেন সেখানকার পরিস্থিতি পর্যালোচনা করার জন্য । প্রতিনিধি দলটি ফিরে আসার পর হযরত মুসা (আ.) কে জানাল যে, ঐ লোকগুলো শুধু দেখতেই বিশালদেহী, কিন্তু তেমন সাহসী ও লড়াই নয় । বনী ইসরাঈলীরা একযোগে আক্রমণ করলে তারা পালিয়ে যেতে বাধ্য হবে ।

এবার হযরত মুসা (আ.) বনী ইসরাঈলীদেরকে একত্রিত করে এক জ্বালাময়ী ভাষণ দিয়ে তাদেরকে ফিলিস্তীনে যাওয়ার নির্দেশ দিলেন । কিন্তু তারা বলল, 'ঐ শক্তিমান জাতিটি যতক্ষণ ওখানে আছে, ততক্ষণ আমরা যাব না । যদি বেরিয়ে যায়, তাহলে আমরা যাব ।'

এই সময় হযরত ইউশা ইবনে নূন এবং হযরত মুসার (আ.) ভগ্নিপতি কালেব তাদেরকে অনেক বুঝালেন যে, 'তোমরা ভয় পেয়ে না । আল্লাহর ওপর ভরসা করে এগিয়ে চল । তোমরা ঐ দেশটির সীমান্তে পৌছা মাত্রই ওরা চলে যাবে এবং তোমরা বিজয়ী হবে ।'

বনী ইসরাঈল বলল, 'হে মুসা, ওরা থাকতে আমরা যাব না । বরঞ্চ তুমি ও তোমার খোদা গিয়ে লড়াই করে ওদের তাড়িয়ে দিয়ে এস । আমরা ততক্ষণ এখানেই বসে থাকব ।'

এবার মুসা (আ.) আল্লাহর কাছে নিবেদন করলেন, 'হে আল্লাহ, আমি কেবল আমার ও আমার ভাইয়ের দায়িত্ব নিতে পারি । তুমি আমার সাথে আমার এই অবাধ্য জাতির সম্পর্ক ছিন্ন করে দাও ।'

আল্লাহ বললেন, 'হে মুসা! এখন চল্লিশ বছরের জন্য ঐ দেশ বনী ইসরাঈলের জন্য নিষিদ্ধ করা হলো । এই চল্লিশ বছর ওরা মরুভূমিতে উদভ্রান্ত হয়ে ঘুরে বেড়াবে । তুমি ঐ অবাধ্য লোকদের পরিণতির জন্য দুঃখ করো না ।'

এরপর বনী ইসরাঈল চল্লিশ বছর ধরে মরুভূমিতে উদভ্রান্ত হয়ে ঘুরে বেড়াতে থাকে । এই সময় মিশর থেকে বেরিয়ে আসা বংশধরটি সম্পূর্ণ নিশ্চিহ্ন হয়ে যায় । পরবর্তী বংশধরের লোকেরা পূর্ববর্তীদের পরিণতি থেকে শিক্ষা গ্রহণ করে

ফিলিস্তীনের জেহাদে অংশগ্রহণ করতে প্রস্তুত হয়। চল্লিশ বছর যখন অতিবাহিত প্রায়, তখন আল্লাহ হযরত মুসা ও হারুনকে নির্দেশ দিলেন যে, বনী ইসরাঈলের বারোটি গোত্রকে বারোজন সেনাপতির নেতৃত্বে বারোটি সেনাদলে বিভক্ত করে ফিলিস্তীনে পাঠাতে।

তিনি প্রত্যেক ২০ বছর বা তদূর্ধ্ব বয়স্ক যুবককে সেনাবাহিনীতে ভর্তি করার আদেশ দেন। তদনুসারে হযরত মুসা (আ.) হযরত ইয়াকুবের (ইসরাঈল) ১২ পুত্রের নামে নিম্নরূপ ১২টি সেনাদল গঠন করেন :

১. রুবেলের গোত্র, সৈন্য সংখ্যা ৬৪ হাজার পাঁচশ, সেনাপতি যামুর বিন শাদিউরা।
২. শামউনের গোত্র, সৈন্য সংখ্যা ৫৯ হাজার তিনশ, সেনাপতি শেলোমাঈল বিন হোরেশদায়।
৩. ইয়াজদার গোত্র, সৈন্য সংখ্যা ৭৪ হাজার ছয়শ, সেনাপতি নাহশূন বিন আমীনাদাব।
৪. ইসাখারের গোত্র, সৈন্য সংখ্যা ৫৪ হাজার চারশ, সেনাপতি নাশাঈল বিন সোগার।
৫. ইউসুফ (আ.) এর গোত্র, সৈন্য সংখ্যা ৪০ হাজার পাঁচশ, সেনাপতি ইউশা ইবনে নূন।
৬. মীশার গোত্র, সৈন্য সংখ্যা ৩১ হাজার দুইশ, সেনাপতি জামলাঈল বিন ফাদাহসূর।
৭. বিন ইয়ামীনের গোত্র, সৈন্য সংখ্যা ৩৫ হাজার চারশ, সেনাপতি আবিদুন বিন জাদউন।
৮. হাদের গোত্র, সৈন্য সংখ্যা ৪৫ হাজার ছয়শ পঞ্চাশ জন, সেনাপতি ইলিয়াসাফ বিন রাউঈল।
৯. আশীরের গোত্র, সৈন্য সংখ্যা ৪১ হাজার পাঁচশ, সেনাপতি ফুজআঈল বিন আকরান।
১০. দানের গোত্র, সৈন্য সংখ্যা ৬২ হাজার সাতশ, সেনাপতি উখাইয়ার বিন আমাশদায়।
১১. নাফতালীর গোত্র, সৈন্য সংখ্যা ৫৩ হাজার চারশ, সেনাপতি উখায়রা বিন আইন।
১২. যবুলুনের গোত্র, সৈন্য সংখ্যা ৫৭ হাজার চারশ, সেনাপতি আলবাব বিন হাইলুন।

বনী ইসরাঈলের এই সম্মিলিত বাহিনীর নেতৃত্বে ছিলেন হযরত ইউশা ইবনে নূন। এই বাহিনীর যাত্রার পূর্বেই হযরত মূসা (আ.) ও হারুন (আ.) একে একে ইস্তিকাল করেন। অতঃপর গোটা বনী ইসরাঈল জাতির সার্বিক নেতৃত্ব দেন হযরত মূসার প্রথম খলীফা হযরত ইউশা ইবনে নূন এবং তাঁর নেতৃত্বে ফিলিস্তীন বিজিত হয়। এই সময় তিনি নবুয়তও লাভ করেন।

বর্ণিত আছে যে, হযরত ইউশা' (আ.) চল্লিশ দিন যাবত জর্দান নদী অতিক্রম করতে পারেননি। অতঃপর তাঁর দোয়ার ফলে উভয় তীরের পাহাড় দু'টি মিলিত হয়ে পুলের আকার ধারণ করে। তার ওপর দিয়ে তিনি সৈন্য সামন্ত নিয়ে পার হন। তিনি আরিহা (বর্তমান জেরিকো) শহর ছয়মাস যাবত অবরুদ্ধ করে রাখেন। সপ্তম মাসে বিকট শব্দে তার প্রাচীরগুলো ভেঙ্গে পড়ে। জেরিকো বিজয়ের চূড়ান্ত মুহূর্তে সূর্য অস্ত্র যাওয়ার উপক্রম হলে তাঁর দোয়ায় সূর্য নিশ্চল হয়ে গিয়েছিল বলে কোনো কোনো রেওয়াজে উল্লেখ করা হয়েছে। কেননা ঐ দিন ছিল শুক্রবার। ঐ দিনের মধ্যে বিজয় অর্জিত না হলে পরদিন শনিবার ছিল নিষিদ্ধ দিন। তাই বিজয় অনেক বিলম্বিত হতো। আল্লাহ তার বিশেষ সাহায্য দ্বারা এই বিজয়কে উপস্থিত করেন। ইউশা' আমালেকাদেরকে বিভাড়িত ও পরাজিত করেন। অতঃপর বাইতুল মাকদাসকে রাজধানী করে ফিলিস্তীনের অধিবাসীদের হযরত ইউশা' আল্লাহর কিতাব তাওরাত অনুসারে ২৭ বছর শাসন করেন। তিনি ১২৭ বছর বয়সে ইস্তিকাল করেন।

শিক্ষা : জেহাদ থেকে পিছপা হওয়া অত্যন্ত মারাত্মক পরিণাম ডেকে আনে। পক্ষান্তরে ইসলাম ও মুসলমানদের রক্ষার জন্য আল্লাহর ওপর ভরসা করে জেহাদে অবতীর্ণ হলে প্রতিপক্ষ যত শক্তিশালীই হোক, আল্লাহ বিজয় লাভে সাহায্য করেন।

## ৫৫. হযরত উরওয়া ইবনে যুবাইয়ের পরহেজগারী ও কৃতজ্ঞতা

বিশিষ্ট সাহাবী হযরত উরওয়া ইবনে যুবাইর (রা.) একবার উমাইয়া বংশীয় বাদশাহ আব্দুল মালেকের সাথে দেখা করতে যান। তাঁর সাথে ছিল তাঁর ছেলে। ছেলের আবদারক্রমে তারা শাহী আস্তাবল দেখতে গেলেন। ছেলেটি কৌতুহলবশতঃ একটা ঘোড়ার পিঠে সওয়ার হলে ঘোড়া তাকে এমন জোরে ফেলে দিল যে, সে ঘটনাস্থলেই মারা গেল। উরওয়া বাদশাহর দরবার থেকে ক্ষুণ্ণ মনে বাড়ি চলে গেলেন। কয়েকদিন পর তার পায়ে এমন এক মারাত্মক ফোঁড়া

হলো যে, চিকিৎসকরা তাঁর পা কেটে ফেলার পরামর্শ দিল। নচেত সমস্ত দেহ তা দ্বারা সংক্রামিত হতে পারে।

হযরত উরওয়া পা এগিয়ে দিলেন কাটার জন্য। ডাক্তার বলল, 'সামান্য একটু মদ খেয়ে নিন, যাতে অস্ত্রোপচারের কষ্ট কম অনুভূত হয়।'

হযরত উরওয়া বললেন, 'আমি কোনো অবস্থাতেই কোনো হারাম জিনিসের সাহায্য নেব না।'

চিকিৎসক অস্ত্রোপচার করে পা কেটে দিল। হযরত উরওয়া শান্তভাবে বসে দোয়া-দরুদ পড়তে লাগলেন। যখন রক্ত বন্ধ করার জন্য ক্ষত স্থানে লোহা পুড়িয়ে দাগানো হলো, তখন যন্ত্রণার তীব্রতা সহিতে না পেরে বেহুঁশ হয়ে গেলেন। হুঁশ ফিরে এলে কাটা পা ঘুরিয়ে ফিরিয়ে দেখে বলতে লাগলেন :

'ওহে পা, যে আল্লাহ তোমাকে আমার বোঝা বহন করার জন্য সৃষ্টি করেছেন, তিনি ভালো করেই জানেন যে, আমি তোমার সাহায্যে হেঁটে কখনো কোনো হারাম কাজ করতে যাইনি। হে আল্লাহ, তোমার শোকর যে, আমার চার হাত পার মধ্যে মাত্র একখানা তুমি নিয়েছ এবং বাকি তিনখানা অক্ষত রেখেছ; আর চার ছেলের মধ্যে মাত্র একজনকে নিয়েছ এবং তিনজনকে জীবিত রেখেছ। তুমি কিছু যদি কেড়েও নিয়ে থাক, তবে অনেক কিছু অবশিষ্টও রেখেছ। কিছুদিন যদি কষ্টও দিয়ে থাক, তবে অনেকদিন সুখ-শান্তিও দিয়েছে।'

শিক্ষা : মুমিনের সবসময় তার বর্তমান অবস্থার জন্য আল্লাহর কৃতজ্ঞতা স্বীকার করা উচিত।

## ৫৬. ইমাম আবু হানিফার মহানুভবতা

ইমাম আবু হানিফার পাড়া পড়শীদের মধ্যে একজন দিনমজুর বাস করত। দিনের বেলায় সে নিজের কুঁড়েঘরে বসে নানা রকম কুটির শিল্পের কাজ করত। অশালীন গান গাইত ও প্রলাপ বকত। তার হৈ-চৈতে ইমাম সাহেবের গভীর রাতের নামায, জিকির ও চিন্তা গবেষণা পর্যন্ত ব্যাহত হত। তিনি তাকে ঐ বদভ্যাস ত্যাগ করার জন্য প্রায়ই অত্যন্ত মিষ্টি ভাষায় উপদেশ দিতেন। কিন্তু সে তাতে কর্ণপাত করত না। ইমাম অগত্যা নীরবে সব কিছু সহ্য করতেন।

একদিন রাতে তিনি লক্ষ্য করলেন যে, ঐ লোকটির কুঁড়েঘর থেকে কোনো হৈ-চৈ এর শব্দ আসছে না। তিনি আজ নির্বিঘ্নে এবাদত, জিকির ও চিন্তা-গবেষণা চালালেন বটে, কিন্তু তাঁর মন অস্থির ও উদ্বিগ্ন হয়ে উঠল।

ভোরবেলা ইমাম সাহেব তার খোঁজ খবর নিতে গেলেন। তিনি শুনতে পেলেন যে, পুলিশ ঐ মাতাল লোকটাকে ধরে নিজে জেলে আটক করেছে।

তৎকালে বাগদাদের সিংহাসনে আসীন ছিলেন উমাইয়া বংশীয় বাদশাহ মানসুর। ইমাম সাহেব বাদশাহ দরবার কঠোরভাবে এড়িয়ে চলতেন। বাদশাহ নিজেই কখনো কখনো এসে ইমাম সাহেবের সাথে দেখা করে যেতেন। কিন্তু আজ ইমাম সাহেব তাঁর দরিদ্র প্রতিবেশীর বিপদে অধীর হয়ে বাদশাহর দরবারে চলে গেলেন।

বাদশাহ ও তাঁর আমীর ওমরাহগণ ইমাম সাহেবকে দরবারে আসতে দেখে অবাক হয়ে গেলেন। তারা পরম শ্রদ্ধা সহকারে তাঁকে বসালেন।

তিনি বললেন, ‘মহামান্য বাদশাহ, আপনার লোকেরা আমার এক প্রতিবেশীকে ধরে এনে জেলে পুরেছে। আমি তার মুক্তি চাইতে এসেছি।’

বাদশাহ এক মুহূর্ত ভেবে জবাব দিলেন, ‘মান্যবর ইমাম সাহেব, আপনি আজ আমার দরবারে উপস্থিত হয়ে আমাকে যে ধন্য করলেন, সেই আনন্দে ও আপনার সম্মানের খাতিরে আপনার প্রতিবেশীসহ জেলের সকল কয়েদীকে মুক্তি দিলাম। ইমাম সাহেব তার প্রতিবেশীকে নিয়ে বাড়িতে ফিরলেন। দিনমজুর এরপর আর মদ স্পর্শ করেনি।

শিক্ষা : প্রতিবেশী যেমনই হোক না কেন তার খোঁজ রাখা ও বিপদে তার পাশে থাকাই ঈমানদার ব্যক্তির কর্তব্য।

## ৫৭. ইমাম আবু হানিফা ও নাস্তিক

একবার খলিফা হারুনুর রশীদের নিকট এক নাস্তিক এসে বললেন, আপনার সাম্রাজ্যে যদি কোনো জ্ঞানী ব্যক্তি থেকে থাকে তবে তাকে ডাকুন, আমি তার সাথে তর্ক করে প্রমাণ করে দেব যে, এই আকাশ ও পৃথিবীর কোনো স্রষ্টা নেই, এগুলো আপনা আপনি জন্মেছে এবং আপনা থেকেই চলে। খলিফা কিছুক্ষণ ভেবে নিলেন। তারপর একটা চিরকুটে পুরো বিষয়টি লিখে একজন দূত মারফত ইমাম আবু হানিফার নিকট পাঠালেন, যেন তিনি যত শীঘ্র সম্ভব খলিফার দরবারে আসেন এবং বিতর্কে অংশ নেন। ইমাম আবু হানিফা দূত মারফত খলিফাকে জানালেন যে, তিনি পরদিন জোহরের নামায খলিফার প্রাসাদে এসে পড়বেন এবং নামাযের পর বিতর্কে অংশ নেবেন।

পরদিন জোহরের সময় খলিফা, তার সভাসদবর্গ ও উক্ত নাস্তিক ইমাম

সাহেবের জন্য প্রতীক্ষায় রইলেন। কিন্তু জোহরের নামায পড়া তো দূরের কথা, জোহরের সময় গড়িয়ে আসর হলো, তবু তিনি এলেন না। আসর গড়িয়ে যখন মাগরিবের আযানের সময় সমাগত প্রায়, তখন তিনি এলেন। তাঁকে দেখামাত্র নাস্তিকটি খলীফা হারুনুর রশীদকে বলল যে, তার প্রতিপক্ষ এত দেরিতে কেন পৌঁছলেন তার কারণ জানতে চাই, খলীফা ইমাম আবু হানিফাকে নাস্তিকের অভিপ্রায় জানালেন। ইমাম আবু হানিফা বললেন, ‘জাহাপনা, আমি দজলা নদীর ওপারে বাস করি। আপনার দাওয়াত পেয়ে দজলার কিনারে এসে দেখি পারাপারের কোনো নৌকা নেই। অনেকক্ষণ অপেক্ষা করলাম। কিন্তু কোনো নৌকা এল না। সহসা নদীল কিনারের একটা গাছ আপনার থেকে মাটি উপড়ে পড়ে গেল। অতঃপর দেখতে দেখতে গাছটি আপনা থেকে চেরাই হয়ে তজায় পরিণত হয়ে গেল এবং সেই তজা জোড়া লেগে আপনা আপনি নৌকা তৈরি হয়ে গেল। অতঃপর সেই নৌকায় আমি চড়ে বসলাম। নৌকাটি আপনা আপনি চলতে চলতে আমাকে এপারে এনে পৌঁছে দিল।’

ইমাম সাহেবের কথা শুনে নাস্তিকটি হো হো কর হেসে উঠল। সে বলল, ওহে ইমাম সাহেব, আপনি কি আমাকে বোকা পেয়েছেন যে, এমন গাজাখুরি গল্প বিশ্বাস করব। একটা গাছ আপনা আপনি নৌকায় পরিণত হলো এটা কি করে সম্ভব?

ইমাম সাহেব বললেন, ওহে নাস্তিক সাহেব, একটা গাছ যদি আপনা থেকে নৌকায় পরিণত হতে না পারে, তাহলে এই বিশাল আকাশ পৃথিবী চন্দ্র সূর্য নক্ষত্র ইত্যাদি কিভাবে আপনা-আপনি তৈরি হতে এবং চালু থাকতে পারে?

নাস্তিকটি লা-জওয়াব হয়ে মুখ কাচু মাচু করে বিদায় নিল। খলীফা হারুনুর রশীদ ইমাম সাহেবের তৎক্ষণাৎ জবাবে মুগ্ধ হয়ে তাকে সম্মানে বিদায় দিলেন। কোনো তর্কে যাওয়ার আগেই নাস্তিকটি শোচনীয়ভাবে পরাজিত হয়ে গেল।

**শিক্ষা :** নাস্তিক ও খোদাদ্রোহীদের কোনো যুক্তি থাকে না। বিচক্ষণতা ও সাহস নিয়ে তাদের মোকাবিলা করলেই তারা পরাজিত হতে বাধ্য। তবে এ যুগের নাস্তিক ও খোদাদ্রোহীরা যুক্তির অভাবে সন্ত্রাসের আশ্রয় নিয়ে অস্তিত্ব টিকিয়ে রেখেছে। তাদেরকে প্রতিহত করার জন্য মুসমানদেরকে মাথা ঠাণ্ডা রেখে সুপরিকল্পিতভাবে শক্তি অর্জন করে জেহাদের জন্য প্রস্তুতি নিতে হবে।

## ৫৮. কে বেশি দানশীল

একবার প্রখ্যাত দানশীল সাহাবী হযরত আব্দুল্লাহ ইবনে জাফর নিজের একটা জমি দেখতে গেলেন। সেখানে একটি গোত্রের খেজুর গাছের ছায়ায় বসলেন এবং একজন নিগ্রো ক্রীতদাসকে দেখতে পেলেন। সে বাগানটি পাহারা দিচ্ছিল। কিছুক্ষণ পর সে খাওয়ার জন্য তিনটি রুটি বের করল। সে রুটি খাওয়া শুরু করার আগেই একটা কুকুর এসে তার কাছে ঘেঁসে বসল। ক্রীতদাসটি একটা রুটি কুকুরকে দিল। কুকুর তা খেয়ে ফেলল। সে তাকে আরো একটি দিল। কুকুরটি তাও খেয়ে ফেলল। অতঃপর সে তৃতীয় রুটিটিও দিল এবং এক নিমেষেই কুকুর তাও খেয়ে ফেলল। আব্দুল্লাহ তার দিকে অবাক হয়ে তাকিয়ে দেখতে লাগলেন।

আব্দুল্লাহ বললেন : তুমি প্রতিদিন ক'টা রুটি খেতে পাও?

ক্রীতদাস বলল : তিনটি।

আব্দুল্লাহ বললেন : তুমি নিজে না খেয়ে সবক'টা রুটি কুকুরকে দিয়ে দিলে কেন?

ক্রীতদাস বলল : এ অঞ্চলে কোনো কুকুর নেই। এ কুকুরটা নিশ্চয়ই অনেক দূর থেকে এসেছে এবং নিশ্চয়ই সে ক্ষুধার্ত। তাই তাকে ফিরিয়ে দেয়া পছন্দ করিনি।

আব্দুল্লাহ বললেন : আজ তুমি কী খাবে?

ক্রীতদাস বলল : আজ উপোষ করব।

আব্দুল্লাহ ইবনে জাফর মনে মনে বললেন, এতো আমার চেয়েও দানশীল। অতঃপর ঐ খেজুরের বাগান ও ক্রীতদাসকে কিনে নিলেন এবং ক্রীতদাসকে স্বাধীন করে বাগানটি তাকে উপহার দিলেন।

শিক্ষা : ক্ষুধার্ত প্রাণীকে খাবার খাওয়ানো একটি বড় ধরনের সাদকা।

## ৫৯। একজন আরব শেখের মহানুভবতা

তখন স্পেনে মুসলিম শাসন চলছে। আমীর আবদুর রহমান স্পেনের শাসনকর্তা। জনৈক আরব শেখ কর্ডোভার এক গোত্রের সরদার ছিলেন। তার বিপুল ধনসম্পদ ও জমিজমা ছিল।

একদিন তিনি নিজ বাগানে পায়চারী করে বেড়াচ্ছেন। এই সময় জনৈক স্পেনীয় যুবক আকস্মিকভাবে তার বাগানে ঢুকলো এবং তার পায়ে পড়ে জীবনের নিরাপত্তা চাইলো।



শেখ তাকে টেনে তুললেন এবং কারণ জানতে চাইলেন। যুবক বললো, “মহানুভব শেখ, পশ্চিমধ্যে এক যুবকের সাথে আমার কথা কাটাকাটি হয়েছিল। আমি ক্রোধে দিশাহারা হয়ে তার মাথায় একটা আঘাত করলাম। যুবকটি তৎক্ষণাত মারা গেল। তার সঙ্গীরা আমাকে ধাওয়া করেছে। আমি জীবনের নিরাপত্তার জন্য পালাচ্ছিলাম। আপনার দরজাটা খোলা দেখে ঢুকে পড়েছি। ঐ ওরা ধেয়ে আসছে। ওদের কোলাহল শোনা যাচ্ছে। দোহাই আপনার, আমাকে প্রাণে বাঁচান।” এই কথা বলে যুবকটি পুণরায় শেখের পা জড়িয়ে ধরলো। সরদার এবারও তাকে টেনে তুললেন এবং বললেন, “তোমাকে নিরাপত্তা দিচ্ছি। কেউ তোমার কিছু করবে না। এসো আমার সঙ্গে।” অতঃপর তিনি যুবকটিকে তার বাড়ীর একটি গোপন কক্ষে সবার অলক্ষ্যে তালা দিয়ে রাখলেন।

যুবককে নিরাপদ কক্ষে তালাবদ্ধ করে বাগানে ফিরে আসতেই তিনি দেখতে পান একটি অকল্পনীয় দৃশ্য। তারা এক সুন্দর সূঠামদেহী যুবকের সদ্য মৃত লাশ ধরাধরি করে নিয়ে এসেছে। লাশ দেখে সরদার এক প্রচণ্ড আর্তচিৎকার দিয়েই শটান হয়ে পড়ে গেলেন। কারণ যুবকটি ছিল তাঁরই একমাত্র পুত্র সন্তান। উত্তেজিত জনতার মধ্য হতে একজন বললো, “মান্যবর শেখ, একটা বখাটে স্পেনীয় যুবক এই হত্যাকাণ্ডটা ঘটিয়েছে। সে এই পর্যন্ত এসে উধাও হয়ে গিয়েছে। আমরা তাকে ধাওয়া করে এসেছিলাম। কিন্তু ধরতে পারলাম না।”

সরদার নিঃসন্দেহে বুঝতে পারলেন যে, তাঁর আশ্রিত যুবকই তাঁর প্রাণপ্রিয় সন্তানকে হত্যা করেছে। জনতা তাঁর সমস্ত বাগান তন্নতন্ন করে খুঁজলো। কিন্তু কোথাও তার সন্ধান পেল না। অবশেষে তারা নিরাশ হয়ে শেখকে স্বাস্তনা দিয়ে চলে গেল।

আশ্রিত যুবকটি তার কক্ষ হতে এসব কিছু দেখলো এবং শুনলো। সে উপলব্ধি করতে পারলো যে, তার মৃত্যু আসন্ন। সে তার গোপন কক্ষে চরম আতংকের মধ্যে সময় কাটাতে লাগলো।

লাশটি যথারীতি গোসল, কাফন-ও জানাযা শেষে সমাহিত করা হলো। শেখের বাড়িতে কান্নার রোল পড়ে গেল। এই কান্না ও আহাজারীর মধ্য দিয়ে কখন সন্ধ্যা হয়ে গেল কেউ জানে না।

সন্ধ্যা ক্রমশ গাঢ় হয়ে এলো। রাত গভীর হতে গভীরতর হলো। বাড়ীর লোকজন কান্নাকাটি করে ক্লাস্ত হয়ে এক সময়ে গভীর ঘুমে অচেতন হয়ে

পড়লো। কিন্তু সরদারের চোখে মুম নেই। তিনি তার বিছানা থেকে উঠলেন, ধীর পায়ে অপরাধী যুবকের কক্ষের কাছে গেলেন এবং তার দরজার তালা খুলে দিলেন। তখন ভয়ে কম্পমান যুবককে লক্ষ্য করে তিনি বললেন : “তোমার ভয়ের কোন কারণ নেই। তুমি আমার মেহমান। মুসলমান প্রতিশ্রুতি ভঙ্গ করে না। এই নাও, এই পোটলায় তোমার পথে খাওয়ার জন্য কিছু খাবার আছে। আর আস্তাবল হতে একটি ঘোড়া নিয়ে এখনি এখন হতে বিদায় হও। আমার ভয় হয়, কখন আবার শয়তানের কুপ্ররোচণায় বিদ্রোহী হয়ে তোমাকে হত্যা করে বসি। তাই বিলম্ব করো না। চলে যাও। আমি তোমাকে ক্ষমা করে দিলাম।”

সীমাহীন কৃতজ্ঞতায় অশ্রুভরা চোখে যুবক তাকালো শেখের দিকে। অতঃপর সালাম জানিয়ে ঘোড়া হাঁকিয়ে দ্রুত চম্পট দিল।

**শিক্ষা :**

মুমিনের প্রতিশ্রুতি এমনই হওয়া প্রয়োজন যা অতীব আনন্দ কিংবা প্রচণ্ড কষ্ট/আঘাত কিছুতেই ভঙ্গ হয় না।

## ৬০। দুঃসাহসী বীর বিশর বিন আমরের ইসলাম গ্রহণের কাহিনী

দশম হিজরীর কথা। কতিপয় সাহাবী রাসূল (সা.) এর পাশে বসেছিলেন। সহসা বিশর বিন আমর আল জারুদের আবির্ভাবে রাসূল (সা.) এর পবিত্র মুখমণ্ডল উজ্জ্বল হয়ে উঠলো। সাহাবীগণ এই বিশরের রহস্য নিয়ে কৌতুহলী হয়ে উঠলেন। তারা কিছু জিজ্ঞাসা করার আগেই রাসূল (সা.) পূর্বদিকে ইঙ্গিত করে বললেন, “এখানে একটু পরেই উপস্থিত হবে সেই কাফেলা, যাতে শ্রেষ্ঠ প্রাচ্যবাসীদের সমাবেশ ঘটেছে।”

সাহাবীগণ পরম্পরের মুখ চাওয়াচাওয়ি করতে লাগলেন। এই কাফেলার পরিচয় জিজ্ঞাসা করতে তাদের সকলের মন আকুপাকু করছিল যে, তারা কোন্ গোত্র এবং কোন্ এলাকার লোক। কিন্তু লজ্জায় কেউ কিছু জিজ্ঞাসা করতে পারলেন না। তবে হযরত ওমর(রা.) আর দেরী সইতে পারলেন না। তিনি নিজের ঘোড়ায় চড়ে দূর হতে যে কাফেলাটি ধূলা উড়িয়ে আসছে তা দেখতে এগিয়ে এলেন। একেবারে কাজে গিয়ে জিজ্ঞেস করলেন : আপনারা কোন্ গোত্রের লোক?

তাদের নেতা জবাব দিলেন, “বনু আবদিল কায়েস গোত্রের”।

হযরত ওমর (রা.) পুনরায় জিজ্ঞেস করলেন, “আপনারা কেন এসেছেন? ব্যবসার জন্য?”

তারা বললো, না ।

রাসূল (সা.) এইমাত্র আপনাদের কথা উল্লেখ করেছেন এবং খুব ভালো বলেছেন ।

অনতিবিলম্বে কাফেলা রাসূল (সা.) এর সামনে উপনীত হলো । তিনি তাদেরকে মোবারকবাদ জানালেন, ইসলামী নিয়মে সালাম দিলেন এবং তাদের আগমনে আনন্দ প্রকাশ করে বললেন : “আগন্তুক কাফেলাকে অভিনন্দন; সম্মানে ও নিঃসঙ্কোচে আসুন ।” কাফেলার নেতা ছিলেন আবু গিয়াস বিশর বিন আমর বিন আল মুয়াল্লা আল আবদী । তিনি বনু আব্দুল কায়েসের শাখা বনু আবসের প্রবীণতম নেতা, সরদার ও সর্বাপেক্ষা সম্মানিত ব্যক্তি । প্রতিপক্ষীয় এক গোত্রের ওপর আক্রমণ করে তাদেরকে সম্পূর্ণ নিশ্চিহ্ন করে দেয়ার কৃতিত্বের জন্য তারা তাকে জারুদ বা নিপাতকারী নামে আখ্যায়িত করে । তারা এসেছিলেন আরব সাগরের উপকূলবর্তী এলাকা হতে । তার বীরত্ব ও সাহসিকতার খ্যাতি সমগ্র আরব উপকূলে ছড়িয়ে পড়েছিল ।

জারুদ রাসূলুল্লাহ সাল্লাল্লাহু আলাইহি ওয়াসাল্লামের দরবারে উপস্থিত হয়ে আলাপ আলোচনা শুরু করলো, তিনি তার নিকট ইসলাম পেশ করলেন এবং তাকে ইসলাম গ্রহণের দাওয়াত ও উপদেশ দিলেন । জারুদ বললো, “ইয়া রাসূলুল্লাহ । আমার একটা ধর্ম আছে । এখন আপনার ধর্ম গ্রহণের উদ্দেশ্যে আমি নিজ ধর্ম ত্যাগ করতে রাজী আছি । তবে নিজ ধর্ম ত্যাগ করায় আমার কোন ক্ষতি হবে না- আমাকে এ নিশ্চয়তা আপনি দিতে পারেন কি?” রাসূলুল্লাহ সাল্লাল্লাহু আলাইহি ওয়াসাল্লাম বললেন, “হ্যা, আমি তোমাকে নিশ্চয়তা দিচ্ছি ইসলাম গ্রহণের অর্থ দাঁড়াবে এই যে, আল্লাহ তোমার ধর্মের চেয়েও ভাল ধর্ম গ্রহণ করার সুযোগ দিলেন ।”

এ কথা শুনে জারুদ ও তার সঙ্গীরা ইসলাম গ্রহণ করলো । অতঃপর রাসূলুল্লাহ সাল্লাল্লাহু আলাইহি ওয়াসাল্লামের কাছে দেশে ফিরে যাওয়ার জন্য সওয়ারী [বাহন] প্রার্থনা করলো । রাসূলুল্লাহ সাল্লাল্লাহু আলাইহি ওয়াসাল্লাম সওয়ারী প্রদানে অক্ষমতা প্রকাশ করলেন । তখন জারুদ বললো, “ইয়া রাসূলুল্লাহ সাল্লাল্লাহু আলাইহি ওয়াসাল্লাম আমাদের স্বদেশ গমনের পথে অনেক লাওয়ারিশ পথভ্রষ্ট উট পাওয়া যায় । সেগুলোতে চড়ে আমরা যেতে পারি কি?” রাসূলুল্লাহ সাল্লাল্লাহু আলাইহি ওয়াসাল্লাম বললেন, “না, খবরদার । এগুলোতে আরোহণ করো না । ওগুলো দোযখে যাওয়ার বাহন হবে ।”

অতঃপর জারুদ রাসূলুল্লাহ সাল্লাল্লাহু আলাইহি ওয়াসাল্লামের কাছ থেকে

বেরিয়ে স্বদেশ মুখে রওনা হলেন। তিনি মৃত্যুকাল পর্যন্ত ইসলামের ওপর অবিচল ছিলেন এবং খুবই ভালো মুসলমান ছিলেন। রাসূলুল্লাহ সাল্লাল্লাহু আলাইহি ওয়াসাল্লামের ইত্তিকালের পর যখন কিছু লোক ইসলাম ত্যাগ করে, সে সময়ও তিনি বেঁচে ছিলেন।

তাঁর গোত্রের এক ব্যক্তি বলে উঠলো : “মুহাম্মদ (সা.) যদি নবী হতেন, তাহলে মরতেন না।”

সঙ্গে সঙ্গে গোত্রের আরো অনেকে তাকে সমর্থন করলো এবং মুরতাদ হয়ে যেতে লাগলো।

জারুদ তাদের সবাইকে এক জায়গায় সমবেত করে বললেন : “হে বনু আবদুল কায়েস, আমি তোমাদের কাছে একটি কথা জিজ্ঞেস করছি। যদি তোমাদের জানা থাকে জবাব দিও, নচেত জবাব দিওনা।”

তারা বললো : “ঠিক আছে, জিজ্ঞেস করুন।”

জারুদ বললেন, “তোমরা কি জান যে, অতীতেও আল্লাহর বহু নবী এসেছেন?”

তারা বললো : শুনেছি।

জারুদ : তারা এখন কোথায়?

তারা বললো : তারা মারা গেছেন।

জারুদ : তারা যেমন মারা গেছেন, মুহাম্মদ (সা.) ও তেমনি মারা গেছেন। আমি সাক্ষ্য দিচ্ছি যে, আল্লাহ ছাড়া আর কোন মা'বুদ নেই এবং মুহাম্মদ (সা.) আল্লাহর রাসূল। আমি হযরত আবু বকরের কথার পুনরাবৃত্তি করছি যে, মুহাম্মদ (সা.) যদি মারা গিয়ে থাকেন, তাতে কিছু যায় আসে না। আল্লাহ চিরঞ্জীব ও চিরস্থায়ী।

এবার তাঁর গোত্রের লোকেরাও কঠে কঠ মিলিয়ে বললো : “আমরাও সাক্ষ্য দিচ্ছি যে, আল্লাহ ছাড়া কোন মা'বুদ নেই এবং মুহাম্মদ সাল্লাল্লাহু আলাইহি ওয়াসাল্লাম তাঁর বান্দা ও রাসূল”।

এরপর হযরত জারুদের আর একটি সৌভাগ্য লাভ করা বাকী ছিল। সেটি হলো শাহাদাত। আল্লাহ তাঁর সে আশাও পূর্ণ করলেন। একুশ হিজরীতে হযরত ওমরের (রা.) আমলে পারস্যে প্রেরিত একটি সেনাবাহিনীর সেনাপতি হিসেবে লড়াই করতে করতে তিনি শহীদ হন।

শিক্ষা : ঈমানের মজবুতি না থাকলে পথভ্রষ্ট হওয়ার ঝুঁকি থাকে। তাই আত্মবিশ্বাসের সাথে ঈমানের পথে অবিচল থাকা এবং মানুষকে সতর্ক করা প্রয়োজন।

## ৬১। হযরত জুলকিফল (আ.) এর ক্রোধ সংবরণ

বিশিষ্ট নবী আল-ইয়াসা (আ.) যখন বার্বক্যে উপনীত হ'লেন, তখন তিনি এমন একজনকে তাঁর স্থলাভিষিক্ত বা খলীফা মনোনীত করতে ইচ্ছা করলেন, যিনি তার নবীসুলভ দায়িত্ব পালন করতে পারবেন। তিনি তাঁর সাহাবীদেরকে ডেকে বললেন, আমি আমার খলীফা মনোনীত করব। যার মধ্যে তিনটি গুণ থাকবে তাকেই আমি খলীফা মনোনীত করব। প্রথমত : সর্বদা রোযা রাখা, দ্বিতীয়ত : রাত জেগে আল্লাহর এবাদত করা এবং তৃতীয়ত : কোনো অবস্থাতেই কারো ওপর রাগান্বিত না হওয়া। সমাবেশের মধ্য থেকে একজন সাধারণ ব্যক্তি উঠে দাঁড়াল। সে বলল, আমি এই কাজের যোগ্যতা রাখি এবং দায়িত্ব পালন করতে প্রস্তুত। হযরত আল ইয়াসা বললেন, তুমি কি সব সময় রোযা রাখ, রাত জেগে এবাদত কর এবং কোনো অবস্থাতেই কারো ওপর রাগ কর না? সে বলল, জ্বী, এই তিনটি গুণই আমার মধ্যে আছে। হযরত ইয়াসা তার কথায় বিশ্বাস করতে না পেরে সেদিনকার মতো তাকে ফিরিয়ে দিলেন। দ্বিতীয় দিন তিনি আবারো সমাবেশ ডেকে আগের দিনের কথার পুনরাবৃত্তি করলেন। আজও ঐ একই ব্যক্তি দাঁড়িয়ে আগের দিন যা যা বলেছিল তাই বলল আর অন্য সবই চূপ করে রইল। তখন হযরত ইয়াসা তাঁকে খলীফা নিযুক্ত করলেন। এই ব্যক্তিরই নাম যুলকিফল এবং ইনিই পরবর্তীকালে নবুয়ত লাভ করেছিলেন।

এদিকে হযরত যুলকিফল এই পদ লাভ করেছেন দেখে ইবলিস চক্রাণ্ড শুরু করে দিল। সে তার অনুসারীদেরকে বলল, 'তোমরা যাও, এই যুলকিফলকে যে কোনোভাবেই হোক এমন কোনো অন্যায় কাজ করতে প্ররোচিত কর যাতে তার এই পদ বাতিল হয়ে যায়। তার অনুসারীরা বলল, যুলকিফল খুবই পাকা ঈমানদার। ওকে বশে আনা আমাদের পক্ষে সম্ভব নয়।' তাই ইবলিস বলল, 'ঠিক আছে, আমি নিজেই দেখে নেব কেমন করে সে এই দায়িত্বে বহাল থাকে।'

হযরত যুলকিফল যথার্থই প্রতিদিন রোযা রাখতেন এবং সারা রাত জেগে এবাদত করতেন। কেবল দুপুরে একটু ঘুমিয়ে নিতেন। ইবলিশ ঠিক দুপুরে এক বুড়ো মানুষের বেশে এসে তার ঘুমের সময় দরজায় কড়া নাড়ল। তিনি জেগে উঠে জিজ্ঞেস করলেন, কে? জবাব এলো, আমি একজন ময়লুম বুড়ো মানুষ। তিনি দরজা খুলে দিলে আগস্তুক ভেতরে এসে মনগড়া এক দীর্ঘ কাহিনী বলতে শুরু করল। সে তার গোত্রের লোকদের বিরুদ্ধে অভিযোগ করল যে, তারা তার ওপর নানাভাবে জুলুম নিপীড়ন চালাচ্ছে। এভাবে তার দুপুরের ঘুমের সময়

কেটে গেল। হযরত যুলকিফল বললেন, আমি যখন আদালতে বসব তখন এসো। আমি তোমার অভিযোগের বিচার করবো।

যুলকিফল আদালতে বসে লোকটির জন্য দীর্ঘ সময় অপেক্ষা করলেন। কিন্তু সে এলো না। পরের দিন তিনি যখন আদালতে বসলেন, তখনো তার পথ চেয়ে থাকলেন। কিন্তু সে তখনো এল না। দুপুরে যখন ঘুমাতে আরম্ভ করলেন, অমনি লোকটি দরজা ধাক্কাধাক্কি শুরু করে দিল। তিনি দরজা খুলে দেখলেন সেই বুড়ো লোকটি দাঁড়িয়ে। তিনি বললেন, আমি তো তোমাকে আদালতে আসতে বলেছি। তুমি কালও আসনি। আজও আসনি। সে বলল, জনাব আমার শক্ররা বড়ই শঠ। আপনার আদালতে গেলে তারা আপনার সামনে আমার পাওয়া মিটিয়ে দেবার অঙ্গীকার করবে। কিন্তু পরে আর দেবে না। এভাবে দ্বিতীয় দিনও তার ঘুম নষ্ট হলো। তিনি বললেন, ঠিক আছে, আমি তোমার পাওনা আদায় না করে তোমার শত্রুদেরকে যেতে দেব না। তুমি কাল আদালতে এসো। বুড়ো, 'জ্বী আচ্ছা' বলে চলে গেল।

পরদিন আবারও তিনি আদালতে অপেক্ষা করলেন। কিন্তু বুড়ো লোকটি এল না। তিনি ঘুমে কাতর হয়ে বাড়িতে এসে দুপুরে ঘুমিয়ে পড়লেন। ঘুমোবার আগে বাড়ির সবাইকে নিষেধ করলেন কেউ যেন দরজা না খোলে। বুড়ো আজ আবার এসে কড়া নাড়তে শুরু করল। বাড়ির লোকেরা দরজা খুলতে রাজি না হলেও সে আশ্চর্যজনকভাবে ভেতরে ঢুকে হযরত যুলকিফলকে ডাকতে শুরু করল। তিনি জিজ্ঞেস করলেন, তুমি ঘরের ভেতর কিভাবে ঢুকলে? লোকটি আমতা আমতা করতে লাগল। তখন তিনি চিনে ফেললেন যে, সে আসলে ইবলিশ। সে বলল, আমি আপনাকে রাগান্বিত করার এবং দিনের ঘুম ভাঙিয়ে রাতের এবাদত ব্যাহত করার চেষ্টা করছিলাম যাতে হযরত আল ইয়াসার সাথে কৃত আপনার ওয়াদা ভঙ্গ হয়। কিন্তু আপনি আমার সকল চক্রান্ত নস্যং করে দিয়েছেন। (ইবনে কাছীর)

শিক্ষা : ঈমান ও তাকওয়ার ওপর অবিচল থাকতে সংকল্পবদ্ধ হলে শয়তানের কুপ্ররোচনা ও চক্রান্ত থেকে রক্ষা পাওয়া যায়।

## ৬২। মুক্তির জন্য নিজের সৎলোক হওয়াই যথেষ্ট নয়

তাকসীরে বাহরে মুহীতে বর্ণিত আছে যে, হযরত ইউশা ইবনে নূনের নিকট একবার ওহী এল যে, তোমার জাতির এক লক্ষ লোককে আযাবের মাধ্যমে ধ্বংস করা হবে। এদের মধ্যে চল্লিশ হাজার সৎলোক এবং ষাট হাজার

অসৎলোক । ইউশা (আ.) বললেন : হে রাব্বুল আলামীন! অসৎ লোকদের ধ্বংস করার কারণ তো জানি, কিন্তু সৎলোকদেরকে কেন ধ্বংস করা হবে । জবাব এল : এই সৎ লোকগুলিও অসৎলোকদের সাথে বন্ধুত্বপূর্ণ সম্পর্ক রাখতো । তাদের সাথে পানাহার, উঠাবসা ও হাসি তামাসায় যোগদান করতো । আমার অবাধ্যতা ও পাপাচার দেখে কখনো তাদের চেহারায় অসন্তোষের চিহ্ন ফুটে উঠতো না ।

শিক্ষা : এই ঘটনা থেকে শিক্ষা পাওয়া যায় যে, আল্লাহর আযাব ও অসন্তোষ হতে মুক্তি পাওয়ার জন্য নিরেট সৎলোক হওয়াই যথেষ্ট নয়, বরং নিজের পার্শ্ববর্তী লোকদেরকেও সৎ বানাবার নিরন্তর চেষ্টা চালিয়ে যেতে হবে । অবশ্য অসৎ লোকদেরকে সৎ পথে আনার জন্য সাময়িকভাবে তাদের সাথে খোলামেলা ও বন্ধুত্ব করা অবৈধ ও অন্যায় হবে না । তবে এই সময়ে তাদেরকে মন দিয়ে ভালোবাসা যাবে না এবং অন্যায় কাজ হতে তাদেরকে ফেরানো বা বাধা সৃষ্টি করার জন্য প্রতিটি সুযোগকে কাজে লাগিয়ে চেষ্টা করতে হবে ।

## ৬৩ । মসজিদুল আকসা নির্মাণের ঘটনা

হযরত দাউদ (আ.) এর আমলে একবার কলেরা মহামারীতে প্রায় এক লক্ষ সত্তর হাজার লোক মারা যায় । যারা এই মহামারী থেকে রক্ষা পায় তাদেরকে হযরত দাউদ (আ.) বললেন : তোমরা যে আল্লাহর রহমতে এই ভয়াবহ গণব হতে রক্ষা পেলে, সেজন্য আল্লাহর শোকর আদায় কর । তবে শোকর আদায় করার সর্বোত্তম পস্থা হলো মসজিদ নির্মাণ করা ।

হযরত দাউদ (আ.)-এর কথা শুনে বনী ইসরাঈলের সবাই মসজিদ তৈরি করতে মনস্থির করল । যে জায়গাটা মসজিদ তৈরির জন্য নির্ধারিত হলো, তার মালিকরা সবাই জায়গাটা ওয়াকফ করে দিতে রাজি হলো । কিন্তু একজন মালিক ওয়াকফ করতে রাজি হলো না । সে ঐ জমির এতো দাম চেয়ে বসল যে, জমির প্রকৃত বাজার মূল্যের চেয়ে তা বহুগুণ বেশি । সে বলল যে, জমির চারপাশে তার সমান উঁচু দেয়াল গেঁথে সেই দেয়াল সমান উঁচু সমস্ত জমি ভর্তি করে স্বর্ণমুদ্রা দিতে হবে । তাহলেই আমি জমি বিক্রি করতে পারি ।

হযরত দাউদ (আ.) বনী ইসরাঈলের সবাইকে ডেকে এক জায়গায় সমবেত করে ঐ জমির মালিকের দাবির কথা জানালেন । বনী ইসরাঈল সম্প্রদায় তৎক্ষণাৎ তার দাবি মেনে নিয়ে চাঁদা তুলে মূল্য পরিশোধ করার সিদ্ধান্ত জানাল । এ কথা শুনে লোকটি বলল, তোমাদের সংকল্পের দৃঢ়তা দেখে

আমি খুশি হয়েছি। আমার কোনো কিছুই প্রয়োজন নেই। আমি চেয়েছিলাম জমি ও স্বর্ণমুদ্রা উভয়ই মসজিদ নির্মাণের জন্যদান করব। কিন্তু এখন আর আমাকে কিছুই দিতে হবে না। তোমরা নির্বিঘ্নে মসজিদ নির্মাণ কর।

হযরত দাউদ (আ.)-এর নির্দেশে লোকেরা মসজিদ নির্মাণের জন্য জমি খুঁড়তে শুরু করে দিল। মসজিদের প্রাচীর মানুষ সমান গাঁথা হলে আল্লাহর নিকট হতে ওহী হল : হে দাউদ, আমি বনী ইসরাঈলের শোকরিয়া গ্রহণ করলাম। আমি এ কাজ তোমার ছেলে সোলায়মানকে দিয়ে সম্পন্ন করবো। এখন এ কাজ স্থগিত রাখ।

অতঃপর হযরত সোলায়মান (আ.) এর আমলে মসজিদুল আকসার অবশিষ্ট নির্মাণ কাজের বেশিরভাগ সমাপ্ত হয়।

হযরত সোলায়মান (আ.) এর প্রত্যক্ষ তত্ত্বাবধানে ও নির্দেশে বিপুল সংখ্যক মানুষ ও জ্বীন এই মসজিদের অবশিষ্ট নির্মাণ কাজ সম্পন্ন করে। তিনি মসজিদের নিকট কাঠের তৈরি একটি গম্বুজের ভেতরে লাঠির ওপর ভর দিয়ে দাঁড়িয়ে নির্মাণ কাজ তদারক করতেন। ফলে দৈত্য দানবেরা কাজে অলসতা করত না। একদিন এইভাবে দাঁড়ানো অবস্থায়ই আজরাঈল (আ.) এসে তাঁর প্রাণ সংহার করেন। হযরত সোলায়মান (আ.) এর অনেক সাধ ছিল বেঁচে থাকতে মসজিদটির নির্মাণ কাজ সম্পন্ন করবেন। কিন্তু মৃত্যুর নির্ধারিত সময় এসে যাওয়ায় তিনি আর এক মুহূর্তও অতিরিক্ত সময় পেলেন না। তার দৈত্য দানবেরা যাতে কাজ শেষ না করে চলে যায়, সে জন্য আল্লাহ তাঁর মৃত্যুর ব্যাপারটা তাদের কাছ থেকে গোপন রাখলেন। তাঁর মৃতদেহটি লাঠির ভর দিয়ে দাঁড়িয়েই রইল। এভাবে তাঁর মৃত্যুর পরও প্রায় এক বছর যাবত কাজ চলে ও নির্মাণ কাজ সম্পন্ন হয়।

হযরত সোলায়মানের কাঠের লাঠিটি উই পোকায় খেয়ে ফেলায় একদিন সহসা তা ভেঙ্গে পড়ে গেল। সঙ্গে সঙ্গে হযরত সোলায়মানের লাশও মাটিতে লুটিয়ে পড়ল।

বর্ণিত আছে যে, জ্বিনদের একটি দল এরূপ ধারণা পোষণ করত যে, তারা গায়েবের অর্থাৎ অদৃশ্যের খবরাদি জানে। তাদের এই ধারণা ভ্রান্ত প্রমাণ করা ও দর্প চূর্ণ করার উদ্দেশ্যেই আল্লাহ এই কৌশল অবলম্বন করেন। তারা যদি গায়েব জানত, তাহলে মৃত হযরত সোলায়মান (আ.) এর ভয়ে দীর্ঘ এক বছর অত পরিশ্রম করে মসজিদ নির্মাণ সম্পন্ন করত না।

শিক্ষা : এই ঘটনা হতে নিম্নোক্ত শিক্ষা লাভ করা যায়।



১. কোনো মসজিদ বা ধর্মীয় প্রতিষ্ঠানে নির্মাণের অজুহাতে কারো কাছ থেকে বলপূর্বক জমি বা অন্য কোনো ধন-সম্পত্তি আদায় করা বৈধ নয় ।

২. মৃত্যুর জন্য সময় নির্ধারিত রয়েছে । এই সময়ের কোনো হেরফের হয় না এবং কাউকে এক মুহূর্তও আয়ু বাড়িয়ে দেয়া হয় না ।

৩. জিন, মানুষ, দৈত্য দানব বা আর কোনো সৃষ্ট জীব গায়েব বা অদৃশ্যের খবর জানে না । অদৃশ্যের খবর একমাত্র আল্লাহ জানেন ।

৪. আল্লাহর নিয়ামতের শোকর আদায় করার জন্য মৌখিকভাবে আলহামদুল্লাহ ইত্যাদি বলাই যথেষ্ট নয়, বরং কাজের মাধ্যমে বিশেষত আল্লাহর পথে ত্যাগ ও সম্পদ ব্যয়ের মাধ্যমে শোকর আদায় করা কর্তব্য ।

## ৬৪ । হযরত উযাইর (আ.) এর কাহিনী

বুখতে নসর নামক এক কুখ্যাত অত্যাচারী বাদশাহ বনী ইসরাঈলকে পরাজিত করে বাইতুল মাকদাসকে দখল ও ধ্বংস করেছিল । সে এই পবিত্র শহরের দালান কোঠা ঘরবাড়ি সম্পূর্ণরূপে বিধ্বস্ত করে এবং এক অধিবাসী বনী ইসরাঈলের ওপর চরম নির্যাতন চালায় ।

এই ঘটনার কিছুদিন পর আল্লাহ তায়ালা হযরত উযাইর (আ.) কে নবী হিসেবে প্রেরণ করেন ।

একদিন তিনি সকালবেলা ভ্রমণে বেরুলেন । ভ্রমণের সময় বিধ্বস্ত নগরী বাইতুল মাকদাসের করুণ দৃশ্য দেখে ভীষণভাবে মর্মান্বিত হলেন এবং বললেন, আল্লাহ বিধ্বস্ত জনপদকে কিভাবে পুনরুজ্জীবিত করবেন? যদিও তিনি এ কথাটা অবিশ্বাসের মনোভাব নিয়ে বলেননি, তথাপি আল্লাহ তার নবীর মুখ দিয়ে এরূপ কথা উচ্চারণ পছন্দ করলেন না । কেননা কথাটার মধ্যে আল্লাহর অসীম ক্ষমতার প্রতি সংশয় প্রকাশ পেয়েছিল । তাই আল্লাহ এ ব্যাপারে তাঁর নবীকে বাস্তব অভিজ্ঞতা দ্বারা শিক্ষা দেয়ার সিদ্ধান্ত নিলেন ।

হযরত উযাইর (আ.) একটা গাধার পিঠে আরোহন করে ভ্রমণে বেরিয়ে ছিলেন । তাঁর সাথে একটা পায়ে কিছু খাদ্যদ্রব্য ছিল । তিনি একটা গাছের সাথে গাধাটাকে বেঁধে নিজে তার ছায়ায় বিশ্রাম নিতে লাগলেন । বিশ্রাম করতে করতে তিনি ঘুমিয়ে পড়লেন । আর এই ঘুমের মধ্যেই আল্লাহ তাঁর ও তাঁর গাধার মৃত্যু ঘটালেন ।

হযরত উযাইরের মৃত্যুর পর একশো বছর কেটে গেল । তাঁর লাশ সেখানেই পড়ে রইল । কিন্তু এত দীর্ঘ সময়েও তাঁর লাশের কিছুমাত্র বিকৃতি ঘটল না ।

তার খাদ্যদ্রব্যও টাটকা রইল। কিন্তু তাঁর গাধাটা পঁচে গলে মাটির সাথে মিশে গেল। কেবল তার হাড়গুলো অক্ষত রইল।

একশো বছর পর আল্লাহ হযরত উযাইরকে জীবিত করে জিজ্ঞেস করলেন, হে উযাইর, তুমি কতক্ষণ ঘুমিয়ে ছিলে? হযরত উযাইর বললেন, সম্ভবত একদিন বা তার থেকেও কম।

আল্লাহ তায়ালা বললেন, না, তুমি একশো বছর মৃত অবস্থায় কাটিয়েছ। তারপর আমি তোমাকে পুনরায় জীবন দান করলাম। তোমার খাদ্যদ্রব্যগুলো লক্ষ্য কর, তা একেবারে টাটকা রয়েছে। কিন্তু গাধাটা মরে নিশ্চিহ্ন হয়ে গেছে। শুধু কয়েকখানা হাড় রয়েছে। এই দেখ, আমি ওর হাড়ে গোশত জড়িয়ে কিভাবে পুনরায় জীবিত করি। এই বলে গাধাটাকে জীবিত করে দিলেন।

এই ঘটনা ঘটিয়ে আল্লাহ নিজেকে অসীম ক্ষমতালশালী বলে প্রমাণ করলেন। ওদিকে উযাইর সমকালীন বাদশাহর কাছে গিয়ে নিজের পরিচয় দিলেন। অতঃপর বাদশাহ ও তার শাসনাধীন জনগণকে তাওরাত শিক্ষা দিতে লাগলেন। তিনি ছিলেন সমগ্র তাওরাতের হাফেয।

কিন্তু হযরত উযাইর (আ.) মৃত্যুর পর পুনর্জন্ম লাভ করায় ইহুদিরা তাকে অতি মানব মনে করে ভক্তি শ্রদ্ধা করতে থাকে। শেষ পর্যন্ত তারা মাত্রা ছাড়িয়ে ভক্তির আতিশয্যে তাকে আল্লাহর পুত্র বলে বিশ্বাস করতে আরম্ভ করে। তাদের এই অবাস্তুর ধারণাকে পরবর্তী নবীগণ খণ্ডন করেন। সর্বশেষ কুরআনেও তা ভ্রান্ত বলে ঘোষণা করা হয়েছে।

## ৬৫। কাদেসিয়ার এক দুর্ধর্ষ বীরের কথা

চৌদ্দ হিজরীর মুহররম মাসের কথা। মুসলিম বাহিনী সা'দ বিন আবি ওয়াক্কাসের নেতৃত্বে কাদেসিয়ার ইরানী বাহিনীর বিরুদ্ধে যুদ্ধরত। ইরানী বাহিনীর সেনাপতি ছিলেন মহাবীর রুস্তম। আজ যুদ্ধের দ্বিতীয় দিন। তুমুল যুদ্ধ চলছে। অনেকে শহীদ হচ্ছেন। আবার অনেকে আহত হয়ে শিবিরে চিকিৎসাধীন রয়েছেন। সা'দ বিন্ আবি ওয়াক্কাস অসুস্থ। তাই ময়দানে যেতে পারেননি। কাদেসিয়ার নিজ বাসস্থানের ছাদের উপর থেকে যুদ্ধের দিকনির্দেশনা দিচ্ছিলেন। তাঁর বাড়ির এক কক্ষে এক কয়েদী পায়ে শিকল বাঁধা অবস্থায় আটক ছিল। মদ্যপানের অপরাধে তাকে আটক করা হয়েছে। যুদ্ধের পর তাকে শাস্তি দেয়া হবে। তার চোখে মুখে ভীষণ উদ্বেগ ও উৎকর্ষ। তাঁর দৃষ্টি

কেন্দ্রীভূত রয়েছে রণাঙ্গণের দিকে। হযরত সা'দের স্ত্রী সালমা কোন কাজে ঐ কক্ষের দিকে যাওয়া মাত্রই কয়েদী ভারী শিকল নিয়ে টলতে টলতে কোন রকমে তাঁর কাছে গিয়ে বললো :

‘আল্লাহর দোহাই, আমাকে ছেড়ে দিন। আমাকে যুদ্ধে যেতে দিন। জ্যান্ত ফিরতে পারলে আবার এসে শেকল পরব।’

সালমা অস্বীকার করল। পরম দুঃখ ভারাক্রান্ত মনে কয়েদী নিজ জায়গায় গিয়ে বসল। সেখান থেকে রণাঙ্গন দেখা যাচ্ছিল। সেদিকে একটা নজর বুলিয়ে সে আবেগে গুণ গুণ করে কবিতা আবৃত্তি করতে লাগল :

‘এর চেয়ে দুঃখের কথা আর কি হতে পারে যে, লড়াকু সিপাইরা তীর নিক্ষেপ করে চলেছে, আর আমি কয়েদখানায় পড়ে আছি। আমি উঠতে চাই, কিন্তু শেকল আমাকে টেনে ধরে। দরজা এমনভাবে তালাবদ্ধ যে, আমার চিৎকারও কারো কানে যায় না। ...ওহে মহিয়সী নারী, আমার তলোয়ার খানা দিন। খোদার কসম, আমি অস্বীকার ভঙ্গ করব না। বেঁচে গেলে অবশ্যই ফিরে আসব। আর মরে গেলে তো শাহাদাতের স্থানই পূর্ণ হবে।’

কয়েদীর কণ্ঠে গভীর বেদনাভরা আবেগের আকুতি। সালমা আর সইতে পারলেন না। তার মন গলে গেল। তিনি কয়েদীর শেকল খুলে দিলেন। কয়েদী বর্শা হাতে নিল এবং সা'দের ঘোড়ায় চড়ে বিদ্যুৎবেগে ময়দানে পৌঁছে গেল। শত্রুর ওপর বজ্রের মতো গিয়ে পড়ল। সে যদিকে ঢুকল সেদিকে শত্রু সৈন্যদেরকে কচুকাটা করতে লাগল। শত্রু সৈন্য তার ওপর বার বার আঘাত হেনেও বাগে আনতে পারল না। চোখের পলকে সে একদিক থেকে আর একদিন গিয়ে শত্রু সৈন্যদেরকে বিপর্যস্ত করে তুলল। মুসলিম বাহিনী হতবাক। এ কোন্ বীর? কোথা থেকে তার এ হঠাৎ আগমন? তার এই বজ্রসম আক্রমণে সমগ্র ইসলামী বাহিনীতেও তীব্র গতি ও আবেগের সঞ্চার হলো।

হযরত সা'দও ছাদের ওপর বসে এই দৃশ্য দেখছিলেন। তিনি ভেবে পাচ্ছিলেন না এ দুর্ধর্ষ জোয়ান কোথা থেকে এল! তার ঘোড়া তো হুবহু সাদের ‘বালকা’ আর যুবককে দূর থেকে আবু মাহজান সাফাফীর মতো লাগছে। কিন্তু সেতো তাঁর ঘরে কয়েদী।

যুদ্ধের ফায়সালা সেদিনও হলো না। রাতে আবু মাহজান ময়দান থেকে ফিরে এসে নিজে নিজেই শেকল পরে কয়েদখানায় বসে রইল। মুসলিম বাহিনীর সর্বত্র এই দুর্ধর্ষ বীরকে ঘিরে কথাবার্তা চলছে। সবার ধারণা, এ ব্যক্তি কোনো মানুষ নয়, গায়েব থেকে আগত কোনো ফেরেশতা, যিনি মুসলমানদের

মনোবল বাড়তে এসেছিলেন। রাতের বেলা খাওয়ার সময় হযরত সা'দও বিষয়টা আলোচনা করতে লাগলেন। স্ত্রী সালমার কথা শুনে তিনি স্তম্ভিত হয়ে গেলেন। সালমা বললেন, 'ওতো আবু মাহজান ছিল।' অতঃপর পুরো ঘটনা তাকে জানালেন। তিনি তৎক্ষণাত খাওয়া রেখে উঠে গেলেন এবং আবু মাহজানকে মুক্ত করে দিয়ে বললেন :

'যে ব্যক্তি জেহাদের জন্য এত ব্যাকুল এবং ইসলাম ও মুসলমানদের এত দরদী, তাকে আমি মদ্যপানের শাস্তি দেব না।'

আবু মাহজান বলল, 'আমি তওবা করছি মাননীয় সেনাপতি, জীবনে আর কখনো মদ স্পর্শ করব না।'

শিক্ষা : শয়তানের প্ররোচনায় কেউ একটি অপরাধ করে ফেললে তার তৎক্ষণাত তওবা করা উচিত এবং পরবর্তীতে প্রথম সুযোগেই জিহাদ কিংবা অন্যান্য সৎকাজে অংশগ্রহণের মাধ্যমে কৃত পাপ মোচনে সচেষ্ট হওয়া উচিত। এ প্রসঙ্গে মনে রাখতে হবে যে, আল্লাহর পথে জেহাদই কৃত গুনাহের কাফফারার সবচেয়ে বড় উপায়। আল্লাহ তায়াল্লা ঈমান এনে জেহাদে অংশগ্রহণকারীদের জন্য একাধিকবার গুনাহ মাফ করার আশ্বাস দিয়েছেন।

## ৬৬। কে ধনী, কে গরীব

একবার এক ব্যক্তি প্রখ্যাত সুফী সাধক ইবরাহীম আদহামকে বললেন, "আমার একান্ত ইচ্ছা যে, আমার এই জুব্বাটি আপনি হাদীয়া হিসেবে গ্রহণ করুন।"

ইবরাহীম আদহাম বললেন : "তুমি যদি ধনী হও, তবে হাদীয়া গ্রহণ করতে পারি। আর যদি গরীব হও, তাহলে দুঃখ প্রকাশ করছি।"

লোকটি বললো : আমি অবশ্যই ধনী।

আদহাম বললেন : তোমার কত সম্পদ আছে?

লোকটি বললো : দু'হাজার দীনার।

তিনি বললেন : তুমি কি চাওনা যে, তোমার আরো দু'হাজার দীনার হোক।

লোকটি : তা অবশ্যই চাই।

ইবরাহীম আদহাম বললেন : তাহলে তো তুমি গরীব। আমি তোমার হাদীয়া নিতে পারি না।

শিক্ষা : একটি হাদীসে রাসূল (সা.) বলেছেন, "যে ব্যক্তি মনের ধনী, সে-

ই আসল ধনী ।” আলোচ্য ঘটনাটি এই হাদীসেরই ব্যাখ্যা স্বরূপ । কেননা এখানে এক ব্যক্তির মনের দারিদ্র্যই ফুটে উঠেছে । সে ধনী বলে দাবী করেছিল । কিন্তু যেহেতু তার যে সম্পদ আছে তাতে সে ভৃগু নয় । তাই সে আসল ধনী নয় । সে আসলে গরীব । প্রকৃত ধনী সেই ব্যক্তি, যার আর ধনের লিঙ্গা নেই এবং তার যা আছে তাতেই সে পরিতৃপ্ত ।

## ৬৭ । উম্মে সুলাইমের দেনমোহর

তখন ইয়াসরিবে (মদীনায়ে) এক নজীরবিহীন পরিবর্তনের হাওয়া বইছিল । খাজরাজ গোত্রের কয়েক ব্যক্তি হজ্জ করতে মক্কায় গিয়েছিল । সেখান থেকে তারা যখন ফিরে এল, তখন তাদের চিন্তা ও কর্মের ধারাই পাল্টে গেল । শুধু তাদের নয়, মনে হচ্ছিল যেন পুরো ইয়াসরিবেরই জীবন ধারা পাল্টে যাবে অচিরেই । ঘরে ঘরে এক নতুন কলেমার চর্চা শুরু হয়ে গেল । এটা সেই কলেমা, যা মক্কায় কুরাইশ গোত্রের এক পরম সত্যবাদী ও বিশ্বাসী ব্যক্তি মুহাম্মদ বিন আব্দুল্লাহ বিগত দশ বছর ধরে প্রচার করে যাচ্ছিলেন । মক্কায় তার আহ্বানে মুষ্টিমেয় কয়েক ব্যক্তিই সাড়া দিয়েছিল । কিন্তু ইয়াসরিববাসীর মধ্যে তা অতি দ্রুত ছড়িয়ে পড়তে লাগল । ইয়াসরিবের গোটা সমাজ ব্যবস্থাই নতুনভাবে নির্মিত হতে লাগল । যারা এই দাওয়াত গ্রহণ করতে লাগল, তাদের মধ্যে আগে কোনো সম্পর্ক না থাকলেও এখন তারা পরস্পরে পরম আত্মীয় হয়ে যেতে লাগল । আর অন্যদের সাথে তাদের সম্পর্ক ছিন্ন হয়ে যেতে লাগল— চাই তাদের মধ্যে যত ঘনিষ্ঠ রক্ত সম্পর্কই থাক না কেন ।

ইয়াসরিবের বনু নাজ্জার গোত্রের উম্মে সুলাইম সবার আগে ইসলাম গ্রহণ করে গোত্রের সবাইকে তাক লাগিয়ে দিলেন । এ সময় তার স্বামী মালেক বিদেশে ছিল । বিদেশ থেকে ফিরে আসার সময় সে ইয়াসরিবের উপকণ্ঠেই এক পরিচিত ব্যক্তির সাক্ষাত পেল । সে বলল, ইয়াসরিবের সবকিছু পাল্টে গেছে । জনগণের মধ্যে ইসলাম গ্রহণের হিড়িক পড়ে গেছে । আবু হাইসাম, আবু উমাম ও রাফে প্রমুখ মক্কায় গিয়ে ইসলাম গ্রহণ করে আসার পর এখানে সবার কাছে তা জনপ্রিয় হয়ে উঠেছে । এখন ঘরে ঘরে ইসলামের সরব পদচারণা । তোমার স্ত্রী উম্মে সুলাইমও ইসলাম গ্রহণ করেছে ।

মালেক ভীষণ চটে গেল । দ্রুত পদক্ষেপে বাড়ি গিয়ে পৌঁছল । উম্মে সুলাইম হাসিমুখে স্বাগত জানালেন । কিন্তু মালেকের ঙ্গ কৃষ্ণিতই রইল । উম্মে

সুলাইমের দিকে কটমট করে তাকিয়ে বলল, 'শেষ পর্যন্ত তুমিও সাবী (নক্ষত্র পূজারী) হয়ে গেলে?'

উম্মে সুলাইম বললেন, 'সাবী নয় মুসলমান হয়েছি। আমি পৌত্তলিকতা ছেড়ে দিয়ে শান্তির পথ অবলম্বন করেছি। মালেক, ভেবে দেখতো অসংখ্য দেব দেবীর পূজা করা ভালো, না এক আল্লাহর? আমি এক আল্লাহকে মা'বুদ হিসেবে গ্রহণ করেছি।'

মালেক কি বলবে ভেবে পেল না। কেবল কটমট করে তাকিয়ে রইল। উম্মে সুলাইম পুত্র আনাস বিন মালেককে ডাকলেন। আনাস কাছে এলে বললেন, 'বাবা, পড়, লা-ইলাহা ইল্লাল্লাহ মুহাম্মাদুর রাসূলুল্লাহ।' আনাস একবার বাবার দিকে ও একবার মায়ের দিকে তাকিয়ে তোতলাতে তোতলাতে বলল, 'লা-ইলাহা ইল্লাল্লাহ মুহাম্মাদুর রাসূলুল্লাহ।' মালেক ক্রুদ্ধ কণ্ঠে বলল, 'নিজে যা করার তাতো করেছ। ছেলেটার মাথা খেয়ো না।'

উম্মে সুলাইম বললেন, 'আমি আমার কলিজার টুকরার মাথা খাই কিভাবে? আমি তাকে শান্তির পথে আনতে চাই।' তার কণ্ঠে বিনয়ের সুর কিন্তু দৃঢ় মনোবল প্রকাশ পাচ্ছিল।

উম্মে সুলাইম স্বামীকে কুফরির পথ থেকে ফেরাতে অনেক চেষ্টা করল। কিন্তু পারল না। একদিন রাগারাগি করে বাড়ি থেকে চলে গেল মালেক। আর ফিরল না। পরে জানা গেল, মালেক সিরিয়া যাওয়ার পথে তার শত্রুরা তাকে হত্যা করেছে।

কিছুদিন পর বনু নাজ্জারের এক যুবক আবু তালহা উম্মে সুলাইমকে বিয়ের প্রস্তাব পাঠাল। উম্মে সুলাইম তাকে বললেন :

'আবু তালহা, আমি মুসলমান। আর তুমি কাফের। কাফেরের সাথে মুসলিম নারীর বিয়ে জায়েয নয়। রাসূল (সা.) এর ওপর ঈমান আনো এবং তার দ্বীনের অনুসরণ কর। আমি বিয়েতে রাজি হয়ে যাব এবং কোনো দেনমোহরও চাইব না। তোমার ইসলাম গ্রহণই হবে আমার দেনমোহর।'

আবু তালহা বললেন, 'আমাকে একটু ভাবতে সময় দাও।'

অবশেষে কয়েকদিন পর আবু তালহা উম্মে সুলাইমের বাড়িতে গেল। বাড়ির দরজায় পা রেখেই কালেমা পড়ল। আর কালবিলম্ব না করে উম্মে সুলাইমও তার কথা রাখলেন। ইসলামের ইতিহাসে এটাই ছিল প্রথম বিয়ে, যার দেনমোহর ছিল ইসলাম।

উম্মে সুলাইম অত্যন্ত বুদ্ধিমতী ও ধৈর্যশীলা রমণী ছিলেন। তাঁর ছোট ছেলে

আবু উমাইর যখন মারা যায়, তখন আবু তালহা বাড়িতে ছিলেন না। উম্মে সুলাইম তার গোছল ও কাফনের ব্যবস্থা করলেন এবং বাড়ির সবাইকে বললেন, আবু তালহা এলে কেউ তাকে আবু উমাইরের মৃত্যুর খবর জানাবেন না। আমি নিজে জানাব। রাতে আবু তালহা এলে জিজ্ঞেস করলেন, আবু উমাইর কেমন আছে? উম্মে সুলাইম বললেন, 'খুব ভালো আছে। ঘুমুচ্ছে।'

তারপর তাকে খাবার দিলেন এবং উভয়েই শান্তভাবে শুয়ে পড়লেন। রাত একটু গভীর হলে উম্মে সুলাইম বললেন :

'আবু তালহা, যদি কেউ কোনো পরিবারকে কোনো জিনিস ধার হিসেবে দেয় এবং কিছুদিন পর তা ফেরত চায়, তবে তা দেয়া উচিত না দিতে অস্বীকার করা উচিত?'

আবু তালহা বললেন, 'অবশ্যই দিয়ে দেয়া উচিত।'

উম্মে সুলাইম বললেন, 'তাহলে আপনি আবু উমাইরের ব্যাপারে ধৈর্য ধারণ করুন। সে ছিল আল্লাহর সম্পদ। তিনি আমাদেরকে ধার হিসেবে দিয়েছিলেন এবং এখন ফেরত নিয়ে নিয়েছেন।'

আবু তালহা ক্ষুব্ধ হয়ে বললেন যে, আমাকে আগে বলনি কেন? সকালবেলা রাসূল (সা.) কে গিয়ে সব ঘটনা জানালেন।

রাসূল (সা.) বললেন, 'আল্লাহ তোমাদের ওপর খুবই খুশি হয়েছেন এবং তোমাদের ধৈর্যের বিনিময়ে তোমাদেরকে আরো ভালো সন্তান দেবেন। এর কিছুদিন পর আল্লাহ তাদেরকে একটি পুত্র সন্তান দেন। এর নাম রাখা হয় আব্দুল্লাহ। আব্দুল্লাহর সাতটি পুত্র সন্তান হয়েছিল এবং তারা সকলেই কুরআনের হাফেয হয়েছিল। আর উম্মে সুলাইমের অন্য পুত্র হযরত আনাস বিন মালেক তো রাসূল (সা.) এর ঘনিষ্ঠতম ও প্রিয়তম সাহাবীদের অন্তর্ভুক্ত ছিলেন।

শিক্ষা : হযরত উম্মে সুলাইম একজন উঁচু স্তরের আদর্শ মহিলা সাহাবী। স্বামী ভক্তির পাশাপাশি তিনি সন্তানসহ গোটা পরিবারের উপর নিজের ইসলামী চরিত্রের প্রাধান্য বজায় রেখেছিলেন। এমনকি নতুন স্বামী গ্রহণ করার পূর্বে তাকেও ইসলামে দীক্ষিত করে নিয়েছিলেন। এই গুণাবলী প্রত্যেক মুসলিম নারীর ভূষণ হওয়া উচিত।

## ৬৮। অকৃতজ্ঞতার পরিণাম

হযরত রাসূলুল্লাহ সাল্লাল্লাহু আলাইহি ওয়াসাল্লাম বলেছেন : বনী ইসরাইল গোত্রে তিন ব্যক্তি বিভিন্ন রোগে আক্রান্ত ছিল। একজন ছিল কুষ্ঠরোগী, দ্বিতীয়জন মাথায় টাক পড়া আর তৃতীয় জন অন্ধ। আল্লাহ তায়ালা এই তিনজনকে পরীক্ষা করতে মনস্থ করলেন। তিনি তাদের কাছে একজন ফেরেশতা পাঠালেন। ফেরেশতা প্রথমে কুষ্ঠরোগীর নিকট গিয়ে বলল, তুমি কি চাও? সে বলল, আমি আল্লাহর কাছে শুধু এটুকুই চাই যে, আমার এই কুৎসিত ব্যাধি নিরাময় হোক, আমার শরীরে নতুন চামড়া জন্মাক এবং আমি সুন্দর হই যেন লোক সমাজে যেতে পারি এবং মানুষ আমাকে ঘৃণা না করে। ফেরেশতা তার শরীরে হাত বুলিয়ে দোয়া করলেন। সঙ্গে সঙ্গেই তার রোগ সেরে গেল এবং শরীর নতুন রূপ ধারণ করল। এরপর আল্লাহর ফেরেশতা তাকে জিজ্ঞেস করলেন তুমি কি কোনো সহায় সম্পদ চাও? সে বলল, হ্যাঁ, আমি উট পেলে খুশি হই। ফেরেশতা তাকে একটা গর্ভবতী উষ্ট্রী এনে দিলেন। অতঃপর আল্লাহর দরবারে বরকতের জন্য দোয়া করে নিষ্ক্রান্ত হলেন।

এরপর ফেরেশতা টাকপড়া লোকটির নিকট গিয়ে বললেন, তুমি কি চাও? সে বলল, আমার টাকের কারণে মানুষ আমাকে ঘৃণা করে। আমি এই টাকের নিরাময় চাই। ফেরেশতা তার মাথায় হাত বুলিয়ে দিতেই মাথা ভালো হয়ে গেল। নতুন চুল গজিয়ে সম্পূর্ণ নতুন রূপ ধারণ করল। এবার ফেরেশতা জিজ্ঞেস করলেন, কোনো প্রকারের সম্পদ তুমি পেতে চাও? সে বলল, গরু পেলে আমি খুশি হই। ফেরেশতা তৎক্ষণাত একটি গর্ভবতী গাভী এনে দিলেন এবং বরকতের জন্য দোয়া করে প্রস্থান করলেন।

অতঃপর ফেরেশতা অন্ধ লোকটির নিকট গেলেন এবং তাকে জিজ্ঞেস করলেন, তুমি কি চাও? লোকটি বলল, আল্লাহ আমার চোখ ফিরিয়ে দিন যেন আমি আল্লাহর সৃষ্টিকে দেখতে পাই। আল্লাহর ফেরেশতা তার চোখে হাত বুলিয়ে দিলেন এবং সঙ্গে সঙ্গেই সে দৃষ্টিশক্তি ফিরে পেল। অতঃপর ফেরেশতা জিজ্ঞেস করলেন, তুমি কি পছন্দ কর? সে বলল, আল্লাহ যদি আমাকে একটি ছাগল দেন তবে আমি কৃতার্থ হবো। ফেরেশতা তৎক্ষণাত একটি গাভীন বকরী এনে দিলেন এবং বরকতের জন্য দোয়া করে বিদায় নিলেন।

অল্পদিনের মধ্যেই এই তিনজনের উট, গরু ও ছাগলে মাঠ পরিপূর্ণ হয়ে গেল। এখন তারা প্রত্যেকে এক একজন বিরাট ধনী। এই সময় একদিন হঠাৎ সেই ফেরেশতা আগের মতো রূপ ধারণ করে উটওয়ালার (সাবেক কুষ্ঠরোগী)



নিকট এসে বললেন, আমি একজন প্রবাসী। আমি পথিমধ্যে বড়ই অভাবে পড়েছি। আমার বাহক জন্তুটিও মারা গেছে এবং আমার পথ খরচও ফুরিয়ে গেছে। আপনি যদি অনুগ্রহপূর্বক আমাকে কিছু সাহায্য করেন তবে আমি খুবই উপকৃত হবো। এখন আল্লাহ ছাড়া আমার কোনই উপায় নেই। যে আল্লাহ আপনাকে সুন্দর স্বাস্থ্য ও সুশ্রী চেহারা দান করেছেন তার নামে আমি আপনার নিকট একটি উট চাই। আমাকে একটি উট দিন। আমি তাতে আরোহন করে কোনো রকমে বাড়ি পৌছতে পারব।

লোকটি বলল, হতভাগা কোথাকার! দূর হও এখন থেকে। তোমাকে দেবার মতো আমার কিছুই নেই। ফেরেশতা বললেন, আমি তোমাকে চিনি বলে মনে হয় তুমি কি কুষ্ঠরোগী ছিলে না? লোকে কি তোমাকে এজন্য ঘৃণা করত না? তারপর আল্লাহ কি তোমাকে ভালো করে দেননি? তুমি কি নিঃশ্ব ও গরীব ছিলে না? অতঃপর আল্লাহ পাক কি তোমাকে এই বিপুল ধন সম্পদ দান করেননি? লোকটি বলল, কখনো নয়। আমরা বাপদাদার আমল থেকেই ধনী। এই সম্পত্তি আমরা পুরুষানুক্রমে ভোগ করে আসছি। ফেরেশতা বললেন, যদি তুমি মিথ্যাবাদী হয়ে থাকো, তবে আল্লাহ তোমাকে আগের মতো বানিয়ে দিক। কিন্তু দিনের মধ্যেই লোকটি আগের মতো নিঃশ্ব ও কুষ্ঠরোগী হয়ে গেল।

অতঃপর ফেরেশতা দ্বিতীয় ব্যক্তি অর্থাৎ সাবেক টাকপড়া লোকটির নিকট উপস্থিত হলেন। তার এখন এমন সুন্দর সুঠাম দেহ ও চেহারা আর মাথায় এমন ঘন কালো চুল যে, আগে তার মাথায় টাক ছিল এমন কথা কল্পনাও করা যায় না। ফেরেশতা তার নিকট একটি গরু চাইলেন এবং পূর্ববর্তী ব্যক্তির মতোই আলাপ আলোচনা চালালেন। সেও পূর্ববর্তী ব্যক্তির মতো প্রত্যাখ্যান করল। ফেরেশতা তাকে অভিসম্পাত দিয়ে বললেন, তুমি যদি মিথ্যুক হয়ে থাকো, তবে আল্লাহ যেন তোমাকে আগের অবস্থায় ফিরিয়ে দেন। তার মাথায় আবার টাক পড়ল এবং ধন সম্পদ বিনাশ প্রাপ্ত হলো।

এরপর ফেরেশতা একইভাবে সাবেক অন্ধ ব্যক্তিটির নিকট গেলেন এবং একইভাবে নিজের প্রবাসকালীন বিপদের কথা বললেন ও লোকটির পূর্বকার অবস্থা স্মরণ করিয়ে দিয়ে একটা বকরি প্রার্থনা করলেন। লোকটি বলল, আমি আমার অতীতকে ভুলিনি। আমি অন্ধ ও গরীব ছিলাম। আল্লাহ আমাকে দৃষ্টিশক্তি ফিরিয়ে দিয়েছেন এবং আমার নিকট যত ধন সম্পদ দেখতে পাচ্ছ, সবই তিনি দিয়েছেন। তোমার যে কয়টি দরকার ইচ্ছামতো নিয়ে যাও।

ফেরেশতা বললেন, না, এসব তোমারই থাক। কিছুরই আমার প্রয়োজন নেই।

তোমাদের তিনজনকে পরীক্ষা করা অভিপ্রেত ছিল। সে কাজ সমাপ্ত হয়েছে।  
অপর দু'জন পরীক্ষায় অকৃত্য হয়েছেন। তুমি উত্তীর্ণ হয়েছ। তাদের উভয়ের  
ওপর আল্লাহর গজব নাযিল হয়েছে। আল্লাহ তোমার ওপর খুশি হয়েছেন।  
(বুখারী শরীফ)

শিক্ষা : এ হাদীসের শিক্ষা অত্যন্ত পরিষ্কার। আল্লাহ তায়ালা পবিত্র কুরআনে  
বলেছেন, 'তোমরা শুকরিয়া আদায় করলে আমি নিয়ামত বাড়িয়ে দেব। আর  
না শুকরিয়া করলে (মনে রেখ) আমার শাস্তি অত্যন্ত ভয়াবহ।' (সূরা ইবরাহীম)  
শুকরিয়া বা কৃতজ্ঞতা শুধু মৌখিকভাবে ব্যক্ত করার জিনিস নয়। কাজের মাধ্যমে  
শুকরিয়া আদায় করতে হয়। অর্থাৎ আল্লাহ যা দিয়েছেন তা আল্লাহর মনোপুত  
কাজে ব্যয় ও ব্যবহার করতে হয়। এরই নাম শুকর বা কৃতজ্ঞতা। আর কৃপণতা  
করা বা অপচয় ও অপব্যয় করা না শুকরি। আল্লাহ আমাদের সকলকে আল্লাহর  
দেয়া প্রতিটি নিয়ামতের যথাযথ শুকরিয়া আদায় করার তৌফিক দিন।

প্রসঙ্গত উল্লেখযোগ্য যে, বস্তুগত ধন-সম্পদের ন্যায় আমাদের অনেক নৈতিক  
ও অদৃশ্য নিয়ামত রয়েছে, যার যথার্থ ব্যবহার ছাড়া শুকরিয়া আদায় হতে পারে  
না। ইসলাম সবচেয়ে বড় সম্পদ ও সর্বাপেক্ষা মূল্যবান নিয়ামত। এ নিয়ামত  
আল্লাহ যেমন আমাদেরকে দিয়েছেন, তেমনি তা অন্যদেরকেও বিতরণ করা  
আমাদের কর্তব্য। এ জন্য ইসলামের প্রচার ও প্রতিষ্ঠা প্রত্যেক মুসলমানের  
দায়িত্ব। অনুরূপভাবে জ্ঞান, বিদ্যা, বুদ্ধি, মেধা, প্রতিভা, কারিগরী দক্ষতা ও  
শৈল্পিক কলাকৌশল- এ সবই আল্লাহর নিয়ামত এবং আল্লাহর মনোপুত পন্থায়  
ও মানবতার কল্যাণে তার প্রয়োগ জরুরি।

## ৬৯। আছহাবুল উখদুদের কাহিনী

রাসূল (সা.) বলেছেন, তোমাদের পূর্ববর্তীদের মধ্যে এক অতীব  
পরাক্রমশালী রাজা ছিল আর তার ছিল এক যাদুকর। সে যখন বৃদ্ধ হয়ে গেল,  
তখন রাজাকে বলল, আমি বৃদ্ধ হয়ে পড়েছি। এক বালককে আমার কাছে  
পাঠিয়ে দিন। আমি তাকে যাদু শেখাব। রাজা একটি বালককে যাদু শেখার জন্য  
তার কাছে পাঠাল। তার যাতায়াতের রাস্তায় ছিল হযরত ঈসা (আ.) এর  
শরীয়তের অনুসারী একজন দরবেশ। একদিন সে আসা যাওয়ার সময় কিছুক্ষণ  
তার কাছে বসল এবং তার কথাবার্তা শুনে মুগ্ধ হলো। এভাবে সে প্রতিদিন  
আসা যাওয়ার সময় দরবেশের কাছে বসতে লাগল। যাদুকরের কাছে গেলে সে

তাকে বিলম্বের কারণে মারধর করত। এতে সে দরবেশের কাছে যাদুকরের বিরুদ্ধে অভিযোগ করল। দরবেশ বলল, যখন যাদুকর তোমাকে বিলম্বের কারণ জিজ্ঞেস করবে তখন বলবে আমার পরিবারবর্গ আমাকে আটকে রেখেছিল। আর যখন তোমার পরিবারবর্গ তোমার কাছে বিলম্বের কারণ জানতে চাইবে, তখন বলবে যাদুকর আমাকে আটকে রেখেছিল।

এভাবেই চলতে লাগল বালকটির আসা যাওয়া। একই সাথে যাদুকরের কাছে যাদু এবং দরবেশের কাছে ইসলামী বিধান শিখতে লাগল। বাড়ি থেকে যাদুকরের কাছে যাওয়ার সময় একবার এবং যাদুকরের কাছ থেকে বাড়ি যাওয়ার সময় আর একবার দরবেশের কাছে বসতো এবং তার উপদেশ শুনতো। কিছুদিন এভাবে চলার পর বালকটা উভয়ের ব্যাপারে সন্দিহান ও দোদুল্যমান হয়ে পড়ল। কোনটি সত্য ও সঠিক, তা সে বুঝে উঠতে পারল না।

এই সময় একদিন সে রাস্তার ওপর একটা বিশালকায় জন্তু দেখতে পেল। জন্তুটি এমনভাবে রাস্তা আটকে দাঁড়িয়েছিল যে, লোকজন আসা যাওয়া করতে পারছিল না। বালকটি তখন মনে মনে বলল, আজ আমি দেখে নেব দরবেশ শ্রেষ্ঠ না যাদুকর শ্রেষ্ঠ। তাই সে একটি পাথরখণ্ড হাতে নিয়ে বলল, 'হে আল্লাহ! দরবেশের কার্যকলাপ যদি তোমার নিকট যাদুকরের কার্যকলাপের চেয়ে বেশি পছন্দনীয় হয়, তবে এই জানোয়ারটাকে মেরে ফেল, যাতে লোকজন পথ চলতে পারে।' তারপর সে ঐ পাথরখণ্ড ছুঁড়ে মারল এবং তাতে জানোয়ারটা মারা গেল। আর লোকজন যে যার পথে চলে গেল। তারপর সে দরবেশের কাছে এসে সমস্ত বৃত্তান্ত জানাল। দরবেশ তাকে বলল, 'প্রিয় বৎস! তুমি আজ আমার চেয়ে উত্তম হয়ে গেছ। তবে তুমি খুব শীঘ্রই পরীক্ষার সম্মুখীন হবে। যদি তুমি কোনো পরীক্ষায় পড়ে যাও, তবে আমার সন্ধান দিও না।'

এরপর বালকটি এমন অলৌকিক ক্ষমতার অধিকারী হলো যে, সে কেবল আল্লাহর কাছে দোয়া করা মাত্রই অন্ধ ও কুষ্ঠরোগী ভালো হয়ে যেতো এবং এভাবে অন্যান্য রোগেরও চিকিৎসা করতো।

রাজার পাত্রমিত্রদের একজন অন্ধ হয়ে গিয়েছিল। সে এই খবর শুনে বালকটার কাছে উপটোকন নিয়ে এসে বলল, তুমি আমাকে আরোগ্য দান করবে এই আশায় এসব শুনেছি। বালক বলল, আমি কাউকে আরোগ্য দান করি না। আল্লাহই আরোগ্য দান করেন। যদি তুমি আল্লাহর প্রতি ঈমান আনো, তবে আমি দোয়া করব। আশা করা যায় যে, তিনি আরোগ্য দান করবেন। সে তখন আল্লাহর প্রতি ঈমান আনল। আর আল্লাহ তৎক্ষণাত তাকে আরোগ্য দান

করলেন। তারপর সে রাজদরবারে ফিরে গিয়ে আগের মতো নিজ দায়িত্বে নিয়োজিত হলো। রাজা তাকে জিজ্ঞেস করল, 'তোমার চোখ কে ফিরিয়ে দিল?' সে উত্তর দিল, 'আমার প্রভু!' রাজা বলল, 'আমি ছাড়া তোমার কোনো প্রভু আছে না কি?' সে বলল, 'আমার ও তোমার সকলেরই প্রভু আল্লাহ।' এতে রাজা তাকে ধরে শাস্তি দিতে লাগল। অবশেষে সে শাস্তি থেকে রেহাই পাবার আশায় বালকের কথা বলে দিল। তখন বালকটিকে ধরে আনা হলো। রাজা তাকে বলল, 'হে প্রিয় বালক! তোমার যাদুবিদ্যার যথেষ্ট খ্যাতি ছড়িয়েছে। শুনেছি তুমি নাকি অন্ধ ও কুষ্ঠরোগী আরোগ্য করে থাক এবং আরো বহু অলৌকিক কর্মকা- করে থাক। বালক বলল, 'আমি কাউকে আরোগ্য দান করি না। আরোগ্য দান তো আল্লাহই করেন। এ কথা শুনে রাজা তাকেও শাস্তি দিতে লাগল।

অবশেষে বালকটি হযরত ঈসার শরীয়তপন্থী দরবেশের কথা বলে দিল। তখন দরবেশকে আনা হলো। তাকে তার ধর্ম ত্যাগ করতে বলা হলো। কিন্তু সে অস্বীকার করল। তখন রাজা একখানি করাত আনিয়াে দরবেশের মাথার মাঝখান থেকে চেরাই করে দ্বিখণ্ডিত করে ফেলল। তারপর আনা হলো রাজার সেই সভাসদকে। তাকেও তার ধর্ম ত্যাগ করতে বলা হলো। কিন্তু সে অস্বীকার করায় তাকেও করাত দিয়ে চিরে দুটুকরো করে ফেলা হলো।

এরপর আনা হলো বালকটিকে। তাকেও তার ধর্ম ত্যাগ করতে বলা হলো। কিন্তু সে অস্বীকার করল। তখন রাজা তাকে তার কতিপয় কর্মচারীর হাতে সমর্পণ করে বলল, 'তোমরা তাকে পাহাড়ের চূড়ার ওপর নিয়ে যাও। তখন যদি সে তার ধর্ম ত্যাগ করে তবে তো ভালো কথা। নচেত তাকে সেখান থেকে ফেলে দিও।

লোকেরা বালকটিকে নিয়ে যেই পাহাড়ে উঠল। বালক বলল, 'হে আল্লাহ! তুমি যেভাবে চাও এদের হাত থেকে আমাকে মুক্তি দান কর। তখন পাহাড়টি এমন জোরে কেঁপে উঠল যে, রাজার লোকেরা নিচে পড়ে মারা গেল এবং বালক স্বচ্ছন্দে রাজার কাছে গিয়ে হাজির হলো। রাজা তাকে জিজ্ঞেস করল, 'তোমার সঙ্গীরা কোথায়?' সে বলল, 'তাদের ব্যাপারে আমার জন্য আল্লাহই যথেষ্ট। এতে রাজা অনুমান করতে পারল যে, তারা আর বেঁচে নেই।

এরপর রাজা তাকে আরেক দল কর্মচারীর হাতে সোপর্দ করে বলল, 'তোমরা একে একটি নৌকায় তুলে সমুদ্রের মাঝখানে নিয়ে যাও। তারপর সে যদি তার ধর্ম ত্যাগে রাজি না হয়, তবে তাকে সেখানে সমুদ্রের পানিতে ফেলে দেবে।

নৌকা চলল মাঝ দরিয়া অভিমুখে । বালক আবার বলল, হে আল্লাহ! তুমি যেভাবে চাও, তাদের হাত থেকে আমাকে মুক্তি দাও । এতে নৌকা তাদেরকে নিয়ে ডুবে গেল এবং ছেলেটি শান্তভাবে রাজার দরবারে হাজির হলো । রাজা তাকে জিজ্ঞেস করল, তোমার সঙ্গীরা কোথায়? সে বলল, তাদের হাত থেকে আমাকে উদ্ধার করতে আল্লাহই যথেষ্ট হয়েছে ।

এরপর সে রাজাকে বলল, আমি যেভাবে বলব সেভাবে কাজ করলেই তুমি আমাকে হত্যা করতে পারবে । রাজা জিজ্ঞেস করল, কিভাবে? সে বলল, একটি মাঠে জনগণকে সমবেত কর । তারপর আমাকে শূলে চড়াও । তারপর আমার তীরদানি থেকে একটি তীর নিয়ে ধনুকে জুড়ে দিয়ে বল, বালকটির প্রভু আল্লাহর নামে তীর মারছি । এরূপ করলে তুমি আমাকে মারতে পারবে ।

রাজা তখন মাঠে লোক সমবেত করে বালককে শূলের ওপর বসাল । তারপর বালকের তীরদানি থেকে তীর নিয়ে ধনুকে জুড়ে দিয়ে বলল, 'বিসমিল্লাহি রাব্বিল গুলাম' অর্থাৎ বালকটির প্রভু আল্লাহর নামে তীর মারলাম । এই বলে তীর নিক্ষেপ করল, বালকটি তাতে বিদ্ধ হলো ও মারা গেল ।

এ দৃশ্য দেখে জনতা সমস্বরে বলে উঠল, এই বালক যে প্রভুর কথা বলে, সেই আল্লাহর ওপর আমরা ঈমান আনলাম । এ খবর পেয়ে রাজা ক্রোধে অধীর হয়ে উঠল । তার পরিষদবর্গ তাকে বলল, যে আশঙ্কা আপনার ছিল তাইতো ঘটে গেল । এখন তো দেশশুদ্ধ লোক ঈমান এনে ফেলেছে ।

রাজা তখন রাস্তার পাশে দীর্ঘ গর্ত খোঁড়ার হুকুম দিল । গর্ত খোঁড়া হলে তাতে আগুন জ্বালানো হলো । রাজা বলল, যে ব্যক্তি তার ঈমান ত্যাগ করবে না তাকে ঐ আগুনে ফেলে দাও । যারা ইসলামের ওপর অবিচল রইল, তাদের সবাইকে জ্বলন্ত আগুনে নিক্ষেপ করে শহীদ করা হলো । এক সময় সন্তান কোলে নিয়ে এক মহিলা এলো । সে আগুনের মধ্যে যেতে ইতস্ততঃ করলে শিশুটি অলৌকিকভাবে বাকশক্তি লাভ করল এবং বলল, আম্মা! আপনি সবর করুন (অর্থাৎ আগুনে ঝাপ দিতে সংকোচ করবেন না) । কারণ আপনি তো সত্যের ওপরে আছেন । (মুসলিম শরীফ)

**পর্যালোচনা :** এই ঘটনাটিকে ঐতিহাসিক আসহাবুল উখদুদের ঘটনা বলা হয় । উখদুদ অর্থ আগুনের কুণ্ডলী । পবিত্র কুরআনের সূরা আল বুরূজে এই ঘটনার প্রতি ইঙ্গিত করা হয়েছে ।

সাধারণ অবস্থায় নিজেকে হত্যা করতে কাউকে পরামর্শ দেওয়া বা তার কৌশল শিখিয়ে দেওয়া আত্মহত্যার শামিল । আত্মহত্যা কখনো জায়েজ নয় । তবে আলোচ্য ঘটনায় বালকটি যে পরিস্থিতিতে এ কাজ করেছিলো তা স্বাভাবিক

পর্যায় পড়ে না। তা ছাড়া সম্ভবত : সে আল্লাহর ইঙ্গিতে কাজ করেছিল, যা ওহী ব্যতীত ইলহামের মাধ্যমেও আসতে পারে। এমনও হতে পারে যে, এরূপ কৌশলে জীবন বিসর্জন দেয়ার ফলে সমগ্র দেশ ঈমান আনবে বলে বালক ধারণা করেছিল, বাস্তবেও তাই ঘটেছিল।

**শিক্ষা :** এই ঘটনার সবচেয়ে বড় শিক্ষা এই যে, প্রকৃত ঈমানদার ব্যক্তির যে কোন সময় যে কোন কঠিন পরীক্ষার সম্মুখীন হওয়ার জন্য প্রস্তুত থাকা উচিত। এমনকি যদি ইসলামের প্রচার ও প্রতিষ্ঠার কাজে নিয়োজিত হয় এবং তাতে কিছু সাফল্য ও বিজয় আসতে থাকে, তাহলেও প্রত্যেক সাফল্যের সাথে সাথে পরীক্ষার তীব্রতা ও কঠোরতা বেড়ে যাওয়া বিচিত্র নয়।

দ্বিতীয় শিক্ষা এই যে, এক আল্লাহর প্রতি ঈমানই ছিল হযরত ঈসা (আ.)এর প্রকৃত শিক্ষা। তিনিও ইসলামের নবী ছিলেন এবং ইসলামেরই দাওয়াত দিয়েছেন। পরবর্তীকালে তার অনুসারীরা তার আনীত ইসলামী শরীয়ত বিকৃত করে নাম রাখে খৃস্টবাদ এবং নিজেরা খৃস্টান নামে পরিচিত হয়। এই খৃস্টবাদ ও খৃস্টানদের সাথে হযরত ঈসার প্রকৃত শিক্ষার কোন সম্পর্ক নেই। আলোচ্য ঘটনায় উল্লেখিত দরবেশ, বালক ও অন্যান্য শহীদগণ ছিলেন হযরত ঈসার প্রকৃত অনুসারী ও খাঁটি মুসলমান-খৃস্টান নয়।

## ৭০। সততার এক নজিরবিহীন দৃষ্টান্ত

রাসূল সাল্লাল্লাহু আলাইহি ওয়াসাল্লাম বলেন, একবার এক ব্যক্তি অপর এক ব্যক্তির নিকট হতে এক খণ্ড জমি কিনল। ক্রেতা তার কেনা জমিতে স্বর্ণমুদায় পূর্ণ একটি কলসি পেল। সে তৎক্ষণাত ঐ জমির সাবেক মালিকের নিকট কলসীটি নিয়ে গেল এবং বললো : “তোমার এই স্বর্ণ নিয়ে নাও, তোমার জমিতে এটি পাওয়া গেছে। আমি তো তোমার কাছ থেকে জমি কিনেছি, স্বর্ণ কিনিনি।” সাবেক জমিওয়ালা বললো, “না, ঐ স্বর্ণ তোমার। কেননা আমি ঐ জমিতে যেখানে যা কিছু আছে-সব গুদাই বিক্রয় করেছি।” কিন্তু ক্রেতা কিছুতেই এ কথা মানতে রাজী হলো না।

অবশেষে উভয়ই তৃতীয় এক ব্যক্তির মধ্যস্থতা গ্রহণ করলো। তৃতীয় ব্যক্তিটি উভয়ের বক্তব্য শুনলেন। দেখলেন, উভয়ে নিজ নিজ বক্তব্যে অনড়। তখন বিরোধ মিটাবার কি উপায় বের করা যায় ভাবতে লাগলেন। শেষ পর্যন্ত একটি কৌশল তিনি উদ্ভাবন করে ফেললেন।

তিনি বিবাদমান লোক দুটিকে জিজ্ঞেস করলেন, তোমাদের কোন সন্তান

আছে কি? একজন জানালো তার একটি ছেলে আছে। অপরজন জানালো তার একটি মেয়ে আছে।

মধ্যস্থতাকারী বললেন, ঠিক আছে। এই স্বর্ণ তোমাদের কাউকেই নিতে হবে না। তোমরা তোমাদের ছেলেমেয়েদের পরস্পর বিয়ে দাও। এই স্বর্ণ দিয়ে বিয়ের ব্যয় নির্বাহ কর এবং যা বেঁচে যায়, তা নব দম্পতিকে উপঢৌকন দাও।

উভয়ে এই রায় বিনা বাক্য ব্যয়ে মেনে নিল। (বুখারী ও মুসলিম)।

শিক্ষা :

(১) যে কোন বিরোধ বা বিতর্কের মীমাংসার জন্য নিরপেক্ষ তৃতীয় ব্যক্তি বা ব্যক্তিবর্গের মধ্যস্থতা গ্রহণ করা ইসলামের রীতি। এই তৃতীয় ব্যক্তি উভয় বিবাদমান পক্ষের সম্মতিক্রমে মনোনীত হবে এবং তার ফায়সালা মেনে নেয়া উভয়ের জন্য বাধ্যতামূলক হবে।

(২) আলোচ্য ঘটনার বিবাদমান ব্যক্তিদ্বয় খোদাভীরুতার এক বিরল দৃষ্টান্ত স্থাপন করেছেন। উভয়েই জমির ভেতর প্রাপ্ত স্বর্ণকে অপর পক্ষকে দেয়ার জন্য উদগ্রীব-নেয়ার জন্য নয়। মুমিনের চরিত্র এমনই হওয়া উচিত।

(৩) ইসলামী আইনের দৃষ্টিতে বিক্রেতার বক্তব্যই সঠিক। কেননা জমি যখন বিক্রয় অথবা দানসূত্রে হস্তান্তরিত হয়, তখন বিক্রেতা বা দাতা ইচ্ছাপূর্বক কোন কিছু বাদ না দিলে ঐ জমির ওপরে বা অভ্যন্তরে যা-ই থাক, সব সময়েই হস্তান্তরিত হবে। দাতা বা বিক্রেতা যদি কোন জিনিস দান বা বিক্রয় বহির্ভূত বলে ঘোষণা করে, তবে তা হস্তান্তরের আগেই বা যে সময়ের জন্য ক্রেতা বা বিক্রেতা অনুমতি দেয়, সে সময়ের মধ্যেই তা সরিয়ে নিতে হবে।

(৪) ছেলে বা মেয়ে বিয়ে দেয়ার জন্য কি ধরণের পরিবার ও কি ধরণের বর কনে খোঁজা দরকার, সে ব্যাপারেও এই কিসসাটিতে চমৎকার শিক্ষা রয়েছে। একটি উন্নত মানের ইসলামী চরিত্র সম্পন্ন পরিবারের বর কনেই প্রত্যেক মুসলিম পরিবারের কাম্য হওয়া উচিত। পরিবারের ইসলামী ভাবধারা অক্ষুণ্ন রাখার এটাই একমাত্র উপায়।

## ৭১ । তওবার মহিমা

হযরত রাসূলুল্লাহ সাল্লাল্লাহু আলাইহি ওয়াসাল্লাম বলেছেন, 'তোমাদের পূর্ববর্তী জাতিগুলোর মধ্যে এক ব্যক্তি একনাগাড়ে ৯৯ জনকে হত্যা করে। অতঃপর সে সৎপথে প্রত্যাবর্তনের সিদ্ধান্ত নেয়। সে লোকজনের কাছে দেশের সেরা আলেমের সন্ধান চায়। লোকেরা তাকে জৈনিক দরবেশের সন্ধান দেয়। সে ঐ দরবেশের কাছে গিয়ে জিজ্ঞেস করে যে, আমি তো ৯৯ জন মানুষকে হত্যা করেছি। এ পাপ থেকে আমার নিষ্কৃতি লাভের কোনো উপায় আছে কি? দরবেশ বলল, না। সে তৎক্ষণাত ঐ দরবেশকে হত্যা করে একশো পূর্ণ করল। এরপর পুনরায় একজন ভালো আলেমের অনুসন্ধানে বেরুল। এবার একজন আলেমের সন্ধান পেল। তাকে সে জিজ্ঞেস করল, আমি তো একশো জন মানুষ হত্যা করেছি। আমার তওবার অবকাশ আছে কি? তিনি বললেন, হ্যাঁ। তওবার পথে বাধা দেয়ার অধিকার কারো নেই। তবে তোমাকে নিজের গ্রাম ছাড়তে হবে। কারণ, ওটা খারাপ লোকদের বসতি। তুমি অমুক গ্রামে চলে যাও। সেখানে আল্লাহর অনুগত লোকেরা বাস করে। সেখানে গিয়ে তাদের সাথে তুমিও আল্লাহর অনুগত্যের পথ অবলম্বন কর।

লোকটি উক্ত আলেমের কথামতো স্বগ্রাম ত্যাগ করে সৎলোকদের গ্রামের দিকে রওনা হলো। পথের মাঝামাঝি জায়গায় উপনীত হলে তার আয়ু শেষ হয়ে গেল। তার কাছে দুই ধরনের ফেরেশতা হাজির হলো— রহমতের ফেরেশতা ও আযাবের ফেরেশতা। তারপর পরস্পরে ঝগড়া করতে লাগল রহমতের ফেরেশতার বা বলল, এই ব্যক্তি তওবা করে আল্লাহর দিকে আন্তরিকভাবে প্রত্যাবর্তিত হয়েছিল। কাজেই এর প্রাণ আমরা গ্রহণ করব। আযাবের ফেরেশতার বা বলল, সে কখনো কোনো সৎ কাজ করেনি। তাই ওর প্রাণ আমাদেরই প্রাপ্য। এই ঝগড়ার মীমাংসার জন্য সেখানে মানুষের আকৃতিতে একজন ফেরেশতা এলো। সে বলল, তোমরা ঝগড়া থামাও। দু'দিকের রাস্তা মেপে দেখ। কোনটা দীর্ঘতর। যে দিকের রাস্তা ক্ষুদ্রতর হবে, তাকে সেদিকের অধিবাসী ধরে নিতে হবে। অতঃপর রাস্তা মাপলে দেখা গেল, তার গন্তব্যস্থল সংলগ্ন রাস্তাই ক্ষুদ্রতর। তখন রহমতের ফেরেশতার বা তার প্রাণ সংহার করল। (বুখারী, মুসলিম, ইবনে মাজা)

একটি বর্ণনায় পাওয়া যায়, সৎলোকদের গ্রামটি এক বিঘত পরিমাণ নিকটতর ছিল। অপর এক বর্ণনায় আছে আল্লাহ তায়ালা স্বীয় আদেশ বলে সৎ লোকদের গ্রামটিকে নিকটতর করে দেন। আর এক বর্ণনায় বলা হয়েছে যে,



মৃত্যুর ফেরেশতা আসার পরও সে হামাগুড়ি দিয়ে গন্তব্যস্থলের দিকে কিঞ্চিৎ এগিয়ে যায় ।

**শিক্ষা :** এ কিসসাটিও অত্যন্ত শিক্ষাপ্রদ । বিশেষত : নিম্নোক্ত বিষয়গুলো এ হাদীসের অন্যতম শিক্ষণীয় বলে বিবেচিত হতে পারেঃ

১. মূর্খ দরবেশের চেয়ে হকপন্থী আলেমই মানুষকে সৎপথের সন্ধান দিতে অধিকতর যোগ্য ।

২. কেউ যদি একনিষ্ঠ মনে ন্যায়পথে অগ্রসর হওয়ার সিদ্ধান্ত নেয়, তবে তার পথ কেউ আটকাতে পারবে না । আল্লাহ স্বয়ং তাকে সাহায্য করেন ।

৩. সৎ হবার জন্য সৎ লোকদের সংসর্গ অবলম্বন ও অসৎ লোকদের সাহচর্য পরিত্যাগ্য । এ জন্য প্রয়োজনে নিজের জন্মভূমি হতে হিজরত করা কর্তব্য । আর হিজরত করা যেখানে সম্ভব নয় কিংবা হিজরত করে যথার্থ সৎলোকের সংসর্গ পাওয়া যাবে এমন নিশ্চয়তা নেই, সেখানে একমাত্র বিকল্প কর্মপন্থা হলো, আশেপাশের মানুষকে ইসলামের শিক্ষায় শিক্ষিত করে ইসলামী পরিবেশ গড়ে তোলার দীর্ঘমেয়াদী ও স্বল্পমেয়াদী কর্মসূচি নিয়ে কাজ শুরু করে দেয়া । আল্লাহ আমাদেরকে সৎলোক ও সৎ পরিবেশ তৈরির তাওফীক দিন । আমীন ।

## ৭২ । আল্লাহর পথে দানের মাহাত্ম্য

হযরত রাসূলুল্লাহ সাল্লাল্লাহু আলাইহি ওয়াসাল্লাম বলেন, একবার এক ব্যক্তি ক্ষেতে কাজ করার সময় মেঘের ভেতরে আওয়াজ শুনতে পেল, 'হে মেঘ! অমূকের ক্ষেতে পানি দাও ।' এ কথার পর মেঘখানা একদিকে চলতে শুরু করল । ঐ লোকটিও মেঘের সাথে সাথে চলতে লাগল ।

বেশ কিছু পথ অতিক্রম করার পর সে দেখতে পেল, একটি বাগানের ওপর ঐ মেঘখানি গিয়ে থামল এবং মুষলধারে বৃষ্টি বর্ষণ করল । অথচ তার আশপাশের অন্যান্য ক্ষেতখামারে এক ফোঁটা বৃষ্টিও হলো না ।

বৃষ্টির শেষে লোকটি ঐ বাগানে ঢুকল । দেখল, বাগানের ভেতরে এক প্রৌঢ় কৃষক বৃষ্টির পানি বিভিন্ন গাছের গোড়ায় পৌঁছিয়ে দিচ্ছে । সে জিজ্ঞেস করল, জনাব, আপনার নাম কি? কৃষক যখন তার নাম বলল, তখন সে দেখল, মেঘের ভেতর যে নামটি উচ্চারিত হয়েছিল, তার সাথে এ নামটি হুবহু মিলে যাচ্ছে । অতঃপর কৃষক আগন্তুককে জিজ্ঞেস করল, 'আপনি কি জন্য আমার নাম জানতে চাইছেন?' আগন্তুক বলল, 'যে মেঘ থেকে এইমাত্র বৃষ্টি বর্ষিত হলো, সেখানে

আপনার নাম ধরে বলা হচ্ছিল আপনার বাগানে বৃষ্টি বর্ষাতে। আমি জানতে চাই আপনি এমন কি মহৎ কাজ করেন, যার জন্য আপনার প্রতি আল্লাহর এমন অলৌকিক অনুগ্রহ।’

কৃষক বলল, ‘আমি ফসল ঘরে তোলার পর তাকে তিন ভাগ করি। এক ভাগ প্রথমেই আল্লাহর পথে দান করি। অপর এক ভাগ বীজ হিসেবে সংরক্ষণ করি। আর তৃতীয় ভাগ নিজে সপরিবারে ভোগ করি।’ (মুসলিম শরীফ, তারগীব ও তারহীব)

**শিক্ষা :**

১. এ ঘটনাটি থেকে জানা যায় যে, নিজের যাবতীয় প্রয়োজন পূরণের পর অবশিষ্ট অংশ আল্লাহর পথে ব্যয় করা নয় বরং উপার্জিত সম্পদের একটি অংশ প্রথমেই আল্লাহর পথে দান করা এবং তারপর বাদবাকী অংশ দিয়ে নিজের প্রয়োজন পূরণ করাই ইসলামী রীতি। কেননা এতে অনেক সময় আদৌ কোন অবশিষ্ট অংশ নাও থাকতে পারে। প্রথমে আল্লাহর পথে দাতব্য অংশটি নির্ধারণ বা দান করার অর্থ দাঁড়ায় সমুদয় পার্থিব চাহিদা ও প্রয়োজনের ওপর আল্লাহর দ্বীনের ও তার দরিদ্র বান্দাদের প্রয়োজনকে অগ্রাধিকার দেয়া। এতে আল্লাহ সর্বাধিক পরিমাণে খুশি হন এবং যে বান্দা এরূপ নীতি অবলম্বন করে তার জীবিকা বৃদ্ধি নিশ্চিত করেন।

২. এ ঘটনাটি থেকে এ কথাও জানা গেল যে, সাধারণ কৃষক শ্রমিক ও মুটে মজুর শ্রেণীর লোককে অবজ্ঞা করা কোনো অবস্থাতেই উচিত নয়। এ ধরনের নগণ্য লোকেরা অতি সহজেই আল্লাহর নৈকট্য লাভ ও তাঁর ওলীর মর্যাদায় উপনীত হতে পারে। যদিও তাদের বেশভূষা ও চালচলনে তেমন কোনো লক্ষণ সাধারণ মানুষের চোখে পড়ে না এবং তারা সমাজের মর্যাদাবান ও প্রভাবশালী লোকদের দৃষ্টিতে উপেক্ষিতই থাকে। নিজের উপার্জনে আল্লাহর বঞ্চিত দরিদ্র বান্দাদের অংশ রয়েছে— এ কথা যারা ভুলে যায় না বরং সেই অংশটি সবার আগে আলাদা করে ও দান করে, তারা যথার্থই আল্লাহর ওলী তথা প্রিয় বান্দা— চাই তারা যেখানে যে পরিচয়েই বাস করুক না কেন।

## ৭৩। নিজের ক্ষতি স্বীকার করে পরোপকার

রাসূল (সা.) বলেন, প্রাচীনকালে একবার দুই ব্যক্তি একসাথে সফরে বেরলো। এদের একজন সবসময় আল্লাহর ইবাদতে লিপ্ত থাকতে পছন্দ করতো। অপরজন ছিল আল্লাহর হুকুম পালনে উদাসীন। পথিমধ্যে একসময়

প্রথমোক্ত ব্যক্তি পিপাসায় কাতর হয়ে পড়লো। ক্রমে সে বেহুশ হয়ে মাটিতে লুটিয়ে পড়লো। দ্বিতীয় ব্যক্তিটি মনে মনে বললো, “এই সং ও খোদাভীরু লোকটি যদি পিপাসায় মারা যায় এবং আমার সাথে পানি থাকা সত্ত্বেও যদি না খাওয়াই, তাহলে আল্লাহর আক্রোশ হতে আমি কোনভাবেই রক্ষা পাবো না। পক্ষান্তরে তাকে পানি খাওয়ালে পরবর্তীতে আমি নিজে পিপাসায় মরে যাবো। এখন তা হলে কি করা?”

কয়েক মুহূর্ত ভেবেচিন্তে সে আল্লাহর ওপর ভরসা করে তাকে কয়েক ফোঁটা পানি খাইয়ে দিল এবং নিজের জন্যও কিছু সঞ্চিত রাখলো। এভাবে তাদের একত্রে সফরের পালা শেষ হলো।

এই দুই ব্যক্তির মৃত্যুর পর প্রথম ব্যক্তিকে জান্নাত ও দ্বিতীয় ব্যক্তিকে জাহান্নামের অধিবাসী বলে ঘোষণা করা হলো। দ্বিতীয় ব্যক্তিকে যখন ফেরেশতারা জাহান্নামে নিয়ে যেতে আরম্ভ করলো, তখন সহসা প্রথম ব্যক্তির সাথে তার সাক্ষাত হলো। সে ঐ ব্যক্তিকে চিনতে পেরে বললো, “ও হে আল্লাহর প্রিয় বান্দা! তুমি কি আমাকে চেন?” সে বললো, “তুমি কে?” তখন সে বললো, “আমি অমুক। এক বিপদের দিনে আমরা মিলিত হয়েছিলাম এবং তোমাকে অগ্রাধিকার দিয়ে পানি খাইয়ে প্রাণ রক্ষা করার চেষ্টা করেছিলাম।” তখন ঘটনাটা প্রথম ব্যক্তির মনে পড়লো এবং দোজখের ফেরেশতাকে থামতে বললো। অতঃপর সে আল্লাহর নিকট সুপারিশ করে তাকে সাথে নিয়ে বেহেশতে চলে গেল। (তাবরানী, বায়হাকী)।

### শিক্ষা :

১. হাদিসটির পয়লা শিক্ষা এই যে, কোনো বিপন্ন বা মুম্বুর্ষু মানুষকে দেখলে তাকে সাহায্য করা ও তার প্রাণ বাঁচানোর চেষ্টা করা কর্তব্য। বিশেষত কোনো ধার্মিক ও সং ব্যক্তি যদি বিপদগ্রস্ত হয় তবে নিজের কিছু কষ্ট হলেও তাকে সাহায্য করা উচিত।

২. দ্বিতীয়ত : কাউকে বিপদগ্রস্ত বা মৃত্যুর সম্মুখীন দেখলে নিজের যথাসর্বস্ব বিলিয়ে দিয়ে তাকে সাহায্য করা ঠিক নয়। নিজের জন্য যতটুকু একান্ত প্রয়োজন, তা রেখে অন্যকে দিতে হবে। শেষ কপর্দক বিলিয়ে দিয়ে নিজেকে অন্যের মুখাপেক্ষী বানানো উচিত নয়।

৩. সফরসঙ্গীকে সব সময় অগ্রাধিকার দিয়ে খিদমত করার চেষ্টা করা উচিত। বিশেষত সফরসঙ্গী যদি অপেক্ষাকৃত অভাবী সং ব্যক্তি হয়, তবে তার দিকে আরো বেশি খেয়াল রাখা কর্তব্য।

## ৭৪ । ওয়াদামত ঋণ পরিশোধের গুরুত্ব

রাসূল (সা.) বলেন, একবার বনী ইসরাইলের এক ব্যক্তি একই গোত্রের জনৈক ধনাঢ্য ব্যক্তির নিকট এক হাজার দিনার ধার চাইল। ধনাঢ্য লোকটি তাকে বলল, 'ঠিক আছে। আমি ধার দিতে প্রস্তুত। তবে কয়েকজন সাক্ষী নিয়ে এসো। তাদেরকে সাক্ষী রেখে আমি তোমাকে ধার দেব।' ধার প্রার্থী বলল, 'সাক্ষী হিসেবে আল্লাহই যথেষ্ট।'

ধনাঢ্য ব্যক্তি তখন বলল, 'তাহলে এমন একজন লোক নিয়ে এসো, যে এই ঋণের জন্য জামিন থাকবে।' লোকটি এবারও বলল, 'জামিন হিসেবে আল্লাহই যথেষ্ট।' তখন ধনাঢ্য লোকটি বলল, 'তুমি সত্য কথাই বলেছ।'

অতঃপর সে তাকে একটি নির্দিষ্ট মেয়াদের জন্য এক হাজার দিনার ধার দিল।

লোকটি এই ঋণ নিয়ে সমুদ্র ভ্রমণে বেরিয়ে গেল এবং নিজের প্রয়োজন পূরণ করল। অতঃপর দেশে ফিরে আসার জন্য জাহাজের সন্ধান করতে লাগল, যাতে নির্ধারিত সময়ে সে ঐ ঋণ পরিশোধ করতে পারে। কিন্তু বহু চেষ্টা করেও সে কোনো জাহাজ ধরতে পারল না। অগত্যা সে একখানা কাঠের টুকরো ছিদ্র করে তার ভেতরে এক হাজার দিনার ও ঋণ দাতার উদ্দেশ্যে লেখা একখানা চিঠি ঢুকিয়ে তা সীসা লাগিয়ে বন্ধ করে সমুদ্রে ভাসিয়ে দিল।

অতঃপর সে আল্লাহর নিকট কাকুতি মিনতি সহকারে দোয়া করল, 'হে আল্লাহ! তুমি তো জান, অমুকের নিকট থেকে আমি এক হাজার দিনার ধার নিয়েছিলাম। সে সাক্ষী চাইলে আমি বললাম, সাক্ষী হিসেবে আল্লাহই যথেষ্ট। অতঃপর সে জামিন চাইলে আমি বললাম, জামিন হিসেবে আল্লাহ যথেষ্ট। সে সাক্ষী ও জামিন হিসেবে তোমাকে পেয়েই সন্তুষ্ট হয়েছিল। আমি যথাসময়ে তার ঋণ পরিশোধের জন্য সামুদ্রিক যান সন্ধান সাধ্যমত চেষ্টা করেছি। কিন্তু সক্ষম হইনি। তাই এই এক হাজার দিনার আমি তোমার নিকট সোপর্দ করছি।' এই বলেই সে ঐ কাঠখণ্ড সমুদ্রে নিক্ষেপ করল। এরপরও সে জাহাজের সন্ধান ব্যাপ্ত রইল।

ওদিকে ঋণদাতা নির্ধারিত দিনে সমুদ্রতীরে এসে অপেক্ষা করতে লাগল। ভাবল, হয়তো তার খাতক কোনো জাহাজে করে ফিরে আসবে এবং তাকে ঋণ পরিশোধ করবে। কিন্তু দীর্ঘ সময় অপেক্ষা করেও কোনো জাহাজ কিনারে ভিড়তে দেখল না। সে হতাশ হয়ে ফিরে যেতে উদ্যত হলো। সহসা দেখল, এক টুকরো কাঠ ভাসতে ভাসতে এসে কিনারে আসল। লোকটি ঐ কাঠের

টুকরোটি জ্বালানী হিসেবে ব্যবহারের উদ্দেশ্যে বাড়িতে নিয়ে গেল। বাড়িতে নিয়ে যেই কাঠখানি চেরাই করল, অমনি তার ভেতর থেকে চিঠি ও এক হাজার দিনার বেরিয়ে পড়ল।

কয়েকদিন পরই খাতক এসে হাজির। সে পৃথকভাবে তাকে এক হাজার দিনার দিল। কারণ সে ভেবেছিল সমুদ্রে ভাসিয়ে দোয়া কাঠের টুকরো তার মহাজন পায়নি। এমনকি ব্যাপারটা তাকে জিজ্ঞেস করতেও সে সংকোচ বোধ করল। এক হাজার দিনার হাতে গুঁজে দিয়ে সে বিলম্বের জন্য ওজর পেশ করতে ও ক্ষমতা চাইতে লাগল। বলল, সময়মতো সামুদ্রিক যান না পাওয়ার কারণেই তার এই বিলম্ব হয়েছে।

মহাজন বলল, 'আচ্ছা, তুমি কি আমার কাছে কোনো জিনিস পাঠিয়েছ?'

সে বলল, 'আমি আপনার নিকট ওজর পেশ করছি যে, সময়মত জাহাজ ধরতে না পেরে আমার বিলম্ব হয়েছে।'

মহাজন বলল, 'তাহলে শোনো! তুমি কাঠের টুকরোতে করে যা পাঠিয়েছ, তা আল্লাহ আমার কাছে পৌঁছে দিয়েছেন। এই এক হাজার দিনার আমার প্রয়োজন নেই। এটা তুমি নিয়ে যাও।' (বুখারী, নাসায়ী)

শিক্ষা :

(১) ওয়াদামত ঋণ পরিশোধ করা কর্তব্য। হাদীসে আছে, যে ব্যক্তি আল্লাহর পথে লড়াই করে শহীদ হয়, তার সকল গুনাহ আল্লাহ মাফ করলেও ঋণ মাফ করেন না। কারণ ওটা বান্দার হক।

(২) যে কোন ব্যাপারে আল্লাহর ওপর তাওয়াক্কুল করা সত্ত্বেও যথাসাধ্য চেষ্টা অব্যাহত রাখা কর্তব্য।

(৩) ঋণের আদান-প্রদান কালে সাক্ষী বা জামিন রাখা অথবা লিখিত দলীল সাক্ষর করা শরীয়তের দৃষ্টিতে বাধ্যতামূলক। তবে পূর্ববর্তী নবীদের শরীয়তে এ ব্যাপারে বাধ্যবাধকতা ছিল না। কুরআনের সূরা বাকারায় এ ব্যাপারে বাধ্যবাধকতা আরোপ করা হয়েছে যাতে কোন বিতর্কের সৃষ্টি না হয়।

(৪) কোন ব্যক্তি যদি সাক্ষ্য বা জামিন হাজির করতে অক্ষম হয় এবং আল্লাহকে সাক্ষী ও জামিন রাখে, তবে তাকে বিশ্বাস করে ঋণ দিয়ে তাকে বিপদ হতে উদ্ধার করা উত্তম। মনে রাখতে হবে, সুদবিহীন ঋণ প্রদান ক্ষেত্র বিশেষে দান করার চেয়েও বেশি সাওয়াবের কাজ। কেননা এটা সাধারণত : বিপদগ্রস্ত ব্যক্তিকে উদ্ধারে সহায়তা করে। দানশীল ব্যক্তি সাধারণত নিজের ইচ্ছা অনুসারে উদ্ধৃত সম্পদ হতে দান করে থাকে। কিন্তু ঋণদাতা বিপন্ন ব্যক্তিকে উদ্ধারের জন্য নিজের অত্যাবশ্যকীয় সম্পদ হতেও ঋণ দিয়ে থাকে।

## ৭৫। অপাত্রে দান

হযরত রাসূলুল্লাহ (সা.) বলেন : একবার এক ব্যক্তি শপথ করলো যে, আজ রাতে কিছু সাদকা না করে সে ঘুমাবে না। অতঃপর ছদকার অর্থ নিয়ে রাস্তায় বেরলো। যে ব্যক্তিকে সে ছদকা দিল, সে ছিল একজন চোর। লোকটি তাকে চিনতো না। যখন ব্যাপারটা জানাজানি হয়ে গেল, তখন লোকে তাকে উপহাস করলো যে, একটা চোরকে সে ছদকা দিয়েছে। কিন্তু সে কিছুমাত্র হতোদ্যম হলো না। বরং আল্লাহর শোকর আদায় করলো।

পরের দিন পুনরায় শপথ করলো যে, রাতে কিছু ছদকা না নিয়ে সে ঘুমাবে না। কিন্তু আজও তার ছদকা গিয়ে পড়লো এক ব্যভিচারীর হাতে। এবারও তাকে বিদ্রূপ শুনতে হলো এবং সে যথারীতি আল্লাহর শোকর আদায় করলো।

তৃতীয় দিনেও একই ঘটনার পুনরাবৃত্তি ঘটলো। আজ তার ছদকা জুটলো এক ধনী ব্যক্তির কপালে। আজও তাকে উপহাসে জর্জরিত করা হলো। কিন্তু সে আল্লাহর শোকর আদায় করলো।

এই লোকটি কিছুদিন পর মারা গেলে ফেরেশতারা তাকে জানালেন যে, তার সকল ছদকাই কবুল হয়েছে। চোরকে দেয়া ছদকা এই জন্য কবুল হয়েছে যে, এ ছদকা পাওয়ার পর তার চুরির অভ্যাস ত্যাগ করার আশা করা যায়। ব্যভিচারীরও শুধরে যাওয়ার সম্ভাবনা রয়েছে। আর ধনী ব্যক্তি ছদকা পেয়ে লজ্জিত হয়ে নিজে ছদকার অভ্যাস গড়ে তুলতে পারে। (বুখারী, মুসলিম, নাসায়ী)

**শিক্ষা :** দান ছদকা না জেনে অপাত্রে দিলেও তা বৃথা যায় না। তবে জেনেশুনে উপযুক্ত ও অভাবী ব্যক্তিকেই দেওয়া উত্তম। কোন অপরাধী যদি ছদকা পেলে শুধরে যাবে বলে আশা করা যায়, তবে তাকে ছদকা দেওয়া যাবে।

## ৭৬। অন্যায়ের প্রতিরোধ

রাসূল সাল্লাল্লাহু আলাইহি ওয়াসাল্লাম বলেন, একবার আল্লাহ তায়ালা ফেরেশতা জিবরীলকে আদেশ দিলেন যে, “যাও, অমুক জনপদটি ধ্বংস করে দিয়ে এসো।” জিবরীল সেই জনপদটিতে গিয়ে দেখলেন সেখানে একজন দরবেশ রয়েছে, দিনরাত তিনি নামায পড়েন ও যিকির তাসবীহ করেন। এ দৃশ্য দেখে তিনি আল্লাহকে বললেন, “হে আল্লাহ! এখানে তোমার এক বান্দা রয়েছে যিনি সর্বক্ষণ তোমাকে স্মরণ করছেন”।

আল্লাহ জবাবে বললেন : তাকে শুদ্ধই ধ্বংস করে দাও । কেননা তার সামনে ইসলামের অবমাননা হয়, নাফরমানী করা হয়, জুলুমবাজী ও পাপাচারের সয়লাব হয়ে যায় । কিন্তু তার মুখমন্ডলে তাতে কোন বিরক্তির চিহ্ন ফুটে উঠে না এবং তার মন কিছুমাত্র অস্থির হয় না ।

অতঃপর জিবরীল সেই জনপদটি ধ্বংস করে দেন ।

**শিক্ষা :**

অন্যায়, অত্যাচার ও পাপাচারের প্রতিরোধে যার যতটুকু ক্ষমতা থাকে, সে অনুসারে অবদান রাখা কর্তব্য । কর্তব্য পালন না করে কেবল নফল নামায ও যিকির ইত্যাদিতে ব্যাপ্ত থাকলে দুনিয়া ও আখেরাতের শাস্তি হতে রেহাই পাওয়া যাবে না । এক হাদীসে রাসূল (সা.) বলেছেন : কোন অন্যায় কাজ সংগঠিত হতে দেখলে সর্বশক্তি দিয়ে তা ঠেকাও, তা যদি না পার তবে মুখ দিয়ে সদুপদেশ দাও, তাও যদি না পার তবে মনে মনে তাকে ঘৃণা ও অপছন্দ কর এবং কিভাবে তা বন্ধ করা যায় তা চিন্তা করতে থাকো । শেষোক্ত পস্থা হলো সবচেয়ে দুর্বল ঈমানের পরিচায়ক ।

## ৭৭ । তিনজন মুসাফির

হযরত উমার (রাজিয়াল্লাহু আনহু) থেকে বর্ণিত যে রাসূলুল্লাহ সাল্লাল্লাহু আলাইহি ওয়াসাল্লাম বলেছেন, 'তোমাদের পূর্ববর্তী জাতিগুলোর মধ্য থেকে তিন ব্যক্তি একবার সফরে বেরুল । পথ চলতে চলতে এক জায়গায় রাত হলে তারা একটি পর্বতের গুহায় আশ্রয় নিল । গুহার ভেতরে প্রবেশ করা মাত্রই পর্বতের ওপর থেকে একটি প্রকাণ্ড পাথর গড়িয়ে পড়ল এবং যে গুহায় তারা আশ্রয় নিয়েছিল তার মুখ ঐ পাথরে চাপা পড়ে বন্ধ হয়ে গেল । এ অবস্থা দেখে ঐ তিন ব্যক্তি পরামর্শ করে এই সিদ্ধান্তে উপনীত হলো যে, এত বড় পাথরের অবরোধ থেকে রক্ষা পেতে হলে আমাদের একটি মাত্র উপায় আছে । সেটি হচ্ছে এই যে, আমরা প্রত্যেকে নিজ নিজ অতীত জীবনের কৃত সৎ কর্মসমূহের দোহাই দিয়ে আল্লাহর কাছে মুক্তি চাইব ।

সিদ্ধান্ত মোতাবেক এক ব্যক্তি নিম্নরূপ দোয়া করল : 'হে আল্লাহ! আমার পিতামাতা বৃদ্ধ হয়ে গেলে তাদের আগে আমি নিজ পরিবার পরিজনের আর কাউকে রাতের খাবার খাওয়াতাম না । একদিন জঙ্গলে কাঠ কাটতে গিয়ে আমার বাড়ি ফিরতে দেরি হয়ে যায় । বাড়ি ফিরে দেখি, তারা উভয়ে ঘুমিয়ে গেছেন । আমি তাদের রাতের খাওয়ার জন্য দুধ দুইয়ে আনলাম । কিন্তু

দেখলাম, তারা তখনো ঘুমিয়ে। পিতামাতার খাওয়ার আগে আমার বা আমার পরিবারের লোকদের খাওয়া আমি সমিচীন মনে করলাম না। তারা কখন জেগে ওঠেন, তার অপেক্ষায় আমি সারা রাত দুধের পাত্র হাতে নিয়ে বসে রইলাম। আমার ছেলে মেয়েরা ক্ষুধার যন্ত্রণায় আমার পায়ের ওপর গড়াগড়ি খেয়ে কান্নাকাটি করছিল। কিন্তু আমি তাতেও বিচলিত হইনি। ভোর হয়ে গেলে পিতামাতা জেগে উঠলেন এবং দুধ খেয়ে নিলেন। হে আল্লাহ! এ কাজটি আমি যদি তোমাকে সম্ভ্রষ্ট করার উদ্দেশ্যে করে থাকি, তাহলে এই পাথরের অবরোধ থেকে আমাদেরকে উদ্ধার কর।’

এ পর্যন্ত বলা মাত্রই পাথরটা খানিকটা সরে দাঁড়াল। তবে সেটুকু তাদের বেরিয়ে আসার জন্য যথেষ্ট ছিল না।

রাসূল (সা.) বললেন, এরপর দ্বিতীয় ব্যক্তি এভাবে দোয়া করতে লাগল। ‘হে আল্লাহ! আমার এক চাচাত বোন ছিল। আমি তাকে সবচেয়ে বেশি ভালোবাসতাম। কিন্তু সে আমাকে তেমন ভালোবাসতো না। অবশেষে একদিন দুর্ভিক্ষের কবলে পড়ে সে আমার কাছে সাহায্য চাইতে এলো। সুযোগ বুঝে এবার আমি তার কাছে পুনরায় ভালোবাসা নিবেদন করলাম এবং একশো বিশ দীনার দিলাম। সে আমার সাহায্য গ্রহণ করল তবে সেই সাথে আমাকে কঠোরভাবে সাবধান করে দিল যে, তার ব্যাপারে আমি শরীয়তের পর্দার বিধান লঙ্ঘন না করি। আমি তার সতর্কবাণী মেনে নেই এবং তাকে যে সাহায্য দিয়েছিলাম তার দাবিও পরিত্যাগ করি। হে আল্লাহ! আমি এ সংযম যদি তোমার ভয়েই অবলম্বন করে থাকি তবে আমাদেরকে এই অবরোধ অবস্থা থেকে মুক্ত কর।’

এ কথা বলার সঙ্গে বিশাল পাথরখানি আরো একটু সরে দাঁড়াল। কিন্তু তখনো বেরুবার পথ সুগম হয়নি।

রাসূল (সা.) বললেন, এরপর তৃতীয় ব্যক্তি বলতে আরম্ভ করল, ‘হে আল্লাহ! আমি এক সময় কয়েকজন শ্রমিক নিয়োগ করি। কাজের শেষে তাদের একজন বাদে সকলের পারিশ্রমিক দিয়ে দেই। এই লোকটি নিজের পারিশ্রমিক না নিয়েই চলে যায়। অতঃপর আমি তার প্রাপ্য অর্থকে লাভজনক খাতে বিনিয়োগ করি। কালক্রমে তা থেকে প্রচুর সম্পদ উৎপন্ন হয়।’ কিছুকাল পরে সে আমার কাছে আসে এবং তার প্রাপ্য পারিশ্রমিক চায়। আমি তাকে বললাম, তুমি যে বিপুল সংখ্যক গরু, ছাগল ও উট দেখতে পাচ্ছ, এ সবই তোমার পারিশ্রমিক।’ সে বলল, ‘দোহাই আল্লাহর! আমার সাথে তামাশা করবেন না।’



আমি বললাম, 'মোটাই তামাশা নয়।' অতঃপর তাকে বুঝিয়ে বললে সে সানন্দে গ্রহণ করল এবং গুণলোকে হাকিয়ে নিয়ে চলে গেল। হে আল্লাহ! আমি এই কাজটি যদি তোমাকে খুশি করার জন্যই করে থাকি, তাহলে আমরা যে দুর্বিসহ অবস্থায় পড়েছি তা থেকে নিষ্কৃতি দাও।'

এ পর্যন্ত বলার সঙ্গে সঙ্গে পাথরটি গুহার মুখ থেকে সম্পূর্ণরূপে সরে গেল। অতঃপর আল্লাহর ঐ তিন বান্দা গুহা থেকে বেরিয়ে গন্তব্য স্থানের দিকে রওনা হলো। (বুখারী, মুসলিম, নাসায়ী)

**শিক্ষা :** হাদীসের কিসসাটি অত্যন্ত শিক্ষাপ্রদ। বিশেষত: নিম্নবর্ণিত বিষয়গুলোকে এর অন্যতম প্রধান শিক্ষা হিসেবে গ্রহণ করা যায়ঃ

১. নিজের কৃত কোন সৎ কর্মের জন্য গর্ববোধ বা অহংকার প্রকাশ করা যদিও অন্যায়, কিন্তু কোন ভাল কাজ করতে পারা এবং খারাপ কাজ পরিহার করতে পারাকে নিজের সৌভাগ্য ও আল্লাহর অনুগ্রহ মনে করে সন্তোষ ও তৃপ্তি বোধ করা এবং আল্লাহর শোকর করা মহত্ত্বের পরিচায়ক। এক হাদীসে বলা হয়েছে, "ভালো কাজ করতে পেরে আনন্দ বোধ করা ও খারাপ কাজ করে অনুতপ্ত হওয়া ঈমানের লক্ষণ।" আর এ ধরনের কোন নিঃস্বার্থ ও একনিষ্ঠ সৎকর্ম যদি নিজের অতীত জীবনে থেকে থাকে, তবে তার দোহাই দিয়ে দোয়াও করা যায় এবং সে দোয়া কবুল হওয়ারও আশা করা যায়।

২. পিতামাতার খিদমত, পরোপকার ও খোদাতীতি মানুষকে আখিরাতে কল্যাণের পাশাপাশি বহুবিধ পার্থিব বিপদ মুসিবত হতেও উদ্ধার করে।

৩. পিতামাতার অধিকার স্ত্রী ও সন্তানদের অধিকারের ওপর অগ্রগণ্য। বিশেষত পিতামাতা বার্বক্যে উপনীত হলে তাদের ভরণপোষণের দায়িত্ব উপার্জনক্ষম সন্তানদের।

৪. শ্রমিক মালিক সম্পর্কের একটি চমকপ্রদ নমুনা এ হাদীসে তুলে ধরা হয়েছে। মালিকের নিকট শ্রমিকের কোন পাওনা গচ্ছিত থাকলে তা হারাম উপায়ে নয় বরং হালাল পন্থায় লাভজনক ব্যবসায়ে খাঁটিয়ে যতদূর সম্ভব বাড়িয়ে ফেরত দেওয়া বাধ্যতামূলক না হলেও মহৎ কাজ। আর না হোক, চাওয়ামাত্র টালবাহানা না করে আসল পাওনা সম্পূর্ণরূপে ফেরত দেয়া বাঞ্ছনীয়। শ্রমিকের উৎপাদনের লভ্যাংশে শরীক করার প্রতি উৎসাহ প্রদানও এ হাদীসের অন্যতম লক্ষ্য বলে প্রতীয়মান হয়।

৫. বিপন্ন মানুষকে, বিশেষত নারীকে তার অসহায়ত্বের সুযোগ নিয়ে স্বার্থোদ্ধারের মানসে কোন সাহায্য করা অত্যন্ত নিষ্ঠুর ধরনের শোষণ ও ঘৃণ্য

মানসিকতার পরিচায়ক ।

৬. শত বিপদাপদ ও নির্যাতনের ভিতরেও জুলুমকারীকে সদুপদেশ দান, সতর্ক করা ও খোদাভীতির শিক্ষা দিতে কুণ্ঠিত হওয়া চাই না। মুসলিম নারী ক্রীতদাসী হয়েও স্বীয় জালেম ও অমুসলিম মনিবকে ক্রমাগত সদুপদেশ দিতে দিতে নিষ্ঠাবান মুসলিমে পরিণত করেছে-এমন দৃষ্টান্তও বিরল নয়। আলোচ্য হাদীসটিতে এক দুর্ভিক্ষপীড়িত মুসলিম রমণীর সততা, চারিত্রিক দৃঢ়তা ও সতীত্ব লক্ষণীয়।

৭. সর্ববিস্তার পরামর্শের ভিত্তিতে কাজ করা ও আল্লাহর সাহায্য কামনা করা কর্তব্য। যেমন আল্লাহর ঐ তিন বান্দা করেছিলেন।

## ৭৮। লুকমান হাকীমের কিসসা

হযরত লুকমান হাকীম হযরত দাউদ (আ.) এর সমসাময়িক একজন অত্যন্ত জ্ঞানী গুণী ব্যক্তি ছিলেন। পবিত্র কুরআনে তার নাম উল্লেখ করত : তার কতিপয় উপদেশ উদ্ধৃত করা হয়েছে। নবী না হয়েও কুরআনে তার মত এত গুরুত্ব আর কোন ব্যক্তি পান নি। নবী বা রাসুল না হওয়া সত্ত্বেও তার কথাবার্তা ও আচরণে নবীসুলভ বিজ্ঞতা, বিচক্ষণতা ও সততা প্রতিফলিত হতো। এজন্য তিনি লুকমান হাকীম নামে পরিচিত ছিলেন।

হযরত লুকমানের জন্মস্থান বা বংশ পরিচয় সংক্রান্ত কোন তথ্য নির্ভরযোগ্য সূত্রে পাওয়া যায় না। বিভিন্ন বর্ণনা থেকে তার সম্পর্কে শুধু নিম্নোক্ত তথ্য সমূহ জানা যায়ঃ

প্রথম জীবনে তিনি সিরিয়ায় এক ধনবান ব্যক্তির অধীনে গোলামীর জীবন যাপন করেন। তারপর তার মধ্যে অসাধারণ জ্ঞান ও বুদ্ধিমত্তার পরিচয় পেয়ে তার মনিব তাকে মুক্ত করে দেয়।

গোলামী জীবনের পূর্বে তিনি মেস রাখাল ছিলেন বলে জানা যায়। সেই সময় তার সমবয়সী আর এক রাখালও তার সাথে মেস চরাতো। তাদের মধ্যে প্রগাঢ় বন্ধুত্ব ছিল।

পরবর্তীকালে যখন হযরত লুকমান একজন হাকীম অর্থাৎ জ্ঞানী ব্যক্তিরূপে প্রসিদ্ধি লাভ করেন, তখন তার সেই বাল্য বন্ধুটি একদিন তাকে একটি বিরাট জনসমাবেশে ওয়ায নসিহত করতে দেখে। সে সমাবেশ শেষে তাকে জিজ্ঞাসা করে যে, তুমি কি সেই ব্যক্তি নও, যার সাথে আমি মাঠে বকরী চড়াতাম। হযরত লুকমান বললেন, হা, তুমি আমাকে ঠিকই চিনেছ। আমি বাল্যকালে

বকরী চরাতাম। সে জিজ্ঞাসা করলো, তুমি এই মর্যাদা কিভাবে অর্জন করলে? তিনি বললেন : আমি চারটি স্বভাব দ্বারা এই মর্যাদা লাভ করেছি : (১) কখনো হারাম সম্পদ উপার্জন করিনি। (২) কখনো মিথ্যা বলিনি। (৩) কখনো আমানতের খেয়ানত করিনি। (৪) কখনো সময়ের অপচয় করিনি।

অসাধারণ বুদ্ধিমত্তা প্রসূত ও জ্ঞানদীপ্ত কথা ও কর্মকাণ্ডকে হিকমত বলা হয়ে থাকে। পবিত্র কুরআনে ও বিভিন্ন নির্ভরযোগ্য রেওয়াজেতে হযরত লুকমানের যে সব হিকমত বর্ণিত হয়েছে, তার কিছু কিছু নিম্নে তুলে ধরা হয়েছেঃ

**পবিত্র কুরআনে বর্ণিত হিকমতের বাণী:-**

**নিজ পুত্রকে প্রদত্ত উপদেশাবলী**

(১) হে বৎস! আল্লাহর সাথে কাউকে শরীক করো না। আল্লাহর সাথে শরীক করা একটি মারাত্মক জুলুম।

(২) হে বৎস! তুমি যদি একটি তিলের মত ক্ষুদ্র আকার ধারণ কর, অতঃপর কোন পাথরের অভ্যন্তরে অথবা আকাশের অপরে অথবা ভূগর্ভে আত্মগোপন কর, তবুও আল্লাহ সেখান থেকে তোমাকে বের করবেন।

(৩) হে বৎস! তুমি নামায কায়েম কর, সং কাজের আদেশ দাও, অসং কাজ থেকে নিষেধ কর এবং এই পথে যে বিপদ আপদের সম্মুখীন হও, তাতে ধৈর্য ধারণ কর।

(৪) মানুষের সাথে আচরণের সময় মুখ বিকৃত করো না এবং পৃথিবীতে অহংকারের সাথে চলাফেরা করো না। ধীরস্থিরভাবে চলাফেরা কর এবং অনুচ কণ্ঠে কথা বল।

**রেওয়াজেত থেকে প্রাপ্ত হিকমতের বিবরণ:-**

১. হযরত লুকমান যখন গোলামীর জীবন যাপন করতেন, তখন একই মনিবের অধীন তার সাথে আরো একটি গোলাম কর্মরত ছিল। একবার সেই গোলামটি মনিবের কোন খাদ্যদ্রব্য চুরি করে খেয়ে ফেলে। মনিব উভয়কে দোষারোপ করেন এতে হযরত লুকমান ভীষণ চিন্তিত হয়ে পড়েন। কিভাবে নিজেকে নির্দোষ প্রমাণ করবেন, তা নিয়ে ভাবতে লাগলেন। অতঃপর মনিবকে পরামর্শ দিলেন যে, আপনি আমাদের দু'জনকে গরম পানি খাইয়ে দিন। এতে উভয়ের বমি হবে এবং যে প্রকৃত চোর, তার পেট থেকে বমির সাথে ভক্ষিত জিনিষের অংশ বেরিয়ে পড়বে। মনিব তার পরামর্শ মত কাজ করলেন এবং হযরত লুকমান নির্দোষ সাব্যস্ত হলেন।

এই ঘটনা থেকে এই শিক্ষা পাওয়া যায় যে, কো ন মিথ্যা অপবাদ মাথায় নিয়ে কারো চূপ করে বসে থাকার উচিত নয়। তাৎক্ষণিকভাবে তার প্রতিবাদ করা

উচিত এবং নিজেকে নির্দোষ প্রমাণ করার চেষ্টা করা উচিত ।

২. একবার হযরত লুকমানের মনিব তার বন্ধুর সাথে পাশা খেলে হেরে যান । খেলার যে বাজী পূর্বাঙ্কে নির্ধারিত হয়েছিল, সে অনুসারে হয় তাকে তার সমস্ত সম্পদ বিজয়ী বন্ধুকে দিতে হবে, নতুবা পার্শ্ববর্তী নদীর সমস্ত পানি তাকে খেয়ে ফেলতে হবে । খেলায় হেরে যাবার পর বন্ধুটি তার মনিবকে এই দুটি শর্তের একটি অবিলম্বে পালন করার জন্য চাপ দিতে লাগলো । মনিব অতি কষ্টে তার বন্ধুর কাছ থেকে একদিন সময় নিয়ে বাড়িতে চলে এল এবং লুকমানকে সমস্ত বিষয় খুলে বললো । লুকমান একটু চিন্তা করেই তাকে বললেন : আপনি আমার বন্ধুকে এক কানাকড়িও দেবেন না । বরং নদীর পানি খেয়ে ফেলার শর্তটাই পালন করতে ইচ্ছা প্রকাশ করবেন । তবে তাকে বলবেন, প্রথমে সে যেন নদীর দু'পাশে বাধ দিয়ে দেয় । তা না হলে এক দিক দিয়ে পানি খেয়ে ফেললে অন্য দিক থেকে নদীতে আরো পানি ঢুকে পড়বে । হযরত লুকমানের শিখানো এই বুদ্ধিতে তার মনিব বিপদ থেকে রক্ষা পেল এবং তার বন্ধু অবৈধভাবে বন্ধুর অর্থ আত্মসাতের সুযোগ থেকে বঞ্চিত হলো । এতে খুশী হয়ে মনিব তাকে মুক্তি দিলেন ।

এই ঘটনা থেকে শিক্ষা পাওয়া যায় যে, মানুষকে অন্যের জুলুম ও শোষণ থেকে বাঁচানোর জন্য যেখানে শক্তি প্রয়োগের পথ বন্ধ, সেখানে কৌশল প্রয়োগ করতে হবে ।

৩. আর একদিন হযরত লুকমান হাকীমের মনিব তাকে আদেশ দিল যে, আমার জন্য একটি বকরী যবাই করে তার দেহের সর্বোত্তম অংশ রান্না করে নিয়ে এস । হযরত লুকমান বকরীর হৃদপিণ্ড ও জিহবা রান্না করে আনলেন । পরদিন মনিব আবার নির্দেশ দিলেন বকরীর সবচেয়ে নিকৃষ্ট অংশ রান্না করতে । লুকমান আবারো হৃদপিণ্ড ও জিহবা রান্না করে খাওয়ালেন । মনিব জিজ্ঞাসা করলো : কি হে লুকমান! আজও দেখি, তুমি একই অংগ রান্না করে এনেছ । একই অংগ সবচেয়ে উৎকৃষ্ট ও সবচেয়ে নিকৃষ্ট কিভাবে হয়? হযরত লুকমান বললেন : যে কোন জীবের জিহবা ও হৃদপিণ্ডই তার প্রধান অংগ । এই দুটি যখন ভালো থাকে, তখন সেও হয় উৎকৃষ্ট জীব । আর এ দুটি যখন খারাপ হয়, তখন সে হয় নিকৃষ্ট জীব ।

এই ঘটনা থেকে প্রকারান্তরে হযরত লুকমান শিক্ষা দিলেন যে, মানুষের বেলায়ও এই কথা প্রযোজ্য । সে যদি তার হৃদয় দিয়ে সং চিন্তা করে এবং জিহবা দিয়ে সং কথা বলে, পবিত্র জিনিস পানাহার করে, তবে সে সর্বোত্তম

প্রাণীতে পরিণত হতে পারে, নতুবা নিকৃষ্টতম প্রাণীতে পরিণত হবে। বলা বাহুল্য, তার এ হিকমতটি হাদীস ও কুরআনের সাথে পুরোপুরি সামঞ্জস্যপূর্ণ।

৪. আর একদিন হযরত লুকমানের মনিব তাকে নির্দেশ দিল তার যমীনে তিল বপন করতে। হযরত লুকমান চালাকী করে তিলের পরিবর্তে সরিষা বপন করলেন। পরে যখন ফসল জন্মালো, তখন মনিব বললো, আমি তো তোমাকে তিল বপন করতে বলেছিলাম। তুমি সরিষা বপন করলে কেন? হযরত লুকমান বললেন : আমি তো ভেবেছিলাম, সরিষা বুনলেই তিল হবে। মনিব বললেন : তা কি করে হয়? তখন হযরত লুকমান বললেন : আপনি যখন সব সময় পাপ কাজ করে উত্তম ফল বেহেশত পাওয়ার আশা করেন, তখন সরিষা বুনে আমি তিল পাওয়ার আশা করলে দোষ কী? এ কথা শুনে মনিব চমকে উঠলো এবং নিজের ভুল বুঝতে পেরে তওবা করলো।

৫. আর একবার লুকমান হাকীম একটি জাহাজে আরোহন করে সমুদ্র পাড়ি দিচ্ছিলেন। জাহাজে একজন সওদাগর ও তার সাথে একটি বালক ভৃত্য ছিল। জাহাজ সমুদ্রের মাঝখানে গেলে তার উত্তাল তরংগমালা দেখে বালকটি বিকট চিৎকার করে কান্নাকাটি জুড়ে দিল। সে জীবনে আগে কখনো সমুদ্র দেখে নি। তাই সমুদ্রের মাঝখানে এসে সে ভয়ে কাঁদতে লাগলো। সওদাগর অনেক বুঝিয়ে সুজিয়ে তাকে শান্ত করার চেষ্টা করলেন। কিন্তু কোনই লাভ হলো না। এই অবস্থা দেখে লুকমান হাকীম সওদাগরের কাছে এগিয়ে গেলেন এবং তাকে বললেন, 'আপনি বোধ হয়, বালকটির কান্নাকাটি থামাতে ব্যর্থ হয়েছেন। যদি কিছু মনে না করেন, আমি চেষ্টা করে দেখতে পারি। সওদাগর সানন্দে রাশী হলো। লুকমান বালকটিকে নিয়ে জাহাজের এক প্রান্তে চলে এলেন। তারপর তার হোমরে একটি রশি দিয়ে শক্ত করে বাধলেন। অতঃপর তাকে সাগরের পানির মধ্যে ফেলে দিয়ে কিছুক্ষণ রশি ধরে টেনে নিয়ে চললেন। বালকটি পানিতে পড়বার সময় গগণবিদারী একটা চিৎকার দিল। কিন্তু তারপরই নিরবে হাবুডুবু খেতে লাগলো। কিছুক্ষণ পর লুকমান তাকে টেনে তুললেন এবং সওদাগরের কাছে রেখে এলেন। এবার সে আর কান্নাকাটি করলো না। শান্ত হয়ে বসে থাকলো। সওদাগর বিস্মিত হয়ে লুকমানকে জিজ্ঞাসা করলেন, এ অসম্ভবকে আপনি কিভাবে সম্ভব করলেন? লুকমান বললেন : ব্যাপারটা কঠিন কিছু ছিল না। বালকটি সমুদ্র কখনো দেখেনি। তাই সমুদ্রের ভয়াল চেহারা দর্শনই তাকে ভয়ে দিশেহারা করে দেয়ার জন্য যথেষ্ট ছিল। কিন্তু যখন সে দেখলো, সমুদ্রের পানিতে পড়ে যাওয়া বা ডুবে যাওয়া আরো ভয়াবহ ব্যাপার।

তখন তার কাছে জাহাজে বসে সমুদ্র দেখা অপেক্ষাকৃত আরামদায়ক কাজ বলে মনে হতে লাগলো । এ জন্যই সে এখন শান্ত । আমি বিষয়টা প্রথমেই বুঝে নিয়ে এই কৌশল প্রয়োগ করেছি ।

এই ঘটনা থেকে শিক্ষা পাওয়া যায় যে, বিপদ দেখেই অস্থির হওয়া বুদ্ধিমানের কাজ নয় । মনে রাখতে হবে যে, যে বিপদ এখন সামনে এসেছে ভবিষ্যতে তার চেয়েও বড় বিপদ আশা বিচিত্র কিছু নয় ।

## ৭৯ । নামায সংক্রান্ত কয়েকটি ঘটনা

বর্ণিত আছে যে, বনী ইসরাইলের এক মহিলা একবার হযরত মূসার (আ.) কাছে এল । সে বললো : হে আল্লাহর রাসুল । আমি একটি ভীষণ পাপের কাজ করেছি । পরে তওবাও করেছি । আপনি দোয়া করুন যেন আল্লাহ আমাকে ক্ষমা করেন । মূসা (আ.) বললেন : তুমি কী গুনাহ করেছো? সে বললো : আমি ব্যভিচার করেছিলাম । অতঃপর একটি অবৈধ সন্তান প্রসব করি এবং তাকে হত্যা করে ফেলি । মূসা (আ.) বললেন : “হে মহাপাতকিনী । এক্ষুনি বেরিয়ে যাও । আমার আশংকা, আকাশ থেকে এক্ষুনি আগুন নামবে এবং তাতে আমরা সবাই ভস্মীভূত হবো ।” মহিলাটি ভগ্ন হৃদয়ে বেরিয়ে গেল । অল্পক্ষণ পরেই জিবরীল (আ.) এলেন । তিনি বললেন : “হে মূসা! আল্লাহ আপনাকে জিজ্ঞাসা করেছেন কী কারণে এই তওবাকারিণীকে তাড়িয়ে দিলেন? তার চেয়েও কি কোন অধম মানুষকে আপনি দেখেন নি?” মূসা বললেন : “হে জিবরীল! এর চেয়ে পাপিষ্ঠ কে আছে?” জিবরীল (আ.) বললেন : “ইচ্ছাকৃতভাবে নামায তরককারী ।”

অপর একটি ঘটনায় বর্ণিত আছে যে, এক ব্যক্তি তার বোনের দাফন কাফন সম্পন্ন করে বাড়ি ফিরে গিয়ে দেখলো তার মানিব্যাগটি নেই । পরে তার মনে হলো, ওটা কবরের ভেতর পরে গেছে । তাই সে ফিরে গিয়ে কবর খুঁড়লো । দেখলো, কবর জুড়ে দাউ দাউ করে আগুন জলছে । সে পুনরায় মাটি চাপা দিয়ে কাঁদতে কাঁদতে বাড়ি গেল । তার মায়ের কাছে সমস্ত ঘটনা জানালে তিনি বললেন, মেয়েটি নামাযের ব্যাপারে খামখেয়ালী করতো এবং সময় গড়িয়ে গেলে নামায পড়তো । বিনা ওজরে নামায কাযা করলে যদি এরূপ পরিণতি হতে পারে তাহলে বেনামাযীর পরিণাম কত ভয়াবহ হতে পারে । তা ভাবতেও গা শিউরে উঠে ।

শুধু নির্ধারিত সময়ের মধ্যে নামায পড়াই যথেষ্ট নয় । নামাযকে সুষ্ঠুভাবে ও

বিশুদ্ধভাবে পড়াও জরুরি। নচেত অশুদ্ধ নামায পড়া নামায না পড়ারই সমতুল্য। বুখারী ও মুসলিম শরীফে বর্ণিত আছে যে, একদিন এক ব্যক্তি মসজিদে নববীতে প্রবেশ করলো। রাসুল (সা.) তখন মসজিদেই বসে ছিলেন। লোকটি নামায পড়লো। অতঃপর রাসুল (সা.) এর কাছে এসে সালাম করলো। তিনি সালামের জবাব দিয়ে বললেন : তুমি ফিরে যাও এবং নামায পড়। কারণ তুমি নামায পড়নি। সে চলে গেল এবং আগের মত আবার নামায পড়ে রাসুল (সা.) এর কাছে এসে সালাম করলো। তিনি সালামের জবাব দিয়ে আবার বললেন : তুমি ফিরে যাও এবং নামায পড়। কেননা তুমি নামায পড়নি। এরূপ তিনবার নামায পড়ার পর লোকটি বললো : হে আল্লাহর রাসুল। আমি এর চেয়ে ভালো ভাবে নামায পড়তে পারি না। আমাকে শিখিয়ে দিন। তিনি বললেন : “প্রথমে নামাযে দাঁড়িয়ে তাকবীর বল। অতঃপর যতটুকু পার কুরআন পাঠ কর। অতঃপর রুকু কর এবং রুকুতে গিয়ে স্থির হও। অতঃপর উঠে সোজা হয়ে দাঁড়াও। তারপর সিজদা দাও এবং সিজদায় গিয়ে স্থির হও। তারপর স্থির হয়ে বস। অতঃপর আবার সিজদা দাও এবং সিজদায় স্থির হও। এভাবে নামায শেষ কর।”

**শিক্ষা :** ঈমানের পরেই নামায সবচেয়ে গুরুত্বপূর্ণ কর্তব্য। সময়ানুবর্তীতার সাথে ও বিশুদ্ধভাবে নামায না পড়লে আখেরাতে নাজাত লাভের আশা করা যায় না।

## ৮০। উদ্যানের মালিকদের ঘটনা

হযরত ইবনে আব্বাস (রা.) হতে বর্ণিত আছে যে, ইয়ামানে একটি চমৎকার ফলের বাগান ছিল। হযরত ঈসা (আ.) এর উম্মতের জনৈক মুমিন ও সৎকর্মশীল ব্যক্তি এই উদ্যানটি তৈরি করেছিলেন। তাঁর নিয়ম ছিল যে, ঐ উদ্যানের ফলমূল আহরণের সময় তিনি দরিদ্র লোকদের জন্য তার একটা অংশ রেখে দিতেন। ফলে সেখান হতে খাদ্যশস্য আহরণ করে জীবিকা নির্বাহ করা তাদের অভ্যাসে পরিণত হয়েছিল এবং ঐ বাগানের ওপর তাদের অনেকাংশে জীবিকা নির্ভরশীল হয়ে পড়েছিল। এজন্য প্রতিবছর ফসল কাটার মওসুমে সেখানে ফকীর মিসকীনদের ভিড় লেগে যেত।

হযরত ঈসা (আ.) এর আকাশে উত্থিত হওয়ার কিছুকাল পর এই পুণ্যবান ব্যক্তিও ইন্তিকাল করেন। তাঁর তিন পুত্র ঐ বাগান ও ক্ষেতের উত্তরাধিকারী হলো। তারা পরস্পর এই মর্মে শলাপরামর্শ করলো যে, এখন আমাদের সদস্য

বেড়ে গেছে। সেই অনুপাতে ফসলের ফলন হচ্ছে না। তাই এখন আর পিতার আমলের মত ফকীর মিসকীনদের জন্য ফসল ও ফলমূল রেখে দেওয়া সম্ভব নয়। কোন কোন রেওয়াজাতে আছে যে, কোন কোন পুত্র এও পর্যন্ত বললো যে, আমাদের পিতাতো বোকা ছিল বলে ফলমূল বিলাতো। এখন আমাদের ঐ প্রথা বন্ধ করে দিতে হবে। তারা স্থির করলো যে, ভোরবেলা বেশ খানিকটা রাত থাকতে উঠে ফসল কেটে আনা হবে, যাতে ফকীর মিসকীনরা টের না পায় এবং বাগানের কাছে ভীড় না জমায়। তারা দৃঢ়ভাবে সংকল্প নিল যে, ফকীর-মিসকীনদের জন্য কোন অংশই রাখা হবে না।

কিন্তু ভোররাতের নির্দিষ্ট সময় ঘনিয়ে আসার আগেই ঐ বাগানে এক ভয়াবহ আগুনে ঝড় এসে সমস্ত ফসলকে জ্বালিয়ে ভস্ম করে দিল। অথচ বাগানের মালিকেরা এ ঘটনার বিন্দু বিসর্গও টের পেল না। কারণ তারা ঘুমিয়ে ছিল এবং ঐ ঝড় নির্দিষ্ট বাগান ছাড়া অন্য কোথাও আঘাত হানেনি।

ভোররাত্তে তারা যথাসময়ে বাগানে গিয়ে দেখে সেখানে একটা ফাঁকা ময়দান ছাড়া আর কিছুই নেই। প্রথমে তারা ভাবলো তারা পথ ভুলে অন্য কোথাও এসে পড়েছে। কিন্তু কিছুক্ষণ পরেই তারা সবকিছু বুঝতে পারলো এবং অনুশোচনা করতে লাগলো। পরে তারা তাওবা করে। ইমাম বাগাওয়ী বর্ণনা করেন যে, তাওবা করার পর আল্লাহ তাদেরকে আরো ভালো একটা উদ্যান দান করেছিলেন এবং তারা তাদের পিতার নীতি অনুসরণ করে আরো সমৃদ্ধশালী হয়েছিল।

**শিক্ষা :** এই ঘটনাটি পবিত্র কুরআনের সূরা কালামে সংক্ষেপে বর্ণিত হয়েছে। এর শিক্ষা এই যে, আল্লাহর দেয়া সম্পত্তি হতে আল্লাহর পথে ব্যয় করতে থাকলে আল্লাহ সেই সম্পদ আরো বাড়িয়ে দেন, তেমনি দান বন্ধ করলে তিনি তা ধ্বংস ও করে দিতে পারেন। বিশেষত, যেখানে কোনো সংকর্ম আগে হতে চালু রয়েছে সেখানে তা বন্ধ করে দিলে আল্লাহর গয়ব নাযিল হওয়া অবধারিত হয়ে যায়। পবিত্র কুরআনে আল্লাহ তায়ালা বলেছেন, “তোমরা যদি আমার নিয়ামতের শোকর আদায় কর, তবে আমি তা আরো বাড়িয়ে দেব। আর যদি নাশোকরী কর তবে জেনে রেখ, আমার আযাব অত্যন্ত ভয়ঙ্কর।” (সূরা ইবরাহীম)। এ কথা সহজেই বোধগম্য যে, আল্লাহর দেয়া সম্পদ হতে দরিদ্রদেরকে বঞ্চিত করা এবং শুধু নিজেই সম্পূর্ণ ভোগ করা চরম নাশোকরী ও অকৃতজ্ঞতার শামিল।



## ৮১। আল্লাহর প্রিয় বান্দাদের বিরুদ্ধে শত্রুতার পরিণাম

হযরত ইবনে আব্বাস থেকে বর্ণিত আছে যে, হযরত মুসা (আ.) এর আমলে বনী ইসরাইল গোত্রে একজন নামকরা আলেম ছিলেন। তার নাম ছিল বালয়াম বাউরা। তিনি তাওরাতের হাফেয ও মুফাসসির ছিলেন এবং ইসমে আযম জানতেন। তার একটি বিশেষ মর্যাদা ছিল এই যে, আল্লাহর ইসমে আযম উচ্চারণ করে তিনি যে দোয়াই করতেন, তা আল্লাহ কবুল করতেন এবং এ বিষয়টি বনী ইসরাইল ও অন্যান্য গোত্রের লোকদের জানা ছিল।

হযরত মুসা (আ.) যতদিন জীবিত ছিলেন, ততদিন বালয়াম বাউরা কিনানে বনী ইসরাইলের ঘনিষ্ঠ সান্নিধ্যে বাস করতেন এবং তাদের ও হযরত মুসা (আ.) এর সংগে তার ভালো সম্পর্ক ছিল। কিন্তু হযরত মুসা (আ.) এর ইন্তিকালের পর যখন তার ভাগ্নে হযরত ইউশা ইবনে নূন (আ.) বনী ইসরাইলের শাসক ও খলীফা নিযুক্ত হন, তখন বালয়াম বাউরা তার সরকারের একটি উচ্চ পদ লাভের প্রত্যাশা করেন। কিন্তু হযরত ইউশা (আ.) তা দিতে অস্বীকার করায় তিনি অসন্তুষ্ট হয়ে পার্শ্ববর্তী মোশরেক রাজ্য বেলকায় গিয়ে বসতি স্থাপন করেন। এই রাজ্যের রাজা তাকে বসবাসের জন্য একখণ্ড জমি দান করেন এবং সেখানে তিনি বাড়ী বানিয়ে বসবাস করতে থাকেন।

এদিকে হযরত ইউশা (আ.) এর নেতৃত্বে বনী ইসরাইল পার্শ্ববর্তী ইল্লিয়া রাজ্য জয় করে বেলকা রাজ্যের সীমান্তে উপনীত হয়। বেলকার মোশরেক রাজ্য দখল করে সেখানে ইসলামের পতাকা উত্তোলন করার জন্য আল্লাহ তায়ালা তাকে আদেশ দেন। তদানুসারে হযরত ইউশা বেলকা রাজ্যের মোশরেক রাজাকে ইসলাম গ্রহণ নতুবা আত্মসমর্পনের জন্য চরমপত্র দেন। বেলকার রাজা চরমপত্র প্রত্যাখ্যান করে হযরত ইউশার বিরুদ্ধে যুদ্ধ ঘোষণা করে। উভয় পক্ষে তুমুল যুদ্ধ হয় এবং তাতে হযরত ইউশার বাহিনী বিজয়ী হয়। বেলকার রাজার সৈন্যদের একাংশ নিহত হয় এবং অপরাংশ পালিয়ে যায়। এই অবস্থায় অনন্যোপায় হয়ে উক্ত রাজা বালয়াম বাউরার শরণাপন্ন হয়। সে তার নিকট উপস্থিত হয়ে বলে যে, আমার এই বিপদের দিনে আপনার সাহায্য আমার একান্ত প্রয়োজন। আপনি আপনার আল্লাহর নিকট দোয়া করুন যেন আমরা ইউশার সৈন্যদের বিরুদ্ধে যুদ্ধ করে জয়লাভ করতে পারি এবং তাকে তাড়িয়ে দিতে পারি।

বালয়াম বাউরা বললেন, হযরত ইউশা (আ.) আল্লাহর নবী ও প্রিয় ব্যক্তি। তার বিরুদ্ধে দোয়া করা আমার পক্ষে ঘোরতর পাপের কাজ হবে। তাছাড়া

এরূপ দোয়া কবুল হওয়ার আশা করা যায় না। আপনি বরঞ্চ ইসলাম গ্রহণ করুন। আপনার রাজ্য নিরাপদ থাকবে।

রাজা ভীষণ ক্রুদ্ধ হলো। সে বালয়াম বাউরাকে একদিকে হত্যার ভীতি প্রদর্শন করতে লাগলো, অপরদিকে বালয়াম বাউরার স্ত্রীর কাছে গোপনে দূত পাঠিয়ে বিপুল অর্থ প্রদানের প্রলোভন দিতে লাগলো। বালয়াম বাউরা দেখলেন, তিনি আপনজনদের নিকট থেকে বিচ্ছিন্ন হয়ে একটি কাফের রাজ্যে আশ্রয় গ্রহণ করে তাদের মুঠোর মধ্যে চরম অসহায় অবস্থায় পতিত হয়েছেন। এখানে রাজার বিপুল শক্তির মোকাবিলা করা তার সাধ্যাতীত। অপরদিকে অর্থের প্রলোভনেও তিনি দিশেহারা হয়ে পড়লেন। তাই তিনি রাজাকে বললেন, আমাকে একদিন সময় দিন। রাজা তাকে সময় দিল। বালয়াম বাউরার নিয়ম ছিল, কোন বিষয়ে দোয়া করতে হলে প্রথমে আল্লাহর কাছে অনুমতি চাইতেন। আল্লাহ তাকে সপ্নের মাধ্যমে জানিয়ে দিতেন অনুমতি দেয়া হলো কি না। একদিন সময় নিয়ে বালয়াম বাউরা আল্লাহর কাছে অনুমতি চাইলেন। আল্লাহ তাকে সপ্নের মাধ্যমে জানিয়ে দিলেন যে, আমার নবীর বিরুদ্ধে কোন দোয়া গ্রহণযোগ্য নয় এবং এরূপ দোয়া করলে তোমার দুনিয়া ও আখেরাত উভয়ই বরবাদ হয়ে যাবে।

বালয়াম বাউরা রাজাকে তার সপ্নের কথা জানালেন। রাজা তাকে বললেন, আপনাকে আরো একদিন সময় দেয়া গেল। আবার অনুমতি প্রার্থনা করুন। বালয়াম বাউরা আবারো অনুমতি প্রার্থনা করে ঘুমিয়ে গেলেন। এবার তাকে সপ্নে কিছুই জানানো হলো না। বালয়াম বাউরা কিছুটা বিভ্রান্তির মধ্যে পড়ে গেলেন। তিনি কিংকর্তব্যবিমূঢ় হয়ে বসে আছেন এমন সময় রাজার দূত এসে তাকে আবার তাড়া দিল দোয়া করার জন্য। এই সময় শয়তান তাকে এই মর্মে প্ররোচনা দিল যে, গত রাতে আল্লাহ যে নীরবতা অবলম্বন করেছেন, তাকে মৌন সম্মতি ধরে নেয়া যায়। তাছাড়া দোয়ার মাধ্যমে কাফের বাদশাকে বিজয়ী হতে সাহায্য করলে সে হয়তো তার প্রতি কৃতজ্ঞ হবে এবং পরবর্তী সময়ে তাকে হেদায়েত করা সহজ হবে। অথচ তিনি একথা ভেবে দেখলেন না যে, আল্লাহর নবীর বিরুদ্ধে শত্রুতার আচরণ করা কত বড় মারাত্মক গুনাহর কাজ এবং এরূপ কাজ করে কোন বাতিল শক্তিকে সত্যের দিকে আকৃষ্ট করার আশা দুরাশা মাত্র। তাছাড়া যে কাজ আল্লাহর কিতাবে সুস্পষ্টভাবে নিষিদ্ধ করা হয়েছে, সপ্নের মাধ্যমে তার রদবদল হতে পারে না। আসলে দুনিয়াবী স্বার্থের মোহে অন্ধ হয়ে যাওয়ার কারণে তিনি এ দিকটি ভেবে দেখার প্রয়োজন বোধ করেননি।

বালয়াম বাউরা চিরাচরিত নিয়মে তার গাধার পিঠে চড়ে পাহাড়ের ওপর নির্মিত তার নির্জন ইবাদতখানায় রওনা হলেন রাজার পক্ষে দোয়া করার মতলবে। কোন কোন রেওয়াজেতে আছে যে, এই সময় আল্লাহর হুকুমে গাধাটির চলনশক্তি রহিত হয়ে যায়। বালয়াম বাউরা তাকে প্রহার করতে আরম্ভ করলে সে বাকশক্তি প্রাপ্ত হয় এবং বলে যে, তুমি যে উদ্দেশ্যে যাচ্ছ, আল্লাহ আমাকে সেজন্য তোমাকে বহন করে নিয়ে যেতে নিষেধ করেছেন। এই সময় রাজার লোকজনদের একটি বিরাট দল বালয়াম বাউরার সঙ্গে যাচ্ছিল। বালয়াম বাউরা অগত্যা সেই জায়গায় দাঁড়িয়েই দোয়া করলেন। কিন্তু তিনি যে দোয়া করলেন, তার মুখ দিয়ে ঠিক তার বিপরীত কথা তার অজান্তেই উচ্চারিত হতে লাগলো। তিনি বললেন “রাজাকে বিজয়ী কর।” কিন্তু সবাই শুনতে পেল, যেন তিনি বলছেন “হয়রত ইউশাকে বিজয়ী কর।” তাই রাজার লোকেরা চিৎকার করে প্রতিবাদ করতে লাগলো। তারা বললো, ও হে বালয়াম, আপনি তো উলটা দোয়া করছেন। বালয়াম বললেন, আমি ঠিকই দোয়া করছিলাম। কিন্তু আমার জিহবা এখন আমার আয়ত্তের বাইরে চলে গেছে। এই সময়ে বালয়াম বাউরার জিহবা হঠাৎ কুকুরের জিহবার মত লম্বা হয়ে বুকের ওপর ঝুলে পড়লো। কোন কোন রেওয়াজেতে আছে যে, শুধু জিহবা নয়, তার শরীরের ওপরের অর্ধাংশ কুকুরের মত হয়ে যায় এবং নিম্নাংশ মানুষের মত বহাল থাকে।

এবার বালয়াম বাউরা বললো, আমার তো দুনিয়া ও আখেরাত দুটোই বরবাদ হয়ে গেল। এখন তোমরা একটি কাজ কর। তোমরা তোমাদের সুন্দরী নারীদেরকে বনী ইসরাইলী সৈন্যদের মধ্যে লেলিয়ে দাও। এতে তারা ঐ নারীদের সাথে ব্যভিচারে লিপ্ত হবে এবং তাদের পরাজয় অবধারিত হবে। রাজা এই পরামর্শ অনুসারে কাজ করলো এবং সকল সুন্দরী যুবতীদেরকে সৈন্য বাহিনীর মধ্যে ছড়িয়ে দিল। বনী ইসরাইলী বাহিনী এই পরীক্ষায় কৃতকার্য হতে পারলো না। তারা ব্যভিচারে লিপ্ত হলো এবং তাদের মধ্যে প্লেগ ছড়িয়ে পড়লো। ফলে বহু সংখ্যক সৈন্য মারা গেল এবং পরাজয়ের সম্মুখীন হলো। আল্লাহর নবী হয়রত ইউশা (আ.) এই অবস্থা দেখে সেনাবাহিনীর মধ্যে আল্লাহর ভীতি জাগিয়ে তুললেন এবং বেহায়া নারীগুলিকে ধরে ধরে হত্যা করলেন। সেনাবাহিনীর মধ্যে শৃংখলা ও খোদাভীতি পুনরুজ্জীবিত হওয়ার পর তিনি পুণরায় সর্বশক্তি দিয়ে আক্রমণ চালালেন। এবার তার বাহিনী জয়যুক্ত হলো এবং বেলকার রাজ্য থেকে মোশরেক রাজার রাজত্ব সমূলে উৎখাত করা হলো। বালয়াম বাউরা যুদ্ধে মারা না গেলেও তার কাছ থেকে ইসমে আযম

কেড়ে নেয়া হলো এবং অতঃপর তার আর কোন দোয়া কবুল হতো না। আর তার দেহাকৃতিতে যে পরিবর্তন আনা হয়েছিল, তা তার মৃত্যু পর্যন্ত বহাল রইল। (তাফসীরে খাজেন, কাসাসুল আমিয়া, তাফসীরে মায়ারিফুল)

**শিক্ষা :** এই ঘটনা থেকে নিম্নলিখিত শিক্ষাসমূহ গ্রহণ করা যায়ঃ

১. নিজের জ্ঞান গরিমা ও ইবাদত উপাসনার ব্যাপারে কারো গর্বিত হওয়া উচিত নয়। কারণ শয়তান ও খোদাদ্রোহী মানুষদের প্ররোচনায় বিপথগামী হওয়া মোটেই বিচিত্র নয়, যদি আল্লাহ সাহায্য ও রহমত না করেন।

২. এমন পরিবেশ ও কার্যকলাপ থেকে দূরে থাকা উচিত, যাতে ঈমান ও চরিত্র বিপন্ন হবার আশংকা থাকে। বিশেষত : দুনিয়াবী স্বার্থের ক্ষতির কারণে উত্তেজিত হয়ে সংলোকদের সংসর্গ ত্যাগ করে অসৎ ও বাতিলপন্থীদের সংসর্গ গ্রহণ করা নিজের ঈমান ও চরিত্রকে বিপদের মুখে ঠেলে দেয়ার শামিল।

৩. কোন অবস্থাতেই আল্লাহর দ্বীন প্রতিষ্ঠার কাজে নিয়োজিত লোকদের সাথে শত্রুতা ও বিদ্বেষ পোষণ করা উচিত নয়। এক হাদীসে কুদসীতে আল্লাহ বলেছেন, যে ব্যক্তি আমার কোন প্রিয়জনের বিরুদ্ধে শত্রুতা পোষণ করে, তার বিরুদ্ধে আমি যুদ্ধ ঘোষণা করি।

৪. অসৎ ও পথভ্রষ্ট লোকদের সাথে সম্পর্ক রাখা এবং তাদের নিমন্ত্রণ ও উপহার-উপটোকন গ্রহণ করা থেকে বিরত থাকা উচিত। এ কাজ করেই বালয়াম বাউরা আল্লাহর গ্যবে পতিত হয়েছিল।

৫. অশ্লীলতা ও হারামের অনুসরণ গোটা জাতির ধ্বংস ও পতন ডেকে আনে।

৬. অসৎ কাজে ও অশ্লীলতায় প্ররোচনাদানকারীকে চাই সে নারী বা পুরুষ যেই হোক না কেন, কঠোর হস্তে দমন করা কর্তব্য।

৭. আল্লাহ প্রদত্ত সুযোগ সুবিধা, মেধা প্রতিভা এবং ক্ষমতা ও পদমর্যাদাকে আল্লাহ, আল্লাহর রাসূল ও আল্লাহর দ্বীনের ক্ষতি সাধনে ব্যবহার করা আল্লাহর গ্যবকে ডেকে আনার শামিল। এ ব্যাপারে সকলের সতর্ক থাকা উচিত।

## ৮২। হযরত আইউব (আ.) এর অগ্নিপরীক্ষা

হযরত আইউব (আ.) এমন একজন নবী ছিলেন, যাকে আল্লাহ তায়ালা দূরারোগ্য ব্যাধিতে আক্রান্ত করে কঠিন অগ্নিপরীক্ষায় নিষ্ক্ষেপ করেছিলেন। কিন্তু তিনি ধৈর্য অবলম্বন করে এই পরীক্ষায় উত্তীর্ণ হন। ফলে আল্লাহ তার প্রতি সন্তুষ্ট হয়ে তাকে সাবির অর্থাৎ ধৈর্যশীল উপাধিতে ভূষিত করেন।

প্রথম দিকে হযরত আইউব (আ.) ছিলেন অত্যন্ত সুখী ও সম্পদশালী মানুষ। তাঁর ছিল বহু ধন-সম্পদ, নয়নাভিরাম বাসভবন, বহু সন্তান-সন্ততি, চাকর বাকর ও গবাদি পশু। কিন্তু অল্প কিছুকাল পরেই তিনি পরীক্ষায় পতিত হন। তাঁর সমস্ত ধন সম্পদ ও চাকর নওকর তাঁর হাতছাড়া হয়ে যায়। উপরন্তু তাঁর শরীরে কুষ্ঠের মত এক মারাত্মক চর্মরোগ দেখা দেয়। জিহবা ও হৃৎপিণ্ড ছাড়া তাঁর শরীরের কোন অংশই ঐ রোগের কবল হতে মুক্ত ছিল না। সেই অবস্থায়ও তিনি জিহবা ও মন দিয়ে আল্লাহকে স্মরণ করতেন।

ঘৃণার উদ্বেককারী এই রোগের দরুণ তাঁর আপনজনরাও তাঁকে ছেড়ে চলে যায়। একমাত্র তাঁর স্ত্রী কাছে থেকে পরিচর্যা করতেন। তিনি ছিলেন হযরত ইউসুফ (আ.) এর মেয়ে বা পৌত্রী লাইয়া, মতান্তরে রহীমা, সমস্ত সহায় সম্পদ শেষ হয়ে গেলে তাঁর স্ত্রী মজুরী খেটে অর্থোপার্জন করে তা দিয়ে খাওয়া ও পরিচর্যার ব্যয় নির্বাহ করতেন।

হযরত আইউব (আ.) লোকালয়ের বাইরে গিয়ে এক নির্জন স্থানে প্রায় সাত বছর অবস্থান করেন। তাঁর কাছে কেউ আসতো না। তাঁর স্ত্রী যখন তাঁকে বললেন : আপনি এই বিপদ হতে উদ্ধার পাওয়ার জন্য আল্লাহর কাছে দোয়া করুন। তখন তিনি বললেন : আমি সত্তর বছর আল্লাহর নিয়ামতের মধ্যে কাটিয়েছি। মাত্র সাত বছর দুঃখ কষ্ট ভোগ করেই এত অস্থির হব কেন? যখন ধৈর্যধারণে অক্ষম হবো তখন এই দোয়া করবো।

অবশেষে এক সময় তার রোগ যন্ত্রণা যখন ধৈর্যের সীমা ছাড়িয়ে গেল তখন তিনি আল্লাহর কাছে দোয়া করলেন।

আল্লাহ তাঁর দোয়া কবুল করলে এবং তাঁকে আদেশ দিলেন : নিজের পায়ের গোড়ালি দ্বারা মাটিতে আঘাত কর। মাটি হতে স্বচ্ছ পানির ঝর্ণা ফুটে বেরবে। সেই পানি পান কর ও তা দ্বারা গোসল কর। হযরত আইয়ুব আদেশ পালন করলেন। ঝর্ণার পানি দ্বারা গোসল করা মাত্রই তার সমস্ত রোগ দূর হয়ে গেল এবং তিনি একজন সুস্থ সবল যুবকে পরিণত হলেন। আল্লাহ তায়ালা তাঁর জন্য বেহেশতী পোশাক পাঠিয়ে দিলেন। সেই পোশাক পরে তিনি পরিষ্কার জায়গায় বসে রইলেন।

ওদিকে তাঁর স্ত্রী প্রতিদিনের মত মজুরী খেটে তাঁর পরিচর্যা করতে এলেন। কিন্তু স্বামীকে যথাস্থানে না পেয়ে কাঁদতে লাগলেন। পাশে বসা সুস্থ সবল হযরত আইয়ুবকে দেখেও তিনি চিনতে পারলেন না। তিনি তাকেই জিজ্ঞাসা করলেন : এখানে যে রোগা লোকটি পড়ে ছিল, তাকে দেখেছেন নাকি? তাকে

কোন হিংস্র পশুতে খেয়ে ফেলেছেন এই আশংকায় তিনি কাঁদতে লাগলেন ।

হযরত আইউব (আ.) তাঁর স্ত্রীর কান্নাকাটি দেখে আর স্থির থাকতে পারলেন না । তিনি বললেন : আমিই আইয়ুব । আল্লাহ আমার দোয়া কবুল করে আমাকে স্বাস্থ্য ফিরিয়ে দিয়েছেন । এরপর আল্লাহ তাকে তার যাবতীয় ধন সম্পদ ও সন্তান সন্ততি ফিরিয়ে দেন ।

শিক্ষা : বিপদ হতে উদ্ধার পাওয়ার জন্য দোয়া ও চেষ্টার পাশাপাশি ধৈর্যধারণও করতে হবে । কেননা আল্লাহ প্রত্যেক বিপদ আপদ একটা নির্দিষ্ট সময়ের জন্য অবতীর্ণ করেন ঈমান ও ধৈর্যের পরীক্ষা নেওয়ার জন্য । যতক্ষণ আল্লাহর নির্ধারিত সময় অতিক্রান্ত না হয়, ততক্ষণ অপেক্ষা করতে হবে । রাসূল (সা.) বলেছেন : নবীগণ সবচেয়ে বেশী বিপদে আক্রান্ত হন, তাঁদের পর অন্যান্য সৎলোকেরা পর্যায়ক্রমে আক্রান্ত হন । প্রত্যেকের পরীক্ষা তার ঈমানের দৃঢ়তা অনুপাতে হয়ে থাকে ।

## ৮৩ । হযরত ঈসা (আ.) ও দাষ্টিক দরবেশ

বর্ণিত আছে, হযরত ঈসা (আ.) এর সময়ে ফিলিস্তিনে একজন প্রসিদ্ধ দরবেশ বাস করতো । সে হযরত ঈসার এমন প্রিয়পাত্র ছিল যে তিনি স্বয়ং কখনো কখনো তার খানকায় গিয়ে তাকে সদুপদেশ দিতেন । তৎকালে ঐ অঞ্চলে একজন কুখ্যাত নরঘাতক দস্যুও বাস করতো । সে শুধু ডাকাতি ও নরহত্যায়ই লিপ্ত ছিলো না, সেই সাথে সমসাময়িক জুলুমবাজ সরকারের পোষা গুন্ডা হিসেবে হযরত ঈসা ও তার সঙ্গীসাথীদের ওপর অকথ্য নির্যাতনও চালাতো । এজন্য অন্যান্যের মতো উল্লেখিত দরবেশও তাকে প্রচণ্ডভাবে ভয় পেত ও ঘৃণা করতো ।

সহসা এই দস্যুর জীবনে পরিবর্তন এল এবং সে ঈমান আনার জন্য হযরত ঈসার (আ.) সাথে সাক্ষাত করতে গেলো । হযরত ঈসা এ সময় নিজ বাসস্থানে ছিলেন না । দস্যুটি খোঁজ নিয়ে জানতে পারলো যে, তিনি উক্ত দরবেশের খানকায় আছেন । অগত্যা সে সেখানেই গিয়ে হাজির হলো । দরবেশের দরজায় কড়া নাড়লে ভেতর হতে দরবেশ উঁকি দিয়ে দেখতে পেল তার বহু পরিচিত সেই দস্যুটি দাঁড়িয়ে, যার হাতে তাকে পূর্বে বহু নির্যাতন সহিতে হয়েছে । সে ভেতর থেকে জিজ্ঞাসা করলো, “কে?” দস্যুটি জবাব দিল, “আমি অমুক, আমি

আল্লাহর নবী ঈসার (আ.) সাথে দেখা করতে চাই। আমি ঈমান আনতে চাই।” হযরত ঈসা ভিতরেই ছিলেন। তিনি দরবেশকে বললেন, “দরজা খুলে ওকে আসতে দাও।” কিন্তু দরবেশটি হযরত ঈসার আদর ও স্নেহ পেয়ে দাস্তিক ও একগুঁয়ে হয়ে উঠছিল। সে হযরত ঈসার সাথে বাক বিতন্ডা শুরু করে দিল। তাকে এই বদ লোকটির সাথে সাক্ষাত না করতে অনুরোধ করলো। হযরত ঈসা তাকে যতই বুঝান যে, সে যত খারাপই থাকুক এখন ভালো হতে এসেছে, তাকে সুযোগ দিতে হবে, দরবেশ ততই একগুঁয়ে হয়ে উঠেন। সে বললো, এই লোকটি এত পাপী যে, আল্লাহর নবী ও তার মত দরবেশের সাথে দেখা করারও অযোগ্য। এমনকি সে এতদূরও বললো যে, “এতবড় পাপী লোকের সাথে আল্লাহ যদি আমাকে পরকালে বেহেশতও দেন একসাথে, তবে তাও হবে আমার দোজখতুল্য।”

অতঃপর দরবেশের অনড় মনোভাব দেখে হযরত ঈসা (আ.) ওহীর নির্দেশ পেয়ে ঘর হতে বের হয়ে আসলেন এবং বাইরে একটি গাছের নীচে বসে দস্যুকে তাওবা করালেন ও ইসলাম গ্রহণ করালেন। এরপর হযরত ঈসার নিকট একটি ওহী নাযিল হলো। হযরত ঈসাকে আল্লাহ আদেশ দিলেন ঐ দরবেশকে জানিয়ে দেন যে, আল্লাহ তার মনের আশা পূরণ করার প্রতিশ্রুতি দিয়েছেন। তাকে এই নওমুসলিমের সাথে একত্রে বেহেশতে বাস করতে হবে না। প্রচণ্ড ঘৃণা ও হিংসার দায়ে আল্লাহ তার সকল নেক আমল বাতিল করে দিয়ে তার জন্য দোজখের ফায়সালা দিয়েছেন এবং তাওবাকারী আগন্তকের জন্য বেহেশতের।

শিক্ষা : কোন ব্যক্তি তওবার মাধ্যমে একনিষ্ঠভাবে সত্যের পথে ফিরে আসার পর তার বিরুদ্ধে তার পূর্ববর্তী জীবনের প্রাপ্ত কর্মকাণ্ডের জন্য ঘৃণা ও বিদ্বেষ পোষণ করা অন্যায়।

## ৮৪। হযরত ঈসা (আ.), তিন সহচর ও স্বর্ণের উট

একবার হযরত ঈসা (আ.) তাঁর তিন সহচরকে সাথে নিয়ে সফরে বেরলেন। পথিমধ্যে এক জায়গায় দু’টি স্বর্ণের ইট পাওয়া গেল। হযরত ঈসার (আ.) তিন সহচর সঙ্গে সঙ্গে ইট দু’খানা তুলে নিতে ছুটে এল। তিনি তাদেরকে তা স্পর্শ করতে নিষেধ করলেন, “এ দুটো স্বর্ণের ইট দ্বারা হয়তো আল্লাহ তায়ালা তোমাদের পরীক্ষা করতে চান। এ দু’টো ইট তোমাদের মধ্যে শত্রুতা সৃষ্টি করতে পারে।” কিন্তু ঐ তিন সহচর তাঁর উপদেশে কর্ণপাত করলো না।

তারা পরস্পর পরামর্শ করে একমত হলো যে, ইট দুটি তারা ভেঙ্গে অথবা বিক্রি করে ভাগ করে নিবে। হযরত ঈসা (আ.) তাদের অনড় মনোভাব দেখে বিরক্ত হয়ে তাদের ত্যাগ করে চলে গেলেন।

কিছুক্ষণ পর ঐ তিন সহচরের প্রচণ্ড ক্ষিধে পেলে তারা তাদের একজনকে খাবার আনতে পাঠালো। ইত্যবসরে অবশিষ্ট দুজন শয়তানের কু-প্ররোনায় ষড়যন্ত্র আটল যে, তাদের তৃতীয় সঙ্গী যেই খাবার নিয়ে আসবে, অমনি ওরা দু'জন তার ওপর হামলা চালিয়ে তাকে খতম করে ফেলবে। তাহলে ইট দু'খানা আর ভাগ করতে হবে না। দু'জনে আস্ত একখানা করে নিতে পারবে। ওদিকে যে সঙ্গীটি বাজারে খাবার কিনতে গিয়েছিল, শয়তান তাকেও বিপথগামী করল। সে নিজের খাবার খেয়ে নিল আর বাকি দু'জনের খাবারে বিষ মিশিয়ে আনল, যাতে ওরা দু'জনই মারা যায় এবং সে একাই ইট দু'খানা দখল করতে পারে।

যথাসময়ে খাবার নিয়ে তৃতীয় সঙ্গীটি ফিরে এলো আর সিদ্ধান্ত মোতাবেক তৎক্ষণাত দু'জনে বাঁড়িয়ে পড়ল তার ওপর। তারা মারতে মারতে তাকে মেরেই ফেলল। তারপর লাশটা এক পাশে সরিয়ে রেখে তারা পরম আনন্দে খেতে বসে গেল। আর যায় কোথায়। এক লোকমা খেতেই চিৎকার করে মৃত্যুর মুখে ঢলে পড়লো।

পরদিন হযরত ঈসা ঐ এলাকায় ফিরে এলে দেখলেন, তার তিন সহচরই মরে পড়ে আছে। আর তাদের লাশের পাশেই জ্বল জ্বল করছে স্বর্ণের ইট দু'টো।

শিক্ষা : এ কিসসাটিও অত্যন্ত শিক্ষামূলক। প্রথমত : চুক্তি লঙ্ঘন করে তারা নিজেদের সঙ্গী তথা শরীকদেরকে বধিগত করার ষড়যন্ত্র করেছিল, যার পরিণাম হয়েছিল অত্যন্ত করুণ ও মর্মান্তিক। তাই কখনো পারস্পরিক চুক্তি অথবা ওয়াদা লঙ্ঘন করা চাই না এবং কারো ন্যায্য অধিকার হরণ করা উচিত নয়।

দ্বিতীয়ত : তারা আল্লাহর নবীর সাথে একটি মহৎ উদ্দেশ্যে সফরে বেরিয়েছিল। পশ্চিমধ্যে পার্শ্বিক সম্পদের প্রলোভনে সেই মহৎ লক্ষ্য থেকে বিচ্যুত হয় এবং আল্লাহর নবীর নিষেধাজ্ঞাও অমান্য করে। তাই মনে রাখতে হবে, আল্লাহর ও রাসূলের নাফরমানী এবং বাতিলের প্রলোভনে সত্য হতে বিচ্যুত হওয়ার পরিণাম অত্যন্ত ভয়াবহ হয়ে থাকে।



## ৮৫। হযরত ইবরাহীম (আ.) ও বিবি সারার ঘটনা

একবার হযরত ইবরাহীম (আ.) স্বীয় স্ত্রী হযরত সারাকে সাথে নিয়ে সফর করছিলেন। পশ্চিমধ্যে একটি রাজ্যে তাকে যাত্রাবিরতি করতে হয়। ঐ রাজ্যের রাজা ছিল অত্যন্ত দুরাচারী যালেম। তার নিয়ম ছিল, কোন পথিকের সাথে তার স্ত্রী থাকলে সে স্ত্রীকে গ্রেফতার করে তার ওপর পাশবিক নির্যাতন চালাতো। তবে কেউ বোন বা মেয়েকে নিয়ে সফর করলে তাদের কোন ক্ষতি করতো না।

হযরত ইবরাহীমের সঙ্গীক ঐ রাজ্যে পৌছামাত্রই রাজার কাছে খবর পৌছে গেল। হযরত ইবরাহীম পূর্বাংহে এলাকার লোকদের কাছ হতে রাজার নিষ্ঠুর নিয়মের কথা জেনে গিয়েছিলেন। তাই তিনি আগে থেকে পরিকল্পনা করে রাখলেন যে, রাজার কাছে নীত হলে তিনি সারাকে স্ত্রী নয়, বোন বলে পরিচয় দেবেন।

যথাসময়ে রাজার প্রহরীরা তাঁদের উভয়কে ধরে রাজদরবারে নিয়ে গেল। রাজা জিজ্ঞেস করলেন, এই মহিলা তোমার কে? তিনি বললেন : আমার বোন। রাজা তার কথার সত্যতা যাচাই করার জন্য সারাকে আলাদা ডেকে নিয়ে জিজ্ঞেস করলেন। সারাও হযরত ইবরাহীমের শেখানো মত জানালেন যে, আমরা উভয়ে ভাইবোন। আসলে তাদের মনে মনে ছিল যে, তারা ইসলামী ভাই বোন-এই অর্থেই ঐ কথা বলবেন।

সারাকে জিজ্ঞাসাবাদের জন্য যখন আলাদা ডেকে নিয়ে যাওয়া হলো, তখন হযরত ইবরাহীম নামায পড়ে নিভূতে আল্লাহর কাছে কান্নাকাটি করতে লাগলেন এবং সারার নিরাপত্তার জন্য দোয়া করতে লাগলেন। অবশেষে সারার জবাবে সন্তুষ্ট হয়ে রাজা উভয়কে মুক্তি দিল।

### শিক্ষা :

১. যালেমের যুলুম হতে বাঁচার জন্য অন্য কোন উপায় না থাকলে মিথ্যার আশ্রয় নেয়া যাবে। তবে সেক্ষেত্রেও নির্জলা মিথ্যা বলার চেয়ে 'তাওরিয়া' করাই (পরোক্ষ অর্থে বলা) শ্রেয়। যেখানে এটাও সম্ভব না হবে, সেখানে আত্মরক্ষার জন্য নির্জলা মিথ্যা কথা বলাও বৈধ হবে।

২. ইসলামের দিকে আহ্বান জানানো যাদের জীবনের লক্ষ্য ও ব্রত, তাদেরকে হযরত ইবরাহীম (আ.) এর এই ঘটনা হতে শিক্ষা গ্রহণ করত : সংশ্লিষ্ট অঞ্চলে ও যুগের রীতি প্রথা সম্পর্কে ওয়াকিবহাল হতে হবে এবং কিভাবে বাধাবিঘ্ন অতিক্রম করা যায় সে ব্যাপারে বিচক্ষণতা ও দুরদর্শিতার সাথে পরিকল্পনা করতে হবে।

৩. যথাযথ বিচক্ষণতা ও কুশলতা প্রয়োগ করার পরও সাফল্যের জন্য আল্লাহর সাহায্য চাওয়া অব্যাহত রাখতে হবে। কোন অবস্থাতেই আল্লাহর সাহায্য চাওয়ার কথা ভুলে যাওয়া উচিত নয়।

## ৮৬। হযরত ইবরাহীম (আ.) ও ভিক্ষুক

বর্ণিত আছে যে, হযরত ইবরাহীম আলাইহিস সালাম এত অতিথিপরায়াণ ছিলেন যে, প্রতিদিন অন্তত একজন অতিথিকে সাথে না নিয়ে খাওয়া দাওয়া করতেন না।

একদিন সারাদিনেও তিনি কোন অতিথি খুঁজে পেলেন না। সন্ধ্যা ঘনিয়ে আসার সময় তিনি যখন হতাশ হয়ে গৃহের ভেতর প্রবেশ করতে যাবেন এমন সময় একজন ভিক্ষুক এসে হাজির হলো। তিনি পরম আনন্দে ভিক্ষুককে বসালেন এবং খাবার দিলেন।

সারা দিনের ক্ষুধার্ত ভিক্ষুকটি খাবার পেয়েই গোত্রাসে খেতে শুরু করল। হযরত ইবরাহীম দেখলেন, বিসমিল্লাহ না বলেই ভিক্ষুকটি খাওয়া শুরু করেছে এবং বুভুক্ষের মত গিলছে। আল্লাহর প্রিয় নবী ইবরাহীম (আ.) এর এটা সহ্য হলো না। তিনি ক্রুদ্ধ স্বরে জিজ্ঞেস করলেন : “কি হে! তুমি খাওয়ার আগে আল্লাহর নাম উচ্চারণ করলে না যা!”

ভিক্ষুক বললো : (নাউজুবিল্লাহ) আমি বাপু আল্লাহ-টাল্লা মানিনে। খাবার পেলে খাবো, না পেলে উপোষ করবো। এর সাথে আবার আল্লাহর নাম নেবার কি সম্পর্ক।

হযরত ইবরাহীম (আ.) রেগে আগুন হয়ে বললেন : তবেরে হতভাগা! এর একটি দানাও তুই স্পর্শ করতে পারবি নে। এক্ষুনি দূর হ আমার সামনে থেকে।

বেচারি ভিক্ষুক আর কি করবে! এক গ্রাস কি দু’গ্রাস খেয়েছিল। আর খেতে পারল না। হযরত ইবরাহীম ততক্ষণে তার খাবারের থালাটাও কেড়ে নিয়েছেন। অগত্যা সে একটি দীর্ঘ নিঃশ্বাস ছেড়ে বিদায় নিল।

কিছুক্ষণ পরেই ওহী এল। আল্লাহ ধমকের সুরে হযরত ইবরাহীমকে (আ.) বললেন, “হে ইবরাহীম! দীর্ঘ আশি বছর যাবত এই অবিশ্বাসী নাস্তিককে আমি আমার পৃথিবীতে চলাফেরা ও বসবাস করতে দিয়েছি, খাবার সরবরাহ করেছি। আর তুমি কিনা একটি বেলাও তাকে সহ্য করতে ও খাওয়াতে পারলে না।”

অনুতপ্ত হয়ে হযরত ইবরাহীম (আ.) ভিখারীটিকে খুঁজতে লাগলেন। কিন্তু কোথাও খুঁজে পেলেন না। সেই থেকে হযরত ইবরাহীম (আ.) মুমিন ও কাফির নির্বিশেষে সকল মানুষকে দয়া প্রদর্শন করতে এবং সব রকমের অতিথিকে সমাদর করতেন।

শিক্ষা :

বিপন্ন মানুষের সেবা করার ব্যাপারে জাতি, ধর্ম, বর্ণ প্রভৃতির ভেদাভেদ

করা ইসলামে নিষিদ্ধ। রাসূল (সা.) অমুসলিম পশ্বিক বা অতিথিকে পরম সমাদরে আপ্যায়ন করাতেন-এর দৃষ্টান্ত রয়েছে। হযরত ঙ্গসা (আ.) ও অন্যান্য নবীদের জীবনেও এর নজীর রয়েছে। অমুসলিম দরিদ্র ব্যক্তিকে যাকাতের টাকা বা জিনিসপত্র এবং অন্যান্য নফল সদকাও দেয়া যায়। তবে অমুসলিমের ব্যাপারে ইসলাম যে তিনটি জিনিসকে গুরুত্ব দিয়ে নিষিদ্ধ করেছে তাহলো এই যে,

১. কোন মুসলিমের চেয়ে তাকে অগ্রাধিকার দেয়া যাবে না।
২. তাদের সাথে নিষ্প্রয়োজনে বন্ধুত্ব ও মাখামাখি করা যাবে না।
৩. মুসলমানদের নেতৃত্ব ও শাসন ক্ষমতায় তাদেরকে অংশীদার করা যাবে না।

## ৮৭। হযরত ইবরাহীম (আ.) ও তদীয় পরিবারের মক্কায় পুনর্বাসন

হযরত ইবনে আব্বাস বর্ণিক এক হাদীসে রাসূল সাল্লাল্লাহু আলাইহি ওয়াসাল্লাম বলেন, হযরত ইবরাহীম আলাইহিস সালাম স্ত্রীয় স্ত্রী হাজেরাকে ও পুত্র ইসমাইলকে দুখ খাওয়ার বয়সে নিয়ে মক্কায় আগমন করেন। এখানে কাবা শরীফের নিকটে কিছুটা উঁচুতে জমজমের ওপরে তাদেরকে রাখেন। সে সময় মক্কায় আর কোনো মানুষ বাস করত না এবং সেখানে পানি ছিল না। তিনি স্ত্রী পুত্রের কাছে খোরমা ভর্তি একটি ব্যাগ এবং পানি ভর্তি একটি মশক অর্পণ করেন। তারপর তিনি সেখান থেকে চলে যেতে উদ্যত হন। এ সময় ইসমাইলের মা তাঁর পিছু পিছু এগিয়ে যান এবং জিজ্ঞেস করেন, ‘হে ইবরাহীম! এই জনপ্রাণীহীন মরুভূমিতে আমাদেরকে রেখে আপনি কোথায় যাচ্ছেন?’ হযরত ইবরাহীম কোনো জবাব দিলেননা। হযরত হাজেরা পুনরায় একই প্রশ্ন করলেন। এবারও তিনি নীরব রইলেন। তিনি বললেন, ‘আল্লাহ কি আপনাকে এরূপ করার আদেশ দিয়েছেন?’ হযরত ইবরাহীম জবাবে বললেন, ‘হ্যাঁ।’ তখন হযরত হাজেরা বললেন, ‘তাহলে আপনি যান। আল্লাহ আমাদেরকে ধ্বংস করবেন না।’ অতঃপর তিনি ঘরে ফিরে এলেন। হযরত ইবরাহীম চলতে লাগলেন। যখন তিনি মক্কার শেষ প্রান্তে উপনীত হলেন এবং তার চোখ থেকে কাবা শরীফ উধাও হয়ে গেল, তখন তিনি কাবামুখী হয়ে দু’হাত তুলে এভাবে দোয়া করলেন, ‘হে আমার মনিব! আমি স্বীয় পরিবারকে এক উষর মরুপ্রান্তরে তোমার মহিমান্বিত ঘরের কাছে রেখে গেলাম, যেন তারা নামায কায়েম করে।

অতএব, হে আমাদের প্রতিপালক! মানুষের মনকে তাদের দিকে আকৃষ্ট করে দাও এবং তাদেরকে ফলমূল ও খাদ্যশস্য দাও। হয়তো তারা কৃতজ্ঞ হবে।’

ইসমাইলের মা ঐ পানি পান করতে ও ইসমাইলকে দুধ খাইয়ে লালন পালন করতে লাগলেন। যখন পানি ফুরিয়ে গেল, উভয়ে পিপাসায় কাতর হয়ে পড়ল। শিশু ইসমাইল তখন ভীষণভাবে ছটফট করছেন। তা দেখে হাজেরা অস্থির হয়ে নিকটবর্তী সাফা পাহাড়ে কোন মানুষ বা পানি পাওয়া যায় কিনা খুঁজতে লাগলেন। কিন্তু কিছুই পেলেন না। সেখান থেকে মারওয়া পাহাড়ে গেলেন। কিন্তু কিছুই ফেলেন না সেখানেও। নিরুপায় ও দিশেহারা অবস্থায় তিনি সাফা ও মারওয়া পাহাড়ের মাঝে সাতবার ছুটোছুটি করলেন। বস্তুত : এ কারণেই মানুষ সাফা ও মারওয়া পাহাড়ের মাঝে ছুটোছুটি করে থাকেন। সহসা মারওয়ায় দাঁড়িয়ে তিনি একটি আওয়াজ শুনলেন। হাজেরা সেই অজানা আওয়াজ উত্থাপনকারীকে বললেন : “তোমার আওয়াজ আমার কানে পৌঁছেছে। তবে তোমার কাছে কোন সাহায্যের উপকরণ আছে কিনা জানাও।” সহসা দেখলেন, জমজমের স্থানে এক ফেরেশতা দাঁড়িয়ে আছে। সেই ফেরেশতা তাঁর পাখা দিয়ে একটু মাটি খুঁড়লেন। সঙ্গে সঙ্গে পানি বেরিয়ে এলো। হযরত হাজেরা তাঁর মশকটিতে পানি ভরে নিলেন। রাসূল (সা.) বলেন, “হাজেরা যদি সাথে সাথে পানিতে হাত না দিতো তবে তা একটি বিরাট নদীতে পরিণত হতো।”

হযরত হাজেরা ঐ পানি নিজে পান করলেন এবং ইসমাইলকে দুধ খাওয়ালেন। ফেরেশতা তাকে বললেন : তুমি চিন্তিত হয়ো না। এই স্থানে আল্লাহর একটি ঘর আছে। এই শিশু ও তার বাবা ঘরটি নতুন করে নির্মাণ করবে। এই ঘরের প্রতিবেশীদেরকে আল্লাহ ধ্বংস করবেন না।

তারপর হাজেরা ও ইসমাইল বসবাস করতে লাগলেন। হযরত ইবরাহীম মাঝে মাঝে তাদেরকে দেখতে আসতেন। আবার চলে যেতেন। (ইত্যবসরে ইসমাইলের কুরবানির ঘটনা ঘটে)। ইতিমধ্যে জমজমের পানির সুবাদে ঐ এলাকায় মানব বসতি গড়ে ওঠে ও যৌবনে পদার্পন করার পর হযরত ইসমাইল বিয়ে করেন।

একদিন হযরত ইবরাহীম হযরত ইসমাইলের গৃহে এলেন। তখন হাজেরার ইন্তিকাল হয়েছে এবং ইসমাইলের স্ত্রী গৃহে ছিলেন। হযরত ইবরাহীম পুত্রবধূকে জিজ্ঞাসা করলেন, ইসমাইল কোথায়? সে বললো : খাদ্য সংগ্রহ করতে বাইরে গেছে।

হযরত ইবরাহীম : তোমরা কেমন আছ?

পুত্রবধু : আমরা খুব অনটনে ও দুরবস্থায় আছি ।

হযরত ইবরাহীম : ইসমাইল এলে তাকে আমার সালাম দিও এবং বলো, সে যেন ঘরের কপাটটি পাশ্বে ফেলে । এই বলে পুত্রবধুকে নিজের পরিচয় না দিয়ে ইবরাহীম (আ.) প্রস্থান করলেন ।

ইসমাইল গৃহে ফিরলে তাঁর স্ত্রী তাঁকে আগন্তুক ও তার সাথে তার কথোপকথনের বিবরণ দিলেন । হযরত ইসমাইল বৃদ্ধ আগন্তুকের হুলিয়া ও কথোপকথনের বিবরণ শুনে বললেন, “উনি আমার পিতা । আমাকে তোমার কাছ হতে বিচ্ছিন্ন হওয়ার আদেশ দিয়েছেন । তুমি তোমার বাপের বাড়ি চলে যাও ।” অতঃপর ইসমাইল তাকে তালাক দিয়ে নতুন স্ত্রী ঘরে আনলেন ।

কিছুদিন পর পুনরায় ইবরাহীম (আ.) এলেন । এদিনও ইসমাইল গৃহে ছিলেন না । নতুন পুত্রবধু ছিলেন । তিনি জিজ্ঞাসা করলেন : তোমার স্বামী কোথায়? সে বললো : তিনি আমাদের প্রয়োজনীয় সামগ্রী আনতে গেছেন । তিনি পুনরায় জিজ্ঞেস করলেন, “তোমরা কেমন আছ?” সে বললো, “আল্লাহর শোকর, আমরা খুব ভাল আছি ।”

হযরত ইবরাহীম : তোমরা কি খাও?

পুত্রবধু : গোশত ।

হযরত ইবরাহীম : কি পান কর?

পুত্রবধু : পানি ।

হযরত ইবরাহীম : হে আল্লাহ! এদের খাদ্য ও পানিতে বরকত দাও ।

রাসূল (সা.) বলেন : সেদিন ইসমাইলের ঘরে কোন চাউল বা গম ছিল না । থাকলে সেগুলিতেও তিনি বরকত কামনা করতেন । আজ মক্কায় যে খাদ্যের প্রাচুর্য, তা হযরত ইবরাহীমের দোয়ার ফল ।

হযরত ইবরাহীম বললেন : ইসমাইল এলে তাকে বলো, সে যেন তার ঘরের কপাট আর না পাশ্বেয় ।

অতঃপর ইসমাইল গৃহে ফিরলে তাঁর স্ত্রী তাকে সমস্ত ঘটনা জানালেন । ইসমাইল বললেন : এই আগন্তুক আমার পিতা । ‘কপাট’ বলে তিনি তোমার প্রতি ইঙ্গিত করেছেন এবং তোমাকে বহাল রাখতে বলেছেন ।

কিছুদিন পর হযরত ইবরাহীম এসে ইসমাইলকে জানালেন যে, আল্লাহ তাকে কাবাবশরীফ পুনঃনির্মাণের আদেশ দিয়েছেন । ইসমাইল সানন্দে সায দিলেন এবং সহযোগিতার আশ্বাস দিলেন । ইসমাইল পাথর বয়ে আনেন এবং

হযরত ইবরাহীম কাবা নির্মাণ করেন । (সংক্ষেপিত) (বুখারী) ।

শিক্ষা :

এই ঘটনাটি বহু মূল্যবান শিক্ষায় পরিপূর্ণ । যেমনঃ

১. সর্বাবস্থায় আল্লাহর প্রতি কৃতজ্ঞ থাকা প্রত্যেক মুমিনের কর্তব্য । সংসারে অভাব অনটন থাকলে তা মানুষের কাছে ব্যক্ত করা অনুচিত ।

২. ইসলামের প্রচার ও প্রতিষ্ঠার জন্য চেষ্টা করা এবং এজন্য পরিবার পরিজনকে রেখে বিদেশে সফরের প্রয়োজন হলে তাতেও কুণ্ঠিত হওয়া উচিত নয় । বিশেষত : মুমিন মহিলাদের পক্ষ থেকে পুরুষদেরকে এ ব্যাপারে বাধা দেবার পরিবর্তে উৎসাহ দেয়া কর্তব্য ।

৩. আল্লাহর উপর তাওয়াক্কুল বা নির্ভরতার অর্থ খাদ্য দ্রব্যের সন্ধানে চেষ্টা না চালিয়ে ঘরে বসে থাকা নয় । হযরত হাজেরা স্ত্রীলোক হয়েও দুগ্ধপোষ্য শিশুকে ঘরে রেখে খাদ্য ও পানির সন্ধানে বাইরে ছুটাছুটি করছিলেন । হালাল রুজীর সন্ধানে পর্দা সহকারে বাইরে যাওয়া নারীর জন্যও অবৈধ নয় । তবে স্থায়ী পেশা হিসেবে বহিরাঙ্গনে (যেখানে পুরুষদের উপস্থিতি রয়েছে) চলাফেরা এড়িয়ে চলাই উত্তম ।

৪. পুরুষদের ইসলামী দাওয়াতের কাজে ব্যস্ত থাকা সত্ত্বেও নিজ পরিবারের লোকজনদের নৈতিকতা ও তাকওয়া পরহেজগারীর তদারকী অব্যাহত রাখা কর্তব্য এবং তাদের সততা অনুশীলনের বাধা অপসারণ করা অত্যন্ত জরুরি ।

## ৮৮ । হযরত মূসা (আ.) ও পানির বোতল

হযরত আবু হুরায়রা (রা.) থেকে বর্ণিত আছে যে, রাসূল (সা.) বলেন, একবার হযরত মূসা (আ.) এর মনে প্রশ্ন জাগলো যে, আল্লাহ তায়ালা কেন ঘুমান না? আল্লাহ তার মনের প্রশ্ন জানতে পেরে তার কাছে একজন ফেরেশতা পাঠালেন । এই ফেরেশতা হযরত মূসার (আ.) দুই হাতে দুটি পানিভর্তি বোতল দিয়ে তা ধরে রাখতে বললেন এবং যতক্ষণ অনুমতি না দেয়া হবে, ততক্ষণ বোতল কোথাও নামিয়ে রাখা চলবে না বলে সাবধান করে দিলেন । হযরত মূসা ফেরেশতাকে আল্লাহর প্রেরিত মনে করে তার আদেশকেও আল্লাহর আদেশ বলে বিশ্বাস করলেন এবং তদনুযায়ী কাজ করলেন ।

দীর্ঘ সময় বোতল দুটি ধরে রাখতে রাখতে তিনি ক্রমশ ক্লান্ত হয়ে

পড়লেন। তাঁর দু'চোখে ঘুম আসতে লাগলো। যখনই ঘুম গাঢ় হয় অমনি দু'হাতের বোতল দুটি কাছাকাছি চলে আসে এবং সংঘর্ষের উপক্রম হয়। অমনি ফেরেশতা তাকে জাগিয়ে দেন এবং তিনি সতর্ক হয়ে যান। এক সময় তার ঘুম অত্যন্ত প্রবল হলো। দু'হাতের বোতল দু'টো প্রচণ্ড শব্দে পরস্পর আঘাত লেগে ভেঙ্গে চুরমার হয়ে গেল। তখন ফেরেশতা বললেন : আল্লাহ আপনার জন্য শিক্ষা স্বরূপ এই ঘটনাটি ঘটিয়েছেন। আল্লাহ তায়ালা এই বোতল দুটির মতই আকাশ ও পৃথিবীকে সামাল দিয়ে রেখেছেন। তিনি যদি ঘুমাতে তাহলে আকাশ ও পৃথিবী ধ্বংস হয়ে যেত। (বায়হাকী, দারকুতনী)।

শিক্ষা :

এ ঘটনাটি থেকে অত্যন্ত মূল্যবান শিক্ষা লাভ করা যায়।

১. ক্ষুধা, ঘুম প্রভৃতি জৈবিক প্রয়োজন সাধারণ সৃষ্ট জীবের বৈশিষ্ট্য। আল্লাহ এসব দুর্বলতার অনেক উর্ধ্ব। তিনি সদা সচেতন ও সদা জাগ্রত। এ জন্যই বিশ্ব জগতের নিয়ম শৃংখলা সুষ্ঠুভাবে চালু রয়েছে।

২. এ হাদীস থেকে জানা গেল, আল্লাহ তায়ালা বিশ্বজগতকে শুধু সৃষ্টি করেই অবসর গ্রহণ করেননি বা ক্ষান্ত থাকেননি। বরং তিনি প্রতিটি সৃষ্টির লালন পালনেরও দায়িত্ব পালন করে চলেছেন এবং প্রতি মুহূর্তে তার তত্ত্বাবধান করছেন।

এখানে প্রশ্ন দেখা দিতে পারে যে, হযরত মূসা (আ.) এর মতো একজন বিশিষ্ট নবীর মনে কেন এমন প্রশ্ন জাগলো। এর জবাব এই যে, আল্লাহকে যে ঘুম বা তন্দ্রা স্পর্শ করে না-এ ব্যাপারে হযরত মূসার (আ.) মনে কোনই সন্দেহ ছিল না। তিনি কেবল বিষয়টি প্রত্যক্ষ নিরীক্ষণের মাধ্যমে অধিকতর নিশ্চিত হতে চেয়েছিলেন। এর মাধ্যমে আল্লাহ একটি শিক্ষা দিতে চেয়েছেন। হযরত ইবরাহীম (আ.) সম্পর্কেও পবিত্র কুরআনে বর্ণিত হয়েছে যে, আল্লাহ কিভাবে মৃতকে জীবিত করবেন সে সম্পর্কে তিনি প্রশ্ন করেছেন। আল্লাহ তায়ালা একটি মৃত পাখিকে টুকরো টুকরো করে তাকে পুনরুজ্জীবিত করে দেখিয়েছিলেন এবং তাকে নিশ্চিত করেছিলেন।

মুসনাদে আহমাদে উদ্ধৃত অপর একটি বর্ণনায় বলা হয়েছে যে, আসলে হযরত মূসার পক্ষ হতে নয় বরং বনী ইসরাঈলের পক্ষ হতে হযরত মূসার নিকট প্রশ্ন করা হয়েছিল যে, আল্লাহ ঘুমান না কেন? সে জবাবটি একটি ঘটনার মাধ্যমে আল্লাহ দেখিয়ে দিলেন।

## ৮৯। হযরত মুসা (আ.) ও হযরত খিজির (আ.) এর সফর

হযরত ইবনে আব্বাস (রা.) থেকে বর্ণিত যে, রাসূল (সা.) বলেছেন, একবার হযরত মুসা (আ.) বনী ইসরাইলের এক সমাবেশে ভাষণ দিলে তাকে জিজ্ঞেস করা হয়, পৃথিবীতে কে সবচেয়ে জ্ঞানী? মুসা জবাব দিলেন, আমি। তার এ জবাবে আল্লাহ অসন্তুষ্ট হন। কেননা আল্লাহই যে তার জ্ঞানের উৎস, সে কথা তিনি উল্লেখ করেননি। আল্লাহ তাকে বললেন দুই নদীর সংযোগস্থলে আমার এক বান্দা আছে। সে তোমার চেয়েও বেশি জ্ঞানী। মুসা বললেন, আমি তাঁর নিকট কিভাবে পৌঁছব। আল্লাহ বললেন, তুমি একটি ভাজা মাছ নিয়ে রওনা হও। যেখানে মাছটি হারিয়ে যাবে সেখানেই তার সাক্ষাত পাবে। মুসা স্বীয় খাদেম নবী ইউশা ইবনে নূনকে সাথে নিয়ে ভাজা মাছসহ চলতে লাগলেন। চলতে চলতে তারা সাগর পাড়ের একটি পাথরের কাছে পৌঁছে বিশ্রাম করতে লাগলেন। মুসা সেখানে ঘুমিয়ে পড়লেন। সেই অবসরে মাছটি জীবিত হয়ে সাগরে নেমে গেল। খাদেম ব্যাপারটি জানলেও মুসাকে তা বলতে ভুলে গেল। অতঃপর বিশ্রাম শেষে আবার উভয়ে পথ চলতে লাগলেন। কিছুদূর গিয়ে উভয়ে ক্ষুধার্ত হলেন। হযরত মুসা বললেন, খাবার আনো। তখন খাদেম বলল, শয়তানের প্ররোচনায় পড়ে কথাটা আপনাকে বলতে ভুলে গিয়েছিলাম। খাদ্য হিসেবে যে ভাজা মাছটি ছিল তা ইতিপূর্বে আমরা যেখানে বিশ্রাম নিচ্ছিলাম সেখানে জ্যাঙ হয়ে সমুদ্রে চলে গেছে। মুসা বললেন, ঐ জায়গাটাই তো আমি খুঁজছি। এই বলে তারা আবার সেখানে ফিরে গেলেন।

সেখানে পৌঁছে দেখলেন, এক ব্যক্তি বসে আছেন। মুসা তাকে সালাম করলেন। ঐ ব্যক্তি সালামের জবাব দিয়ে বলল, এ দেশে তো সালামের রীতি নেই। মুসা বললেন, আমি মুসা। লোকটি বলল, বনী ইসরাইলের নবী মুসা? তিনি বললেন, হ্যাঁ। আপনি আল্লাহর কাছ থেকে যে সব নিশ্চয় তত্ত্ব শিখেছেন, তার কিছু কিছু শেখার জন্য আমি এসেছি। আমি কি আপনার সাথে থাকতে পারি? তিনি বললেন, হে মুসা! আমি খিযির। আমাকে আল্লাহ এমন কিছু জ্ঞান দান করেছেন যা তোমাকে দেননি। এখন আমার সাথে থেকে তুমি ধৈর্যধারণ করতে পারবে না। কারণ যার রহস্য তুমি জান না, সে সব ব্যাপারে ধৈর্যধারণ করা সম্ভব নয়। মুসা বললেন, ইনশাআল্লাহ! আমি ধৈর্যধারণ করব এবং অনুগত থাকব। খিযির বললেন, ঠিক আছে। তুমি যদি থাকতে চাও, তাহলে আমি নিজে যতক্ষণ কোনো জিনিসের ব্যাখ্যা না দেব, ততক্ষণ তুমি কোনো ব্যাপারে প্রশ্ন করতে পারবে না। অতঃপর তারা রওনা দিলেন এবং সাগরের তীর ধরে চলতে লাগলেন। একটি নৌকায় তারা সাগর পার হলেন। নৌকার মাঝি খিযিরকে



চিন্তা বলে তাদের ভাড়াও নিল না। অথচ কিনারে গিয়ে ভিড়া মাত্রই খিযির একটা কুড়াল দিয়ে নৌকাটিকে বিরাট ছিদ্র করে দিলেন। মূসা তৎক্ষণাত বলে উঠলেন, এ কি করলেন আপনি? বিনা ভাড়ায় নৌকায় পার হয়ে এমন কাণ্ডটি ঘটালেন, যাতে যাত্রীরা ডুবে মরে? খিযির বললেন, আমি তো বলেছিলাম, তুমি ধৈর্যধারণ করতে পারবে না। মূসা বললেন, আমার ভুল হয়ে গেছে। এবারের জন্য আমাকে মাফ কর দিন।

তারা আবার চলতে লাগলেন।

পশ্চিমধ্যে এক জায়গায় দেখলেন কয়েকটি বালক খেলা করছে। খিযির হঠাৎ একটি বালককে জাপটে ধরলেন এবং ছুরি বের করে তাকে জবাই করে ফেললেন। মূসা এবারও আত্মসম্বরণ করতে পারলেন না। তীব্র প্রতিবাদ করে বললেন, সম্পূর্ণ বিনা অপরাধে এই বালককে হত্যা করে আপনি একটি জঘন্য অপরাধ করেছেন। খিযির এবারও আগের মতো বললেন, আমি তো জানতাম তোমার এসব সহ্য হবে না। মূসা বললেন, আচ্ছা বেশ! আর যদি কখনো কিছু বলি, আমাকে বিদায় করে দেবেন। খিযির এবারও মাফ করে দিয়ে পুনরায় পথ চলতে লাগলেন। চলতে চলতে তারা এক গ্রামে হাজির হলেন এবং গ্রামবাসীর কাছে খাবার চাইলেন। কিন্তু তারা খাবার দিল না। অগত্যা গ্রামটি ত্যাগ করে চললেন। গ্রামের এক প্রান্তে একটি পুরনো প্রাচীর দেখলেন, যা ভেঙ্গে পড়ার উপক্রম হয়েছে। খিযির সেই প্রাচীরটি মেরামত করে দিলেন। মূসা এতে ঘোরতর আপত্তি জানিয়ে বললেন, যে গ্রামবাসী আমাদের মেহমানদারী করল না তাদের আপনি বিনা মজুরিতে প্রাচীর মেরামত করে দিলেন। ইচ্ছা করলে আপনি অন্তত মজুরি আদায় করতে পারতেন। এবার খিযির বললেন, আর তোমাকে নিয়ে চলতে পারলাম না। তুমি এক্ষুণি বিদায় হও। তবে যাবার আগে আমার যেসব কর্মকাণ্ডের রহস্য বুঝতে না পেরে তুমি ধৈর্য হারিয়ে ফেলেছিলে, তার তাৎপর্য শুনে নাও। নৌকাটি ছিদ্র করলাম এ জন্য যে, ঐ এলাকায় এক অত্যাচারী রাজা ছিল, যে কোনো নিখুঁত নৌকা পেলেই তা কেড়ে নিত। আমি নৌকায় খুঁত করে দিলাম, যাতে তার দরিদ্র চালক তাকে কিঞ্চিৎ মেরামত করে তা দ্বারা জীবিকা নির্বাহ করতে পারে এবং রাজা কেড়ে নিতে না পারে। আর বালকটাকে হত্যা করলাম এ জন্য যে, সে বড় হয়ে কাফের হতো এবং তার মুমিন পিতামাতাকে কষ্ট দিত। আর প্রাচীরটি মেরামত করার কারণ এই যে, ওর নীচে দু'জন পিতৃহীন শিশুর সম্পদ প্রোথিত ছিল এবং তাদের বড় হওয়া পর্যন্ত ঐ সম্পদ রক্ষিত থাকা দরকার। আর মনে রেখ, এসব কর্মকাণ্ড আমি নিজের ইচ্ছায় করিনি। বরং আল্লাহর ইচ্ছা অনুসারে করেছি।

## পর্যালোচনা ও শিক্ষা :

এই ঘটনাটি কুরআনে সূরা কাহাফেও সংক্ষেপে বর্ণিত হয়েছে। তবে আলোচ্য হাদীসে এটি অপেক্ষাকৃত বিশদভাবে বর্ণিত হওয়ায় এই পুস্তকে সন্নিবেশিত হয়েছে। আলোচ্য ঘটনায় বর্ণিত হযরত খিজির অধিকাংশ বিজ্ঞ মুফাসসিরের মতে হযরত খিজির একজন ফেরেশতা। কেননা এ ধরনের শরীয়ত বিরোধী কর্মকান্ড একজন নবীতো দূরের কথা, কোন সাধারণ মুসলমানের দ্বারাও সংঘটিত হতে পারে না। তবে ফেরেশতাগণ আল্লাহর হুকুমে এ ধরনের কাজ করতে পারেন। এ ঘটনার প্রধান শিক্ষণীয় বিষয় হলোঃ

১। কোন ব্যাপারে অহংকার করা উচিত নয়। বিশেষ করে জ্ঞানের বড়াই অত্যন্ত গর্হিত কাজ।

২। যে কাজ শরীয়ত বিরোধী মনে হবে, তার প্রতিবাদ সঙ্গে সঙ্গেই করা উচিত। এমনকি প্রতিবাদ না করার ওয়াদা করে থাকলেও সেই ওয়াদা ভঙ্গ করে ওয়াদা করা কর্তব্য। হযরত মুসা (আ.) এই আদর্শই সম্মুখ করেছেন।

## ৯০। হযরত মুসা (আ.) ও ইসতিসকার নামায

হাদীসে বর্ণিত আছে যে, একবার হযরত মুসা (আ.) এর আমলে মিশরে ভীষণ খরা ও অনাবৃষ্টি দেখা দেয়। বনী ইসরাইলের লোকেরা হযরত মুসাকে অনুরোধ জানায় যে, আপনি আমাদেরকে নিয়ে ইসতিসকার নামায পড়ুন এবং বৃষ্টির জন্য দোয়া করুন। হযরত মুসা বিপুল সংখ্যক লোককে সাথে নিয়ে একটি মাঠে গিয়ে দীর্ঘ সময় ধরে ইসতিসকার নামায পড়লেন এবং অনেক কান্নাকাটি করে দোয়া করলেন। কিন্তু বৃষ্টিও হলো না, আল্লাহর পক্ষ থেকে কোনো জবাবও এলো না।

পরদিন তিনি আবার ইসতিসকার নামায পড়ালেন। এভাবে তৃতীয় দিনও পড়ালেন। শেষের দিন নামাযের পর অনেক বেশি সময় ধরে দোয়া করলেন। দোয়ার পর আল্লাহর কাছ থেকে ওহী এলো যে, 'হে মুসা! সমবেত লোকদের মধ্যে এমন একজন লোক রয়েছে যে আজকের আগে আর কখনো আল্লাহর নাম মুখে আনেনি। অধিকন্তু অত্যন্ত জঘন্য পাপ কাজে লিপ্ত ছিল। ঐ লোকটিকে দল থেকে বের করে দিয়ে দোয়া করো। নচেত আমি দোয়া কবুল করব না।'

হযরত মুসা আল্লাহর ওহীর নির্দেশ সমবেত লোকদেরকে জানালেন এবং বললেন, আল্লাহ এই ব্যক্তির নাম বলেননি তবে এই ব্যক্তি নিজে নিজের সম্পর্কে নিশ্চয়ই ওয়াকিবহাল। দেশের সমগ্র জনগণের স্বার্থে আমি তাকে এই স্থান ত্যাগ করতে অনুরোধ জানাচ্ছি।

হযরত মুসা বার বার আবেদন জানাতে লাগলেন। কিন্তু কোনো ফলোদয় হলো না। এভাবে কয়েক ঘণ্টা কেটে যাওয়ার পর সহসা আকাশে মেঘের আনাগোনা শুরু হলো। কিছুক্ষণের মধ্যে কালো মেঘে আকাশ ছেয়ে গেল। অতঃপর মুম্বলধারে বৃষ্টি বর্ষিত হলো।

বৃষ্টি হওয়ায় জনগণ খুশি হলোও হযরত মুসা পড়ে গেলেন একটু বেকায়দায়। কারণ ওহীর নির্দেশত কোনো পাপী লোককে বেরিয়ে যেতে দেখা গেল না। তথাপি বৃষ্টি হলো। এতে জনমনে প্রশ্ন দেখা দিল যে, হযরত মুসা ওহীর নামে যে কথা বলেছিলেন তা সত্য ছিল কিনা।

অগত্যা তিনি ঘটনার ব্যাখ্যা চাইলেন আল্লাহর কাছে। আল্লাহ জবাবে বললেন, হে মুসা! তুমি যখন বারবার পাপীকে স্থান ত্যাগ করার আবেদন জানাচ্ছিলে, সে তখন মনে মনে আমার কাছে অনুশোচনা প্রকাশ করে তওবা করেছিল এবং বলছিল “হে আল্লাহ! এত লোকের সামনে আমাকে অপদম্ভুও করোনা, আর আমার জন্য দেশবাসীকে কষ্টও দিওনা। আমাকে মাফ করে দিয়ে বৃষ্টি দাও।” আমি তার দোয়া কবুল করে বৃষ্টি দিয়েছি। (বুখারী)।

শিক্ষা : গুনাহ বা ভুলক্রটির জন্য কোনো মানুষকে লজ্জা দেয়া বা লোকজনের সামনে হেয় করা উচিত নয়।

## ৯১। হযরত খিজিরের (আ.) বদান্যতা

রাসূল সাল্লাল্লাহু আলাইহি ওয়াসাল্লাম বলেন, একবার হযরত খিজির (আ.) বনী ইসরাইলের কোন বাজারে ঘোরাফিরা করছিলেন। এমতাবস্থায় এক ব্যক্তি তার কাছে এসে এভাবে আবেদন জানায়, ‘হে আগন্তুক! আমি একজন ক্রীতদাস। আমার মনিব আমাকে চারশো’ দিরহামের বিনিময়ে মুক্তি দেয়ার প্রতিশ্রুতি দিয়েছেন। এখন আমি এই মুক্তিপণ সংগ্রহের জন্য দ্বারে দ্বারে ঘুরছি। আপনার কাছে কিছু সাহায্য প্রার্থনা করছি। আল্লাহ আপনার কল্যাণ করুন।’ হযরত খিজির বললেন, ‘আল্লাহর যা ইচ্ছা, সেটা একভাবে সম্পন্ন হবেই। আমার কাছে তোমাকে দেওয়ার মতো একটি কানাকড়িও নেই। আমাকে মাফ কর।’ ক্রীতদাসটি পুনরায় বলল, ‘আমি আল্লাহর দোহাই দিয়ে আপনার কাছে কিছু সাহায্য চাই। আপনার মুখমণ্ডলে একজন দানশীল ও মহানুভব ব্যক্তির লক্ষণ পরিস্ফুট। আল্লাহ আপনাকে অশেষ বরকত দান করুন।’ খিজির আবাবো নিজের অক্ষমতা প্রকাশ করে বললেন, ‘তুমি আমাকে একটি দাস হিসেবে বাজারে বিক্রি করে যে অর্থ

সংগ্রহ করতে পারো, কর। এছাড়া আর কোনোভাবে তোমাকে সাহায্য করতে আমি সক্ষম নই।' ক্রীতদাসটি বলল, 'এটা কি সমীচিন হবে?' খিজির বললেন, 'অবশ্যই, তুমি একটি গুরুতর বিপদে পড়ে আমার সাহায্য চেয়েছ। আমি তোমাকে বঞ্চিত করতে চাই না। তুমি আমাকে বিক্রি কর।'

এরপর লোকটি তাকে বাজারে নিয়ে যায় এবং চারশো দিরহামে বিক্রি করে। যে ব্যক্তি হযরত খিজিরকে কিনে নিয়ে যায়, সে তাকে কোনো কাজে না লাগিয়ে অতিথির মতো যত্নে রাখে। কিছুদিন পর হযরত খিজির তাকে বললেন, 'আপনি আমাকে নিজের কাজকর্মের জন্যই কিনে এনেছেন। অথচ কোনো কাজ করতে দিচ্ছেন না। এ কেমন কথা। আমাকে কাজের আদেশ দিন।'

মনিব বলল, 'আপনি একজন বয়োবৃদ্ধ প্রবীণ ব্যক্তি। আপনাকে কাজে খাঁটিয়ে কষ্ট দেয়াটা আমার অপছন্দ।' হযরত খিজির বললেন, 'আমার কোনো কষ্ট হবে না। আপনি আদেশ করে দেখুন।' তখন মনিব বলল, 'বেশ তাহলে এই পাথরটি সরিয়ে ওখানটায় রাখুন।' আদেশ দিয়ে মনিব বিশেষ কাজে বাইরে গেল। পাথরটি এত বিরাট ও ভারী ছিল যে, ছয়জন মানুষ একটানা সারাদিন পরিশ্রম করা ছাড়া তা সরানো সম্ভব ছিল না। অথচ একঘণ্টা পরে মনিব ফিরে এসে দেখে, বৃদ্ধ ক্রীতদাস একাই পাথর যথাস্থানে সরিয়ে রেখেছে। সে বলল, 'আপনি চমৎকার কাজ করেছেন। এত বড় শক্ত কাজ করার ক্ষমতা আপনার আছে, তা আমার ধারণারও বাইরে ছিল।'

কিছুদিন পর মনিবের প্রবাসে যাওয়ার প্রয়োজন দেখা ছিল। সে হযরত খিজিরকে বলল, 'আমি আপনাকে একান্ত বিশ্বস্ত, সৎ ও আমানতদার লোক মনে করি। আমার অবর্তমানে আপনি আমার পরিবার পরিজনকে ন্যায়সঙ্গত আচরণ সহকারে দেখাশুনা ও তত্ত্বাবধান করবেন।' বৃদ্ধ ক্রীতদাস বলল, 'আর কোনো কাজ থাকলে তাও বলে যান।' সে বলল, 'আপনাকে বাড়তি কষ্ট দেয়া আমার মনোঃপুত নয়।' ক্রীতদাস বলল, 'আমার কোনো কষ্ট হবে না।' অগত্যা মনিব বলল, 'বেশ, তাহলে আমার ঘরের ভিত তৈরির অপেক্ষায় রয়েছে। আপনি কিছু ইট লাগিয়ে কিছুটা ভিতের কাজ করে রাখবেন।' এরপর মনিব সফরে বেরিয়ে গেল। সফর থেকে ফিরে সম্পূর্ণ ভিত তৈরি হয়ে গেছে দেখে সে বিস্ময়ে অভিভূত হয়ে গেল। এবার সে তার বৃদ্ধ ক্রীতদাসকে বলল, 'আল্লাহর দোহাই, আপনি কে এবং আপনার রহস্য কি আমাকে খুলে বলুন।'

হযরত খিজির বললেন, 'আপনি যেমন আল্লাহর দোহাই দিয়েছেন,

তেমনি আল্লাহর দোহাই দিয়ে অন্য একজনের প্রার্থনাই আমাকে এই দাসত্বের পর্যায়ে পৌঁছিয়েছে। আমি কে সে কথা আপনাকে জানিয়ে দিচ্ছি। আমি খিজির। আমার নাম আপনি নিশ্চয়ই শুনে থাকবেন। একজন দাস নিজেকে মুক্ত করতে কিছু সাহায্য চেয়েছিল আমার কাছে। দেয়ার মতো একটি কপর্দকও তখন আমার কাছে ছিল না। তাই অক্ষমতা জানালাম। কিন্তু সেই নাছোড়বান্দা আমাকে আল্লাহর দোহাই দিয়ে পুনরায় মিনতি জানালো কিছু সাহায্যের জন্য। তখন আমি নিজেকে তার মালিকানায় সোপর্দ করি। অতঃপর সে আমাকে বাজারে বিক্রি করে। আমি আপনার অবগতির জন্য জানাচ্ছি যে, যে ব্যক্তির কাছে কোনো অসহায় ব্যক্তি আল্লাহর দোহাই দিয়ে কোনো সাহায্য চাইবে এবং সে দিতে সক্ষম হয়েও তাকে বঞ্চিত করবে, সে কেয়ামতের দিন অত্যন্ত জীর্ণশীর্ণ হাড়িডসার অবস্থায় উঠবে।

এ কথা শোনার পর মনিব বলল, ‘আমি আল্লাহর ও আপনার ওপর ঈমান এনেছি। হে আল্লাহর নবী না জেনে শুনে আপনাকে কষ্ট দেয়ায় আমি অনুতপ্ত।’ হযরত খিজির বললেন, ‘তাতে আপনার কোনো দোষ হয়নি। আপনি যা করেছেন সততার সাথে ও সুষ্ঠুভাবেই করেছেন।’ মনিব বলল, ‘হে আল্লাহর নবী! আপনি আমার সহায় সম্পদ ও পরিবার পরিজন সম্পর্কে যেমন ভালো মনে করেন, আদেশ দিলে আমি তদনুযায়ী কাজ করব, নচেত আপনি মুক্তি চাইলে মুক্ত করে দেব।’

হযরত খিজির বললেন, ‘আমার পত্যাশা এই যে, আমাকে মুক্তি দিন যাতে আমি নিজের আসল মনিব আল্লাহর ইবাদতে নিয়োজিত হতে পারি।’ অতঃপর লোকটি তাকে মুক্ত করে দিল। তখন হযরত খিজির বললেন, ‘মহান আল্লাহর শুকরিয়া আদায় করছি। যিনি আমাকে মানুষের গোলামীর বন্ধনে আবদ্ধ করার পর তা থেকে মুক্তি দিয়েছেন।’ (তাবরানী-তারগীব ও তারহীব)

**শিক্ষা :** উল্লিখিত কিসসাটি থেকে এই শিক্ষা পাওয়া যায় যে :

১. কোনো অধিনস্ত ব্যক্তি বেশভূষায় যত মামুলী ও নগণ্য মনে হোক না কেন, বয়সে প্রবীণ ও আচরণে ন্যায়পরায়ন হলে তার সাথে শ্রদ্ধাপূর্ণ আচরণ করতে হবে এবং তার দৈহিক খাটুনি যথাসম্ভব কমিয়ে দিতে হবে। ইসলামের ইতিহাসে এমন অজস্র দৃষ্টান্ত রয়েছে যে, জ্ঞানীগুণী ও চরিত্রবান ব্যক্তি দাস বংশোদ্ভূত বা স্বয়ং কোনো ক্রীতদাস হলেও তাকে সমাজ ও রাষ্ট্রে যথোপযুক্ত মর্যাদাপূর্ণ বা স্বয়ং কোনো ক্রীতদাস হলেও তাকে সমাজ ও রাষ্ট্রে

যথোপযুক্ত মর্যাদাপূর্ণ আসন দান করা হয়েছে। এ ধরনের ব্যক্তি খিলাফতে রাশেদার আমলে রাষ্ট্রের প্রধান বিচারপতি, সেনাপতি, মুফতি ও মুহাদ্দীস এবং ভারতে দিল্লীর শাহী মসনদেও আসীন হয়েছেন।

২. বিশেষত কোনো দুস্থ ব্যক্তি যদি আল্লাহর দোহাই দিয়ে কোনো সাহায্য প্রার্থনা করে, তাহলে তাকে কিছুতেই খালি হাতে ফিরিয়ে দেয়া উচিত নয়। কারণ তার আল্লাহর দোহাই দেয়ার অর্থ এও হতে পারে যে, সে নিজের অভাবের সত্যতা প্রমাণের জন্য আল্লাহর নামে শপথ করছে বা আল্লাহকে সাক্ষী হিসেবে পেশ করছে। কাজেই তাকে বঞ্চিত করার অর্থ হবে তার শপথকে অগ্রাহ্য বা অবমাননা করা। তবে যার কাছে প্রার্থনা করা হয়, সে ব্যক্তি স্বয়ং অভাবী বা অসমর্থ হলে সেটা অবশ্য স্বতন্ত্র কথা।

৩. মানুষ মূলতঃ একমাত্র আল্লাহর গোলাম বা দাস। কোনো মানুষের গোলামী- চাই তা ব্যক্তিগত বা সমষ্টিগত যেভাবেই হোক না কেন, তা তার জন্য এক শোচনীয় অভিশাপ ছাড়া আর কিছু নয়। তাই যে কোনো মানুষের গোলামী বা পরাধীনতা ঘূচানো ও তাকে স্বাধীন মানুষের মর্যাদা দানের জন্য সাধ্যমত সবকিছু করা ও সব রকমের ত্যাগ স্বীকার করা প্রত্যেক মানুষেরই কর্তব্য।

৪. নিয়োগকারীর যেমন কর্তব্য শ্রমিক ও কর্মচারীদের সাধের অতিরিক্ত কাজ করতে বাধ্য না করা, তেমনি শ্রমিক কর্মচারীদেরও উচিত কাজে ফাঁকি না দেয়া এবং যথাযথভাবে দায়িত্ব পালন করা। অধীনস্তদের ওপর ক্ষমতার অতিরিক্ত কাজ চাপানো যেমন গুনাহ, তেমনি বেতনভুক্ত কর্মচারীরা কাজে ফাঁকি দিয়ে বেতন ও পারিশ্রমিক গ্রহণ করলে তা হারাম ও অবৈধ উপার্জনে পরিণত হবে।

৫. পরোপকার ও জনসেবা চিরদিন আল্লাহর প্রিয় বান্দাগণ ও নবীগণের একটি মহান ব্রত। আলোচ্য ঘটনায় আল্লাহর নবী হযরত খিজির ক্রীতদাসের ছদ্মবেশ ধারণ করে একজন দাসকে মুক্ত করার যে অভিনব দৃষ্টান্ত স্থাপন করেছেন, তা প্রত্যেক মুসলমানের জন্য অনুকরণীয়। হযরত ঈসা, হযরত ইবরাহীম এবং হযরত মুহাম্মদ (সা.) সহ প্রায় সকল নবীর জীবনে আমরা এ ধরনের মহানুভবতার নজির দেখতে পাই। কিন্তু বড়ই পরিতাপের বিষয় এই যে, মুসলিম জাতির বিশেষতঃ সচ্ছল ও বিত্তশালী লোকদের মধ্যে এই শিক্ষার প্রভাব ক্রমশ লোপ পেতে চলেছে। ফলে দরিদ্র মুসলমানগণ সর্বত্র নিগৃহীত ও খ্রিস্টান ধর্মযাজকদের প্রলোভন ও প্রতারণার শিকার হচ্ছে।

## ৯২। শাদ্দাদের বেহেশতের কাহিনী

হযরত হুদ (আ.) এর আমলে শাদ্দাদ নামে একজন অতীব পরাক্রমশালী ঐশ্বর্যশালী মহারাজা ছিল। আল্লাহর হুকুমে হযরত হুদ (আ.) তার কাছে ইসলামের দাওয়াত পেশ করেন এবং দাওয়াত গ্রহণ করলে আখেরাতে বেহেশত লাভ অন্যথায় দোযখে যাওয়া অবধারিত বলে জানান। শাদ্দাদ হযরত হুদ (আ.) এর কাছে বেহেশত ও দোযখের বিস্তারিত বিবরণ জানতে চাইলে তিনি জানান। শাদ্দাদ তাকে বলল, তোমার আল্লাহর বেহেশত আমার প্রয়োজন নেই। বেহেশতের যে নিয়ামত ও সুখ-শান্তির বিবরণ তুমি দিলে, অমন বেহেশত আমি নিজে এই পৃথিবীতেই বানিয়ে নিব। তুমি দেখে নিও।

হযরত হুদ (আ.) তাকে হুশিয়ার করে দিলেন যে, আল্লাহ পরকালে যে বেহেশত তৈরী করে রেখেছেন, তোমার বানানো বেহেশত তার ধারে কাছেও যেতে পারবেনা। অধিকন্তু তুমি আল্লাহর সাথে পাল্লা দেয়ার জন্য অভিশপ্ত হবে। কিন্তু শাদ্দাদ কোন হুশিয়ারীর তোয়াক্কা করলো না। সে সত্যি সত্যিই দুনিয়ার উপর একটি সর্ব-সুখময় বেহেশত নির্মাণের পরিকল্পনা করল। তার ভাগ্নে জোহাক তাজী তখন পৃথিবীর অপর প্রান্তে এক বিশাল সম্রাজ্যের অধিকারী ছিল। অধিকন্তু পারস্যের সম্রাট জামশেদের সম্রাজ্য দখল করে সে প্রায় অর্ধেক দুনিয়ার প্রতাপশালী সম্রাটে পরিণত হয়েছিল। মহারাজা শাদ্দাদ সম্রাট জোহাক তাজী কে চিঠি লিখে তার বেহেশত নির্মাণের পরিকল্পনা জানালো। অতঃপর তাকে লিখলো যে, তোমার রাজ্যে যত স্বর্ণ-রৌপ্য, হিরা-জহরত ও মনি-মাণিক্য আছে, তা সব সংগ্রহ করে আমার দরবারে পাঠিয়ে দাও। আর মিশক-আম্বর জাতীয় সুগন্ধী দ্রব্য যত আছে, তা পাঠিয়ে দাও।

অন্যান্য রাজা-মহারাজাদের কাছেও সে একই ভাবে চিঠি লিখলো এবং বেহেশত নির্মাণের পরিকল্পনা জানিয়ে সবাইকে প্রয়োজনীয় নির্মাণ সামগ্রী পাঠানোর আদেশ জারী করলো। পৃথিবীর সকল অঞ্চলের অনুগত রাজা-মহারাজারা তার নির্দেশ অক্ষরে অক্ষরে পালন করল।

এবার বেহেশতের স্থান নির্বাচনের পালা। বেহেশত নির্মাণের উপযুক্ত স্থান খুঁজে বের করার জন্য শাদ্দাদ বহু সংখ্যক সরকারী কর্মচারী কে নিয়োগ করল। অবশেষে ইয়ামানের একটি শস্য শ্যামল অঞ্চলে প্রায় একশ চল্লিশ বর্গ মাইল এলাকার একটি জায়গা নির্বাচন করা হল।

বেহেশত নির্মাণের জন্য নির্মাণ সামগ্রী ছাড়াও বিভিন্ন দেশ থেকে বাছাই

করা দক্ষ মন্ত্রী আনা হল। প্রায় তিন হাজার সুদক্ষ কারিগরকে বেহেশত নির্মাণের জন্য নিয়োগ করা হল। নির্মাণ কাজ শুরু হয়ে গেলে শাদ্দাদ তার অধীনস্থ প্রজাদের জানিয়ে দিল, কারো নিকট কোন সোনা রূপা থাকলে সে যেন তা গোপন না করে এবং অবিলম্বে তা রাজ দরবারে পাঠিয়ে দেয়। এ ব্যাপারে তল্লাশী চালানোর জন্য হাজার হাজার কর্মচারী নিয়োগ করা হল। এই কর্মচারীরা কারো কাছে এক কণা পরিমাণ সোনা-রূপা পেলেও তা কেড়ে নিতে লাগল। এক বিধবার শিশু মেয়ের কাছে চার আনা পরিমাণ রূপার গহণা পেয়ে তাও তার কেড়ে নিল। মেয়েটি কেঁদে গড়াগড়ি দিতে লাগল। তা দেখে বিধবা আল্লাহর নিকট ফরিয়াদ জানাল যে, হে আল্লাহ— এই অত্যাচারী রাজা কে তুমি তার বেহেশত ভোগ করার সুযোগ দিও না। দুঃখিনী মজলুম বৃদ্ধার এই দোয়া সম্ভবত কবুল হয়ে গিয়েছিল।

ওদিকে মহারাজা শাদ্দাদের বেহেশত নির্মাণের কাজ ধুমধামের সাথে চলতে লাগল। বিশাল ডুখন্ডের চারদিকে চল্লিশ গজ জমি খনন করে মাটি ফেলে মর্মর পাথর দিয়ে বেহেশতের ভিত্তি নির্মাণ করা হল। তার উপর সোনা ও রূপার ইট দিয়ে নির্মিত হল প্রাচীর। প্রাচীরের উপর জমরুদ পাথরের ভীম ও বর্গার উপর লাল বর্ণের মূল্যবান আলমাছ পাথর ঢালাই করে প্রাসাদের ছাদ তৈরী হল। মূল প্রাসাদের ভিতরে সোনা ও রূপার কারুকার্য খচিত ইট দিয়ে বহু সংখ্যক ছোট ছোট দালান তৈরি করা হলো।

সেই বেহেশতের মাঝে মাঝে তৈরি করা হয়েছিল সোনা ও রূপার গাছ-গাছালি এবং সোনার ঘাট ও তীর বাধা পুস্করিণী ও নহর সমূহ। আর তার কোনটি দুধ, কোনটি মধু ও কোনটি শরাব দ্বারা ভর্তি করা হয়েছিল। বেহেশতের মাটির পরিবর্তে শোভা পেয়েছিল সুবাসিত মেশক ও আশ্বর এবং মূল্যবান পাথর দ্বারা তার মেঝে নির্মিত হয়েছিল। বেহেশতের প্রাঙ্গণ মনি মুক্তা দ্বারা ঢালাই করা হয়েছিল।

বর্ণিত আছে যে, এই বেহেশত নির্মাণ করতে প্রতিদিন অন্তত : চল্লিশ হাজার গাধার বোঝা পরিমাণ সোনা-রূপা নিঃশেষ হয়ে যেত। এইভাবে একাধারে তিনশ' বছর ধরে নির্মাণ কাজ সম্পন্ন হয়।

এরপর কারিগরগণ শাদ্দাদ কে জানাল যে, বেহেশত নির্মাণের কাজ শেষ হয়েছে। শাদ্দাদ খুশী হয়ে আদেশ দিল, এবার রাজ্যের সকল সুন্দর যুবক-যুবতী ও বালক-বালিকাকে বেহেশতে এনে জড়ো করা হোক। নির্দেশ যথাযথভাবে পালিত হলো।

অবশেষে একদিন শাদ্দাদ সপরিবারে বেহেশত অভিমুখে রওনা হলো।



তার অসংখ্য লোক-লস্কর বেহেশতের সামনের প্রান্তরে তাকে অভিবাদন জানাল। শাদ্দাদ অভিবাদন গ্রহণ করে বেহেশতের প্রধান দরজার কাছে গিয়ে উপনীত হল। দেখল, একজন অপরিচিত লোক বেহেশতের দরজায় দাঁড়িয়ে আছে। শাদ্দাদ তাকে জিজ্ঞেস করল, তুমি কে?

লোকটি বললেন : আমি মৃত্যুর ফেরেশতা আজরাঈল।

শাদ্দাদ বলল : তুমি এখন এখানে কি উদ্দেশ্য এসেছ?

আজরাঈল বললেন : আমার প্রতি নির্দেশ এসেছে তোমার জান কবজ করার।

শাদ্দাদ বলল : আমাকে একটু সময় দাও। আমি আমার তৈরী পরম সাধের বেহেশতে একটু প্রবেশ করি এবং এক নজর ঘুরে দেখি।

আজরাঈল বললেন : তোমাকে এক মুহূর্তও সময় দানের অনুমতি নেই।

শাদ্দাদ বলল : তাহলে অন্তত : আমাকে ঘোড়া থেকে নামতে দাও।

আজরাঈল বললেন : না, তুমি যে অবস্থায় আছ, সে অবস্থায়ই তোমার জান কবজ করা হবে।

শাদ্দাদ ঘোড়া থেকে এক পা নামিয়ে দিল। কিন্তু তা বেহেশতের চৌকাঠ স্পর্শ করতে পারলনা। এই অবস্থায় তার মৃত্যু ঘটল। তার বেহেশতের আশা চিরতরে নির্মূল হয়ে গেল।

ইতঃমধ্যে আল্লাহর নির্দেশে হযরত জিবরাঈল (আ.) এক প্রচণ্ড আওয়াজের মাধ্যমে শাদ্দাদের বেহেশত ও লোক-লস্কর সব ধ্বংস করে দিলেন। এভাবে শাদ্দাদের রাজত্ব চিরতরে নিশ্চিহ্ন হয়ে গেল।

বর্ণিত আছে যে, হযরত মুয়াবিয়ার (রা.) রাজত্বকালে আব্দুল্লাহ বিন কালব নামক এক ব্যক্তি ইয়ামানের একটি জায়গায় একটি মূল্যবান পাথর পেয়ে তা হযরত মুয়াবিয়ার (রা.) নিকট উপস্থাপন করেন।

সেখানে তখন কা'ব বিন আহবার উপস্থিত ছিলেন। তিনি উক্ত মূল্যবান রত্ন দেখে বললেন, এটি নিশ্চয় শাদ্দাদ নির্মিত বেহেশতের ধ্বংসাবশেষ। কেননা আমি রাসূল (সা.) কে বলতে শুনেছি যে, আমার উম্মতের মধ্যে আব্দুল্লাহ নামক এক ব্যক্তি শাদ্দাদ নির্মিত বেহেশতের স্থানে গিয়ে কিছু নিদর্শন দেখতে পাবে।

শিক্ষা : এই কাহিনীর সবচেয়ে বড় শিক্ষা এই যে, জুলুম-নির্যাতনের মাধ্যমে দখলকৃত সম্পদ অনেক সময় কাজে লাগেনা। আর মজলুমের দোয়া যে আল্লাহর কাছে কবুল হয়ে যায়, সে কথা একাধিক হাদীস থেকেও জানা যায় এবং এই ঘটনার মাধ্যমেও আরেকবার জানা গেল।

## ৯৩। হযরত ঈসা (আ.) এর উম্মতের এক দরবেশের কাহিনী

ইবনে ইসহাক হতে বর্ণিত আছে যে, হযরত ঈসা আলাইহিস সালামের আকাশে উত্থিত হওয়ার পর যখন তাঁর উম্মতের মধ্যে নানারকমের শিরক ও বিদয়াতের অনুপ্রবেশ ঘটতে থাকে, তখন যারা হযরত ঈসা (আ.) আনীত আল্লাহর সকল দ্বীনকে দৃঢ়ভাবে আঁকড়ে ধরেন এবং তার প্রচার চালাতে থাকেন, তাদের একটি দল এক সময়ে ইয়ামানের নাজরান প্রদেশে বসতি স্থাপন করেন। এই দলটির যিনি নেতা ছিলেন তাঁর নাম ছিল ফিমিউন। তিনি ছিলেন একজন অত্যন্ত সৎ, ন্যায়পরায়ন, দুনিয়ার স্বার্থত্যাগী ও কঠোর পরিশ্রমী এক ব্যক্তি। তাঁর দোয়া আল্লাহর কাছে কবুল হতো। প্রথমে তিনি দেশ থেকে দেশান্তর সফর করে আল্লাহর দ্বীন প্রচার করতেন এবং প্রধানত পল্লী অঞ্চলের মানুষের অতিথি হতেন। যে গ্রামেই তিনি পুণ্যবান ব্যক্তি হিসেবে পরিচিত হয়ে যেতেন সেখান থেকে অন্যত্র চলে যেতেন, যেখানে কেউ তাকে চেনে না। কেননা তিনি আশঙ্কা করতেন যে, ভক্তদের ভক্তি ও আতিথেয়তার বাড়াবাড়ি তাকে দুনিয়ার মোহে আচ্ছন্ন করে গোমরাহীর দিকে নিয়ে যেতে পারে। তিনি শুধু নিজের উপার্জন হতে খাওয়া দাওয়া করতেন। ঈসায়ী শরীয়াতের বিধান অনুযায়ী তিনি রবিবার কোন কাজ করতেন না এবং সেদিন একটি নির্জন এলাকায় গিয়ে সকাল থেকে সন্ধ্যা পর্যন্ত নামায ও ইবাদতে মশগুল থাকতেন। একবার সিরিয়ার একটি গ্রামে অবস্থানকালে তিনি গোপনে নামায পড়েন। কিন্তু একজন গ্রামবাসী তা দেখে ফেলে। তার নাম ছিল সালেহ। সে ফিমিউনকে এতো ভালোবেসে ফেলল যে, জীবনে সে আর কখনো কাউকে অতটা ভালোবাসেনি। ফিমিউন যেখানে যেতেন সে তার সাথে সেখানে যেত, কিন্তু ফিমিউন তা টের পেতেন না। একদিন রবিবার তিনি যথারীতি নির্জন জায়গায় গেলে তার অজান্তেই সালেহ তাঁর পিছু পিছু যায়। সালেহ অতি সংগোপনে অদূরে বসে তার কার্যকলাপ লক্ষ্য করতে লাগল। দেখলো ফিমিউন নামায পড়ছেন। নামায পড়ার সময় সহসা দেখল, তানীন নামক সাত শিংধারী একটা সাপ ফিমিউনের দিকে এগিয়ে যাচ্ছে। ফিমিউন সাপকে দেখে তার মৃত্যুর জন্য দোয়া করতেই সাপটি মারা পড়ল। সালেহ সাপকে তার দিকে এগুতে দেখেছিল, কিন্তু সে যে মারা গেছে, তা সে দেখতে পায়নি। সে ভয়ে চিৎকার করে বলল, 'ওহে ফিমিউন! তোমার দিকে সাপ এগিয়ে গেছে।' কিন্তু ফিমিউন তার চিৎকারে ক্রক্ষেপ করলেন না। তিনি নামায অব্যাহত রাখলেন এবং শেষ করলেন।

সন্ধ্যা ঘনিয়ে এলে তিনি চলে গেলেন। ফিমিউনের জানতে বাকি থাকল না যে, এখানে লোকজন তাকে চিনে ফেলেছে। আর সালেহও বুঝতে পারল যে, ফিমিউন তার উপস্থিতি টের পেয়ে গেছেন। সে তাঁকে বলল, ‘হে ফিমিউন! তুমি নিশ্চয়ই অবগত আছ যে, আমি আজ পর্যন্ত তোমার মতো কাউকে ভালোবাসিনি। আমি তোমার সাথে থাকতে চাই।’

ফিমিউন বললেন, “তোমার ইচ্ছাটা মন্দ নয়। কিন্তু আমার অবস্থা তো দেখতেই পাচ্ছ। তুমি যদি মনে কর, আমার সাথে টিকতে পারবে, তাহলে থাকো।” সালেহ তাঁর সহচর হয়ে গেল। গ্রামবাসী ফিমিউনের রহস্য প্রায় বুঝে ফেলার উপক্রম করেছিল। সে সময় কোনো ব্যক্তির হঠাৎ কোনো অসুখ-বিসুখ হলে বা দুর্ঘটনা ঘটলে ফিমিউন তার জন্য দোয়া করতেন এবং তৎক্ষণাত সে ভালো হয়ে যেত। কিন্তু কোনো বিপন্ন বা রুগ্ন ব্যক্তি তাকে ডাকলে তিনি যেতেন না। এক গ্রামবাসীর ছেলের অসুখ হলো। সে ফিমিউনের বিষয়ে খোঁজ খবর নিয়ে জানল যে, কারো বাড়ি তাকে ডাকা হলে তিনি যান না। তবে তিনি মজুরির বিনিময়ে মানুষের বাড়িঘর নির্মাণ করেন। লোকটি তার ছেলেকে নিজের কক্ষে রাখল এবং তাকে কাপড় দিয়ে ঢেকে দিল। তারপর সে ফিমিউনের কাছে গিয়ে বলল, ‘ওহে ফিমিউন! আমি নিজের বাড়িতে কিছু করতে চাই। তুমি আমার সাথে চল, কি কাজ করতে হবে তা দেখে আসবে।’ ফিমিউন তার সাথে গেলেন এবং তার কক্ষে প্রবেশ করলেন। তখন তিনি সেই গ্রামবাসীকে জিজ্ঞেস করলেন, আপনার এ ঘরে আপনি কি কাজ করতে চান? লোকটি কাজের বিবরণ দিয়ে বালকের ওপর থেকে চাদর সরিয়ে ফেলল এবং বলল, ‘হে ফিমিউন! এই যে আল্লাহর এক বান্দা অসুস্থ। তার ভালো হওয়ার জন্য দোয়া করুন।’ তিনি দোয়া করতেই বালক সম্পূর্ণ সুস্থ ও স্বাভাবিক হয়ে উঠে দাঁড়াল।

ফিমিউন বুঝলেন, এখানেও তিনি পরিচিত হয়ে গেছেন। তাই তিনি ঐ গ্রাম থেকে প্রস্থান করলেন। সালেহ তাঁর সাথে চলল। সিরিয়ার একটি অঞ্চল দিয়ে চলার সময় পার্শ্ববর্তী একটি প্রকাণ্ড গাছের ওপর থেকে এক ব্যক্তি ডাকল, ‘হে ফিমিউন!’ ফিমিউন ডাকে সাড়া দিলেন। সে বলল, আমি তোমার অপেক্ষায় রয়েছি এবং ভাবছি, কখন তুমি আসবে। সহসা তোমার আওয়াজ শুনে চিনলাম যে, তুমি এসেছ। তুমি যেও না। আমি এক্ষুণি মারা যাচ্ছি, তুমি আমার জানাযা পড়াবে। লোকটি সত্যিই মারা গেল। ফিমিউন তার জানাযা পড়ালেন এবং দাফন করলেন। তারপর আবার রওনা হলেন

এবং সালেহ তাকে অনুসরণ করল। এ সময় তারা আরব ভূখণ্ডের বেশ খানিকটা অতিক্রম করে ফেলেছেন। সহসা একটি আরব কাফেলা তাদের উভয়কে অপহরণ করে নিয়ে গিয়ে নাজরানে বিক্রি করল। নাজরানবাসী তখন বাদবাকি আরবদের মতো পৌত্তলিক। তারা তাদের সামনে অবস্থিত একটি দীর্ঘ খেজুর গাছের পূজা করত। প্রতি বছর তার কাছে মেলা বসত। মেলার সময় লোকেরা ঐ গাছকে সবচেয়ে সুন্দর কাপড় ও অলঙ্কারাদি উৎসর্গ করত। কাফেলাটি ঐ গাছের কাছে গেল এবং সেখানে একদিন অবস্থান করল।

নাজরানের জনৈক সম্ভ্রান্ত ব্যক্তি কাফেলার কাছ থেকে ফিমিউনকে এবং অপর একজন সালেহকে কিনে নিল। রাতে ফিমিউনকে তার মনিব যে ঘরে থাকতে দিত, তিনি সেখানে তাহাজ্জুদের নামায পড়তেন। তাঁর ঘরটি কোনো আলো ছাড়াই সারারাত আলোকিত থাকত। তাঁর মনিব এটা দেখতে পেয়ে বিস্মিত হলো। সে তাঁকে তাঁর ধর্ম কি জিজ্ঞেস করল। ফিমিউন তাকে তাঁর ধর্মের বিষয়ে অবহিত করলেন এবং বললেন, তোমরা গোমরাহীর ভেতরে লিগু আছ। এই খেজুর গাছ কারো ক্ষতি বা উপকার কিছুই করতে পারে না। আমি যে খোদার ইবাদত করি তাকে যদি আমি বলি এই গাছকে ধ্বংস করে দিন, তিনি অবশ্যই তাকে ধ্বংস করে দেবেন। তিনি আল্লাহ, তার কোনো শরীক নেই। তার মনিব বলল, বেশ তুমি গাছটাকে ধ্বংস করে দেখাও তো দেখি। এটা করতে পারলে আমরা সকলে তোমার ধর্ম গ্রহণ করব এবং আমাদের ধর্ম ত্যাগ করব। ফিমিউন ওজু করে দু'রাকাত নামায পড়ে আল্লাহর কাছে ঐ গাছটির ধ্বংসের জন্য দোয়া করলেন। আল্লাহ তৎক্ষণাত একটা ঝড় বইয়ে দিয়ে গাছটিকে সমূলে উৎপাটিত করে মাটিতে ফেলে দিলেন। তখন নাজরানবাসী তার ধর্মে দীক্ষিত হলো। তারা হযরত ঈসা (আ.) এর আসল ও অবিকৃত শরীয়তের অনুসারী হলো। এরপর নাজরানবাসীর ওপর এমন কিছু আপদ নেমে আসে, যা দুনিয়ার সর্বত্র সত্য স্বীনের অনুসারীদের ওপর নেমে থাকে। সেই থেকে নাজরানে ঈসায়ী ধর্মের অভ্যুদয় ঘটে।

**শিক্ষা :** এই ঘটনাটির সবচেয়ে গুরুত্বপূর্ণ শিক্ষা এই যে, ইসলাম প্রচারের কাজে লিগু ব্যক্তিদের সবসময় নিজস্ব স্বতন্ত্র জীবিকার ব্যবস্থা রাখা উচিত। যাতে জীবিকার ক্ষেত্রে আত্মনির্ভরশীল, লোভমুক্ত ও হালাল উপার্জনে ব্রতী থাকা যায়। আর সর্বাবস্থায় তাদের দাওয়াতের কাজ চালিয়ে যাওয়া ও তাকওয়া ভিত্তিক জীবন যাপন করা উচিত।

## ৯৪ । হযরত সোলায়মানের (আ.) ন্যায়বিচার

(ক) হযরত সোলায়মান (আ.) এর আমলে একদিন দুই মহিলা তাঁর দরবারে বিচারার্থী হয়ে এলো। এদের একজনের কোলে ছিল একটি শিশু। কিন্তু উভয় মহিলাই শিশুটি নিজের বলে দাবি জানাচ্ছিল।

হযরত সোলায়মান প্রথমে উভয়ের যুক্তি প্রমাণ আলাদা আলাদাভাবে শুনলেন। তারপর তিনি উভয়কে একটি সমঝোতায় উপনীত হওয়ার পরামর্শ দিলেন। কিন্তু তারা কিছুতেই সমঝোতায় আসতে রাজি হলো না। অগত্যা হযরত সোলায়মান এই মর্মে রায় দিলেন যে, তোমরা যখন কোনোমতেই আপোষ রক্ষা করতে রাজি নও, তখন এই শিশুকে আমি দ্বিখণ্ডিত করে উভয়কে সমান সমান অংশ দিয়ে দেব।

এ কথা শুনে এক মহিলা তো নীরব রইল। কিন্তু অপরজন চিৎকার করে কাঁদতে লাগল। সে বলল, 'দোহাই আল্লাহর! আপনি শিশুটিকে কাটবেন না। ওকে বরং ঐ মহিলার কোলেই দিয়ে দিন, ও বেঁচে থাকুক। আমি না হয় মাঝে মাঝে গিয়ে দেখে আসব।'

এ কথা শোনার পর হযরত সোলায়মানের আর বুঝতে বাকি থাকল না যে, শেষোক্ত মহিলাই শিশুটির আসল মা। তাই শিশুটি তিনি তাকেই দিলেন। (বুখারী)

শিক্ষা : একজন ন্যায়পরায়ন ও বিচক্ষণ শাসক বা বিচারককে শুধু শরীয়ত ও আইন জানলেই চলে না সেই সাথে মানুষের মনস্তত্ত্বও জানতে হয়। নচেৎ সুবিচার নিশ্চিত করা যায় না।

(খ) একবার দুই ব্যক্তি হযরত দাউদ (আ.)-এর নিকট উপস্থিত হলো তাদের একজন ছাগল-ভেড়া পালন এবং অপরজন কৃষি কাজ করে জীবিকা নির্বাহ করত। কৃষিজীবী লোকটি ছাগল-ভেড়া পালনকারীর বিরুদ্ধে নালিশ করল যে, সে নিজের একপাল ছাগল-ভেড়া ছেড়ে দিয়ে আমার ক্ষেতের সমস্ত ফসল খাইয়ে ফেলেছে। হযরত দাউদ (আ.) অভিযুক্ত ফসলের ক্ষয়ক্ষতির পরিমাণ নিরূপণ করলেন। অতঃপর যে ছাগল ভেড়াগুলো ফসল নষ্ট করেছে, সবগুলোর দামও জেনে নিলেন। তিনি যখন জানলেন যে, নষ্টকৃত ফসলের মূল্য নষ্টকারী ছাগল-ভেড়াগুলোর সমান, তখন তিনি ফসলের মালিককে ক্ষতিপূরণস্বরূপ ঐ ছাগল-ভেড়াগুলো দিয়ে দেয়ার নির্দেশ দিলেন। এরপর বাদী বিবাদী দরবার থেকে বেরিয়ে গেল।

যখন তারা দরজার বাইরে এলো, তখন হযরত সোলায়মানের সাথে

তাদের দেখা হলো। তিনি জানতে চাইলেন যে, তাদের মামলার বিচার কিভাবে হয়েছে। জবাবে তারা হযরত দাউদের রায় শুনিতে দিল। হযরত সোলায়মান তাদেরকে অপেক্ষা করতে বললেন এবং পিতা হযরত দাউদের কাছে গিয়ে বললেন যে, এই মামলার নিষ্পত্তির ব্যাপারে আমার একটা ভিন্ন মত ছিল। সেই মত গ্রহণ করলে উভয়পক্ষ উপকৃত হবে। হযরত দাউদ জিজ্ঞেস করলেন, সেটি কি? হযরত সোলায়মান বললেন, ছাগল ভেড়াগুলোকে ক্ষেতের মালিকের নিকট এবং ক্ষেতকে ছাগলের মালিকের নিকট অর্পণ করা হোক। যখন সে ছাগল ভেড়ার দুধ মাংস ইত্যাদি খেয়ে ক্ষতি পূরণ আদায় করে নেবে, তখন ছাগল ভেড়া ও জমি মূল মালিকের কাছে ফেরত যাবে। ইত্যবসরে ক্ষেতের ফসল আগের অবস্থায় ফিরে যাবে এবং ছাগলের মালিক উপার্জনের উপকরণ হাতছাড়া হয়ে যাওয়ায় অভাবে পড়বে না। কেননা জমি চাষ করে ফসল ফলিয়ে সে জীবিকা নির্বাহ করতে পারবে। হযরত দাউদ এই রায়টি মেনে নিলেন এবং নিজের রায় পাণ্টে ফেললেন।

**শিক্ষা :** অপরাধীকে শাস্তি দেয়ার পাশাপাশি তার কল্যাণের কথা চিন্তা করাও প্রত্যেক বিচারকের কর্তব্য। অপরাধীকে এমন শাস্তি দেওয়া উচিত নয় যাতে সে দেউলে হয়ে যায় এবং পুনরায় অপরাধে লিপ্ত হতে বাধ্য হয়।

## ৯৫। হযরত ইউনুস (আ.) এর কাহিনী

ইরাকের নিনোয়া নামক স্থানে হযরত ইউনুস (আ.) কে মানুষের হেদায়েতের জন্য পাঠানো হয়েছিল। তিনি তাদেরকে ঈমান আনয়ন ও নেক কাজ করার আহ্বান জানাতে থাকেন। কিন্তু তারা ক্রমাগত তার আহ্বানকে প্রত্যাখ্যান করতে থাকে। একপর্যায়ে তিনি তাদের প্রতি রুষ্ট হয়ে তাদের জনপদ ত্যাগ করে চলে যান। এতে তারা ঘাবড়ে যায় এবং এখনই আযাব এসে যাবে বলে আশঙ্কা করে। ফলে নবীর অনুপস্থিতিতেই তারা ঈমান আনয়ন করে এবং আযাব থেকে নিস্তার পায়। ওদিকে হযরত ইউনুস মনে করেছিলেন যে, এতক্ষণে আল্লাহর আযাব এসে তার জনগণকে হয়তো ধ্বংস করে দিয়েছে। কেননা কোনো নবী যখন তাঁর জনগণ কর্তৃক

প্রত্যাখ্যাত হয়ে হিজরত করেন, তখন সাধারণত ঐ জনপদের জন্য আযাব অনিবার্য হয়ে ওঠে। কিন্তু যখন তিনি জানতে পারলেন যে, তাদের ওপর কোনো আযাবই আসেনি এবং তারা ভালো আছে। তখন তিনি নিজেকে নিয়ে শংকিত হয়ে পড়লেন। কেননা প্রথমত তিনি ভাবলেন, তাঁর জাতির কাছে তিনি মিথ্যুক প্রতিপন্ন হয়ে গেছেন। এখন আর তারা তাঁকে বিশ্বাস করবে না অথবা তাকে হত্যা করে ফেলবে।

অগত্যা তিনি নিজ অঞ্চলে ফিরে আসার পরিবর্তে অন্য দেশে যাওয়ার জন্য রওনা হলেন। পশ্চিমদিকে একটা নদী পার হবার জন্য নৌকায় আরোহন করলেন। নৌকা এক দুর্ঘটনায় পতিত হয়ে ডুবে যেতে উদ্যত হলে মাঝি বলল যে, আরোহীদের মধ্য থেকে একজনকে পানিতে ফেলে দিতে হবে, তাহলে অন্যরা বেঁচে যাবে। এখন কাকে ফেলা হবে, সেটা স্থির করার জন্য আরোহীদের নামে লটারি করা হলো। এতে হযরত ইউনুসের নাম উঠল এবং তাকে নদীতে ফেলে দেয়া হলো।

আল্লাহ একটি মাছকে আদেশ দিলেন হযরত ইউনুসকে গিলে খেয়ে পেটে পুরে রাখতে। মাছের পেটে গিয়ে হযরত ইউনুস আত্মসমালোচনা করেন এবং নিজের ভুলের জন্য অনুতপ্ত হয়ে নিম্নরূপ দোয়া করেন : হে আল্লাহ! তুমি পবিত্র। তুমি ছাড়া আর কোনো ইলাহ নেই। আমি যুলুমকারীদের অন্তর্ভুক্ত হয়ে গেছি। অতঃপর আল্লাহ তাকে মুক্তি দেন এবং মাছটি তাকে একটি দ্বীপে গিয়ে উদগীরণ করে দেয়।

হযরত ইউনুস আল্লাহর নির্দেশক্রমে জাতিকে বলেছিলেন তোমরা ঈমান না আনলে তিন দিনের মধ্যে আযাব আসবে। সেই সময় অতিক্রান্ত হওয়ার পর তিনি আশঙ্কা করেন যে, তাদের ওপর আযাব এসে যাবে। এই মনে করে তিনি আযাব থেকে দূরে থাকার জন্য অন্যত্র চলে যান। কিন্তু তারপর তাদের ঈমান আনার কারণে আযাব না আসা সত্ত্বেও তিনি তাদের কাছে ফিরে আসেননি। তাদেরকে ছেড়ে যাওয়া এবং তাদের কিছু ফিরে না আসা- এই দুটো কাজই তিনি নিজ মতানুসারে করেন অথবা এর একটি নিজের মতে এবং অন্যটি আল্লাহর নির্দেশে করেন- সে ব্যাপারে মতভেদ রয়েছে। তবে যে কোনো একটি কাজ যে তিনি ওহির অপেক্ষা না করেই নিজের মতানুসারে করেছিলেন এবং সে জন্য আল্লাহ তাকে পানিতে ও পানি থেকে মাছের পেটে নিক্ষেপ করে মৃদু শিক্ষা দিয়েছিলেন, তাতে কোনো সন্দেহ নেই। ওহীর অনুপস্থিতিতে নিজের ইজতিহাদ তথা সুনিশ্চিত মত অনুসারে

কাজ করা কোনো নবীর পক্ষে কোনো গুনাহ নয়, তবে ধৈর্যধারণ করে ওহির নির্দেশের অপেক্ষা করাই সম্ভবত আল্লাহর দৃষ্টিতে উত্তম ছিল ।

শিক্ষা :

১. কোন ব্যাপারে শরীয়তের সুস্পষ্ট নির্দেশ থাকলে সে ব্যাপারে নিজস্ব বা অন্যের মত অনুসরণ করা কোন মুসলমানের জন্য বৈধ নয় । আর নির্দেশ নিজের অজানা থাকলে যারা অভিজ্ঞ, তাদের কাছ হতে জেনে নেওয়া এবং অপেক্ষা করা জরুরি ।

২. বিপদে পড়লে আল্লাহর কাছে ভুলক্রটি স্বীকার করে ক্ষমা চাওয়া ও মুক্তি চাওয়া যখন আল্লাহর নবীদের নীতি, তখন সাধারণ মুসলমানদের জন্য তা আরো বেশি কর্তব্য ।

## ৯৬ । উয়াইস কারনীর ঘটনা

হযরত আছীর বিন আমর থেকে বর্ণিত আছে যে, হযরত ওমরের কাছে যখনই ইয়ামানের মুসলিম বীর মুজাহিদরা আসতো, তখন তাদের কাছে জিজ্ঞেস করতেন, তোমাদের মধ্যে উয়াইস বিন আমের কারনী নামে কেউ আছে নাকি? এভাবে খোঁজ-খবর নিতে এক সময় তিনি তাকে পেলেন ।

অতঃপর বললেন, আপনিই কি উয়াইস বিন আমের?

উয়াইস বললেন, হ্যাঁ ।

হযরত ওমর : আপনার বাড়ি কি ইয়ামানের কারণ নামক স্থানে?

উয়াইস : জি ।

হযরত ওমর : আপনার গায়ে কি কুষ্ঠ রোগ হয়েছিল এবং এক দিরহাম পরিমাণ জায়গা বাদে তার সবটাই কি এখন সেরে গেছে?

উয়াইস : জি ।

হযরত ওমর : আপনার কি মা আছেন?

উয়াইস : হ্যাঁ ।

হযরত ওমর : ‘আমি রাসূলুল্লাহ (সা.) কে বলতে শুনেছি যে, ইয়ামানের বীর মুজাহিদদের সাথে উয়াইস বিন আমের নামক এক ব্যক্তি তোমাদের কাছে আসবে । তার বাড়ি ইয়ামানের কারণে । তার কুষ্ঠ রোগ ছিল । এক দিরহাম জায়গা বাদে তা সেরে যাবে । তার এক মা থাকবে এবং সে এত মাতৃভক্ত হবে যে, মার দোহাই দিয়ে সে আল্লাহর কাছে কিছু চাইলে আল্লাহ



তাকে তা দেবেন । সম্ভব হলে তার কাছে গিয়ে আল্লাহর কাছে গুনাহ মাফের আবেদন জানাতে অনুরোধ করো ।' অতএব, হে উয়াইস । আমার জন্য ক্ষমা প্রার্থনা করুন । উয়াইস তার জন্য ক্ষমা প্রার্থনা করলেন ।

হযরত ওমর : আপনি কোথায় চলেছেন?

উয়াইস : কুফায় ।

হযরত ওমর : আমি কি কুফার শাসকের কাছে আপনার যত্ন নেয়ার জন্য একটা চিঠি লিখে দেব?

উয়াইস : না, সাধারণ মানুষের কাছে থাকতেই আমি ভালোবাসি ।

এরপর কুফাবাসীরা যখনই হজ্জ করতে মক্কা ও মদীনায় আসতো, তখনই হযরত ওমর তাদের কাছে উয়াইসের খোঁজ খবর নিতেন এবং তাঁর সম্পর্কে রাসূল (সা.) এর উক্তি সবাইকে বলতেন । তারপর দলে দলে লোকেরা উয়াইসের কাছে যেতো এবং গুনাহ মাফের দোয়া চাইতো ।

অপর রেওয়াজে আছে, হযরত ওমর (রা.) বলেন, রাসূল (সা.) উয়াইসকে শ্রেষ্ঠ তাবেয়ী বলেছেন । রাসূল (সা.) এর জীবদ্দশায় ঈমান আনা সত্ত্বেও উয়াইস নিজের কুষ্ঠ রোগ ও পঙ্গু মায়ের সেবা-শুশ্রূষার কারণে রাসূল (সা.) এর সাথে দেখা করতে ও সাহাবীর মর্যাদা লাভ করতে পারেননি । কিন্তু আল্লাহ তাঁকে শ্রেষ্ঠ তাবেয়ীর মর্যাদাই শুধু দেননি, সাহাবীদেরকেও তাঁর কাছে গুনাহ মাফের জন্য দোয়া চাইবার উপদেশে দিয়েছেন । কথিত আছে যে, উয়াইস ওহুদ যুদ্ধে রাসূল (সা.) এর দাঁত ভেঙ্গে যাওয়ার খবর শুনে প্রচণ্ড আবেগে বেসামাল হয়ে গিয়ে নিজের কয়েকটি দাঁত পাথর দিয়ে আঘাত করে ভেঙ্গে ফেলেছিলেন ।

**শিক্ষা :** ইসলামের যথার্থ অনুসারী ও গুভাকাজক্ষী হলে সাহাবী না হয়েও মানুষ উচ্চ মর্যাদা লাভ করতে ও আল্লাহর প্রিয় হতে পারে । বিশেষত : পিতামাতার সেবা যে মানুষকে কত উর্ধ্ব তুলে দিতে পারে তা এ ঘটনা থেকে সুস্পষ্ট হয়ে যায় ।

সমাপ্ত

## লেখক পরিচিতি

লেখক ও অনুবাদক হিসেবে সুপরিচিত হাফেজ মাওলানা আকরাম ফারুক। কখনও কুরআন হাদীসের কিস্বা-কাহিনী তার কলমে ফুটিয়ে তুলেছেন সহজবোধ্য, প্রাজ্ঞ ভাষায়, কখনওবা আরবি, উর্দু ভাষার বইগুলোকে তার চমৎকার অনুবাদের মাধ্যমে পৌঁছে দিয়েছেন লাখো লাখো পাঠকের হৃদয়ে।

১৯৪৭ সালের ২৮ মার্চ বাগেরহাট জেলার মোল্লাহাট থানার গাড়ফা নামক গ্রামে জন্ম গ্রহণ করেন লেখক। তাঁর পিতার নাম মৌলভী মোহাম্মদ নূহ মিয়া। তিনি মাওলানা শামসুল হক ফরিদপুরী প্রতিষ্ঠিত গওহরডাঙ্গা দারুল খাদেমুল ইসলাম মাদ্রাসা থেকে কৃতিত্বের সাথে হাফেযে কুরআন ও দারসে নিযামী শেষ করেন। পরবর্তীতে দাখিল ও আলিমে বোর্ড মেধা তালিকায় স্থান করে নেন এবং ঢাকা বিশ্ববিদ্যালয় থেকে আরবীতে এম.এ ডিগ্রী লাভ করেন।

কর্মজীবনে ঢাকাস্থ সৌদী দূতাবাসের প্রথম আরবি অনুবাদক এবং থাইল্যান্ড, মালয়েশিয়া ও লিবিয়ায় মুবাচ্ছিগের দায়িত্ব পালন করেন।

তাছাড়া তিনি একজন মেধাবী সাংবাদিক হিসেবে দৈনিক জনপদ, সাপ্তাহিক জাহানে নও (অধুনালুপ্ত) ও সোনার বাংলা পত্রিকার সহকারী সম্পাদকের দায়িত্ব পালন করেছেন।

লেখা ও অনুবাদের কাজে ছাত্রজীবন থেকেই তার প্রচলিত আগ্রহ ছিল। সেই সূত্র ধরেই মাওলানা সাইয়্যেদ আবুল আলা মওদুদী রচিত কালজয়ী গ্রন্থ 'আল জিহাদ' বইটি দিয়ে অনুবাদ জগতে তিনি পা রাখেন। পরবর্তীতে মিশরের শহীদ সাইয়্যেদ কুতুব প্রণীত 'ফি যিলালিল কুরআন, ইমাম আযযাহাবীর কিতাবুল কাবায়ের (কবীরা গুনাহ), সীরাতু ইবনে হিশাম, মানবতার বন্ধু মুহাম্মদ (সা.), ইসলাম ও পাশ্চাত্য সভ্যতায় নারী, নারী অধিকার বিদ্রোহ ও ইসলাম, রাহে আমল (১,২), মুসনাদে আহমদ (১-৩), আত্ তারগীব ওয়াত তারহীব, ইসলাম প্রচারের হৃদয়গ্রাহী পদ্ধতি, ইসলামী দাওয়াত ও তার দাবি, ফিকহুস সুন্নাহ (১-৩), এর মতো অসংখ্য ব্যাপক তাৎপর্যমন্ডিত বই অনুবাদ করেন। তন্মধ্যে ২০০১ সালে মানবতার বন্ধু মুহাম্মদ (সা.) বইয়ের অনুবাদের জন্য জাতীয় সীরাত কমিটি কর্তৃক শ্রেষ্ঠ অনুবাদকের খেতাবে ভূষিত হন। তার মৌলিক রচনার মধ্যে হাদীসের কিস্বা, মহানবীর নৈতিক বিপ্লব, ইমাম হোসাইনের শাহাদাত, উজ্জীবিত ঈমানের ইতিকথা, রমজানুল মোবারক উল্লেখযোগ্য। এছাড়া তার মৌলিক কিছুই বই অপ্রকাশিত অবস্থায় রয়েছে। বিভিন্ন সময় মাসিক পৃথিবী ও অন্যান্য পত্রিকায় তার বিভিন্ন লেখা তাকে ইসলামী সাহিত্য জগতে করেছে আরো সুপরিচিত। সর্বশেষ তিনি মরক্কো দূতাবাসে কর্মরত ছিলেন। ২০১০ সালের ১মে তিনি মহান রাক্বুল আলামীনের সান্নিধ্যে চলে যান।

মহান আল্লাহ তার রুহের মাগফেরাত দান করে তাকে জান্নাতবাসী করুন।



সৃজনশীল বই প্রকাশক ও বিক্রেতা

**প্রত্যয় প্রকাশনী**

বড় মগবাজার, ঢাকা-১২১৭